

國學基  
本叢書

書  
十一

舊



國家圖書館典藏  
由國家圖書館數位化



書叢本基學國

書 明

(一十)

纂鱗維傅



行發館書印務商

626.01  
7567  
11  
明書卷一百四十二

列傳八

隱逸傳

史官論曰。夫君子之道。或出或處。或默或語。夫通塞殊方。要歸一致。亦云性分所樂而已。顏氏子操瓢與箪。曾參歌聲出金石。豈必借適魚鳥。放情林草哉。負道而處。充然有以自樂。不以萬物取舍動其心。故形槁而神無惡。終身安焉。而不知外之可慕也。若疵暴以激其餓。愁祿以焚其身。以隱成義。光範足垂。至後世散髮林間。箕踞轟飲。愆禮敗俗。或身江湖而心魏闕。指終南爲仕宦捷徑。此作者所嗤。豈哲人語默之道乎。故曰。心隱爲上。身隱次之。茲獨取國初諸人。以其潔身自完。附於賞井丹之義。而所關者鉅矣。至太宗即位後。忠義之士。多遜荒野。蹤跡詭秘。時露形塵。市間不可究。其人總謂之逸。亦法孔子以夷齊爲逸民意也。故並列是篇。若夫遭世承平。耕漁岸傲。此乃自棄明時者矣。奚足取哉。

嚴明德。吳人。洪武拜左僉都御史。掌院事。以疾求歸。上怒。謫戍南丹。刺字於面。後遇赦還。居於蘇州之樂橋。布衣徒步如齊民。人不知也。宣德末年猶存。有西軍以調征過吳。暴苦民家。亦入明德室中。閔明德奮手毆之。西軍訟於御史李穎立。逮至官。穎坐堂上。明德詭陳云。老子亦曾在臺。句當公事。夫豈不曉三尺。



而悍若此。是軍暴也。穎問何年在臺。明德曰：老子於洪武時曾爲臺長。今都察院堂榜所稱嚴德明是也。穎大驚。急持起。延入後堂。問舊事。歷歷道之。歡洽竟日。次日往訪。則已先期擔一囊走遠村。徒空居兩三間。無可覓矣。久之復歸樂橋。同鄉御史繆讓延教授李綺飲。倩明德陪。明德時貧甚。頭戴小帽。已敝。用雜布補綴。綺易之。問曰：老人家犯何法。而刺四字。明德因述前事。綺大驚。拜請罪。因避下坐。明德曰：先時國法嚴。仕者多不得保首領。余固不食之。碩果也。此破帽豈易戴哉。因北而拱手。稱曰：聖恩。聖恩。人漸知之。有所餽遺。皆不受。以疾卒。年九十餘。而視聽不衰。人皆服其隱德云。

唐桂芳字仲實歙人。少時博涉經史。穎悟絕人。益遊學。廣所聞見。客金陵。以聘主明道書院。再聘司訓于昇。一時名碩皆重之。商榷詩文。莫不心服。後至句容杜叔良家。以薦爲崇安教諭。再爲南雄路學正。未上。居艱。斬黃盜起。挈家避亂。陳友諒留真軍中。一夕脫去。戊戌太祖下歙。訪問耆儒。僉院鄧愈以朱升姚瑩及桂芳薦。召見。上問曰：喪亂以來。民心望治。吾深知對曰：自大軍去後。民獲所歸。又問曰：鄧愈築城怨乎。曰：頗怨。上曰：必愈所爲。迫促以失人心。卽命罷之。又問聞爾博通。必諳成敗。若漢高祖。唐太宗。宋太祖。元世祖。此數君者。一天下。其道何如。對曰：此數君者。皆以不嗜殺人。故能定天下。於一主公。聖明神武。兼數君之長。驅除禍亂。未嘗妄殺。出民膏火。措於衽席之上。開創之功。超於前代。然以今日觀之。民雖得所歸。而未遂生息。上是之。曰：我積少而費多。所給於民。甚非得已。然皆以爲軍需。無一毫奉己。民之勞苦。恆思所以休養之。曷敢忘。頓首曰：誠如是。民生息可立待矣。上曰：有不便者。盡盡言之。皆拜謝。賜布帛。鄧愈聘

掌儒學事。秋祀三獻未終。知府魏均祥飲福受胙。而悍卒遽攫其肉以出。桂芳惡其瀆法。盤禮立殿階上。朗讀糾劾之文。左右莫不震攝。爲桂芳危。而愈尤加敬焉。遂辭歸。授徒爲終老計。學者稱白雲先生。無何。駙馬都尉王克恭。太守魏均祥。俾攝紫陽書院山長。院有二穹碑。宋理宗賜紫陽書院四大字。皆頽墮。桂芳爲堅護之。後疾革。自作贊曰。兩袖清風。千里白雲。蕭然而逝。年七十三。桂芳長身美髯。雙瞳如漆。而如紅玉。氣豪邁。老而彌壯。對客議論風生。莫不傾聽。澹於利欲。與人交洞見肺腑。孝友特至。若居他郡邑。遇父母生辰節令。必刻期而歸。文章以氣爲主。辭嚴理正。詩清新流麗。而聲調格律。鏗鏘瀏亮。有武彘藁白雲集四十卷。

梁寅。字孟敬。新喻人。家貧力學。徧通六經。累舉鄉不第。棄去。遊金陵錢塘間。一時名士多願與交。聘爲集慶路訓導。居二歲辭歸。會兵起。隱居教授。及太祖定天下。訪徵已六十餘矣。時以禮律制誥分三局。寅於禮局討論精審。諸儒皆推服。書成。賜金帛。授以官。以老病辭。許之歸。居石門山。四方士多從學。稱爲梁五經。或問曰。吾輩免亂離之禍。享太平之福。何以祝吾君。公舉手加額曰。願吾君恭己九重。存心四海。擴天理而遏人欲。進君子而退小人。愈於華封三祝矣。新昌有士人。負氣自豪。筮仕得巖邑。比行。來謁請教。應曰。清慎勤。乃居官三字符也。子力行之得矣。復何言。士子意未滿。請天德王道之要。微笑曰。言忠信。行敬篤。天德也不傷財。不害民。王道也。其人退。語人曰。孟敬議論平平耳。越三年。以不檢罷官歸。慚且歎曰。吾不敢見石門先生。卒年八十二。著有周易參義。詩書演義。周禮考注。春秋考義。及漢唐以來君臣事略。

宋元史節要及石門集於世。

吳海字朝宗號魯齋閩人元末以學行著稱會時大亂遂絕意仕進深自韜匿間與人說經廣詩一時名人如貢師秦輩皆雅重之明初部使者薦於朝力辭不就闢一室於家園隙地日酣經史自娛適因探摭古人孝順節烈及友愛之事附以感應禍福各爲一卷以傳布巷閭令人誦習之名曰本命錄謂克培其本則司命者皆無權也又著書論楊墨佛老爲六經之賊管商申韓爲治道之賊遺事外傳爲史氏之賊支詞蔓說爲文章之賊上之人亟宜取其書禁絕之使天下曉然知正道之當趨歧徑之當塞名曰書禍平居虛心樂讜言或有因事規正者欣然立改因扁其齋曰聞過常慕鄙魯士風淳厚欲徒居不果因以魯齋自號志所願學也爲文嚴整雅奧咸有矩程而一歸諸理有聞過齋集行於世

黎貞字彥晦新會人性坦蕩不羈以酒自放故號陶陶生晚更號秫坡少岐嶷異羣兒七八歲時與弟浴於塘弟溺塘井中雙足猶漾漾未沒貞亟投水以手捉其足登淺處鄉閭異之曰此可持輒破甃者五羊孫賁有美才爲文章立就不以死生榮辱得失介意貞從之遊故學所成就非一時流輩可及發爲詩文滔滔寫自胸中無斧鑿痕議論古今治亂興廢與世運汗隆人物賢否數出己意而多得之自然洪武初以學行聘署新會訓導辭去築釣魚臺於居室前自擬嚴子陵後以事受譴戍遼東者十八年艱危困阨中益肆力學問識趣愈高會赦歸聲聞益著從者甚衆諄諄善誘隨淺深有所造就嘗自贊其像曰江湖勝覽渤海浪游飄飄一葉浩蕩沈浮惟酒是務陶陶忘憂嘗彼力穡乃亦有秋不知老之將至樂夫天命

死卽休。年五十九卒。所著穉坡集古今一覽家禮舉要。行於世。初貞在遼。孫賁以事見僂。貞抱持其尸。以衣裹之。殯殮如葬安山之陽。爲文祭之。讀者莫不比淚。自遼歸。適已薄暮。明月滿空。呼舟中餘酒。登所築釣臺吟嘯。人疑以爲僂。久之乃扣門還家。其胸次脫落皆類此。

李詞。字孟言。錢塘人。少受學於楊鐵崖。負氣尙節。善爲詩。賣藥金陵。名其室曰樗亭。而自號爲樗散生。市人病者。趨其門買藥。無不與。所與必善。人人談樗散生。美不置口。或問樗散生。今人莫不願爲材。有寸誇尺。有尺誇尋。惟恐人不知己。才不卽用。旣用又恐不得大任以爲戚。今生乃以樗散自名。樗。不才木也。生豈無才者耶。何其嗜好與人不同也。詞曰。吾計之熟矣。名之美者。吾豈不欲居。然苟無實以稱之。則名祇足爲禍。吾苟自以爲可用。彼將以有用者求我。我或不足如其所求。則爲妄人矣。吾今自以爲樗。彼亦從而樗我。不虞我足用。而我足用。固存。捐於我乎。世之受禍深者。求名太切也。夫名虛器。得之未必有益於身。而與我競者。齟齬然欲奪之。不亦危乎。吾是以安焉。而不敢務乎名也。且吾之食者醫。醫之書有至理。醫之技足公普。吾誠盡吾心焉。疑於心者。不敢強施於人。薄於用者。不敢厚責其報。雖有不中。庶可以無愧矣。我誠肯自負吾才。而享釜庾之祿。豈皆不若乎人。然吏胥操法而迫吾側。民庶持牒而謁吾前。吾心欲平之。而力不暇。欲施吾才。而勢有不能。則吾心之愧。無時而釋矣。豈若守一技。居無用之名。以自適哉。於是問者謝之。咸稱樗散生爲知道者。

陶宗儀。字九成。黃巖人。宗儀冲襟粹質。洒然不凡。少舉進士不第。棄去。好古學。無所不窺。出遊浙東西。師

張嘉、朱喜、李孝光、杜本間等，肆力文章，其結撰法度過人，尤刻志字學。工舅氏集賢學士趙雍家，甚貧，抵華亭教授，遇人無夷險，倭直一接以誠。平居寡言笑，至論古今人物，上下數千年，竟日不倦。至正間，浙師秦不華南臺御史，一時文士依以周旋者甚盛，議署諸獨不往。洪武辛亥，詔取天下士，癸丑命守令舉人才，推上皆以病不就，或諂讓之，歎曰：親不逮養，捧檄祇令人悲。況今賢良輩出，草莽之臣老死太平，幸矣。隄分之榮，其敢觀乎？藝圃一區，果蔬度足給賓客祭享，餘悉種菊，栽接溉壅，皆身自爲之。間遇勝日，引觴獨酌，歌所自爲詩，撫掌大噓，人莫測也。崎嶇亂離幾二十年，喪葬祭禮備盡其力。人以孝稱，晚益閉門著書，世所共傳說。郭一百卷，懷耕錄三十卷，書史會要九卷，四書備遺二卷，弟宗傳，代縣令，宗儒，文選郎中。

王景，關中人，少時牧牛，每竊入學舍聽諸生讀書，輒默記。漸學問充足，父母亦不知也。少多放言，嘗入終南山，數月不出，採薇蕨食，探古洞深巖，流連不歸。其家尋之，固求歸，乃出。後父卒，遂日侍其母，不出遊，朝夕盡心力。家貧，出教授以養母，每過市中，以白牛駕母車，自被古服冠御，鄉里小兒競遮道訕笑，景亦笑。有欲薦之爲府史者，罵曰：若我者，肯朝夕抱案立庭下，備奴使哉？每居小樓上，客至，僮入報命之，登乃登。部使者行郡，坐馬上求見，拒之去。去不百武，倚樓長嘯，使者聞之，慚，扁舟入吳，楚歷覽名山大川，或遇奇才俠客，談古豪傑事，卽呼酒共飲，慷慨悲吟，人皆異之。北遊燕都，去曰：此中狐兔遊矣。人以爲狂，旣歸，家居種桃數百株，桔茆其間，當天大雪，獨上華嶽最高處，四顧大呼，爲歌響，振遠近，景貌豐偉，美鬚髯，嘗藏

大帽穿曳地衣。翩翩而行。兩袂軒翥。譁笑溢市中。著書立說。出人意外。每對人縱天下之務。旁若無人。目之爲王景略復生也。間發爲繪事。有殊致。每當風月佳時。操觚賦詩。千百言。多怪語。人不可解。皆鸚鵡海怒。讀旣毛髮爲聳。客至不爲賓主禮。高論竟日不倦。食至輒食。都不辭謝。洪武中徵聘不起。入山不知所終。

徐舫。字方舟。桐廬人。幼有俠氣。好馳馬試劍。兼攻毬鞠之戲。不屑視拘拘法度士。稍長。幡然悔曰。此豈君子道哉。卽從師受章句。爲進士業。爛然成章。已而又悔曰。是如蠹書蟬出入故紙中。何有終期。人生貴適意。習古歌詩。吟咏性情。庶幾少遂其願耳。先是陸多詩人。唐有皇甫湜。方干。徐凝。李頰。施肩吾。宋有高師魯。滕元秀。世號爲睦州詩。舫悉取諷詠。期於超邁。出遊江漢淮浙間。與名士相摩切。詩道益昌。江浙行省參政蘇天爵聞其賢。欲薦之。避去。築室江皋。日苦吟。愴然若與世隔。因自號曰滄江散人。天大雪。乃泛舟釣江中。終日戀戀。見者疑其非世間人。元季兵亂。益婚閉不出。易隱者服。人莫知其蹤跡。庚子夏。太祖聘宋劉葉章諸人於金華。舟泝桐江。而西。舫戴黃冠。服白鹿皮裘。青繩綰腰。立於江濱。貌偉神竦。掛劉而笑。且以語侵之。急入舟中。葉章競來。謹誼。各取冠服服之。欲載解纜。舫不可。宋原不相識。問於劉得之。故聞其名。亦起鼓譟爲譴。酌酒而別。劉妬舫以隱。故自高。數言於太祖。招致之。愈自匿。不可得。卒年六十八。有瑤林江二集。唐詩通考。舫平居喜怒不形於色。罔測涯際。性尙氣義。宛陵羅氏。率五百指來避兵。衣且食之。藥病痊死。居久之勿懈。事平。具巨舟載還家。卒後。宋爲立傳。而題曰詩人滄江徐方舟之墓。子膺亦有



文名。

倪瓚字元鎮。無錫人。父柄勤治生。雄於資。生瓚俊爽。稍長。強學好修。性雅潔。敦行孝弟。輕財。田廬生產。託子弟。各有程度。師事墓昌王仁輔。王老無子。養終其身。見義則爲。於宗族故舊。煦煦有恩。喜周人急。神情朗朗。如秋月之瑩。刮磨豪習。談辯絕人。好客之名。聞於四方。所居清閨閣。幽迥絕塵。藏書甚富。悉手所校。定率多成誦。鼎彝名琴。陳列左右。巧於位置。松桂竹梧之屬。敷紆繚繞。而其外則高木修篁。蔚然深秀。故自號曰雲林。每雨止風收。杖履自隨。逍遙容與。詠歌以娛。望之者識其爲世外人。客至。輒笑語留連。竟夕。平生無他好。惟嗜蓄古法書名畫。持以售者。歸其直。累百金。無所靳。雅趣吟興。每發揮於縑素間。蒼勁妍潤。尤得清致。而絕不作人物。謂世可謂無人也。奉幣贊求之者。無虛日。張士誠欲釣致之。逃漁舟。以免。選者遇之。微聞飄香。曰。此必倪處士也。跡得之。將縛以獻。以計給逸去。同時有張介福。亦力拒不應。聘人並高之。晚益務恬退。棄散無所積。屏慮釋累。黃冠野服。浮游湖山間。丰采愈高。足跡不涉貴人之門。與世浮沈。恥於街暴。清而不汙。混迹編氓。沈晦免禍。介特之操。皦然不渝。年既老。益聰明。飲啖步履。不異壯時。氣貌充然。詩尙古雅。理致沖澹。所著有雲林集。洪武甲寅疾卒。年七十四。

王元吉字國祥。金陵人。幼奇偉。喜兵家書。年十四。桀然凌等輩。出其上。歲饑。與兄行糴旁縣。道遇盜。將劫之。兄懼走匿。獨不爲動。徐給罵曰。庸縣官使吾運粟。許遣夫防我。而不至。若豈防夫耶。後有粟車數十輛。可善防之。不使失事。盜以爲然。散去。福壽金陵盜陳也。先潘甲自稱元帥。聲言討賊。索軍食城下。大言舉。

火殺人守將閉門伏不出壽問計對曰此難與爭鋒盜有兩元帥公宜開城門陳芻粟車若將饋之者而陽以好言給之請一元帥以卒來取兩人必相讓則主者當自來吾以計殺之而制彼一人易矣從其言潘甲果至執殺也先失勢亦自敗去絕不以語人又去而之燕秦齊魯之間陰察諸藩知不足與言復歸太祖已都金陵鄉閭子弟多致大官因歎曰主在吾鄉不之識而棲棲求之天下吾之命薄明矣多談何爲因噤不更及世事隱醫肆中自給務爲訥樸事父孝謹事兄友愛卒以布衣終爲人敦夙誼知好尙當世名士多喜與交父喪致賻千餘人

王顯字微仲號溪漁子元吉從子也少脫略不與羣兒嬉遊輒處其上什伍部署之無敢違者父素長者禁切使讀書時時棄去不肯帖帖諸生間所業未久卽過諸生數倍其師奇之謝曰子非吾曹人也顯亦自雄其才志嘗往來江淮結交大俠論古人功業遇當其意徘徊數息仰天撫體若有意於從之遊也與天台林右張穀最善右亦豪士善擊劍多智長於爲文穀雄飲自放於歌詩二人自皆負高一世顯在淮上嘗釣海濱望見二人踞坐大笑二人者知其非庸人也卽與之語大驚異引歸逆旅出酒相飲攝衣跣行起舞爲樂驢聲撼動辨難上下古今事識者知非狂生或不識則共矚指笑之爲真狂或又疑其爲神仙人云遇適意時鮮衣怒馬行衆人中見者爭觀之否則被污垢短衣躡市人後市人呼之弗辭也後盡悔故所爲買書鍵戶讀之好深湛之思爲文章奇偉伉健然恥以自名常曰漢儒者惟賈生諸葛孔明耳唐陸贄粗有識然不足望王道所貴乎學將以輔天地所不及不然多讀書何爲聞者以其論高愈疑之



終莫能測其爲何如士也。入明不應薦辟，終其身。

陳洞，烏傷人，號竹溪逸民。幼經長誦，百家言、文筆蔚茂，喜馳騁聲聞，意功名可唾手致。忽曰：人生百歲，能幾旦暮，所難遂者適意耳。乃戴青霞冠，披白鹿裘，不復與塵事接。所居近大溪，篔簹竹、脩篁然。當月高風靜時，洞輒攜短簫，乘小舫，蕩漾空明中，簫聲挾灑氣爲豪，直入無際，宛轉若龍鳴。鳴簫已，每叩舷而歌。人見之曰：是誠世外人也。欲見且不可得。况狎而近之乎？識者則曰：是有志當世，生非其時，有託而自放也。性喜菊，種之滿園。黃花一開，獨引觴對酌，日入不倦。人或譏其留物，怒曰：舉世無知我，知我惟此花耳。一息自怡，尙可謂滯於物耶？復愛梅，梅初萼，嘗赤腳踏深雪若溫，見輒凝視，或登白鶴山，往數日不出。洞年五十，益恬泊無所繫，間私謂其友曰：吾於世味益孤矣。其友疑其誕，人以其有類於古隱者，相與傳其事。林清，閩人，不仕，變姓名，匿居山寺。會府公檢冊寺中，見清詰問，且曰：能詩乎？曰：頗能。卽以冊號八音命次之。清應聲曰：金紫何曾一掛懷。石田菲屋自天開。絲竿釣月江頭往，竹杖挑雲嶺上來。匏實曉收栽藥圃，土花春長讀書臺。革除一點浮雲虛木筆，題詩酒數杯。府公驚羨，遂與爲友。政暇輒攜酒過飲，倡和移日。一日，忽論江濱人物，因曰：如林清者，雄才碩德，惜未見其人。清不覺有感。府公曰：公殆是耶？清曰：若林君安得見之？此民所以有感也。相與盡醉罷。明日，府公物色，無清蹟矣。

陳亮，長樂人，字景明，學無所不窺。明興，洪永間，累詔郡縣徵遺逸，或推轂亮。亮曰：昔唐堯在上下，有箕穎，吾投迹明時，遊戲泉石，於志慊矣，不願仕也。作讀陳搏傳詩見志。山中爲小樓，曰儲玉，購四方名書藏之。

又作草屋曰滄洲。因以自號。與名士王恭高棅爲文酒會。日相過從。暇則汎江。登江投上方蘭若。尋僧問。偶意豁如也。以此自終。詩冲澹。悠然有陶孟之風。

鮑興。鄒平人。故業儒。讀書問學。文名鵠起。元末隨父官浙中。值兵變。避地吳淞。貧困乃棄業。積居展貨。以爲資養。大裕。母王病。左右奉事不懈。母喪。廬墓三年。父亦不娶。其養父先意承志。無所不備。與乘舟遊江湖間。蕭然物外。洪永間。官蹤跡。薦微遁去。取玄真子漁樵青。以自號。曰漁樵王者。見者咸曰。此鮑公父子也。其繼張。蹇而乘槎者耶。後不落人間蹤跡。微者無從物色之。乃已。

鄭天和。趙郡人。少磊落不羈。自負豪傑才。恥同於衆。居山中。意氣灑然。周貧憐寡。一物價平。出納欲銷世之貪鄙者。凡遇生物。無大小貴賤。卽霽而放之。如是者十餘年。人不能測。咸呼曰顛公。天和嘗假人三世田。其價已盡。後其子置。乃召而告曰。而父所霽田。若未盡而值也。給如之。至其孫置。復告曰。而值也。給如故。晚年每辟火食。日醉醇酒數勺。微醺輒麻鞋散髮。走道上。暢歌屈原漁父篇。以自況。洪武中以地方薦遺逸。人勸之仕。乃喟然漫答曰。而不見飛廉氏馬乎。其一朱鬣白毳。龍瞳鳳臆。終日不釋轡。卒以熱死。其一垂頭昂尾。駝頸駱膝。蹠齧善蹶。棄諸野。終年而肥。古之達者。固不苟潔以罹患。不避穢以養精也。終身不仕。

楊恆。字本初。諸暨人。風神峻爽。稍事文墨。輒明潔如淵珠。衆譁曰。生賦資絕倫。非積功所可及。競邀爲師。多不應。居白鹿山。載椶冠。被羊裘。帶經耕煙雨中。暇則傲睨吟弄。人莫能測也。高郵樂鳳來爲州牧。獨造

門拜請爲州學師。力辭。鳳不得已。令閩右子弟。卽其家問道。州政有闕失。必移諮。恆白以利病。裨助恆多。鳳爲謝。再興所殺。其妻以身翼蔽。亦死。爲殮而送之。後數年。侍御右唐鐸出守越。欲薦辟。子辭。性醇篤。無矯僞。事乖名義。峻言斥不少恕。家貧。臨財甚介。山氓誤坐法常死。憫其恣。諸鄉黨活之。氓輟耕牛爲謝。曰。東作方興。非此何以集。俟冬或可耳。至期。民復來請。反覆譬曉之。乃已。州人求連族。持其成。暨委禽致餼。繼以金幣。笑曰。孰謂君子而可以貨誘耶。悉遣去。人復諱曰。是可以義取者。生尙堅執如此。況其他乎。鄉人因其所居。稱曰白鹿生。與宋濂游。濂復薦之。竟不就。

梁田玉。定海人。官郎中。燕兵入金陵。玉田髡髮爲僧。避去。不知所終。久之。松陽人王詔遊治平寺。觀轉藏。聞藏上嚶嚶有聲。異之。令人緣藏登絕頂。無所見。見書一卷。載建文時。出亡臣僚二十餘人事。紙毀。滬字多斷爛。不可讀。數日稍稍可錄。其可識者。得田玉。郭良。梁中節。梁良用。宋和。郭節。何州。梁良玉。何申。凡九人。人僅數言。詔憐其忠。又得之異。各贊數語。題曰。忠賢奇祕錄。贊良玉曰。行儒名釋。知我者誰。至寶淪沒。久而同輝。

郭梁。不知何許人。與梁中節同行。乘官爲道士去。合贊曰。駕言導引。嘯傲林泉。用以自默。就此龍韜。戈我虞日。重明麗霽。頰波莫挽。仰天以號。白霓晝見。使我心勞。

梁中節。定海人。未詳仕何官。少好讀老子太玄。與郭良乘官同走出京城。爲道士入山去。有道德經注釋行世。

梁良玉定海人仕中書舍人父子兄弟八人同仕於朝金川不守變姓名避去終不可蹤跡其梁氏父子兄弟爲舟師濟建文君逃投水死者五人

宋和郭節皆中書舍人變名挾卜筮書走異域賣卜給衣食後有人識之輒遁去何州海州人不知仕何官與宋和友善素以忠義相勗約棄官去竟莫識者

雪菴和尚不知其姓名落髮爲僧西南走重慶重慶大竹善慶里山水奇絕可廬和尚又走善慶里里虛中有隱士杜景賢叩之未應題絕句於圖見志杜異之次日造訪與往來自龍諸山山旁有松柏灘灘水清駛蘿蘘森蔚和尚欲寺謀景賢景賢豪有力亟爲之寺寺成和尚入居之昕夕誦經山中人不知書謂且誦佛經乃不知其誦易乾卦也景賢曰和尚相釋而誦儒不可請誦佛經景賢意和尚不宜誦儒書恐有蹤跡然又不肯顯言言則恐和尚走去以故婉解之和尙知景賢意遂誦觀音經寺因名觀音云和尚好閱楚辭時時袖楚辭登小舟急棹灘中流朗讀一葉輒投一葉於水投已輒哭哭已讀讀終卷又復買一部如此乘莫測其云何和尚不戒酒日注酒一壺俟客客至輒飲客不至卽拉樵牧豎入飲飲半酩呼兒童歌曰我歌爾和歌竟眠焉而寐和尚頎形秀碩指柔白翦翦落筆成章詞語不甚工密然意氣渙發星流電走紺雲迭出能感愴人死之日其徒問曰師卽死宜銘何許人和尙張目曰松陽問其姓名不答時在成化初年踰百歲矣有雪菴詩集

河西備燕兵破金川備被葛衣走是冬至金城行乞市中金城邊地極寒備止衣葛衣明年過河西依莊

浪豪魯家爲備。備久取直。稍稍積買羊裘披之。雖寒必覆。以故葛衣葛亦破縷。竟不肯脫。夏或衣暑布。布卽新。故葛衣輒覆其上。人勸之棄去。不答。備錢稍有餘。走市中買牛肉酒。與諸乞兒食飲。備力作倦時。自吟吟或夜哭泣。永樂中有留都官從宋總兵至莊浪。識備。備走南山中。旬月留都官去。乃還有問留都官備何人者。留都官亦不答。後數年病死。呼主人囑曰。我死勿殮我棺。幸西北風大起。火我。燬我灰。勿埋我骨。魯家從其言。

補鍋匠往來四川夔慶間。爲人補鍋。至州邑。不過三日卽去。去或復來。夔慶人有欲學補鍋者。卽教之。不索謝錢。直令負擔從。有後曹學者至。卽遣先學者去。如是數年。夔慶間人皆呼爲老鍋匠。補鍋或與錢布米。不擇。當食時。與之食。卽不復錢。錢稍稍積。遇風雨寒暑不出。卽出錢買酒飯自飲食。寄宿蕭寺中。忽夔州市中逢馮翁者。二人相顧愕然。已而相持哭。哭已相牽入山巖中。坐語。竟日。學補鍋者屏不得聞。二人語語已。又相持哭。且別去。言今永訣。不可復相見。作一詩別。隨裂碎且吞之。一日值三數詩老。酌酒聯句。立於側。怪其語澀而艱。矍然者再。諸老怒曰。汝能詩。卽續吾詩。指韻而應。諸老驚起。延之上坐。請賦詩。強而後可。問以它事。不答。若病風然。卒晦以死。莫知所終。蜀中峨眉亭。嘗有建文遺臣題詩云。一箇忠臣九族殃。全身遠害亦天常。夷齊死後君臣薄。力爲君王固首陽。

馮翁在夔州。以章句教童子。給衣食。能爲對句及古詩。詩輒自題馬二子。或馬公。或塞馬先生。嘗作詩大書壁間。比見補鍋匠。歸卽剷去。時蓋永樂甲申乙酉間。未幾辭主人去。莫知所終。

東湖樵夫。樵浙東臨海東湖上。日負柴入市。口不二價。永樂改元。詔至臨海。鄉中人相率走縣庭。請詔。或歸語樵夫曰。新皇帝登極。樵夫愕曰。皇帝安在。或曰。燒宮自焚矣。樵夫慟哭。遂投湖水死。竟不知何人。樂清樵夫。每自山採柴歸。聞太宗卽位。殺方孝孺等。顛天號哭曰。國既就篡。我不願爲其僕。遂棄柴投港。橋下水死。官聞之。爲之殮葬。題曰樵夫墓。

耶溪樵人。未詳所自。永樂時。樵會稽之耶溪上。日鬻薪二束。足則食。已食。已晝。詩於溪沙。晝已輒亂其沙。人怪之。一日窺其晝。從後抱持。乃得詩云。夢入鷓鴣紫宸。覺來依舊泣孤臣。半生家國惟餘我。萬里江山已屬人。無地可容王蠋死。有薇堪濟伯夷貧。伶仃苟活緣何事。要了焚焚一點真。尋匿去。不知所終。雲門僧。會稽有雲門寺。最幽寂。有老僧。每從一童子。攜茗具筆墨。泛舟而遊。賦詩滿袖。歸則焚之。至死不言所以。

玉華山樵。自號大呆子。性天然。寓東陽縣東山。儀容俊偉。惟披麻戴笠。不服常服。盤桓於山南村落。與之遊飲者。每得其詩畫。詩畫雖未過人。亦不塵俗。將死。囑主人曰。斂吾屍。縣於林木足矣。主人卒葬之。嘗有歌云。七年艱難走閩越。日夜思親鬢成雪。回頭往事付空花。形影相隨衣百結。當時恨不蚤見幾扁舟。一棹江南歸。西風塵土障天起。秋水鱸魚空自肥。卽今寄食荒村裏。佳士出迎當倒屣。當歌對酒忍暫歡。握手論心愧知己。老懷豈能忘故山。神遊往往於其間。爲君寫此轉悽惻。片雲零落何時還。終不知爲何如人。常有歌贈王姓者曰。宗兄。人始知其姓王云。





# 明書卷一百四十三

## 列傳九

### 雜傳一

史官論曰。嗚呼。主臣遇合之際。豈非天哉。方劉基釋元侍從。居西湖時。真主尙在埃中也。基指異雲爲金陵天子氣。十年後當輔之。此與留侯識天授。第五決聖主者。尤漠漠幾先矣。易曰。雲從龍。風從虎。聖人作而萬物覩。既曰覩之。豈不從之哉。故王者受命。干城腹心。颺發景集。或取之四塞。或資之敵國。韓黥不產。豐沛馬耿不必南陽也。況明太祖得國之正。度越前古。諸臣從之。順天應人。亦不失春秋之義。與夫裴矩忠唐。孟頫背宋者。不可同年而論。吾於諸人何嘗乎。雖然。昔平元捷至。詔羣臣嘗仕元者。不許賀。且建余闕李黼祠。贈諡福壽。每歲遣官致祭。而壽子陳健。以州倅擢太僕卿。及坐胡黨特宥之。於履聲囊橐之老臣。則醜之以文天祥。而終竄以死。其風示固深遠矣。因仿歐陽修五代史立雜傳。而采曾仕元者。特紀於斯。以元官之小大爲序。卽無事跡可考。亦存其名。使覽者有以感焉。

陳遇秦從龍

附築兒  
周良嗣傳

陳遇。字中行。建康人。父辛之。元淮南鹽課提舉。遇資稟純粹。識度超遠。博通經史。尤精先天之學。元末爲



江東明道書院山長。溫州路學教授。兵亂歸建康。扁其室曰靜誠。人因號曰靜誠先生。每夙興焚香叩天。願蚤生聖人救世。太祖渡江。御史秦元之薦其品行才識。以書聘之。曰：予因胡元失馭。海宇瓜分。豪傑興兵。共爭疆域。干戈四起。黎庶流亡。天命歸予。提兵東渡。遂取臺城。歷思自古英雄創業。誠難獨理。轅門雖有將士。帷幄惜無軍師。恆慮側度以求賢。庶定太平而開國。比聞先生世居江左。學貫三史六經。博覽兵書百技。才兼文武。超越等倫。賢哲天生。實我良輔。崇儒重道。今古皆然。湯文曾徵伊呂。先主猶聘孔明。予不敢以前代明王自期。先生當以伊呂孔明奮起。儻以生民爲念。須弘恤患之心。應天順人。敷陳遠略。非欲奮爪牙以躡武。其實資文德以安民。助成大業。列爵胙土。以報功德。子孫傳襲。與國終始。豈不偉與。與其發光斂迹以全己。何如濟時行道以成仁。拱俟車塵。起展素蘊。丙申四月八日書。馳入見。與語大悅。稱先生而不名。籌謀帷幄。益見親信。屢幸其第。甲辰。上卽吳王位。賜冠帶。授供奉司丞。不受。戊申。卽皇帝位。遇疏陳治道。以復中國。先王禮教爲首務。授翰林學士。不受。賜肩輿。選衛士十人贊其出入。洪武庚戌春。承命往兩浙廉察民隱。還朝。密有所陳。賜白金綵段。除中書左丞。復辭。辛亥。召對華蓋殿。賜坐。命草平西詔。賞賚有加。授禮部侍郎兼弘文館大學士。又辭。時西域進黑馬一。甚奇。召入觀。引漢故事以諫。上大悅。賜大銀一錠。除太常少卿。又辭。上不許。沈吟良久。從之。戊午。復除禮部尙書。固辭。上嘉歎。連稱君子。且曰：士之有志節者。功名不足以介意。其卿之謂乎。朕不強卿。以成卿之名也。自是每燕閒。輒召問古今得失。嘗值暑。賜歸。時功臣多有過譴。力爲救解。每從寬釋。上嘗諭曰：先生有子。著來帶刀隨侍。朕當重用。對曰：

臣三子皆幼。俟其讀書成立。以圖報效。上悅。賜對衣兼金。當是時。寵遇之隆。雖公侯卿大夫無與比者。甲子秋病作。太醫省視。尋卒。年七十二。上震悼不已。諭祭賜葬。鍾山祖塋之次。上所賜詩文翰墨甚多。所述嘗燬於火。故所存無幾。子欽誠俱蚤卒。弟恭。字中復。嘗隨遇侍太祖。由鄉貢士至工部尙書。秦從龍。字元之。洛陽人。仕元累官和林行省左丞。改江南行臺侍御史。會兵亂。避居鎮江。丙申。明兵下金陵。遣大將軍達下鎮江。太祖謂達曰。其地有秦元之者。才器老成。當詢訪致吾欲見之意。達物色得之。時從龍有從孫永爲達部軍。因遣還報。上喜甚。命朱文正、朱文忠以金綺聘之。遂與妻陳偕來。上親至龍江迎入。時上寓王綵帛家。因邀同處。朝夕訪以時政。從龍盡言無隱。既而上卽元故御史臺爲府。居從龍西門外。用爲南臺侍御史。不受。事無大小。悉與諮謀。密書漆板問答。左右皆不知。上稱先生而不名。每歲日上與太子皆有贈遺。或親至其家。與之燕飲。禮遇甚厚。乙巳。從子澤死。告還鎮江。上出郊握手送之。是年十二月卒。年七十餘。上聞驚悼。未幾督兵至鎮江。親臨哭之。命有司厚恤其家。同時有葉兌。字良仲。甯海人。以經濟自負。尤精天文地理卜筮之學。以布衣獻太平策一綱三目。中時務。上奇其言。欲留用之。力辭。賜金幣還里。又建康周良卿。素有德行。上入城。以禮延請。詢政事。號曰三老。上咸敬重之。史官曰。傳曰。不在其位。不謀其政。若冥鴻遐舉。刷羽雲霄。弋人其何慕乎。而遇從龍。皆以終身不受官。得保首領於靈擊之下。吁。異矣。論者謂其逃死非真。辭爵似過矣。夫以故元遺老。果能逃死。而不膺新組。廁諸公卿之列。此其矜然於志。審時之大者哉。然史稱每佐密議。不知北伐之謀。曾與聞否。此時爲遇與從

龍者亦回首燕雲遠灑金臺之淚否耶。

朱升傳

朱升字允升。歙人。幼師陳樸。剖擊問難。多所發明。樸深器之。至正癸未。偕趙沔從黃楚望講道。明年歸。作經書旁注。是秋登鄉試。丁內艱。後四年。戊子。省授池州學正。田歲入富於他學。官吏蠶食。既至。會計出入。盡去宿弊。以身立教。士皆興起。秩滿南歸。新黃之兵已至。徽矣。避兵奔竄。往往閉戶著述。不輟。越五年。丁酉。大明兵下徽。被旨召見。上問之。對曰。高築牆。廣積糧。緩稱王。上嘉其樸。遂參密議。尋辭歸。吳元年。丁未。徵拜侍講學士。知制誥。同修國史。上親製誥詞。有曰。眷我同宗之老。實爲耆哲之英。於開國諸公。好得其實。無何。與學士張樞爲直學士。特免朝謁。優禮之。七月。領樂舞生入見。設雅樂閱視。上親擊石磬。命升識五音。誤以宮音爲徵音。上不懌。賴熊鼎解之。得止。洪武元年。二月上。御東閣。顧謂升曰。近觀周禮。有所謂六夢者。朕嘗感異夢。厥兆維何。對曰。人之精魄。上通於天。此陛下受命之兆也。軒轅夢游華胥。天下大治。帝王之興。自有天命。蓋振古如茲矣。三月。與修女誡。而諭升修齊之本。遂受命纂輯。二年。三月。復命撰齊戒文。是月。請老歸石門。居梅花初月樓。上親灑宸翰以賜。庚戌卒。年七十二。學者稱爲楓林先生。著有易書詩周禮儀禮禮記孝經四書小學旁注及書傳補輯諸書傳解。行於世子同。爲禮部侍郎。史官曰。朱升名審音。而失於宮徵。其解夢多諛辭。所研討者何在。第其於六經之旨。多所發明。誠一代儒宗也。以曾仕元。故抑之。雖然。一苜蓿青氈。亦可以恕矣。

劉三吾傳

劉三吾字如孫。以字行。初名崑。茶陵人。初避兵廣西。授靖江教諭。遷儒學副提舉。明兵下廣西。歸茶陵。洪武十七年。通政使茹瑺薦。徵至老矣。應對詳慎。上喜。除左贊善。歷陞翰林學士。三吾博學通經史。文章典麗。既入翰林。備顧問。每預密議。懿文太子卒。上意在燕王。召問三吾。對曰。皇孫年富。世適之子。子沒孫承。適統禮也。卽立燕王。置秦晉二王何地。上頷之。卽日立建文皇帝爲皇太孫。十八年三月。上命三吾與編古帝王祭祀災祥感應。可爲鑒戒者。爲存心錄。既又命編漢以來災異之應。臣下者。爲書曰省躬錄云。二十三年。授晉世子經。坐怠慢。爲吏部侍郎。侯庸劾。降國子博士。未幾復學士。二十六年。以壻趙勉爲戶部尚書。坐罪。乞免官。未幾。又復學士。上厭表箋多諛詞。纖巧。命三吾及右贊善王俊華。撰定頒天下。丁丑。主會試事。被黜落者所訟。命覆試。三吾囑以卷之最陋者進呈。上覽之。他掇得其情。大怒。遂謫戍邊。尋死於法。三吾爲人慷慨坦蕩。不設城府。自號坦坦翁。

史官曰。元良主器。適嗣承祧。誠千古不易之經。非一時權宜之計。愛憎不得而移。庸哲不得而亂。英雄之主。每多惑焉。而三吾神鑒炳烺。風裁山立。一言而太孫正位。舊史稱其當大節而不奪。有由然矣。雖衡文不厭羣望。何至竄戮。此君臣相保之所以見美於宋祖也。噫。

宋訥傳

宋訥字仲敏。滑縣人。父崇祿。字壽卿。元行臺侍御史。追封魏郡公。贈參知政事。諡忠肅。訥承家教。矩矱自

檢性持重。齒冑館師友切劘。學問該博。元至正癸卯進士。令鹽山。兵亂歸家居。洪武二年。中書省徵儒士十八人。纂修禮樂。訥與焉。事竣不仕歸。五年。過元故宮。作詩傷之。十三年。授國子助教。橫經發難。擊蒞廓蒙。學者歸向。十五年。應制。同諸儒撰敕文十六通。授筆立就。上大稱歎。拜學士。時建太學。上幸學。令爲太學碑文。賞賚。上每觀書。或論用人。必與擬議。皆稱旨。改文淵閣大學士。時年逾七十矣。上親製詰詞。引尙父與周八百爲比。蓋自宋濂詹同而後。惟訥時破召對。旣感知遇。日有補拾。甚見親信。嘗塞附火燎脇。至庸乃覺。上製文警訥曰。脇者協也。豈爾居內。不能協人主。至然耶。訥皇恐謝。明年代吳顯爲祭酒。嚴繩準推恩義。身言並教。寢食學廡。不家宿。一時士皆適用。上猶慮功臣子弟有不服者。以曹公兼領監事。由是貴冑肅然。一日訥病。遣中使諭。卿稟天命之性。發仲尼之誠。施己之幽德。修道教人。所以病不病而速差。以其有神也。又嘗言宋祭酒骨格必壽。命畫工圖像。上問昨公服坐堂上。何以有怒色。對一生獻茶。踏而碎其甌。念臣不才。失於敬。中心自訟。不意爲陛下所知。上喜慰。出畫像示之。以老召其子進士望江主簿麟侍養。十八年。久雨。求直言。獻安邊策曰。今海內旣康。蠻夷奉貢。惟沙漠遠人。未遵聲教。若置之不治。則恐歲久。必致爲患。邊圉若欲窮追遠擊。又恐六師往還萬里。餽運艱難。士馬疲勞。陛下欲爲萬世之計。要不過謹備禦之策耳。備邊固在乎兵食。足食又在乎屯田。屯田之制。必當法漢。本始年中。匈奴帥十餘萬騎南向。欲爲寇。漢將趙充國乃將四萬騎分屯緣邊九郡。單于聞之引去。夫以四萬騎分屯九郡。而充國統制其間。則當時籌畫區分。概可想見。我朝諸將中。勇知謀略。豈無如充國者。陛下宜選數人。隨其遠

近高下立法分田。所領衛兵。以充國兵數。斟酌損益。率五百里屯一將。布列沿邊。遠近相望。首尾相應。耕作以時。訓練有法。遇敵則戰。寇去則耕。此長久安邊之策也。又何必勞師萬里。求僥倖之功。以取無用之地哉。上嘉納之。令邊軍皆屯田。著爲令。乙丑戊辰兩科。上親策士。魁選恆在太學。得士居天下三之二。及任。享泰廷對第一。召訥寢賞。命譏進士題名記。立於監門。學錄金文徵畏其嚴。與同官田子貞等誣訥罪。嗾吏部尚書余燧移文令致仕。訥陸辭。上驚問。知故。皆坐誅。圖形暴罪。敕曰。學校教育天下英材之所。師者模範根本。官於學者。君命也。自祭酒而下。分所學之優劣。辨職級之等差。要當起居常道。語出入儀。文徵等不知育才之所。模範之源。君命之重。等差優劣之分。交通吏部。夤緣爲姦。誣祭酒。訥受賊。餓死生員。剋落師生廩膳。夫其所教生徒。或大家公侯子弟。父母兄長。欲其成才。幣帛鞍馬。錢物酒餼。厚禮於師。此賢父兄也。彰師之教。爲儒者榮。孰云賊也。生員有疾。存問飲食。親教之師。當告知典簿。疾甚。告有司。藥餌之不存問。飲食藥餌。或有傷生。親教師當坐。祭酒提綱而已。今以卑誣尊。飾非惑聽。禍人不淺。仍慰訥復任。二十二年。命譏帝王廟及廣惠祠碑文。明年正月。有疾。尙醫來治。二月朔。疾甚。其子及屬官懇請歸家。厲聲曰。是何風雲氣少。男女情多。況在丁社。兩祭齋戒中耶。三日。丁酉。祭畢。昇歸。抵暮卒。不一及家事。年八十八。上悼惜。自製文。遣官致祭。又遣行人祭於家。爲治墳塋。故事。文臣四品無給喪費者。給自訥始。又官其次子。鄉邑訓導。復祖爲司業。其後辛未。太學生有連舉大魁者。上曰。此宋祭酒訓迪之功也。諸生守官稱職者。多出其門。上每舉爲教國子者。法三十年。以張顯。韓克忠。署祭酒司業事。上因思訥。坐奉天門。諭



太學生曰。宋訥作祭酒。學規嚴肅。秀才循蹈規矩。向學適用。朝廷以故得人。訥善終。朕以禮葬祭。近年老秀才爲祭酒。懷異心。不肯教誨。廢訥學規。年少秀才。則違犯學規。投匿名文。謗師長。自後如是者。首賞銀百兩。犯者。凌遲沒產。正德中。諡文恪。訥家西南三里。卽瓠子堤。父崇祿。構亭曰西隱。訥更築白雲茅屋。所著詩文二十卷。號西隱集。

史官曰。嚴師道尊。古誌之矣。宋訥嚴氣正性。型範克端。以故敷教有方。曲成者衆。太祖崇文重道。經始太學。數臨視而規模閎壯。邁古辟雖。宋訥旣正臬。比有成效。而安邊一策。尤微實用。豈特腐頭巾。徒自白雲茅屋老者哉。及後屢有高等。輒歎曰。宋訥之功。以勵後祭酒。其不以故元鹽山令。視等老臣素。太祖可謂能用其所長哉。第不知於講席上。以節義訓諸生作何語。

劉基傳

劉基。字伯溫。浙青田人。曾祖濠。爲翰林掌書。每陰雨積雪。登高邱。望其聚突。無煙者。賑之。宋亡。林融爲宋舉義。元使簿錄融。株連盡其理。濠盛治牛酒。延使者。其家醉之。肘篋私記渠率二百人。而自火其室。使者欲攜簿走。尋之不得。濠佯驚。第以所記二百人上。曰。此燼餘也。衆並得免。祖廷槐。父煇。有智計。通經術。爲遂昌教諭。基少穎脫。讀書七行俱下。年十四。通春秋。徧及五經。工文章。凡天官陰符家言。無不精析。其奧講性理於鄭復初。聞濂洛心法。元末舉進士。揭曼碩深愛重之。曰。子魏玄成流也。而英特過之。濟時器也。在燕市。得天文書一冊。閱之。翌日。卽背誦如流。其人驚以歸之。笑曰。書在腹中矣。授高安丞。進賢有老人。

鄧祥甫者善天文。一見驚曰：公聰明絕世，器質宏深，當爲一代偉人。盡出秘書相授。在官摧抑豪貴，人多怨之。嘗反新昌故獄，檢官以罪去，嚙謀中傷，行中書省移基入幕府避之。與其長抗議不合，投劾去。尋補浙江儒學副提舉，充考試官。上言御史失職數事，授臺掾，歸乃與魯道元、宇文公諒日縱酒游西湖。一日有異雲起西北，二人以爲慶雲，將賦詩。基大言曰：天子氣也，應在金陵。十年後英主出其下。我常輔之，衆駭散。獨門人沈與原共飲，沈醉乃別。西蜀趙天澤尤奇之，以爲諸葛孔明之流。天上方有事，幸自愛，勿落小盜手。方國珍反海上，省憲辟爲元帥府都事，築慶元諸城逼之。時左丞帖里帖木兒議撫，基持不可。曰：國珍首亂，赦之無以懲後。左丞稱善，進行省都事。聞之朝，而國珍使人浮海至京，賄用事者，許國珍官聽其降。坐基擅持威福，奪職，羈館紹興，并罷左丞。基欲自殺，門人持之而免。乃放浪紹興諸山水，游必有記。多爲詩歌自適。而國珍遂不可制。山盜蜂起，行省復以都事辟治兵，且撫且討，寇悉平。而是時石抹宜孫爲樞密院判，負義，榦基與之相犄角。軍聲甚振，自樞密經歷遷行省郎中。方上功經略，使李鳳谷、右方氏僅以故儒學資遷總管府判，奪其兵權。卽乘官歸，集鄉黨自保。衆避國珍者，多依以居。著郁離子十八篇，其醜物託類，皆悲生民之塗炭，歎國法之弁髦。庶幾藏器以遇真主，其辭甚多，其意一也。郁者文也，離者明也。客或說以句踐事業，基笑曰：生平惡國珍，士城輩所爲，今乃效尤可乎！天命行有屬，其姑待之。時太祖已下金華，定括蒼，基置酒延客，指乾象示曰：此豈人力也耶？會上使孫炎來聘，乃語其衆弟陸曰：善保境，勿爲方氏窺。遂與宋濂、章益、葉琛間道走金陵。旣見上，陳時務十八事，盛言明公因天下之亂，崛起草



昧聞尺士一民無所馮藉名號甚光明行事甚順應此王師也我有兩敵陳友諒居西張士誠居東友諒包饒信跨荆襄幾天下半而士誠僅有邊海地南不過會稽北不過淮陽首鼠竄伏陰欲背元陽則附之此守虜耳無能爲也友諒劫君而脅其天下皆疲位乖則不驍民疲則不傳故漢易取也夫攫獸先猛擒賊先強今日之計莫若先伐漢漢地廣大得漢天下之形成矣上大悅稱先生而不名陳友諒傾國入寇陷太平將犯龍江上欲禦之而衆恒擾甚有請決一戰者有以鍾山王氣請奔據者至有勸納款者基獨張目視不言上召入問之基曰請賜臣劍先斬議降及奔者臣乃言上曰事急矣言而後賜基曰友諒恃太平之勝盛氣東下我師縮腦勢已不敵然明公初有建康圖國之始勝則王敗則賊奈何使諸將人人持所見夫驕易敗也創易懲也敗驕在彼創懲在我臣聞天道後舉者勝王師得人爲本明公若傾府庫以興士怒開至誠以固人心興王大業在此一舉且臣聞者望氣敵衰我旺決可取也上曰善於是賜基劍令諸將盡拜基爲軍師有不服者斬之諸將竦然誘與戰覆其衆盡時上雖定江東稱吳國公猶奉小明王座於中書省基怒罵曰彼牧豎耳奉之何爲不拜大陳天命所在乃止議伐陳友諒力贊曰金星在前火星在後往必克此天意也遂進攻安慶拔其水寨請乘風直擣江州從之友諒倉卒戰敗遁去馮勝攻南康上使基授方略書片紙付曰夜半兵至某所見某方青雲起卽設伏頃有黑雲起者賊伏也勿輕動日中昃而黑雲漸薄回與青雲接者賊歸也銜枚躡其後擊之可盡擒勝啓讀之初亦莫信已而具如所言始以爲神遂破賊取其城洪都守將胡廷瑞使其子約降要質請無分軍上有難色公從後騎所坐

胡牀上悟許之。洪都遂爲明守。友諒不敢越江直下矣。前是基以母喪告歸。上固留不得行。至是復伸前請。特許而以禮官館伴。賻祭踰等。歸至衢。苗軍叛。殺守將。衢人洶洶。其將夏毅憂之。迎基入。衆卽帖伏。爲移書諸屬邑。俾固守。已邵平章兵至。悉誅諸叛將。方治葬國珍。卑辭以幣來。唁。基白之。上使受而答之。因騰書宣上威德。方氏遂入貢獻。上於軍國有所謀。輒馳使以書來叩。署名稱老先生。基事事條答。皆懸中機宜。俄驛召還。道建德。張士誠來寇。李文忠時爲帥。奮欲出戰。止之曰。三日後必走。走而尾擊。可盡擒也。三日。基登城望曰。賊走矣。衆見壁壘旗幟如故。且聞嚴鼓聲。莫敢發。復趣之。至其所。則空壁。留者皆老弱。追薄之東陽。悉獲其衆。還京。會友諒復攻洪都。上率師逆擊。遇彭蠡湖。方大戰。基疾呼揮手曰。難星過。急更舟。遽易舟。返顧前舟已破碎矣。相持未決。請移軍湖口。以金木相犯。日剋勝。陳氏遂平。乙巳。置太史監。秩正三品。基領之。上戊辰。大統麻。日中有黑子。奏東南當失一大將。已而參軍胡深伐陳友定。敗沒。上方欲刑人。基入見。亟語之。夢以頭有血而土傅。故欲應之。基曰。頭上血。衆也。傅以土。得衆且得土也。應在。三日上爲停囚待之。果杭州及海甯降。上悅。悉付基縱歸。獎惑守心。羣下皆惴惴。以上且有誅僇。密言宜下書罪己。以回天意。明日上見羣臣自引咎。衆乃安。大旱。上特命基諗滯獄。甫決而雨。隨注。時基最爲上信。嚮言無不聽。中書參政張景故元臣。有二心。使人上書頌上功德。請及時娛樂。明得意。上出示基。基質責曰。是欲爲趙高也。景色動懷忿。乃使其腹心齊翼巖伺基陰事。未發。景先坐事。誅。司天告災。翼巖遂飛章論基專擅。願所行皆取密旨。或有請報可者。上怒詰問。知出張景斬之。上卽大位。擢御史中丞。仍領太史。

令諸大典制賞冊拜皆基與左丞相李善長學士宋濂計定時處州七縣糧稅比宋制當加五升上獨令青田止五合爲額曰令鄉里子孫世世頌劉伯溫也或言有殺運三十年基慨然曰使我任其責掃除弊俗一二年後寬政可復時李丞相貴盛基獨與抗善長不能平而適以事見譴憲使凌說因彈之基爲上言李助舊且能輯和諸將上曰是數欲害汝汝乃爲之地耶基頓首曰計大體安得及私上乃解累欲加封謝曰陛下乃天授臣何敢貪天固辭上每稱曰伯溫吾子房也嘗因卜相問楊憲何如公素與憲善對曰憲有相才無相器夫宰相者任理爲衡而不以己與乃稱憲自用且不學未見其可問汪廣洋曰此褊淺殆甚於憲問胡惟庸曰此憤轅破犂犢也上曰吾固難之吾之相無逾先生基曰爲巨室者棟必大輕易棟而得小者甯無爲室憂臣非不自知第臣疾惡大甚又不耐繁劇恐辜陛下恩其後憲以怙寵廣洋以輕惟庸以不遜皆坐罪一如所言上巡汴梁基與善長居守請於上謂宋元以寬縱失國且今刑亂用重必使紀綱肅而後忠政可施許之遂督督宮省糾舉姦惡小者捕治大者啓皇太子施行中書省都事李彬貪縱事廢善長以彬省僚且素暱請於基求緩不聽獄具馳奏報可卽斬之善長大恨俟上歸訴基方盛夏祈雨僂人壇墻之下非所以奉承天意上持其章不下而會基以妻喪告歸得免尋手書召還曰前太史令御史中丞基世居括蒼懷先聖道天下初亂聞朕親將金華旋師建業卽別里閭捐邱壘應聘而起相從羣雄未定之秋居則匡輔治道動則仰觀天象發縱指示無往不克曩者攻皖城拔九江撫饒郡降洪都取武昌定處城內變爾多輔焉彭蠡□戰礮聲激裂若雷臨首軍士大呼鬼神號怒自旦至暮

□是凡四。爾時在舟。同我患難。今秋告歸。久而未至。朕心缺然。今天下一家。爾當疾來。同盟勳冊。言非儒造。實出朕誠。爾遂命駕。良慰朕心。既至。賚賜甚厚。是時上方幸鳳陽。建爲中都。銳出塞。滅王保保。基謂中都曼衍。非天子居。王保保雄傑。不可輕忽。進兼弘文館學士。二年大封功臣。先已贈祖父。皆永嘉郡公。至是封開國輔運守正文臣。賚善大夫。上護軍。誠意伯。祿二百四十石。四年正月告歸。八月。手書開曰。近西蜀悉平。稱名者盡俘。我之疆宇。不少前王。且元以寬失天下。朕今收平。非猛不可。然小人但喜寬恣。謗罵國家。煽惑是非。卒莫能治。卽今天象疊見。天鳴已八載。日中黑子。又見三年。今秋天鳴震動。日中黑子。或二或三。或一日。更有之。更不知災禍自何年月日至。卿深知麻數休咎。討論封來。卿年高靜處。萬山中。必有真樂。使者往回。勿賚以物。茶飯發回。基悉條對而焚其草。又奏謂霜雪之後。必有陽春。今國威已立。宜少濟以寬大。上是之。宣付史官。遣其子璉。上平蜀及甘露頌。上優詔以答。時胡惟庸以右丞相攝左事。憚基每思中傷。基亦自料。兩人不並立。深藏以待。凡天象及時務所宜。必馳書以聞。甌括之間。有隙地曰談洋。南抵閩界。曰三魁。爲巖盜藪。元末應方兵爲亂。基奏以其地立巡檢司。控扼之。姦民謂地屬溫州。乃民業。非隙地。遂合逃軍廣三逆命。處州宿猾持郡邑事。不以時聞。基使璉上書奏之。不先白中書省。惟庸挾舊事。益怒基。及宿猾逮。至。使訴基欲購談洋地爲墓。不得。則創立司之說。以窘其人。致激變。當坐罪。上不問。復請逮其子璉。又不問。基懼。馳入朝請罪。留京師待旨。上曰。基有功。不汝害也。六年。以文廟不陪祭。受胙。奪俸一月。惟庸旣益橫。基私憂曰。吾安敢希言驗。卽驗如國家何。邑邑得疾。惟庸陽爲修好。八年正月。

朔挾醫來視疾。飲藥。覺有物積胸中如拳。久之浸劇。上遣使問之。知不能起。三月給驛舟護歸。御製文賜之。略曰。君子絕交。惡言不出。忠臣去國。不潔其名。爾基括蒼之士。少有英名。謁朕陳情。用征四方。天下一統。加以顯爵。垂名後世。敕賜歸老。以盡天年。何圖釁生。致使不安。國有八議。尊祿存名。卿趨朝不辨。釋疑親君。可謂不潔其名者。與惡言不出者。與卿今年邁。居京數載。老病日侵。朕甚念之。可還鄉終天年。稱朕優老之意。四月念六日卒。年六十五。先以生平所習天。文秘書封授。璉曰。亟上之。毋令後人習也。又爲一書。勸上以修德省刑。祈天永命。且寬猛若循環。然毋持一端。諸要害地宜宿重兵。與京師形勢相聯絡。授其次子環曰。惟庸方在事。上之何益。是不久必敗。敗則上思我。其時可密聞也。基剛毅有大節。慷慨敢言。遇天下事。果摯勇壯。不復返顧。受上特知。東西征討。掃平中原。一切皆參密謀。上或召入宮中。或親至基所。屏人語移時乃去。自徐達而外人莫得聞。上天威嚴重。羣臣進對。每戰慄失容。惟基抗言直議。不以利害禍福有所轉移。與人交。開心見誠。遇所不可。義形於色。家居日飲酒奕棋。未嘗自炫。尚儉。好讀書。多行陰德。所著自郁離子十卷外。有覆瓿集二十四卷。寫情集七卷。犁眉公集五卷。皆峻潔嚴勁。爲時宗工。初胡惟庸致毒。上聞而未嘗。嘗問汪廣洋對以不知。上怒貶逐。十三年惟庸誅。於是深思基言。召見二子。慰諭之。璉既蚤卒。二十三年命子廡復故封。誠意伯。誥詞謂其父子俱沒於姦邪。紊政之時。其節不移。故授前爵。加歲祿五百石。世襲。二十五年卒。子法幼。而環奏基遺疏。拜閣門使。遷谷王右長史。燕兵起。谷王開金川門降。環獨不屈。法亦停襲。永樂二年。法與環子頊進大祖書。詔宣德三年授頊刑部照磨。卒。法子。拒。

梔子曇曇子祿。景泰三年命錄基後。守臣言璉七世孫祿幼。不堪授官。環四世孫文謙可。詔用祿。七年授世襲翰林五經博士。天順二年敕建祠於青田。成化十八年敕取基像。祿子憲未嗣官卒。弘治十三年。給事中吳士偉言基子孫宜世爵。憲子璉得爲處州衛指揮使。正德九年。賜誥曰。劉基學爲帝師。才稱王佐。孔明之任。豈間人言。敬輿之謀。不負所學。占事考祥。明有徵驗。運籌畫計。動中機宜。渡江策士。無雙。開國文臣第一。受爵能讓。懷辭金蹈海之風。成功不居。從辟殺封留之請。可謂明哲。允矣清貞。贈爾爲太師。諡文成。嘉靖十八年。刑部郎中李璉言。皇上明聖。斥姚廣孝太廟侑享。臣鄉人劉基。宜侑享高廟。世其封爵。如徐達。上是璉言。下廷議。皆言太祖收攬賢豪。創造基業。一時佐命功臣。並軌宣翼。而帷幄奇謀。中原大計。每每屬基。故在軍有子房之稱。剖封發孔明之喻。基亡之後。孫薦實嗣。太祖嘗召諭再三。鐵券丹書。誓言世祿。鷹鷂爵未幾。旋即隕世。撼圭裳於末裔。存礪帶於空言。或謂後胤孤貧。弗克荷負。或謂長陵紹統。遂至疏嫌。雖一辱塗泥。傳聞多謬。而載書盟府。績效具存。昔者武王興滅。天下歸心。成季無後。爲善何勸。基宜侑享太廟。其九世孫指揮使璉。宜嗣伯爵。伏惟聖明裁定。制曰。可。乃入祀太廟。廡中列六王之下。尋以爵序。璉嗣誠意伯。食祿七百石。與世券二十年。璉卒。子世延嗣。年少氣銳。振武營之變。擁諸大臣至小教場。呼噪。衆皆悻無人色。不能出一語。世延反覆諭以國威。騎頰罵曰。汝等反。反卽殺我。大軍至。盡殺汝等。衆稍稍懼。乃散而聽命。由是自負。藐諸公卿。喋喋上封事。見格。忿而恣橫。革管事。益縱其下。侵奪民田。有詔勒回原籍。驚不肯行。曰。我有鐵券。捶死一人。納一可免。誰難我者。論者蜂起。倔強自如。顧焰消家。



益貧不能支矣。萬歷丙午下南京刑部獄死。子孔昭嗣。

史官曰。世以劉基多帷幄契。又善天官家言。相率爲瑰怪之說。傳之往往過實。故不錄。其天官家言。誠巧合命中矣。卒上之中秘。世無知者。然必有神秘者焉。大約基之爲人。磊落慷慨。不愛其奇。畢忠竭智。謨軍國。誠英偉不羣者矣。古稱豪傑勇智士。不相用則角也。夫角何以全。基數仕元。不用罷歸。以歸太祖。是元遺太祖以基。不使角而使用也。嗚呼奇哉。或謂其類張良。其籌策縱橫。殊無遜美。至出處大節。明哲保身。方之遠矣。然百餘年而人主思之。三推德而復故封。隆佑享。抑何篤厚也。功足當之云爾。

明書卷一百四十四

列傳九

雜傳二

宋濂傳

宋濂字景濂號潛溪先金華人後遷浦江父文昭一名朝字文憲性樂易好禮法有隱德子二長淵義烏教諭次卽濂母陳氏妊七月而生六歲授李瀚蒙求一日而盡九歲能詩歌號神童稍長里人張繼之抽架上雜書以爪逐行按而試之按畢輒誦受業於聞人夢吉得春秋三傳之旨兼通五經時吳淵穎萊方內儒宗金華胡翰出其門致書招曰舉子業不足溷濂曷來同學古文詞乎欣然從之未幾悉得其闢奧吳辭去輒代講席鄉先生柳貫黃潛深禮重之歎曰吾鄉得景濂斯文不乏矣莆田陳旅稱其文沈鬱簡嚴能兼二公之所長歐陽玄則曰非才具衆美識邁千古安能與於斯遂以文名擅天下至正己丑以布衣薦爲元翰林國史編修會世亂自輟閣遁入小龍門山著書二十四篇曰龍門子凝道記又著孝經所說周禮集注諸書劉基稱其主聖經奴百氏遊戲佛老譬猶飫梁肉而兼茹茶飲茗彌稱其大庚子太祖徵入見問世亂奈何對曰願明公不嗜殺人上悅語必稱先生除江南儒學提舉授世子經壬寅召講春



秋左氏傳。濂曰：春秋孔子褒善貶惡之書，遵而行之，賞罰適中，天下可定。歸省甲辰，改起居注。上諭黃石公三略，且口釋之。濂曰：尚書典謨，帝王大經大法，靡不畢具。願陛下留意。上曰：知之。但三略乃用兵攻取時務所先耳。又明年以疾還家，賜金帛。太子贈有加上箋謝書奉太子，勸以孝友恭敬，進修德業。上覽大喜，召太子令曰：誦其書。一過，賜書褒答。洪武二年，徵總修元史，除翰林學士，知制誥，兼修國史。時甘露屢降，召賜坐，上執金杓煉湯於鼎，投露手厄而賜曰：此和氣所凝，能愈疾，故與卿共之。因問災祥之故，對曰：受命不於其天，於其人。休符不於其祥，於其仁。時大都督文正得罪，濂婉言請全親親之誼，從之。上嘗言古帝王當宴安之餘，多好神仙，朕孜孜政理，國治民安，心神恬逸，卽神仙也。對曰：漢武好神仙而方士至，梁武好佛而異僧集，使移此心以求賢才，天下有不治乎？尋失朝參左官。三年遷國子司樂，復坐議孔廟禮稽緩，謫安遠知縣。未幾，召爲禮部主事。陞太子贊善大夫。上問帝王宜讀何書，濂請讀真德秀大學衍義，上立取覽，悅之。令大書揭兩廡壁。已上坐西廡，大臣侍坐，指衍義中司馬遷論黃老事，令講。講畢，復進曰：人主能義理養性，則邪說不能侵，興學教民，則禍亂不能作，刑罰非所先也。上曰：朕上畏天地，下畏兆民，兢兢業業，不敢自逸。濂頓首曰：皇上慎終如始，天下幸甚。陞侍講學士，兼資善大夫，令集歷代姦臣事爲辨姦錄，分賜太子。諸王侍上觀穫，上問三代以上所讀何書，對以載籍未立，不專誦讀，而尙躬行。又命序祖訓，纂大明日厯。七年日厯成，凡一百卷，序進。稱上度越前王者六，一曰挺生南服，統一華彝，二曰憫民塗炭，始取之羣雄之手，得國之正，三曰治政詰戎，羣仰成算，四曰敬天勤民，五曰后妃不預政，外戚循

理閣寺給掃除家法之嚴。六曰大帥佩印率兵征伐。凱旋上章歸士。單身還第。兵政有統。復與詹同等輯  
皇明寶訓上之。其他禮樂律厯之制。勳臣名卿。焯德耀功之文。上並使濂編摩潤色。既侍上久。有間陳說  
直諒。不務文飾。上喜欲相之。對曰。臣無他長。徒以文墨議論。待罪禁林。一旦任事不效。將負陛下。頓首力  
辭。上愈厚之。每燕見。坐賜茶。詢舊章。講治道。甚條析。問廷臣臧否。第言其善者。又問其否者。對曰。善者與  
臣友。故知之。否者卽有之。臣不知也。命爲詩文。必寓忠告。性深密。不洩禁中語。有奏輒焚藁。嘗大書溫樹  
二字室中。或問朝廷事。指二字不對。上嘗彊之飲。醉賦楚詞一章。命侍臣各賦醉學士歌。曰。後世知朕君  
臣同樂也。九年。除翰林學士承旨。知制誥。兼修國史。上曰。朕起布衣爲天子。卿自草萊列侍。從爲開國文  
臣之首。俾世世與國同休。不亦美乎。徵孫慎爲序班。仲子璫中書舍人。復以年老艱步行。令太子選賜良  
馬。又爲良馬歌。賜之。許致仕。贈父爲尙書。祖德政太常少卿。誥詞上皆躬撰。復留之。時有上萬言疏者。上  
怒其迂衍。羣臣有阿意者。曰。此不敬罪當誅。濂曰。彼應詔而來。本效忠無他。上復覽疏中。顯有足采者。召  
罵阿意者曰。若等激吾怒。何異以膏沃火。向非宋學士。幾不誤罪言者。因曰。古人太上爲聖。其次爲賢。若  
濂事朕十九年。口無毀言。身無飾行。寵辱不驚。始終無異。抑可謂賢矣。十年歸。賜緡綺。太子贈衣三襲。上  
曰。朕最慎賞。嘉卿忠誠貫金石。故以賜卿。卿今年幾何。對曰。六十有八。上曰。歲此綺三十二年。作百歲衣。  
濂頓首謝。辭行。請歲一朝。上曰。江險宜循河行。敕慎侍至家。遣慎表謝曰。生世而逢真主。仕宦而歸故鄉。  
二者臣兼焉。上召問慎。而翁去此而誰從。撫兒孫乎。閱生財也。涉田園乎。慎叩對。陛下所問。臣大父事皆

有之上曰。雖然。尙有他。慎對無他。第時時聽訪國政。儻知一二。雖在鄉。尙翼實封補陛下萬一。上悅。賜公歸休之詩。是年九月入朝。上廷問之屢矣。至大喜。賜敕褒諭。命禮部致酒米糶果。日進見。從遊覽。或便殿侍食。至暮始退。上歎曰。純臣哉。爾濂。方今四夷皆知卿名。卿自愛。日本使奉敕求文。獻百金。卻之上。問故。對曰。天朝近臣。受小蘇金。非所崇國體。上喜。歲盡辭還。既行數日。上語璉曰。朕疇昔之夜。夢爾父談笑如曩時。璉曰。非陛下垂念臣父切至。何以形諸夢寐。明年再至。賜賚勞彌厚。歸居青蘿山。閉門纂述。人不見其面。嘗曰。古人爲學。使心正身修。措之行事。俯仰無愧而已。繁辭複說。道之蔽也。尤篤於倫品。與人交。和易任真。內誠外恕。一見信服。汲引後學。如恐不及。平居布衣蔬食。無異貧士。或勸爲子孫計。曰。富貴豈一家物哉。吾乃所以遺之也。視近甚明。夜然燈於几。臥絺帷中。閱蠅頭小書。一黍上能作十餘字。皆可辨。性疏曠。賓客不至。累日不整冠幘。悠然自樂。十三年庚申冬。孫慎坐法論死。濂罪且不測。高皇后及太子力救得釋。安置茂州。十四年辛酉五月。行至夔。宿野寺。有老衲。與語多解悟。濂曰。吾聞內典善惡必以類報。吾平生所爲。自以無愧。何至於是。衲曰。先生於勝國嘗爲官乎。曰。編修。衲默然。是夜自經。卒。年七十三。妻賈。先一年卒。門人方孝孺曰。太史公論道上前。授經太子。未嘗不言仁義。天下既定。上方稽古制治。凡郊廟山川祠祀。律麻禮樂。彝裔貢賚。諸禮文大政。皆太史公裁定。太子寬大仁明。天下歸心愛戴。太史公之功居多。海外諸國。朝貢接國門。至必問太史公安否。其爲人取重如此。濂墓初在夔。永樂十一年。孫恪以蜀獻王命。遷葬華陽。置祀田。弘治中。四川巡撫邢表。賈俊。屢以濂爲言。令有司於葬所春秋致祭。正德

八年謚文憲。二子長瓚先卒。瓚子三人。慎、愷、恂。皆無後。次璉。工書。稱爲國朝義獻子三人。擇愷。恪。居華陽。擇字子彝。奉母謫居。思紹父學。勤苦特甚。蜀獻王時。賜粟帛。由是得專其學。建文皇帝召擇還。以爲翰林侍書。擇書與劉彥銘、朱思平皆名建文間。而濂門人有聲者。同郡樓璉、浦江鄭楷云。

史官曰。有謂明之學始於濂。蓋猶考亭之傳也。考亭一再傳爲何王、金、許。濂因許氏門人而究其說。而別錄謂濂一生多流於禪。以其聰明博洽。能根極理性。其所成就。必有過人。舍周鼎而問康匏。大爲濂惜。然亦不必深辯。獨是文章議論。施於朝廷。達於夷夏。真超拔羣倫者矣。聞老衲一言而悟。卒死於禪。卽不嗜殺人之語。王道也。而極乎禪哉。

### 何真傳

何真字邦佐。東人。少英偉。好讀書。筭擊劍。仕元。管句河源務。副使嶺表。騷動。棄官歸。邑民王成、陳仲玉搆亂。舉義兵討之。擒仲玉。成築砦自守。進圍之。幕人能縛成者。鈔十千。未幾成奴縛成。以出。真釋之。奴求賞。如數與之。使人具湯鑊烹奴。駕轉輪車。數人推之。又使數人鳴鉦。督奴噓火。奴一號。羣應之曰。四境有如奴縛主者。視此。於是人服其賞罰有章。以爲光武待子密。不過是也。行省上其功。元賞賚之。惠州人王仲剛與叛將黃常據惠州。貪暴。民不堪命。衆慕真。議迎以守惠。又上其功。遷惠陽路同知。尋進廣東都元帥。癸卯。邵宗迂陷廣州。守將何深死之。真聞。率衆復其城。擢廣東參政。進江西行省左丞。弟迪以功擢宣慰使。尋合江西、福建爲一省。改拜行省左丞。仍治廣州。乙巳。宗迂復來圍廣。真力禦絕糧。出避。城陷。明年復

克之宗迂退走。又明年遷右丞。有陳符瑞勸爲慰佗計者。逮而戮之。示於元無二心。洪武元年。廖永忠率師取廣東。先遣人以書諭降。真遣都事劉朝佐諭款降。敕褒諭以寶融。李勣爲比。入朝授江西行省參政。蒞官有威德。尤好儒術。三年遷山東參政。四年命還廣東。收集舊將士。回京復任。九年致仕。十四年命真及子貴同往雲南。規畫糧餉。候大軍征進。及還陞山西右布政。十六年致仕。是年復往廣東。收集土豪三萬餘人。明年再往收集。未至軍校。十八年遷浙江。十九年來朝。調湖廣左布政。二十年復致仕。八月上念其功。曰。吾始有天下。命將四征。雖有降附。不見義旗。則尙負固來歸之誠。無過何真。封真東莞伯。祿一千五百石。二十一年卒。年六十七。真貌豐偉。美鬚髯。吐音如鐘。少時有相者謂曰。公才兼文武。霸王之器。惜生南方。微帶火色。位不過封侯。既貴。其塚上時有紫氣。歸國夙夜寅畏。惟謹。太祖推心弗疑。故能以功名終。子榮。字輝先。讀書有文名。洪武二十一年襲封。後以藍黨褫爵。迪反南海。捕得伏誅。貴字奉先。常侍皇太子。爲兵馬指揮。有學行。士夫所推重。官至指揮僉事。宏字彥先。官至尙寶司丞。史官曰。何真武略。不下陳友定。然其務威德。飾以儒術。友定不及也。而友定烈烈存元於海濱之邦。真初不從陳符瑞之言。似其烈烈。昆仲友定矣。至望風輸款。論者謂其識時知命。號稱俊傑。未免夢魂之間。慚愧友定耳。悲夫。

朱守仁傳

朱守仁。字元夫。徐州人。幼有大志。嗜古讀書。落落自豪。視輩行岸然。罕所推接。元末兵起。江淮鼎沸。應州

辟累獻奇謀破羣盜歷官至樞密院同知守舒城甲辰明兵攻廬州守仁舉城來降徐達送至京師陸見太祖嘉其樸茂授中書斷事乙巳以袁州初附命知郡事值郡治新設瘡痍未瘳守仁褻身廉潔撫循有方又表裏恢廓無畦畛民多德之洪武二年徵拜工部侍郎越二年代安然爲本部尙書尋改北平參政以餽餉不繼謫蒼梧知縣九年進知容州改高唐州頗有善政十年驟陞四川布政使時全蜀甫定姦伏徼欲易煽守仁威令簡嚴鋼酷吏懲頑民郡邑從化以惠利顯疾致仕十五年雲南平改威楚開南等路宣撫司爲楚雄府上念漢楚雜處非得老成持重者不足以鎮特起知府事至則招集流移授以田土量民貧富均賦徭役無偏累又肇建學校隨才曲成有強梗不馴者懲以漢法歷九載境內大治計績來朝闔郡保留不獲垂涕而送之二十三年廷見會監牧日蕃上留心馬政特拜太僕寺卿首奏准都督府等衙門各立草場俱於江北湯泉濠州諸處牧馬所轄十四監九十八羣克舉職孽息日盛屢荷賞賚有所獻納無不俞受上詔省天下寺觀惟龍泉寺以守仁奏准留二僧主馬神廟遵守至今二十七年致仕永樂二年朝京疾卒

史官曰朱守仁威惠兼著循蹟頗多老成練達無堅不破洵有用材也以元樞密明司空屢躡再起艱難荒徼終回寺雖數歷足嘉而顛撲可恥

### 安然李幹傳

安然祥符人徙居潁州元季爲山東行省左丞守萊州明兵下山東率衆歸□洪武元年授起居注轉給



事中尋擢山東參政。心行平□。撫綏勤勞。祿止養身。餘以給公用。二年召爲工部尙書。奉命於社稷壇北建祭殿。又建拜殿。以備風雨祭祀。八月建議。功臣守墓人戶。各以本官封爵品級爲差。官給費。上從其議。尋詔功臣歿者。不建享堂。墳塋葬具。皆自備。惟戰歿者。官給。五年調河南參政。九月改行省爲布政使司。陞浙江布政使。十二年陞御史臺右大夫。十三年革左右御史大夫。改左中丞。五月坐事免。以雷震奉先殿。設四輔官。調和陰陽。位次公侯。都督府。召充其任。命刑官聽兩造之辭。正以五刑。奉得旨。送四輔官。及諫院給事中。覆核無疑。然後行之。著爲令。十四年卒。年五十八。上念來歸之誠。親製文遣官祭之。李幹。絳州人。元翰林編修。退居於鄉。洪武九年授本州訓導。尋遣敕召之。曰。朕卽位十三年。夙夜孜孜。思得賢才。共安天下。何期大臣不職。朋比爲姦。雖四兇之罪已誅。而求賢之意未稱。今御史薦爾博學洽聞。特遣齋符。臨召。有司禮送至京。副朕虛懷。至授四輔官。尋調蘇州知府。改國子博士。兩聘爲試官。後以老致仕。

史官曰。安然李幹等。未有穆穆平格之素。爲元官。歷羣任。殊勳謫議。閔然未聞。而使之調和陰陽。備燮理之任。嗚呼。舛矣。大臣朋比不職。小臣卽有聖哲之懷。付之浩歎而已。而以安然輩反其行。不意太祖聰明絕人。乃出於此。

詹同傳

詹同。字同文。原名書。婺源人。穎靈抱奇氣。學士虞集弟槃見而奇之。妻以女。授易於甘楚材。學春秋於劉

彭壽至正中舉茂才異等。擢郴州學正。遇亂道梗。家黃州。仕陳友諒。爲學士承旨兼御史。甲辰明兵破武昌。來歸。太祖與講經史。占對不窮。授中書博士。時方集功臣子弟於內府。令教之。改國子博士。易今名。尋陞考功郎中。歷侍制起居注。奉命求遺書。攷宗廟時享禮。奉命畫古孝行。及起自戰伐勤苦。爲圖以垂世訓。洪武二年陞侍讀學士。時或屈辱大臣不以禮。中丞劉基疏請存待大臣之體。同因取戴記及賈誼書以進。上納之。陞吏部尙書。改學士承旨。仍同呂本迭視吏部。與樂韶鳳。上所製釋奠先師孔子樂章。上曰。祭貴乎誠。若省牲告充。告贖及禮之煩文者。並宜革之。九月同等上言。自上記兵渡江以來。功業隆重。再闢乾坤。軼古帝王。雖有紀載。而未成書。乞編日厯傳後世。上從其請。命與侍講學士宋濂爲總裁官。濂薦義烏人黃昶可贊編摩。上召昶西苑。慰問良久。復使見皇子。賜綺裘革履。它日上召同與劉基。宋濂。燕便閣。同被酒還史館。賦詩贈昶。少選復宣赴右順門。上乘步輦。至曰。卿餘醒未解邪。同對臣雖醉猶能賦詩。贈黃秀才。上亟取觀之。笑點頭曰。朕卽和同詩。卿爲書之。書訖。賜昶。蓋一時翰林學士。同與宋濂。吳沈。樂韶鳳。並有時名。號詹。吳樂。宋一日偶言及竹。上曰。竹數亦多乎。對戴凱之所譜。至五十餘種。惟吳越山中。有方竹者。四枝直上。若有廉隅。士大夫往往以爲叩杖。上曰。有諸乎。對曰。有之。旣退。獲一枝以獻。上摩娑悅之。御草方竹記一通。記末美同人偉氣豪。繕書賜之。七年五月大明厯日成。共爲一百卷。又與宋訥言。厯日藏之天府。人欲見之不可得。臣請倣唐太宗貞觀政要。分類更輯聖政。爲書以傳。上從之。分四十類。自敬天至制蠻夷。凡五卷。名皇明寶訓。自後凡有聖政。史令日紀錄之。隨類增入。九月詔罷科舉。令有司

察舉賢才。必以德行為本。文藝次之。仍令同選國子成材者。與所舉參用。授主事。給事中。御史等官。時用彭通等爲給事中。并國子生李擴等。入文華武華二堂。號小秀才。丙寅。請老。賜敕遣歸。未幾起爲學士。承旨。六月。考宗廟時享禮。初獻將畢。令分獻官行禮。亞獻終獻皆如之。罷上香儀。上皆從之。復以老乞休。許之。官其二子魯徽。召入賜坐。從容慰勞。出御文賜之。卒於家。所著天衢吟嘯及海濱集。

史官曰。詹同風旨整峻。博辯有文。比之危素。相頡頏。而同獨寵遇無懈。同之才必有可稱者。英印以鍾山僧受知。出藩齊魯。材給莫及。其家橫孟中不問。太祖亦或爲才炫矣。人主知臣。不以德器。悅聽俄頃。信爲良顯。嗚呼。每每壞天下事。可勝道哉。偶摛同傳語及之。

危素傳

危素。字太樸。金谿人。少能讀書。年十五。卽通五經大旨。與邑人曾子白。朱夏。並以文章名家。據座爲人師。徒步臨川。吳澄。清江范梈之門。質而正之。二人皆折行輩。與之爲禮。澄至恨相見之晚。凡所著書。多與參訂。因受知於虞集。孫轍。間出遊金陵。或所其文示南臺中丞張起巖。起巖以狀元爲顯官。少所稱許。獨推服之。曰。危君爲狀元。庶幾相常。老夫有愧色矣。起巖入朝。遂挾以行。達官貴人。更相論薦。至正元年。入經筵。爲檢討。年四十一矣。移書執政。請修宋遼金三史。行所在訪摭闕失。遺書書成。其力居多。元順帝知其學問。特命注爾雅。較君臣政要。改國子助教。以善筆劄。詔書釋氏書。辭曰。臣官冑。豈以教化民彝爲事。外教之典。不宜漏書。得止。尋應奉翰林文字。同知制誥。兼國史院編修官。嘗白事丞相前。極言無隱。丞相賀

惟一曰君向寡言。今何多也。素曰待危恩重。豈能默默。素不敢畏丞相。畏後世史官耳。歷禮部尚書。參知政事。先是江南經略使普顏不花。李國鳳。請封徽國。朱文公爲齊國公。以龜山楊公。豫章羅公。延平李公。西山真公。九峯蔡公。從祀於孔子廟廷。素爲御史時。亦請封諡劉蕡。皆寢不報。至是舉行。李羅帖木兒入相。出爲嶺北等處行中書省左丞。躡居房山者四年。順帝北奔。淮王帖木兒不花監國。承制起翰林學士。承旨入廟信宿。明兵入元都。素故與待制黃昇同邑。少同學。相約死難。昇將投居賢坊井中。從人午出之。曰公小臣。死社稷邪。昇曰齊太史兄弟皆死。彼不小臣哉。則給午還舍。取告身。若欲輸大將軍者。午喜還報。已浮屍井矣。素亦走所居報恩寺。脫帽井傍。兩手據井口。俯身爲就沈狀。寺僧大梓。與番陽徐彥禮大呼。毋死。國史非公莫知。公死是死國之史也。勸歸寓。已而兵入府藏。垂及史庫。言於鎮撫吳勉。輦而出之。由是累朝實錄無所失。俘至京。拜侍講學士。太祖嘗訪以元興亡之故。對答詳慎。甚見禮重。日與劉基。羅復仁。胡鉉。睢稼同居館中。時資獻納。宋穆陵顛骨。爲楊叢真珣所發。入宣政院。西番僧相傳授爲祭器。言於上。索取得瘞之聚寶山。頃之坐失朝免。居一歲復之。兼弘文館學士。賜小車。免朝謁。一日同諸學士。賜酒饌。屢命盡觴。內官承旨監勸甚力。酒終。上御製詩一章。繫序於首。命各以詩進。素成最後。上覽之曰。危素老成。其有先憂之意。他日上御東閣側室。素履聲窸窣行籬外。上曰誰。對曰老臣危素。上笑曰。謂文天祥也。而乃爾。御史王著等劾素亡國之臣。不宜列侍從。謫含山守余闕廟。踰年。每不言笑。愧憤死。所著文集五十篇。奏議二卷。宋史藁五十卷。元史若干卷。

史官曰。危素學問淵邃。才識遒捷。固含英咀華者流也。初以經學。史學著聲。元時英澄等折節與友。白事丞相。極言無隱。何其壯乎。入明。瞻顧龜縮。祇以對答詳瞻見禮。亦可傷也。而迹其生之死之之狀。殊可笑。

張以甯傳

張以甯。字志道。古田人。生質清粹。甫六歲。日記千言。八歲時。人訟其伯父。逮於獄。忿不能平。詣邑伸理。言有條序。令異之。命賦琴堂詩。立就。語甚新奇。伯父由是得釋。十五往甯德。受學於韓古遺。歷五年。方歸。學業大進。登元大定丁卯進士。初任黃巖州判官。以計擒捕海寇。殆盡。陞六合令。有惠政。內艱。阻兵亂。教授淮南者十年。後徵爲國子助教。累官翰林學士。有俊才。博學善記。尤長春秋。盡授其學於趙光霽。元末以甯擅名於時。人呼爲小張學。洪武元年。明兵破元都。與危素。黃肅。夏以忠。王時皆送京師。太祖拜以甯侍讀學士。知制誥。兼修國史。時承顧問。後上每厭之。漸見疏遠。己酉。與典簿牛諒奉命齎詔。印使安南。封其國王陳日燿。未至而王卒。世子日燿遣其臣阮亮求詔。繇不許。曰。此吉禮。非凶事也。且旣易世矣。當以奏聞。因留居洱江。俾諒往輸世子。遂復遣其臣來告。計上喜。以甯稱任使。親爲祭文。遣主事林唐。臣編。修王廉。往祭安南王。始入境。竣封事。又安南止。以揖爲禮。喪事甚簡。以甯教其世子服三年喪。并令其國人效中國行頓首稽首禮。上聞嘉之。賜以敕書。比之陸賈。馬援。御製詩八篇。獎諭。庚戌五月。得疾卒於道。命有司還柩於家。以甯清潔自守。臨終時有詩云。覆身惟有黔婁被。垂囊都無陸賈金。詩文數十卷。號翠屏集。行世。劉三吾稱其節制似柳宏。放似韓蘇。宋濂稱其文豐腴雄峭。清圓委蛇。王時亦拜侍讀學士。前在元

以白金三千。令方國珍市馬。汎海而歸。老不可用。

史官曰。張以甯能訓夷以禮。而不能守己以禮。可謂見物而不見己矣。黔被覆身。陸金空囊。清名自表。亦人之將死。其言善歟。不然。迹其資秉靈絕。文腴流美。豈不爲世名家。

程徐傳

程徐。字仲能。鄞縣人。父端學。以明經進士官編修。與兄助教端禮。皆尙經學。修飾古行。時人稱爲小二程。徐遂於春秋。由元校書郎禮刑戶三部主事郎中。以才稱。王保保承辟爲兵部侍郎。不赴。後以國子司業。督兵部尙書。致仕家居。太祖平浙東。召見。命爲吏部侍郎。洪武二年。上令孔子釋奠。止行曲阜。書奏。以爲古今之祀典多矣。而獨社稷三皇。與孔子通祀於天下者。豈無故哉。社稷者。生民之本。三皇者。開極之主。而孔子者。萬世之師也。曠古以來。帝王之治天下。教養二者而已。民非社稷三皇。則無以生。非孔子之道。則無以立。有國者敬而祀之。必崇本始。報功施之典耳。孔子以道設教。其心未嘗一日而忘天下。天下祀之。非祀其人。祀其教也。祀其道也。天下一日不可無孔子之道。則其教不可一日廢。天下一日不可無孔子之教。則其祀不可一日廢。今使天下之心。讀其書。由其教。行其道。而不得通祀焉。豈可以崇本始報功施也哉。若曰。孔子非如佛氏之千百化身。不可一日間赴天下之祀。而遂廢其禮。則三皇后稷。亦皆生爲人而歿爲神。又安得享天下之祀於一日之內乎。蓋孔子以身載道也。孔子之道。卽綱常之道。斯道所在。如天之無不覆。地之無不載。卽家至而日見之也。非可方體而求之也。非可以一念之靈視之也。其道



通於天下。則其祀亦宜通於天下。臣愚謂陛下欲稍革前代之文。以正祭祀。孔子之禮。宜於春秋仲月上丁。遣使致祭於曲阜林廟。仲丁致祭於京師廟學。令天下府州縣於季丁通祀焉。如是則既有等殺之節。無褻瀆之過。其於祀神之禮。根本之誠。開示正學之方。扶持世道之計。可謂曲當而無遺矣。上覽奏從其議。改刑部侍郎。三年改本部尙書。未幾卒。精勤通敏。事無留滯。能文。尤工詩歌。有文集。

史官曰。程徐其爲人不足道。至通祀孔子之議。蓋聖人之徒歟。天下士大夫始終無類者。幾何。第使一節著稱。亦可□□□□□□不朽。

吳雲傳

吳雲。字友雲。宜興人。世業儒。父仲傑。仕元。湖南提舉。雲少有文行。爲國子生。仕元。翰林侍制。洪武元年。魏公達定元都。俘至京。太祖釋之。除弘文館校書郎。二年。改渭南縣丞。有善政。四年。召還。擢刑部郎中。尋遷磨勘司令。五年。驟拜刑部尙書。六年。出爲湖廣參政。八年。坐事被逮。釋之時。元梁王據雲南。上諭曰。今天下混一。四夷賓服。獨雲南一隅。未奉正朔。殺我使臣。朕欲以兵取之。恐勞師費財。且傷遠人。卿能爲朕作陸賈乎。對曰。天命所在。誰敢違之。第彼特遠。故阻聲教。臣奉陛下威德。往告以大義。諭以禍福。彼必附順。若冥頑不從。與師未晚。上然之。七年。遣行會梁王使。鐵知院等二十餘人。使漠北。爲大軍所獲。械送京師。上欲以恩懷之。令與雲偕往。至沙塘口。鐵知院等計曰。吾屬奉使不達。中道被執而還。罪必不免。於是說雲改易制書。共給梁王。不從。欲殺之。適梁王亦遣人來劫降。逼令胡服。辨髮。往見雲。曰。朝廷念雲南一方。

生靈不忍加兵。特遣使持敕招降汝輩。今反欲脅使臣以降邪。吾以死自誓。終不爲汝屈。遂被害。梁王壯其節。命收骸骨。送蜀給孤寺藏之。後雲南平。朝廷方知雲死。適其子黻亦以其事來白。乃命馳驛奉榘歸葬。黻爲國子生。貧不能還鄉。以其嘗仕湖廣。卽葬於江夏。弘治中。輔臣徐溥言於雲南巡撫王詔。爲請於朝。贈刑部尙書。諡忠節。與王禕並祀雲南。曰二忠祠。嘉靖中。復官其曾孫承宗。爲中書舍人。史官曰。梁王雄據一方。與故元消息不隔。而欲使雲一身。以口舌收黔滇百粵之廣。而且使其人共轡往。是太祖死雲矣。焉知非太祖薄雲而故舍之耶。

### 秦裕伯傳

秦裕伯字景容。從父仕元都。就學胄監。登第。累官至福建行省郎中。會世亂棄官。寓揚州。復避地上海。養母。母卒。閉戶力學。時張士誠據蘇州。遣人招之。不納。吳元年。上命中書省檄起之。對使者曰。受元祿二十餘年。背之不忠也。居喪未終。忘哀而出。不孝也。乃上書固辭。洪武元年。復徵。稱疾不出。上手書諭曰。海濱之民好鬪。裕伯智謀之士。而居此地。苟堅守不起。恐有後悔。裕伯拜書入朝。辯博善爲辭說。授侍讀學士。上登鍾山。命與學士朱升等扈從擁翠亭。給筆劄卽景賦詩。甚見寵異。一日侍上。言元時告反者皆不坐。上曰。此何等事。寬之至此。所害善良必多。命反坐懲後。由是刁風始息。二年。降侍制。時論學術政事。皆當上意。四年。蜀地平。上因與侍臣論用將。曰。秦裕伯嘗言古者帝王之用武臣。或使愚使貪。其說雖本於孫武。然其言非也。夫武臣量敵制勝。智勇兼盡。豈可謂愚。攻城戰野。捐軀徇國。豈可謂貪。果若貪愚之人。不

可使也。尋出知隴州。卒於官。

史官曰。秦裕伯居母喪。上書有足采者。及侍太祖。無善可稱。後以謫死。吁。枉卻此一出矣。其時有王時程、儒漢、李善、張昶、李質、曾堅、蕭肅、答祿與權、王儼。皆以元官入明。至大僚。因並紀之。

明書卷一百四十五

列傳十

文學傳一

史官論曰。文章之制於人主。譬川瀆之制於海也。隨其材分取。及高高下下。傾折而赴人主之好惡。故齊紫敗素也。而賈十倍。上好存焉耳。漢武志凌雲而枚馬作賦。唐玄尚經術而燕許應制。何則。利祿之途。人斯往焉。士無賢不肖也。明太祖諭侍臣曰。古人文章。明白易知。而誠意溢。出近世詞雖艱深。意實淺近。自今翰林爲文。但取通道術。達時務者。無事浮藻。故明初陶宋諸學士。文質直無枝葉。有漢始風氣。而諸才人。懲元季之亂。又多隱居肆力。文章彬彬盛矣。自制科興。而東九牧才人之心力。以從事四子五經之文。銖心劘肝。揣合銖寸。醜好成敗。一決於遇不遇。一遇之後。棄如委屣。當其速化。朝種暮穫。及其乖蹇。則童而習之。皓首不能工。乃太息而委之命。併不從人主。然天下以爲利祿之途。釋此無由也。其父兄之所教。子弟之所肄。旦夕從事於此。俟其一遇而休焉。雖有卿雲終賈之姿。不敢獵幅而爲詩古文詞。其爲詩古文詞者。非官成游藝。則林叟遷客。不得志者之所爲耳。故藝苑寂寥。不能軋漢魏而接唐宋大家者。三百年才人之精神嚮慕。不在乎此也。然自北地歷下。瑯琊。昆陵諸家。競爲古文詞。嚙嚙經術。包含百氏。庶幾

大歷貞元之盛。厥後才人繼踵。稍變而爲縱橫天矯之文。其間騷人逸子。唱和名家。或彼此互譏。人擅一喙。爲東野之鳴者。亦班班有文在人間。此皆溢出於制科之外者也。豈士能自治。不從聖人歟。爰采其人之尤著者。錄於篇。文則無暇錄矣。

楊維禎。字廉夫。會稽人。其地鐵崖山高百丈。上有萼綠梅數百株。築層樓俯花。積書數萬卷。號梅花道人。父宏。母李氏。生有祥徵。稍長。授春秋。講析辨刺。凡百十家人。莫能難。父期以重器。不爲授室。俾遊學甬東。購黃氏日鈔諸書以歸。下帷周覽。秦定丁卯。用春秋擢進士。署天台尹。地有八鵬。廉其姦。治以法。民皆稱快。然其黨蟠結不可解。卒用是免官。久之。改錢清場鹽司。屢白民病。頓首涕泣爭之。不終聽。至欲投印去。獲減引額三千。俄外內艱。環廬所植竹筍發。藥牙枝葉鬱如。遲赴調者十年。會修遼金宋三史。獨作正統辨千言。大司徒歐陽玄讀之。歎曰。百年後公論定於此矣。將薦之。有沮者。尋用常額。提舉杭之四務。日夜爬梳。姦不得容。轉建德路總管府推官。悉心獄情。務使無冤。陞江西儒學提舉。未上。會兵亂。棄官。將妻子遊天目山。放於宛陵。毘陵。聞雪中山水最清遠。又自九龍山。涉太湖。大小雷澤。訪縹緲七十二峰。尋鴻漸遺蹟。自雲間東抵海。登小金山。脫烏巾冠。鐵葉冠。服褐毛寬博。手持笛一枝。自稱鐵笛道人。鐵笛者。洞庭湖中冶人。緜氏子。嘗掘地得古莫耶。無所用。鎔爲鐵葉。筒之長二尺。有九寸。竅其九。進於道人。道人吹之。竅皆應律。奇聲絕人。江上老漁狎道人。不時唱歌款乃。道人爲作迴波引和之。仍自歌曰。小江秋。大江秋。美人不來生遠愁。吹笛海西流。又歌曰。東飛鳥。西飛鳥。美人手弄雙明珠。久見鳥生雛。城中貴富人。聞道

人名多載酒道人所。幸聞吹笛道人爲一弄畢，便臥遣客。卽客不去，臥吹笛自如也。嘗對客云：笛有君山古弄，海可養蛟龍，可呼非鈞天，大人不發也。始張士誠據浙西，聞其名，累使求致，不能屈。撰五經反覆告以成敗順逆之說，太祖聞而高其誼，天下大定，詔遣賢修纂禮樂書，召至京師，僅百日，疾作，作老婦吟見志。上笑遣之，還雲間九山行窩，病且革，移拄頰樓中，呼左右謂曰：吾欲觀化一巡如何？乃自起捉筆，撰歸全堂記，頃刻而就。擲筆曰：九華伯潘君招我，我當往，車馬俟吾且久，遂泊然而逝。似聞數十人從兩道登樓，其步履之聲相接，年七十五，初聘錢氏，忽遭惡疾，錢父母請罷婚，不聽，卒聚之疾，尋愈。所著有四書一貫錄、五經鈴鍵、春秋透天關、禮經約、君子議、歷代史鈴補正、三史綱目、富春人物志、麗則遺音、古樂府、上皇帝書、勸忠辭、及平鳴、瑤臺、洞庭、雲間、祁上諸集，通數百卷，藏於家。初爲童子時，屬文輒有精魄，仕不得志，遂大肆其力於古辭賦，以先秦兩漢爲文準。評者謂如商敦周彝，雲雷成文，而寒芒橫逸，奪人目睛。於詩尤號名家，震蕩淩厲，駁駁將逼盛唐。求文者座無虛席，崖鷲野刻，布列東南間。然其風神森沖，無一芥縈懷。遇天爽氣清時，躡履登山，縱情遐視，或戴華陽巾，披羽衣，泛畫舫於龍潭鳳洲中，橫鐵笛吹之，其聲穿雲而上，望之者疑其爲仙。晚年益曠達，築玄圃蓬臺於松江之上，無日無賓，亦無日不沈醉。嘗酒酣耳熱，呼侍兒出，壽白雪之辭，自倚鳳琶和之。座客或躡躡起舞，顧盼生姿，起超直上，蓋數奇諧寡，特託此以依隱玩世耳。性疏豁，與人交無疑二，新進小子，或文詩一句字之美，必爲批點，黏於屋壁，指以示客，尤不錄人小過，黠奴負金，度無以償，逼書收牒，笑與之家藏古名畫，爲西鄰所竊，其僕人追執之，揮手曰：吾業



與之矣。無賴者僞爲維禎文，冒受金緡，或疑將發其姦。曰：此誠予所作，不論遠近，皆頌其寬厚長者云。生平無它嗜好，病棘危坐，不披衣則弄札翰，或理音樂，素不喜奕畫，爲奕損心，畫爲人役，見卽屏去。與永嘉李孝光、茅山張伯兩、錫山倪鎮、昆陽顧瑛爲詩文友。碧桃叟釋臻知歸叟釋現、清容叟釋信爲方外友。臨歿，以志銘託宋潛溪，世稱鐵笛道人。

陶凱，字中立，臨晉人。生時有大星墜簷，光照臥室，比成童，讀書過目成誦，遲重不妄言笑。卓然自立，嘗與人夜歸，限大溪不能度，忽有人撐小舟泊岸，卽登舟渡，回顧無所見，人皆奇之。里中大疫，探病入其家，見妖入甕，卽與封識，棄水中，遂愈。又入城晚，宿三江，病家夜禱，凱朗誦離騷，聲清越，以長病者驚汗而差。議容步履有嚴，有則從學者甚衆。父有孝行，家貧，凱以束修助治喪如禮。祖母墓奪於勢家，成贖而表之。無他兄弟，一妹適仙居顧氏，蚤卒，撫所遺子女甚篤。故里中稱德義者，必曰陶氏父子。積詩歌成帙，相者袁珙見而驚曰：後十年當爲異代名臣。至元中，以明經除永豐教諭，不受。至杭州，施克宏家，太祖起兵，訪凱，延至，置上座，與語，不敢居，因進取天下之策。且曰：羣雄地實兵強，未易圖。胡元政衰，民怨，是空地也。直取之易耳。上大奇之。每用其策，後別去。戊申卽大位，以書徵之，凱矢心不仕。上求之切，諭使人曰：陶凱不應，可取一族人首來。族人四遠，求得凱見上，授編修，與諸儒纂元史。又撰洪武廣韻，上稱善，命教大本堂。授楚王經，除翰林應奉文字。三年，陞禮部尙書，請建奉先殿於乾清宮左。上日焚香，上食，朔望薦新，若節序生辰，祭用常饌。行家人禮。四年，試進士，凱爲提調，刻程文。凱序其首。五年，句容縣民獻瓠瓜，奏頌上曰：

卿歸德於朕。朕不敢當。因言漢唐皆有會要。記載時政。及起居注。記言記事。宜令臺省府各置銅匱。編錄聖旨及時政。依會要編類爲書。上從之。扈駕獻詩。又進方療孝慈皇后有效。賜免死牌。命與開濟作天下民籍。易見圖。凱資性過人。才高學博。識見卓遠。爲文千言汨汨。不見有艱難意。初游吳楚。文多激慨。中更亂離。去居深山中。授經養親。文多隱約。明興。應聘而起。凡稽古禮文。事多凱論定。又兼領翰林院事。詔令封冊。歌頌碑碣。時時命凱。文遂盛傳。出爲湖廣參政。致仕。八年召爲國子祭酒。自稱耐久道人。上聞怒曰。何自賤也。又上一夕夢龍繞公門。疑之。復以參政致仕。密謂弟中吉曰。汝可俟明春二三月。數將至矣。宿緣在此。昔避不能。今奚得免。會遣高麗。誤用符驗。坐與知罪死。凱曰。臣受知陛下。官三品。壽七十。死復何憾。雖有金牌免死。亦不自表也。上尋悔之。楚王求師不得。憤入金水橋。羣臣解衣履下救者。及法官不覆奏者。皆死。贈太子少保。葬長潭山下。

李習字伯羽。太平人。通諸經。攻性理之學。以閔博爲學者所宗。才負經濟。元時以南人見擯斥。延祐初游京師。四年領京師鄉薦。試渾天儀賦。士皆閣筆。習能記其詳。鋪敘燦然。授書院山長。間僑居廣陵。與張仲舉。高季淵。李五峰。旦暮往來唱和。乙未明兵克采石。習同陶安。梁貞等奉迎。駐蹕太平。遂擢爲本府知府。廉能公謹。精於治體。均平徭役。民受其惠。吏不敢欺。未幾。以疾卒。官年八十餘。習有鄉曲之譽。別號雲勸。弟翼字仲羽。中浙江鄉試。與習齊名。江左目爲二李。吳萊謂伯羽之文。簡密嚴奧。一辭弗苟。仲羽之文。豐腴穉麗。五采爛然。劉璠謂伯羽之尊嚴。如雪峰千仞。嶄然特峙。人莫敢褻。仲羽之溫粹。如藍田美璞。光輝

外著天下共寶之。其學行爲時彥所賞如此。及門者百餘人。陶安篤誠。其尤著者也。漁於義溪。吟詠歌行。有峩漁小藁。樵於湯沙。稽考制度。有沙樵雜抄。又有橄欖集五卷。行於世。詩冲澹典則。思致幽深。誦之使人有倉卒不能窮之趣。

劉崧字子高。泰和人。舊名楚。元季鄉舉。明初改今名。七歲能賦詩。嘗侍祖夜寢。聞雞聲。因命爲應聲成。未云喚醒。人間蝴蝶夢。起看天上火龍飛。祖驚歎。家貧力學。年十六授徒。十九遊南昌。時善賦者李叔正而下。稱十才子。見其製作。莫不推讓。復走楚。浙所至觀覽名勝。詩道益昌。薦授龍溪山長。辭。至正中。舉明經進士。捷至。適自田中摘粟歸。悵然泣下。曰。始二親篤於訓子。奈何今不及見。兵燹家蕩覆。避地無以爲生。明初以薦召見。授兵部郎中。小心謹畏。歷署駕部總部事。奉命鎮江。徵糶。多公侯田土。往往掣肘。力持平。與小民一體輸納。歸奏稱旨。又往廣東買馬。得六百匹。又明年往山東點視驛遞。驗漂失海船。衝冒風雪。凡四閱月。訖事。在兵部幾三載。以振職稱。祭方邱。與吳琳。宋濂侍從。應制賦詩。甚見褒賞。六年陞北平副使。持憲綱。招徠逋逃。慰安反側。考覈屬官。以廉慎爲先。讞獄必以情。興學教士。刻石立規。考問風俗。創文天祥祠。度驛路衝僻。爲之哀捐。關防鹽引及私販者。甚有政績。坐事爲胡惟庸所中。輸作京師。尋放歸。十三年惟庸誅。上手敕召拜禮部侍郎。稽古典禮。上嘉之。以文學雅正。屬以撰述。學士宋濂見而歎曰。此司馬遷之文。今未有過者。而於詩則尤所遜服。四月攝吏部尚書。侍郎陸讓以察爲明。一處以寬。銓次有方。藻鑑不爽。五月災異致仕。十四年起尙書。李敬爲祭酒。崧爲司業。令朝夕繼見。燕語移時。四月得疾。猶強。

坐調諸生曰。天子遣崧教國子。將責以成功。而遽死乎。卒年六十一。上爲文命御史唐壽諡。崧所居室。敝半覆以茅。家有田五十畝。皆館授時所置。後居官未嘗有所增益。在北平時。身所覆被。亦館授時物也。嘗爲鼠所傷。始命更置。其故鼠傷者。仍命補葺。以衣其子。歷官十一年。未嘗以家累自隨。嘗攜一童子。到官亦遣還。每夜孤燈一榻。讀書不輟。五更衣冠起坐待旦。當赴北平時。始盡支職方俸廩。易得白金九十兩。封託鄉人及歸。往取其人已用之。止餘封紙。亦不復問。爲人雖溫顏巽詞。而見者懷以敬。問學之功。老而彌篤。與人言未嘗及官政。歲儉。姻黨族人不能自養者。輒賜給之。手筆子史醫卜地理等書六十卷。北平八府志書三十卷。事平事蹟一卷。詩文三十餘卷。而職方集行世。內姪陳繼先。字仲述。秦和人。明初家毀於兵。存者惟母及弟。姑之夫劉尙書崧來撫諭使學。遂往受業焉。雖貧約僅自立。而氣崖高邁。肆力古學。靡不究覽。文筆沛然。渾厚浩博。洪武乙丑進士。授御史。按事山西閩海。時天下決獄多籍於京師。又太祖矜慎。稱旨實難。獨繼先不用威而得情。憲臺章疏多出其手。暇輒爲文自娛。士大夫識與不識。皆稱爲陳古文而不名也。然多散失。存者五卷。洪武甲戌歿於官。坦率簡質。他人巧投曲中。又不能入。終始一節。未嘗少變。

蘇伯衡字平仲。少警敏絕倫。誦說不勞而習。中歲大肆力於文詞。精博敷腴。人謂有祖風致。元末鄉貢。入明。選國子學錄。尋陞學正。屹然以師道自任。發策試士。皆天下國家大務。品第精覈。多士翕服。著空同子。警說四十首。學者皆傳誦之。教胄子者五年。以薦卽日召見。親擢爲翰林編修。詣丞相府辭曰。禁林地望。

親切日侍天子左右備顧問。至華要也。某不幸幼有瞶疾。雖粗通文史。然大懼奏對失措。將速刑僂。誠不足堪。敢辭。丞相以聞。上亦弗強。已而吏部將奏別官。以去親日久。願歸省親。復走白丞相。許之。於是司業宋濂率六館之士祖餞於龍江。謂曰。文定公古史一書。至今傳之。資治通鑑尙闕宋元。平仲歸矣。其尙續諸他日。使人稱曰。蘇氏一門。世濟其美。將不在茲乎。伯衛謝曰。方抱疾未能也。歸治一室。靜坐。或終月不出。與人少所接對。人亦罕得而識之。所與游者皆四方名士。非其人雖未嘗拒絕。然自不敢見也。洪武十年。宋濂歸老入謝。上問曰。今在外文學。復有如卿者。舉以自代。濂曰。蘇伯衛臣鄉人。博學飭行。爲文辭蔚瞻。有法。要不可以微疾廢。上因徵至。入見。欲用之。辭以舊疾。賜衣鈔遣歸。二十年。聘主會試。事竣。復辭歸。卒。伯衛恬靜寡欲。年四十始娶。容貌不逾中人。而學問超拔。平居正襟凝思。淵止山立。雖寒暑風雨。利欲紛華。皆不之知。嚙噴宋學。析義如蠶絲。攻是非如白黑。宋濂稱其文體裁嚴整。恣態橫逸。如春陽被物。根葉條卉。小大圓徧。各隨其物而暢之。視膠滯一體守常而不知變者。萬萬也有文集六卷。

陳觀字廷賓。負雋才。通經史。百家學。善屬文。元季亂不仕。自號莒峰耕隱子。與鄉人方時舉。郭惟貞。族人本初等。二十二人。作真率會。選勝賦詩。以道義相切磋。有壺山文會集行世。洪武初。應明經。辟本府訓導。抗顏師席。諸生翕然。多所成就。閏四歲被召。昂然獨異。太祖問曰。彼頎而哲者何人。觀出對。上試以王猛捫蝨論。稱旨。不數月。擢陝西參政。以廉謹稱。一日。上忽馳召。陛見。諭曰。爾可侍吾左右。於是日與宋濂等備顧問。上益察其恭誠。嘗而命撰鍾山賦。立就。嘉之。祖母喪歸。賜之緡幣。服除。赴闕。未及改拜。以疾卒。年

四十九公持身守官。動皆不苟。而操尤清白。兒孫或從容問陝產金。其贖何狀。公驚曰。吾待罪藩寮。幸不掛吏議足矣。何金之間耶。故其卒也。妻子困甚。子熊。貢入國學。乙酉。應天鄉薦。

林弼。字元凱。初名唐臣。尤溪人。至正進士。授郡幕官。元亡。著述山中。洪武二年。郡以名儒聞。徵入。更名弼。與宋濂。王禕。曾魯等同修元史。書成。賜金帛。尋授考功主事。使安南。祭其國王。王前後持黃金二斤爲壽。悉謝卻。王遣使裝金。請於朝。上曰。小國事。大使臣不辱。既兩得之。可持金歸。安南自漢唐以來。稱臣奉貢。比內諸侯。元時徵其重資。責其躬朝。不肯從。乃有鑄金爲人。夜光爲目之微。夷心益離。使者至多貪夫。悅金貝。坐致褻侮。至是。與同使張以甯等皆固卻。始服中國有人。遷豐城令。吏有作奸者。度弼且置之。法遂誣其受傭金一鎰。緩傭死。逮繫詔獄。上曰。此邵安南金者。謂受傭物耶。援筆草書休問二字。遂得免。改判饒州。尋改垣曲令。適安南國內亂。弼再以薦往。既還。報召至奉天門。親加慰勞。擢禮部郎中。轉吏部。出知登州。有惠政。卒於官。弼博洽羣書。究心正學。著作跌宕雄偉。根極理道。雅精臨池。嘗與王偉談書法。謂用筆須偏正兼備。乃臻妙境。近世趙孟頫側鋒太多。不能逃筆牀。月旦。禕時時語人曰。林元凱在閩。毛中之麟。介中之龜也。禕來判漳。詠清漳十詩。有風流今孰繼。林子亦其徒。蓋指弼也。所著梅雪齋稿。及使安南集。始弼豐城被逮時。舟次湖口。夢一木人口眼俱動。覺曰。吾不免矣。既得御筆休問二字。乃知休於字爲木人。而草書問字皆動象也。

盧熊。字公武。武甯人。元季爲吳縣教諭。洪武初。以故官赴京。母卒歸。起爲工部照磨。尋以善書擢中書舍



人遷兗州知州。政務愷悌，不求赫赫名。州初罹兵革，凋敝甚。適太師李善長營魯王府，浚兗州河，能撫綏供億，事集而人不擾。俄以簿錄刑人家屬，事坐累死。先是熊嘗上疏言州印篆文譌謬，忤旨，竟因此得罪。少與弟熙皆從楊維禎遊，博學工文詞，尤精篆籀。所著有說文字原章句、鹿城隱書、蓬螭憂幽石門清溪等集。別有蘇州志、兗州志、孔顏世譜總若干卷。

王沂，字子興，號竹亭。秦和人。幼時聞張南軒論孟子義利之說，心慕之。既長，刻苦自勵，於性命之理尤得其精微。元末行省照磨吉安路治中，皆不受。未幾江西陷沒，洪武三年庚戌聘爲廣東試官，以廷臣薦徵爲說書，留數月，授福建運副。以老懇辭，賜歸田里。屏居城西龍灣之上，有竹數百竿，日寄傲其中，益以成就後進爲務。從學者衆，接人色莊氣和，語簡理盡，人皆樂就。六經諸儒之書靡不深究，旁通子史，於天人之微、聖賢之蘊，古今治亂成敗之故，蓄之富，察之審，言之當，而履之確也。孝友篤至，終身不道人過失。古文宏偉浩博，至論辨古今成敗得失之際，馳騁貫穿，折之於理，沛如也。喜賦詩，所與遊皆當時名士，日賦咏往還。以商確雅道爲己事。弟御史佑始以罪謫役和州，聞之，貨所有田業往給其費。旣而御史宥還，日怡怡起居，未嘗少離。沂儀觀偉然，氣崖高邁，和氣充溢，渾然不見鋒穎。御史狀貌魁梧，威嚴整肅，昆弟常從容入鄉閭，人望而敬之。所謂二妙集者，沂與佑所作也。著有竹亭退藁若干卷。洪武癸亥卒，年六十七。劉雲章贊略曰：淵乎元酒之在尊，懷乎大阿之未出匣，嶮乎其清而飲之不竭，薰乎其和而卽之弗可狎。又曰：使及門孔氏，則風雲之詠歸，端章甫之禮樂，固將進退所安，而特視其所合，人以爲確論。弟佑子秦。

佑字子啓。十數歲卽知自重。力學不輟。兄弟自爲師友。稍出遊南昌。與名士爲詩友。江西內附。舉教官。吏部試中經義。借十八人者入見。是日太史奏星有文明之祥。太祖喜。皆除御史。賜襲衣及宴。風裁勃勃。動人。廣西平。初置官府。簡御史往任風憲。以尋适爲按察使。佑及胡子祺爲僉事。子祺曰。古刑新國用輕典。佑曰。蠻夷之人。素昧君臣父子之分。瀆倫傷化。不及此時明禮法。以示勸懲。後將難制。适從之。所分部。郡縣吏民悚然。三年。借子祺入覲。時蜀土初平。重郡守之寄。遂徙知崇慶州。子祺知彭州。崇慶承兵革凋敝之後。植仆煦稿。隨事盡心。民始稍蘇。坐累謫役。赦歸。從學者日衆。嚴師道。施教有方。晚學者望之。皆內自斂肅。不敢侈肆。江陰徐遜知秦和。勵精爲治。聘訓導縣學。日躬詣問政。佑曰。示民以好惡之正。而去其蠹。可矣。遜虛己傾聽。陳海桑嘗言。王子啓壁立千仞。不負所學。劉尙書子高言。子啓真風紀臣。包孝肅不足多也。郭守敬曰。子啓平居一言一語。皆可書簡冊。垂法戒。蕭子昕曰。王公秋霜烈日。固當憚之。佑擅文章。其得力處。養氣爲要。中歲以前。所著毀於兵。晚獨存長江萬里稿。年六十六卒。秦字伯貞。天資瓌偉。通經史。能文章。省季父佑於廣西。憩桂林。及佑改知崇慶。浮洞庭。至蜀。復東遊京師。足迹半天下。遍交一時賢士大夫。由是益恢宏練達。文思日進。性至孝。侍母疾。晝夜不解帶。佑罷歸。無子。秦躬養之終身。接人以誠信。自奉儉約。義當存恤者。不計有無。嘗曰。吾所守者三言。循天理而已。洪武壬戌。應詔。上問太極之說。發揮明晰。同時應者五百餘人。上試經學及時務。擢第一。卽命秦次第其餘。上以爲允。授廣東試僉事。分巡雷州。防海寇。復廢渠。清鹽法之弊。會革其官。召還。授工部主事。上語尙書趙俊曰。江西秀才王秦。汝宜從。

之學問。父喪歸遲。上謫安慶者十年。戊寅薦授瓊州知府。一務寬大。崖州黎相仇殺。或以反聞。請用兵。已得朝命。獨察甯遠丞黃童廉平。令往復驗。執黎首事者借來。聞於朝。兵止不出。是舉非秦。糜爛不可言矣。訟者牽連每至數百人。急則逃入生黎。獨虛心聽之。數言而決。且加化道。亡而歸者萬三千餘人。在瓊早甚。禱烈日中。明日大雨。而半舍外尚焦。再禱之。復大雨。歲以大熟。洪武丙子三考。清淨簡易。稱嶺南第一。內艱歸。建文三年入京。授肇慶知州。未任卒。年七十五。子信直。直官吏部尚書。有傳。

胡連字商用。高安人。魁梧奇偉。身長七尺。虹髯奮張。論議英偉。見者竦動。性孤鶩傲岸。不曲合取容。常世然。聞人善如己有。嘖嘖稱之。恐後。士大夫與遊者。或有過。輒曰。胡公其知之否。連或聞之。曳杖來。痛詬弗已。俟其人引咎自責。復怡然笑曰。友道貴直。非訐也。平生不尚華麗。布衣脫粟。處之澹如。學精於易。元季兵起。杜門。惟事親爲務。母喪。終制弗御酒肉。父旅歿。括蒼。時道阻不通。蒙難走二千里。卒負以歸。癸丑。漢帥歐祥遣右丞劉敬襲高安。據之一時。名流皆爲所羅。否則遇害。連獨斂迹。避去。甲寅。明兵至。敬大恐。謀掠士女金帛。火高安。退保新昌。連知事急。乃往見。敬麾下院判雷均正等曰。事已迫矣。不蚤爲之所。恐立受禍。高城旣不能保。況新昌乎。且天命人心。已歸眞主。觀大將軍用兵。可知戰勝攻克。迅若雷墜。勢必不敵。事貴幾先。失之悔無及也。均正等曰。君言是也。然右丞不我從。奈何。請自往說之。敬懼聽命。欲先詣督府投書。而難其人。復要連以行。連曰。吾行矣。恐汝等先諾。後悔。城中禍福未可知也。均正等誓不敢。遂至臨江。白於大將軍。與譚深喜。欲卽官之。苦辭。賜衣一襲。俾還。於是敬等相繼出降。城中以戶計者十萬。以

口計者五倍。憤然以爲更生。洪武八年擢教句容。直諒忠信。士子化之。尋以疾歸。每撫膺歎曰。吾乃止於是命也。萃易詩書諸家說。析而係於各章之下。於易則又以程朱之論會通之。而芟其繁。著爲書數十卷。識者謂其得四聖人意。諸史百子手筆者二百餘卷。每呼其孫振指視之。曰。卽不諱。後遺汝以此矣。賦詩爲文有奇氣。有胡子存稿。將易簪。親友環視。強之曰。灼艾或可起。舉手加額曰。君子貴知命。遂逝。

唐之瀛。本名禹士。以字行。父肅。字敬處。號丹崖居士。山陰人。生而長身巨鼻。敏而勤學。通諸經。旁及子史。陰陽醫卜書數之學。無不研究。文簡潔而雅奧。律詩步驟盛唐。樂府古詩。上薄漢魏。尤工篆楷。深得筆意。至正壬寅。江浙中選道梗。不得上。省臣便宜授杭州路書院山長。轉嘉興學正。明兵取浙西。例起赴京。以父憂東還。洪武三年春。用薦召至京。纂修禮樂書。擢翰林侍讀。科舉法行。預告南京。扈東宮。拜英陵。以疾失朝。例免官。歸鄉後。復謫佃於濠。甲寅至瞿相山卒。所著有萍居稿。文斷諸事。

吳勤。字孟勤。永新人。幼穎敏。方學語時。乳媪負之行廷外。以手指地。媪不顧行而過。少焉仍經其處。復以手指地。乃視之。得一大錢。媪意其所欲。取以爲弄。指錢上字。推媪手置案間。人皆異之。十二三於五經羣書咸成誦。文章煥發。欲就試。其父止之曰。我在爾且止。應曰。兒欲遊戲耳。非謂有所進取也。弟仲謹。英邁俊秀。俱負才名。人謂之吳氏雙鳳。兵亂。謂弟曰。苟如此。何以自立。乃以弭盜之策。獻元守臣。納速兒丁。切中時弊。守不能用。戊戌避難於洪都。時漢兵至。被圍。一日。上滕王閣。觀其勢甚熾。乃言曰。使我得千人守此。賊安得至。斯聞者壯之。欲薦於司徒道童。曰。城破在朝夕。我豈能坐爲魚肉乎。明旦道童遁。勤由間道。

歸癸卯上遣將平吉安紀律嚴肅曰此真王師也向者狐鼠寇竊惡能有成乃往見總帥時淮南郭奎爲參謀相見卽傾蓋劇談達旦不寐遂出所爲詩命勤編正言於總帥署爲泰和令以親老辭洪武初被徵至京試經學第一除武昌教授日與學者講明學問於聖賢經傳剖析奧義反覆開導諸生才質高下咸底於成後多歷顯官莫不感德曰此吳先生之教也數載以從弟平陽同知孔麟故得解官歸惟箸篋盛故衣而已遠近學者接踵於門洪武戊辰楚王遣人致書請爲諸王子師至則待以殊禮凡十載小心慎密教日有益蜀王尤敬慕有自鄂來者必問曰吳先生安否湘獻王亦致書問候有詩曰清才美德冠時儒辭翰欣看逼諸虞自愧庸才思見面故憑海鶴寄音書又曰螺浦回舟喜遂歸故園松菊想披離醴筵薄設待君久同賦淮南招隱詩歲賓興四方交聘以司文衡楚王念高年馳驅良苦卻其聘幣而自遺幣如其數皆不受太宗卽位恭修太祖實錄召入史館旣畢荷賞賚除開封教授周王召講贈子甚厚世子尤加崇重每見不稱名惟曰吳先生永樂三年卒年七十六公學問博邃於羣經子史靡不究析文章溫瀟平易不爲險刻峭厲之言作詩古體追漢魏五七言近體有盛唐音字有晉人風格不擇紙筆俱得其妙嘗燈下書小楷盡一鼓可數千字雖年少者自歎弗及性至孝友弟沒撫諸姪田產悉與之謙己接物雖小夫傭奴皆知敬愛喜飲酒無賓客終月不飲若值親故傾倒連日不醉胸次軒豁未嘗有分毫塵滓每於廣席掀髯論辯一坐盡傾時誦佛經學者疑而問之泫然曰先夫人遺命也有匡山樵者集黃鶴山樵集幽翁集大義齋集若干卷

胡翰字仲申金華人。翰幼聰睿。甫七歲。卽錚錚自異。一日於道中得遺金。守不去。坐候遺者至而還之。歸告母。何何奇之。曰此子必以志節顯。長侍父宦遊蘭谿。從吳澄受學。博覽經史。又登許文懿之門。學益淵邃。時黃文獻公潛以文章名天下。天下師尊之。見翰文大驚。稱贊之不容口。而翰審然不爲之屈也。遊京師。羣公交譽之多所契合。而於武威余闕。宣城貢師泰尤號知己。或勸之仕。不應。還過廣川。弔董子。謁曲阜。拜孔子墓而歸。已天下亂。避地南華山中。著書爲樂。洪武初。大臣交以才薦。召見時。方籍金華民爲兵。翰從容進曰。金華民多業儒。不習兵籍爲兵。徒糜廩粟耳。上立爲罷之。已上憫翰老儒。不欲煩以事。授衢州教授。會修元史。召入局纂修。撰英宗睿宗本紀。及拜住道童丞相等傳。書成。賜金綺而遣之。愛北山泉石佳勝。定居。或乘輿入城訪故舊。則留連數日。高明卓絕。所養甚深。出言簡奧不煩。而動中繩墨。極乎博而守則約。務乎大而不遺乎細。於人鮮所推讓。而所許者衆。必以爲賢。於言不輕發。而所言者人必以爲當。其所著衡運併收皇初正己諸篇。皆覃精名理。窮極造化。爲天下之大綱正法焉。祭酒吳沈以爲如五曜麗天。芒寒五色。朱紱在廟。肅然其音云。洪武十四年卒。年七十五。著有春秋集義。文曰胡仲子集。詩曰長山集。

李德字仲修。番禺人。夙負逸才。博覽羣籍。工文詞。尤邃於經學。明毛詩尙書。洪武庚戌。薦至京師。上親策問。賜徐大全等出身有差。德預焉。授洛陽典史。遷濟南西安二郡幕。非其好也。政暇徧覽帝王遺墟。登高作賦。發其胸中磊落之氣。人爭傳誦。嘗著論謂西安南陽皆天下大形勝所在。建不拔之基者。當擇而都。



之江東非其匹也。歷職郡邑十餘年。自陳衰暮。願就教官。得爲漢陽教諭。當兵革初息。爰舍翳蓬菴中。于徒僅十數輩。皆野獷。不可與語。盡心訓迪之。言諸有司。羅致民間子弟。俊穎者館穀焉。人始知向學。秩滿。改廣西義甯縣。其俗尤陋。德立法。凡遇家有吉凶事。當告假者。隨貧富以楮幣調之。孜孜勸諭。使約束鄉黨。不得爲惡。習俗日美。科貢漸盛。方有薦達。而德以倦遊南歸。卒於家。詩多效長吉。太白。孫贊笑之曰。子眞混元皇帝遠孫也。乃力追古作。有易庵集。少嘗自號采真子。著論如子書。晚更潛心伊洛。嘗謂誠意爲古聖哲心要。所作詩有曰。意誠諸妄遣。可以通天地。又曰。鑿空非自然。立異豈眞實。堯舜與塗人。其初本同一。故世稱有理學者。必曰李仲修子孚。字底信。亦能詩。

蕭執字子所。一名雅言。秦和人。祖夢得有文行。嘗廬墓三年。以毛詩訓其鄉人。執博學強識。結廬讀書於武山。尤長於詩。洪武辛亥鄉薦。選國子學錄。分教胄子。多所造就。明年夏至。上將有事於北郊。前朝丁巳。大雨初止。駕詣齋宮。召兵部尚書吳琳。禮部主事宋濂。率文學能賦之士從焉。於是執偕禮部尚書陶凱。工部尚書黃肅。翰林應奉張籌等十二人入見。時上新服絳裳紗巾。神慮閑適。顧問曰。今茲祀事。是將天宇澄霽。克厭朕心。爾等以文職陪祀。宜卽時物題詠。因命賦殿下柳榭。併荷露。退而詩成。以次呈獻。上親覽誦之。品第有差。旣而復命中官傳旨。往殿後觀梔子花。人給紙一俾。各賦詩。詩旣成。序進如初。執官最後。上閱其詩。喜動顏色。因命起居注劉季道出諸詩。令在侍者徧觀之。執班列遠。召使前。其爲上所寵異如此。贊教三年。念親老。力丐歸侍。凡三四上。乃得請。旣歸。鄉之子弟以其教太學有成也。相率修贊。從之。

游者日衆。於是衆爲建塾。買田贖助成之。蓋道義所風。不勸而自集也。性至孝。旦夕不離親側。沒廬墓三年。誘進後學。孜孜不倦。申國公鄧愈統兵。剿龍泉寇。蔓連秦和。詣軍門言禍亂之由。於是愈下令禁止。邑人德之。禮部侍郎劉崧序其詩集行於世。

秦約。字文仲。淮安人。洪武初。應召。試慎獨箴。拜禮部侍郎。以母老辭歸。再徵入京。上疏乞復書院。書堂。義學。守令之選。另立一科。四十蒞職。百日舉代。郡邑三年造冊。與誌書同進。以備國史採擇。上悅。以約年老。難任繁劇。授溧陽教諭。御史練則成。侍制吳沈薦約宿學遺老。合在館閣。不報。在溧陽八年。請老歸。卒。文章務求理勝。而詩尤工。所著詩文曰樵海集。別有師友語言。樵史補遺。孝節錄。詩話舊聞。崇明誌諸書行於世。

張羽。字來儀。以字行。更字附鳳。溧陽人。領鄉薦。授安定書院山長。洪武四年。以儒士徵至京。應對不稱旨。放還。再徵爲太常寺丞。撰滌陽王碑。俄坐事謫居嶺南。未半道召還。自沈於龍江驛前。博學好古。行章精潔。有法。尤長於敘事。詩法清麗。作畫師小米。所著有靜居集。同時同縣一道士亦曰張羽。字仲翺。能詩。書法甚工。

徐賁。字幼文。本蜀之郫人。後徙居蘇州。賁工爲詩。與高啓諸人齊名。尤善寫山水。秀潤可愛。張士誠居吳。辟爲屬。俄謝去。居湖州之屬山。洪武中。以薦至京。奉使晉冀。及還。檢其橐。惟紀行詩而已。他無所有。授給事中。進退有恆。不失尺寸。改御史。巡按廣東。又改刑部主事。陞廣西參政。以政績卓異。推河南左布政使。

方命大將靖洮岷。道出河南。以賁犒勞不時。下獄死。所著詩曰北郭集。

王佐。字彥舉。先河東人。元末。侍父宦南雄。經亂不能返。因奉母寓廣州。遂爲南海人。時孫贇與佐結詩社於南園。開抗風軒。延一時名士。佐才思雄渾。體裁甚工。贇深重之。構辭敏捷。王不如孫。句意沈著。孫不如王。會何真據廣東。開府求士。與贇首被禮聘。真敬重。使掌書記。軍旅事多見咨詢。李質者。德慶豪帥也。據肇慶。佐恐其有異志。與贇往說之。甚歡。質遂修好。然贇尤好文義。衣冠之士多往依之。歸言於真。遣使招致。由此士凡以一藝名者。真皆館穀之。廣中人文。號爲一時極盛。洪武六年。薦拜給事中。論思補闕。恆稱上意。學士宋濂嘗拜賜黃馬。上爲歌。命諸臣和之。佐斯須而就。清新富贍。上覽之喜。賜鈔。上遊幸。或遇會心處。多命之賦詩。三吾嘗同詠。署中桂。驚其才高語妙。以爲名世之作。性不樂樞要。嘗曰。蚤朝何如寢起。章服何如簞衣。卽欲告歸。或曰。少忍之。不虞性命付一擲耶。遲徊二載。乞骸。上憐其誠。允之。陛辭。賜鈔五十千。爲道路費。時天威嚴重。臣僚自陳者多被譴斥。或有不測。佐以恭慎得歸。故當時以爲難。性孝弟。父沒時貧甚。有廖元正者。爲料理喪事。殯諸南雄之五里山。終身事元正如父。及仕於朝。元正子犯法。言於有司。以己資贖罪。元正旣死。哀慕終身。著述甚富。評者比之高適。岑參焉。

明書卷一百四十六

列傳十

文學傳二

孫蕢字仲衍順德縣人性敏警儀表秀偉於書無所不窺詩文多不屬草援筆立就若不經思而雄渾深致可誦少負節槩不妄交元季避亂山澤間東筦何真保南海甚禮重之與王佐黃哲趙介等並稱五先生洪武元年征南將軍廖永忠至蕢爲真作書請降永忠徵典郡庠三年庚戌始詔天下設科取士蕢舉於鄉授工部織染局使陞虹縣主簿時經兵燹十室九空勞來安輯民多還業一載召爲典籍學士宋濂樂詔鳳承旨詹同皆推遜曰嶺表奇士也日侍上奏對便給容觀飄洒一時見者屬目上亦重之八年同修洪武正韻九年以奉常之節監祀四川居三載力求補外主簿平原無何逮繫輸左校築牆望都門謳吟爲粵聲督工者以聞召至陳詩語極忠愛釋之十一年罷歸里十五年召爲蘇州府經歷二十二年謫戍遼東都督梅思祖素聞其名迎居家塾是年黨禍時思祖已死其家得免賓佐皆原忌者獨錄蕢籍中坐死長歌就刑天下冤之門人黎貞時亦在戍收其骸葬於安山蕢著有通鑑前編綱目孝經集善理學訓蒙西菴集和陶集集古律詩

楊基字孟載。先蜀人。祖宦游江左。基生吳中。遂家焉。穎敏絕人。九歲能背誦六經。著書千萬餘言。名曰論鑒。試儀曹不利。會天下亂。歸隱於吳之赤山。張士誠時辟爲丞相府記室。未幾辭去。又客饒介所。明兵下江南。籍錄諸臣。基以饒氏客安置臨濠。旋徙河南。洪武二年放歸。尋起爲滎陽知縣。謫居鍾離。久之被薦爲江西行省幕官。以省臣得罪落職。六年又起。奉使湖廣。召還授兵部員外郎。出爲山西副使。進按察使。後被纒奪職供役。卒於京。基工詩。初會稽楊維禎客松江。往來吳中。以詩自豪。基嘗以座上賦鐵笛歌。維禎驚喜與俱。東語所從曰。吾在吳又得一鐵來矣。若曹就之學。優於老鐵學也。著有眉菴集。

高啓字季迪。吳人。少警穎。力學能詩文。尙氣。每論事輒傾其座人。張士誠據平江。文士響臻。啓獨居吳江之青邱。歌詠自適。時饒介之。丁仲容以詞學自雄。見啓詩大驚。禮爲上客。啓怡然不屑也。尤好權略。一時武勇士多下之。明興。以薦。偕謝徵等應召。修元史。授翰林編修。命教諸王及諸王子弟。一日薄暮。土御闕。樞召見啓。及徵。聞其對句大悅。擢戶部侍郎。徵吏部侍郎。未幾力辭罷去。仍賜金給牒放還。復居江上。始號槎軒。又號青邱子。銳志翩翩。先是啓以史事爲祭酒魏觀所知。及是觀爲吳守。延居城中。訪問得失。相接甚歡。會觀興繕郡治。讒者搆之。罹重辟。而上梁文適出啓手。遂同及於難。時年三十九。啓身長七尺。具文武才。於書無所不闕。爲文喜辯博。馳聘上下。精采煥發。而於詩尤工。與楊基、張羽、徐賁號吳中四傑。所著有鳴缶集、鳧藻集。

王行字止仲。號半軒。吳縣人。父市藥。挈爲助。尙醫。年藥驗千品。悉志其某某若多寡。酬應無或遺。王媪老。

好聽稗官家說。卽默記數本。迨晚歌之爲娛。主異之。爲語若能讀書否。授魯論一帙。翌日已成誦。大奇之。罄以所庠經史百子。恣其探閱。所得益深。未弱冠辭去。受徒於齊門舊居。時聲譽殷發。一時名士咸願與交。而議論踔厲。證據今古。常屈其座人。然家徒壁立。實無留策。詢所學。曰。向得之藥主人耳。爲詞章。汪洋奧美。關節開解。千緒萬端。參錯桀出一時。老生咸畏之。臨川饒介之爲參政。分守浙右。以詞翰豪視東南。號醉樵。爲之詩歌者殆徧。惟難於一文耳。問延與語。曰。是非莊騷家言。莫殫其形容。卽席爲說。不加點竄。饒頓足曰。吾見中朝才雋亦夥。未有類子敏而奇者。真天才也。亟疏薦。時天下多事。未及用。長洲沈萬三秀者。資雄當世。爲禮聘於家。每成章。輒償白金以鎔。麾去曰。使金塢可守。則然臍之慘無及也。何濫取多田翁爲。又善談兵。三吳鼎沸。所據多壘。礮石自困。私語曰。兵法不云。柔可以制剛也。或詢何居。曰。設植蕩篠。順而倖者。繫布於其端。如旣幪然。人出沒其下。雖礮至。布必隨之。低昂。則人無害而不可盡矣。後常遇春提兵至。果用是計。敵兵計窮。城遂破。洪武初。郡庠延爲經師。時訓導無常祿。猶儒生衣巾。弟子員多出綺紈。皆易之。以五經雜進問難。悉爲辯講。極底蘊。泊刪潤課業。迎刃而解。節有評品。至是皆吐舌曰。王先生未可以詞章儒目之。故有行書。廚皮漆篋之號。以其該博而無滲漏也。郡守江夏魏觀。河內王觀。以國子祭酒。刑部侍郎。前後遷於蘇。皆重之。思欲聞之朝。不果。年漸老。解去。避迹石湖。以經訓爲常。凡碑銘序記等文。求者悉歸焉。間寫圖其上。自適。旁通緇黃家學。與論苦空元寂。累日忘倦。晚更號楮園。有楮園集十五卷。半軒集六卷。學言稿十三卷。四六劄子二卷。通意宜資一卷。宋系統圖二卷。二子皆役於京。欲往。



遊焉。或尼以法網密。非儒者泮渙之日。微哂曰。虎穴尙可嬉。吾爲布衣士。何窳哉。抵京主一祝家。因之見重於涼公。藍玉延誨其子孫。每恨相知晚。數薦之。召對勸上行王道。正禮樂。簡賢立根爲首務。以其迂闊弗之聽也。未久以藍連坐死。年六十五。

高棟。字彥恢。仕名廷禮。漫士其號也。宋尙書張愼之後。曾祖麟。以出繼高氏祀。遂從高姓。棟博學能文。尤雄於詩。謂詩始漢魏。至唐號爲極盛。宋失之理趣。元滯於學識。而不知由悟以入。自襄城楊士宏始。編唐晉正始遺響。然知之者尙鮮。閩三山林鴻獨倡鳴唐詩。其徒黃元。周元繼之。棟與皆山王恭起長樂。頡頏齊名。故閩中推詩人五人。而殘膏賸馥。沾溉者多。黃終於校官。周刑曹員外郎。棟與恭並自布衣入翰林。恭除典籍。棟爲待詔。九年陞典籍。平生賦咏流傳海內。有稿曰嘯臺集。曰木天清氣集。其選唐詩品彙。九十卷拾遺十卷。議者服其精博。能書工畫。時稱三絕。書得漢隸筆法。畫原於米南宮父子。出入商高間。在翰苑二十年。四方求詩畫者爭至。金帛修飾。歲嘗優於祿入。善飲酒。喜談謔。與人無賢愚。待之如一。素強無病。晚得風眩疾。歲輒發。無甚苦。一日與故人飲極驢。夜分乃寐。旦忽眩作。弗能言。

會榮。字子敬。永豐人。永樂二年進士第一人。授翰林院修撰。命解縉選取進士。進學文淵閣。名翰林庶吉士。榮學問日進。時召入試。迅筆千言立就。理詞皆到。上屢摘羣書隱僻事問之。榮悉能對。以故上甚喜。名聞天下。明年修永樂大典。爲副總裁。陞侍讀。數侍燕閒。應制賦詩。有薦文士者。必問得如會榮否。考其文。竟不及榮遠甚。內艱起復。扈從。邑人坐奸黨事。詞及榮。詔特原。曰朕惜爾才也。榮居長安右門外。火延禁。

垣亦不問。陞侍讀學士。修天下郡縣志。爲副總裁。書成。陞左春坊大學士。仍兼侍講。從宣宗自南京還。陞少詹事。又預修三朝實錄。再扈北巡。三考會試。爲文章如源泉混混。沛然千里。又如園林得春。羣芳爛然。興致所到。筆不停揮。狀寫之工。極其天趣。他人不足。已嘗有餘。自解胡後。獨步當世。性孝友。喜獎拔。後進儀貌魁偉。襟度坦夷。而神情灑落。能飲酒。善談論。仕三十年。徒以文學自見。卒贈禮部左侍郎。袁表曰。明興。劉宋以宗工司制代言。文體渾厚。繼以東里。溫醞雅則。有歐陽少師之風。子啓。天才雄麗。倚馬萬言。其文如蘇長公。浩若懸河。注之不竭。詩古體有魏晉風。律宗初盛。唐亦一代之鴻匠也。

李夢陽。字獻吉。慶陽人。母夢日墮懷中。寤而生焉。故名。年十八舉鄉試第一。明年弘治癸丑。登進士高第。丁內外艱。戊午授戶部主事。倡爲古文辭。以變衰陋。斷自秦漢而止。六代以下弗論也。乙丑進員外郎。時外戚壽甯侯張氏。怙寵驕縱。開張皇后。奪民莊田。聲焰薰灼。莫敢問。夢陽上疏。以爲夫天下之勢。譬之身也。欲身之安。莫如去其病。欲其利。莫如祛其害。欲令終而全安。莫如使漸不可長。今天下之爲病者二。而不之去也。爲害者三。而不之祛也。爲漸者六。而不能使不可長也。乃顧汲汲曰。是奚不安也。奚不利也。奚不令終而全安也。是何異於不藥而求病愈也哉。臣謹以所見而陳之。一曰元氣之病。夫元氣之病。有其幾。無其形。譬患內耗。伏未及發。自謂之安。比及病在元氣。臣竊觀當今士氣。頗似之。孔子曰。邦有道危言危行。今人不喜人言。見人張拱深揖。口吶吶不吐詞。則目爲老成。又不喜人直。遇事圓巧而委曲。則以爲善處。是以轉相則傲。翕然風靡。不復知有言之實矣。且大臣者。庶官之表。而民之望也。今大臣則先不

喜人言。又惡人直。夫諫官得以風聞言事者也。今大臣被彈劾。則率廷辯以求勝。語人曰。我非要作官。但要屈直明白耳。及直矣。又恬然作官。此何理也。往大臣有親之喪。服除。非詔不起。今大臣服除自起矣。如此尚得謂之有禮義廉恥耶。夫無禮義。則佞人進。乏廉恥。則國無防。佞人進。則互相欺詆。國無防。則紀綱不張。臣竊謂此等不治。必積漸不可救藥。故曰。四夷未侵。百姓未離。刑政未墜。疆土未蹙。而國危主憂。此臣所謂元氣之病也。二曰。腹心之病。夫腹心之病。攻之則難。不攻則亡。今內官者。腹心之病也。夫內官陰性而狼貪。其地逼近。又朋北難翦。今倉廩場庫。錢穀之要也。皆內官主之。少者五陸輩。多者二三十輩。且夫一虎十羊。勢無全羊。況十虎而一羊哉。今某某有司。摘發其奸。幸陛下洞見其情實。外議僉曰。是必不赦。不然且竄斥。今數月矣。猶閣而不行。夫人情莫不遮於潛。而玩於彰。彼未摘發。尙有嚴心。今其奸已摘發之矣。不置之法。又不竄斥。彼何所憚而不爲乎。昔人有言曰。宦官有罪不可赦。有缺不可補。言難除也。今皇城之內。通名籍幾萬人焉。亦多矣。陛下又敕禮部。選年十五以下。淨身男子五百名。將安用耶。夫滅絕人類。必戕天地之和。戕天地之和。則災害必至。災害至。則五穀不熟。人民離散。天道乖於上。人心怨於下。而陰性狼貪之圖。無忌妄行於中國。不危者鮮矣。臣故曰。內官者。腹心之病也。今陛下誠於此時。拔廉直。獎忠鯁。斥無恥大臣。進盧扁之左。則必轉病而爲安。今議者必曰。彼曾不指實某某直。某某無恥。泛言難行。然不知上者風也。下者草也。拔一君子。則君子進。卽有小人。相率而化於善矣。且人不幸而有病。擇醫而治之者。爲愛身也。今某某有司。幸摘發其奸。是亦國之醫也。若一切閣而不行。是醫能治之。而上



而生者也。今百姓賢者百無一二，愚蠢者十常七八。然貧苦無賴，而有司者不知恤也。斂之不問貧富也。役之不問勝否也。曰：是爾職焉矣。是故富者剝削，貧者稱貸，稱貸之不足，則必鬻子，鬻子之不足，則必逋竄。一旦棄父母，捐親戚，背鄉離井，愁怨之聲，上干天和，則必有水旱風雹之災。逋者不還，居者縲絏而牽連，則必有無辜暴露之屍。臣故曰：民害者，斂使之也。夫內府供用，有常數也。宜有常簿焉。今油蠟皮張諸料等，較弘治初年，費且十倍於前。此何也？蓋下者效上者也。取贏者未有不羨者也。今既十倍於前，則戶工二部科派，必有倍矣。下之州縣，必有倍矣。百姓輸納，又有秤頭等，必有倍矣。又經內官，必有賄賂，是益又倍矣。於乎！民日貧而斂日積，當道不苦言以聞，有司乘機而肥其家。如此而猶望其治，是真卻步以求前耳。陛下前固嘗降詔旨存問矣，然薄數不減，派科不省，稱頭如故，賄賂公行無憚。此所謂虛名而實禍也。臣故曰：貪墨在位，恩不下流者，此也。三曰：莊場。畿民之害，臣伏觀洪武某年，詔曰：直隸拋荒地，聽民開墾，永不起科。夫民既自開墾之矣，不可謂非其田矣。今皇親之家，聽無賴光棍投獻，主使謂非其田也。請之朝廷，朝廷亦謂非其田也。率給賜皇親家。皇親家既奉天子命爲己有，乃輒遂白奪其田土，夷其墳墓，毀其房屋，斬伐其樹木。於是百年土著之民，蕩產失業，拋其父母妻子，千里之內，舉家騷然不甯矣。夫皇親與國同休戚者也，而祿非不豐，貴非不極也。乃祇以區區之田，損害赤子，動搖基本。如此是不欲與國同休耶？嗚呼！亦甚矣。昔者魯廢焚，孔子見之，但曰：傷人乎？蓋貴人賤馬也。今蘇州牧馬草場，與百姓爭阡而競畝者，尺分而寸割之，臣竊悲也。是非賤人而貴馬也。夫草場數千頃地耳，今三遣官矣，百姓連年

坐旬攝轉相牽聯。妨廢本業。耽闕其生理。男不乘耜。女不上機。賣男鬻女。弱者轉而死。泥塗者過半矣。嗚呼。是何賤人而貴馬也。臣雖未詳其始末。竊計今事勢。萬無百姓侵官之理。設有之。所辦亦官租耳。非若皇親之家。占之爲己有也。今據勘牒。四至與民之爭。止十之一二耳。臣謂宜置而不問。夫王畿天下之本也。今以數十百頃之地。失黔首之心。傷陰陽之和。臣故知陛下不忍矣。陛下幸哀憐聽臣愚計。敕戶部查景泰六年勘官馮譚奏內事理。以前項田土。給民徵租。但以空閑草地牧馬。六漸者。一曰匱之。漸。夫匱之。漸者何也。臣以爲兵連然耳。然又苦浪費。今各邊用兵。以將則庸。以卒則罷。糜財而無功。曠日而損威。而錢穀吏俛首供給。莫敢如何。稍有不繼。則軍吏諉以自解。是故倉廩不足。不曰兵者糜之也。是錢穀者誤之也。錢穀者不曰己誤之也。曰是無米而求粥也。於是始有和買之議矣。和買而不足。於是有空運之例。空運而不足。於是乞內帑之銀。臣始至戶部。太倉庫銀尙百七十餘萬。今銷耗且過半矣。然而乞者未已也。由是積漸而不止。雖欲不匱。烏可得耶。夫竭天下之力以供邊。而日猶不足。其故何也。糜財而無功。曠日而損威者爲之也。夫錢者泉也。言流也。散於上而聚於下。公家削則私室盈。今京城內外。千觀萬寺。亦熾矣。顧又不止。彼左右侍臣。孰非造作者也。造作動執。非以鉅萬計。諺曰十入一出。今彼鉅萬出。則其入不止於鉅萬明矣。夫上惟風。下民惟草。今方春氣和。耒耜在野。陛下乃不發倉廩。助不給。賑不足。顧徧察寺觀等。敕給費修葺之。是道民以奉佛也。彼以鉅萬入者。又何憚而不造寺。夫智者察微。今貨入而盈私室矣。又出而造寺觀矣。設卒有水旱之警。兵甲事興。內取則已匱。外斂則民窮。臣不知陛下計所出矣。



故曰又浪費者此也。二曰盜之漸。何也。臣以爲其機在民窮。夫盜者非不知法常死也。彼以爲往固無食矣。今盜而得食。卽死。不猶愈於餒乎。往固無衣矣。今盜而得衣。卽死。不猶愈於凍乎。往有租調官司之轄矣。今盜而得自由。不猶愈於追繫鞭笞乎。夫天下無智愚強弱。舉俛首捧心以事我者。以有法維之。且畏死也。今旣死而愈於凍餒追繫鞭笞之。則彼亦何所不至耶。計今事勢。非但憂盜。將必有大患。大患者何。所謂有亂之機。無亂之形也。夫今天下無不臣之邦。四夷無不庭之國。百官奉職。筐篚歲至。太倉有紅腐之粟。武庫之兵朽而不用。又無方二千里水旱之災也。然而哨聚殺人。劫縣燒村。剽掠婦女者。日相聞也。假如不幸而有方二千里水旱之災。武庫乏兵。太倉竭粟。百官不奉職。夷翟外侵。海內有警。則勢事又如何矣。故曰有亂之機。無亂之形。嗚呼。此亦可以寒心矣。臣謂宜趁此急選良有司。恤饑賑寒。以安民心。又密令整飭城池軍馬。以伺緩急之變。夫安不忘危。竊者之略。有備無患。聖王之政。況今承平日久。民不知兵。萬一有慮外之警。有如平原睢陽之倫乎。臣故曰計今事勢。非但憂盜。將有大患者此也。三曰壞名器之漸。夫壞名器之漸者。臣以爲黜陟失制也。夫明王懸爵賞以待天下之賢。將以奉天而理民也。故曰五服有章。自天命之。示非我也。又曰爵人於朝。與衆共之。明至公也。是以古之英君。甯捐百萬之費。而斬一郎之拜。其意亦謂此耳。而今乞官者官。乞廢者廢。黜其父者陟其子。黜其祖者陟其孫。臣不知陛下計所出矣。夫廢者所以報功。又示勸也。今黜者旣陟其子孫。則有功者何勸焉。是以高其爵。不足以勵。糜乎賞。不足以風。蠶緣鉗刺之風旣行。而廉恥名節之士遂寡。且陛下何利於斯而爲之也。夫薰蕕同器。不

知有薰廉汚並賞。孰肯爲廉。陛下若謂天下之大。何怪此一官。則所謂弊袴之藏。繁纓之惜者。皆非邪。惟名與器。不可以假人。臣故曰壞名器之漸者。黜陟失制也。四曰弛法令之漸。夫弛法令之漸者。臣以爲舛與玩爲之也。夫舛莫大於縱罪。玩莫大於長奸。昔者舜爲天子。警叟殺人。士師執之。孟子以爲爲舜者。但宜竊負而逃。蓋法者。公之天下。受之祖宗者也。掌於士師。士師不得而專也。出於天子。天子不得而專也。是故士師可以執天子之父。爲舜者不可私其親。曩者犯人王禮。擅搶夷僧貨物。損辱國體。傳笑外邦。獄案已具。法所不赦也。陛下何從而赦之耶。以爲無罪。則固已追償其貨直矣。以爲有罪。未聞有罪而赦之者。也有罪而赦之。是縱罪也。縱罪則奸長。奸長則政舛。政舛則民玩。民玩則令慢。則法弛。此古之所大忌。而今之所甚忽也。夫忌莫大於刑忽。又莫大於私。何則。刑天討也。公天道也。王者不私其天。故罰一人而千萬人懼。諺曰。勿謂尺五。後且不補。臣固以王禮之赦。爲弛法令之漸。五曰方術眩惑之漸。夫方術眩惑之漸者。臣以爲去之不力。則誘之必入也。夫自古帝王享國長久者。畏天而憂民也。非以奉佛者。康強少疾者。清心而寡欲也。非以事仙也。且陛下獨不見梁武唐憲乎。梁武奉佛最難。然罹禍最慘。唐憲事仙又最謹。然年又最短。此其明效大驗。彰彰可考者。而今創寺觀。請額者。陛下弗止也。比又詔葺其圯廢。臣不知陛下乃何所取於彼。而爲之也。夫真人者。太虛無爲之名也。今酒肉粗俗道士。陛下敬重之如神。尊爲真人。又法王佛子等。並肩輿出入。珍食衣錦。陛下踐祚。詔曰。僧道不得作醜事。掘惑人心。堂堂天言。四海誦焉。夫陛下神心睿姿。不減於前也。乃令復爾者。臣故知有誘者也。夫誘者必曰其道妙。其法靈。今天

屢見於上。百姓嗷嗷於下。邊報未捷。倉庫匱乏。信如真國師。道足以庇足。陛下何不遂一試之。使天變回而嗷嗷者安乎。此固必無之事。而陛下不察。反聽其誘。此臣之所日夜悲心者也。六曰貴戚驕恣之漸者。臣以爲其防決也。夫水防惟工。國防惟禮。水決則匱。禮決則陵。昔者高皇帝制親令曰。皇親之家。不得與政。臣嘗伏讀嘆息。以爲聖王不易之論。及退而考夫頒祿列爵。則又使大貴而極富。已又考其器度田奴之等。則又不使之踰也。臣於是又歎曰。是所謂禮之防也。夫皇親與國至戚也。不宜有間。今顧制禮以防之者。臣以爲此固保全而使之安也。今陛下至親莫如壽甯侯。所宜保全而使之安者。亦莫如壽甯侯。乃顧不嚴禮以爲之防。臣恐其潰且有日矣。夫下僭則上陵。今壽甯侯招納無賴。罔利而賊民。白奪人田土。擅拆人房屋。強擄人女子。開張店房。要截商貨。而又占種鹽課。橫行江河。打黃旗勢如翼虎。此謂之不僭不可。夫僭則陵。陵則逼。大逼則法行。且今側目而視。切齒而談。孰非飲恨壽甯者也。夫川潰則傷必衆。萬一法行。陛下雖欲保全而使之安。得乎。臣竊以爲宜及今慎其禮防。其所以厚張氏者至矣。亦杜漸剪萌之道也。昭聖皇太后見疏大怒。孝宗不得已。下夢陽錦衣衛獄。拷掠詰責。辭氣無所撓。一日上坐文華殿。召見大學士劉健、李東陽、謝遷。問李夢陽宜何如。劉公叩頭對曰。夢陽狂直不足深罪。上色變。李不敢對。叩頭而已。謝遷從容對曰。李夢陽雖狂。然其心無他。實欲效忠於陛下。上曰。渠無禮。何指宮中爲張氏。遷對曰。漢爲劉氏左袒。宋實所以安劉氏也。所爲氏者。猶云劉家也。上色懌。曰。謝先生言是。乃得復職。一日上獨召見兵部尙書劉大夏。問曰。日來外間事何如。劉公對曰。近釋李夢陽。中外歡呼。聖德如天地。

之大。上曰：初下夢陽獄，有勸朕杖之者，其意欲殺夢陽，以快中宮怒，使朕負殺直臣名，朕故釋之。大夏曰：陛下此事，卽堯舜之心也。正德改元，丙寅進郎中，太監馬永成、劉瑾等爲八黨，蠱亂朝政，給事中劉蔭、陶諧相繼論奏，而大臣未有言者。戶部尙書韓文日流涕憂憤，夢陽進曰：大臣同國休戚，此而不言，焉用彼相。文慷慨曰：吾當言。言而獲罪，報先帝於地下矣。乃屬夢陽草奏，文多不載，疏入，詔廷議其事，而八人者環哭上前乞命。事中變，瑾遂召入司禮監，而中官王岳、范榮皆竄死。明年丁卯，大臣多罷免，瑾知韓疏出，夢陽手書憾不已。矯旨奪劉健等四十八人官，放歸田里，榜爲黨人。夢陽與焉，瑾切齒欲殺之。又明年戊辰，矯旨羅織夢陽罪，械逮至京，再下錦衣獄。夢陽內弟左國玉者，間行徒步從入京，走康海所，語在海傳，賴力救得免。放歸，瑾敗，起爲江西提學副使，振起古學，力變宿習，褒獎義節，訓正禮俗，士翕然向風。時宸濠懷逆，招致文學，凡吏江西有材名者，卽嚼以厚利，否則威劫之。夢陽具大名，折節下之。夢陽既材高負氣，不肯同流俗，是以人多忌之。而江御史某向與夢陽有嫌，遂奏訐。上命大理卿燕忠體勘，下廣信獄，摧苦殊甚。夢陽不爲屈，竟文致閒住，而布政使鄭岳適爲濠所陷，夢陽素與岳不相能，岳旣得罪，謂夢陽傾之也。濠敗，辭連夢陽，賴刑部尙書林俊力救，得亡窮治。後大臣暨撫按數論薦，不用。卒，所著有空同集若干卷。子枝，善文賦，有父風，舉進士，終海州判官。

何景明，字仲默，信陽人，號大復山人，年十五以尙書魁其省，十九弘治登壬戌進士，授中書舍人。是時北地李夢陽、武功康海、鄂杜王九思，歷下邊貢，皆好古文辭，景明與論文語合，乃一意誦法古文，而與夢陽

又駿發齊名。憂憤時事。尚節義而鄙榮利。並有國士之風焉。往學士爲文。自六朝以後。日益靡靡。敝矣。明初。襲元習。宣正以來。駸駸如宋。而至弘正間。景明與諸君子。始一變趨古。其文類國策史記。詩類漢魏。盛唐。於是明興。詩文足起千載之衰。而何李最爲大家。今學士家每稱曰何李。屹然爲一代山斗云。在中書時。自館閣諸縉紳。與四方學士。人人願見之。又願見其詩。車馬填門巷不絕。而景明德性。隨明言儀。雍雅杯酒談笑間。詩文立就。作字復秀拔奇勁。迥出常調。一時聲傾都下。然顧高潔。不妄交遊。錢甯欲交驩。景明間持古畫求景明題。景明曰。此名畫。無污吾題。留一年終不與題。是時甯賜國姓。最寵貴弄權。景明顧奴視遠之。會乾清宮災。應詔言便事。乃極言邊言。邊軍番僧。義子數事。義子者。斥錢甯也。疏留中。師御史客死京師。權幸廖鵬者。賻之棺。謂可結縉紳。謹也。景明曰。御史生不苟受。奚爲受污地下邪。乃約所知共賻金殮之。竟卻其棺。尋督學關中。會鵬弟鸞鎮守關中。恃勢益橫。諸參隨者。遇二司不下馬。景明執參隨者。撻於市。責數之。乃諸參隨者。始人人斂避矣。先是。逆瑾撓吏部權。則移書吏尙書。讚引正大義。夢陽與姜御史詰奏。又移書吏尙書楊溥。直夢陽獄。大學士少師李西涯。東陽疏上乞休。會有兵事。又援古大臣義。爲書讓之。三書皆非身事。而抗言尊顯。語涉時忌。議者謂憂國憐才。古人莫加也。顧獨以不能干謁守中書十年。不調官。然志在經術世務。終不言功名事。其督教關中士。亦以經術世務如其所自志。關中士氣習文藝。蓋自是一大變。景明說五經義。與諸家訓詁多殊。人皆爲諸訓詁不及也。古天文地理陰陽律歷家。皆能究其指。常言彼有是。有不是。欲取經訓與諸家書。刪繁折衷。成一家言。未竟業而卒。年三十九。

景明使滇南。不持滇南一物。持父母喪。不終禫。則不酒不琴。性不喜華麗。不治產。祿入盡散親故。臨卒時。餘三十金篋中。始蠲起汝南人。以爲班固。崔駰。陸雲。王勃。復出。著雍大記三十卷。何子十二篇。詩歌千餘首。書疏騷賦序記銘贊雜文數百篇。曰大復山人集。

康海字德涵。武功人。弘治初舉進士第一。議者謂其廷試策爲明朝第一。明朝文章。至成化末多庸靡。海既有俊才。遂與何李邊王輩興起爲古文。扶衰拔溺有力焉。然性豪放。不閑小禮。恃才凌駕人。人多忌之。會李夢陽代韓文草疏。太監劉瑾已譎出之。猶不快前忿。羅以他事械至京。遂下詔獄。將置之死。時海與夢陽齊名。各負才不相下。瑾慕海。嘗欲招致門下。而海不往。瑾恆先施。必欲其一至。海每矚亡答之。竟不一入其門。至是夢陽所親有左國玉者。詣獄。謂夢陽曰。子殆無生路矣。唯康子可以解之。夢陽曰。吾與康子素不相能。今臨死生之際。乃始託之。獨不愧於心乎。吾甯死矣。左曰。不謂李子而爲匹夫之諒也。強之再三。以片紙請書數字。夢陽乃援筆曰。對山掇我。唯對山爲能掇我。餘無一言。對山者。海別號也。左持書詣海。海憤然曰。是誠在我。遂詣瑾。瑾焚香迎海。延至上座。海不少遜。瑾曰。今日有何好風。吹得先生來也。命左右設席。海曰。吾有言告公。公如聽吾言。當爲公留。不然吾且去矣。瑾曰。云何。海曰。昔唐明皇有高力士。寵冠羣臣。且爲李白脫靴。公能之乎。瑾曰。瑾請爲先生脫之。海曰。不然。今李夢陽高於李白數倍。而海固萬不及者也。下獄而公不爲之援。奈何欲爲白脫靴哉。卽奮衣起。瑾固襄止之曰。此朝廷事。今聞命。卽當斡旋之。海遂解帶。與之痛飲。天明始別。夢陽遂得釋歸。而海自是與瑾往復。遂罹清議矣。及瑾敗。人



遂指海爲瑾黨罷去不復用。海益縱聲妓。恣遊山水。讀書爲文。立名於是。故海雖廢而名益著。彭時嘗欲薦之。海答書以見意。曰：數年不覩光範。偶辱過問。感灼累日。然竊有所未安者。因公知我厚。故不避訶責。輒布上左右。惟公察之聽之。僕自庚午蒙詔之後。卽放蕩形志。雖飲酒不多。而日與銘酌爲伍。人間百事。一切置之。不信於鄉人。妻子奴僕也。蓋素性疎懶。偶因官秩。羈繫數年。若招豚擊鷹。而一旦得此中心之快。實有人所不知而已。獨知之者。自東方多事以來。聞其驍傲無狀如彼。卽或奮然有攘臂之意。隨復自笑。以爲狂奴猶爾。卽又飲酒散髮箕踞林麓。此其性習之已成。雖三公之貴。刀鋸之辱。不可奪也。況數石之粟。半幅之紙乎。僕自幼支謾無狀。性好是古而非今。始仕時。望見先皇帝寬仁大度。卽自私擬。以爲衆。夔契之業。可以復見於今。而狂放易言。略不修飾。至今上嗣位之後。又見其英毅果斷。益喜益負。以爲鄙志當究於此。一時交與之士。反覆輕易不檢。惟僕言是。是故謾論譏說。略無忌畏。日就月將。幾踵奇禍。幸免殺身而歸。而二三者又補砌所無。以爲真有使僕含垢於有罪者之籍。與不肖之人同被驅放。上辱兩朝作養之恩。下累先人狷介之業。生平微志。付之穢塗。情苦心局。不復自愛。暇日偶讀皇甫規避梁冀之事。與蔡雖郤九錫之書。喟然嘆曰：彼何獨不得含垢冒污。而成致美節如此也。又偶讀柳宗元傳曰：卽宗元有不同於叔文。然親與之交。而受其職任矣。夫身有規離之操。而迹廁宗元與禹錫之間。仁人志士。宜於此何如也。今僕所憂者。在忽有大馬之疾。死邱壑之下。不得伸其夙心原悼耳。而區區官秩之事。非所念慮也。瑾之用事也。蓋嘗數以崇秩誘我矣。當是時。持數千金。壽瑾者。不能得一級。而彼自區區於我。

我固能談笑而卻之。使饜餮巖嶮之人。卒不加於我。此其心與事。亦難且甚矣。當朝大臣。蓋皆耳聞目見。而孰知其然。方臺諫論列之際。出於一時倉卒。未暇差別。而今則又數年矣。夫伊尹之輔商也。一夫之不獲。則曰時予之辜。僕卽非賢者。然豈少於商之一夫哉。大臣者乃忍使之雜於孫聰。曹元輩間耶。故鄙人之心。至此益放。益已披髮嘯歌。至於終身而不敢悔。此非甘心爲長沮。桀溺之徒也。公之義曰。古人內舉不避親。時之可舉不可舉。非僕所知也。而僕之不才污穢。亦非公應舉之人。觀近臣者以其所爲主。於此使讖者苟爲之言。則所係於公者豈細哉。今僕之不可於當世者有五。而甚不宜出就官秩者有二。性喜嫉惡。而不能加詳。聞人之惡。輒大罵不已。今諸公者皆喜明遜而陰譏。此一不可。翰林雖皆北面事君。而勤渠閣老門下者。以爲賢能。僕懶放畏出。歲不能一造其戶。此二不可。人皆好修飾文詐。僞恭假直。而僕喜面訐人。未有不怒者。此三不可。士大夫不務修身法事之業。而俱呻吟詩文以爲高業。見其詩若文。不能不怒。故見輒有言。而彼方望我以爲美也。我以言加之。此四不可。與相好者接。必因其職事。加勉戒之詞。多忤其所好。彼或未從。卽拒而絕之。以此親疎多怨。苟復見其所愛者。又不忍不告。或又告之。彼卽又不從。而僕又絕之。此五不可。執德不宏。不能信之於人。雖頗自好。而當世談論之士。多加詆謗。自入有罪者之籍。污穢終身。莫能自潔。使平日所立之志。扁閉淪落。智高萬物之上。而名陷九淵之下。於中夜竊自歎悔。不當輕易效慕世俗科舉徇外。搆此兇溺。今又不傲而欲仕乎。此甚不宜出者。一時同出之人。固有不幸而被污者。然罪大惡極。羞談於婦人女子之口。尙十之九。彼莫不覲幸僕出。以爲先容之地。而當時

幸執。又率崇私愛而乏分別。苟欲引其私人。必援僕爲喻。是所以用僕者。非必實知其爲人。而真明其有誣也。如此則是以賢者之身。而爲不肖者之資矣。語有曰。君子非其招不往。以不賢人之招招賢人。如之何其可往哉。今衆人雖有不肖謂僕。而僕未嘗一日不以賢君子自謂。已如此自謂。而人以彼謂己。蓋所謂嗾爾而與。乞人不屑者也。此甚不宜出者。二。明公之意。特出於一時愛念之篤。偶未詳究及此。然言出乎口。通乎心。明有日月。幽有鬼神。區區平素之悃。可一鑒而盡者。公如覺之。則信其爲肝膈之實。慨然憐我體我矣。家居多蓄聲伎。每自彈琵琶。侑觴客過武功。未嘗不置酒高歌。盡歡洽。有貴官過海。海具酌道及朝政。海輒舉大觥飲之。不使言酒醑。乃言欲薦海。海正腹琵琶。搯歌烏烏。遽舉擲之。貴官避去。自是無言及薦海者。海年八十餘。以壽終。所著有對山集百餘卷。泃東集諸書。子栗。字子寬。亦有異才。能詩詞。不第。早卒。少子櫟。舉於鄉。爲靈壽知縣。有文名。曾孫萬民等。皆有文集行世。

# 明書卷一百四十七

## 列傳十

### 文學傳三

楊慎字用修號升菴四川新都人父廷和歷官少師大學士慎生而岐嶷穎達四歲母夫人教之句讀併授以唐絕句輒成誦稍長奮志誦讀不出外戶罹母憂極其悲號廢食骨立未幾祖母葉訃聞隨父回蜀守制祖留耕授以易兩句而治不遺一字擬作古戰場文有青樓斷紅粉之魂白日照翠苔之骨數語人傳誦祖極稱賞復命擬過秦論益大奇之曰吾家賈誼也時年十二辛酉父罷闕慎亦入京師有過渭城送別詩及霜葉賦一日偶作黃葉詩李東陽見之曰此吾小友也乃進之門下命擬出師表及傅奕請汰僧尼表東陽覽之謂不減唐宋詞弘治己丑侍父入禮闈時崔銑試卷分考疑其刻深弗錄慎見之愛其奇萬以呈父遂擢詩魁崔知之稱爲小座主時年一十八丁卯歸應四川鄉試擢易魁戊辰春試入國學祭酒周玉類試之曰天下士也已已歷事禮部尙書劉宇見慎問曰子爲誰對曰楊慎劉曰本部天下人豈必一大臣子弟耶乃稱歎不置辛未會試第二人殿試第一人制策援史融經敷陳宏剴授翰林修撰時年二十四癸酉丁繼母憂明年藍鄂諸寇作亂慎在邑城中日夕戒嚴有賊數百詐稱官軍以給門者

慎率守雉堞者詰之散去服闋入爲經筵展書官及校文獻通考時武宗遊幸宣大榆林諸邊返而復往慎疏切諫不報世宗卽位開經筵慎爲講官進尙書金作贖刑之章言聖人贖刑之制用於小過者冀民自新之意若大姦元惡無可贖之理時大閹張銳於經等皆犯先朝事罪當死以進金銀得免故及之壬午慎代祀江濱及蜀藩諸陵寢著江祀記與給事熊浹御史簡霄遊浣花溪載酒賦詩癸未募修武廟實錄慎練習朝典事必直書總裁蔣冕費宏曰官階雖未及實堪副總裁者乃盡以藁草付之刊定甲申七月兩上議大禮疏嗣復跪門哭諫下獄廷杖越十日復杖之慎斃而復甦謫戍雲南永昌衛時同事死者配者黜者左遷者二百八人時年二十七至雲南病馳萬里羸憊特甚栖栖旅中方就醫藥而巡撫台州黃衷促且甚慎力疾冒險抵永昌幾不起巡按郭橈清戎江良材極爲存護卜館雲峰居之且上疏乞宥議禮諸臣郭亦被詔下獄斥爲民丙戌聞父疾疋馬問道十九日至家父悅而疾愈復就戍所時土舍安銓鳳朝變爲亂攻掠城堡慎歎曰此吾效國之日也乃戎服率旅僮及步騎百餘往援木密所守禦入城固守明日賊來攻城先以甯州土舍陸紹先率兵戰城下慎以城中兵鼓譟出賊敗去慎復歸會城己丑八月父廷和訃至奔告巡撫歐陽子重疏上得歸襄事復還滇布政高韶聘修雲南通志時鄉有欲冒嗣穎川侯友德以覬世爵者慎不可乃乘張羅峰復相流言欲中之慎遂去庚子巡撫劉大謨聘修蜀志壬寅還戍所丙午冬大理推官吳宗徵署安甯州奸規州利欲權民鹽牛慎言於當路得免丁未居高峽水莊名十二景日與交遊倡和四月屬簡紹芳諱漢王褒移金馬碧鷄文於羅漢寺之崖凡招提佳勝會意

處便操觚留題數與滇之鄉大夫遊昆明池有池賞集時在逸武弁得委祭龍海口。躡肆狂惑請丁夫六千督往注濬。剝衆利州人苦之。慎致書巡按御史趙炳然罷之。己未六月。遭疾卒。年七十有二。穆宗卽位。追贈光祿寺少卿。慎孝友性植穎敏過人。家學相承。益以該博。凡宇宙名物。經史百家。下至稗官小說。醫卜技能草木蟲魚靡不究心多識。闡其理趣。而訂其訛謬。正德間。武宗閱文獻通考。天文星名有注張內閣取祕通書考。又作注張中使下問欽天監及翰館中皆莫和爲何星也。慎曰。注張柳星也。歷引周禮史記漢書以復。又湖廣土官水盡源通塔平長官司進貢同官疑爲三地名。於長官司上添一三字。慎曰。此六字地名也。取大明官制證之。嘉靖初。給事中張紳上言時政論學術不正一條。有喬宇嵬瑣之語。上問之內閣。慎適在館中。卽取荀子非十二子篇以復。大學士蔣冕喜曰。用修之博。何減古之蘇頌乎。乃若論王導之賊晉室。辨太王之非翦商。魯之重祭不始於成王周公。春秋五伯。深斥乎楚宋秦繆。引墨子及修文御覽以辨范蠡無載西施之事。引黃東發蘇東坡之言及李漢韓文序以辨文公與太顛書之僞。駁歐陽氏非非堂之說。傳節婦唐貴梅之死。此又證據古今。闡揚幽隱。皆其有功世教也。至若陶情豔辭。寄意聲伎。落魄不羈。又慎所以用晦行權。匪佞情所測。昔重慶守劉繪貽慎書曰。夫人情有所寄。則有所忘。有所讓。則有所棄。寄之篤。則人無所忌。無所忌。而後能安。無所貪。而後能適。足下所爲。蓋求其適與安也。古人買田宅。擁聲伎。皆豪傑蓋世之才。豈獨抱尺寸者之見也。僕觀足下。自蒙難以來。嘔心苦志。羣文讀經。筵搜百氏。窮探古蹟。鑿石辨剝。破塚出遺忘。有僻儒苦士。白首蓬壺。日自纂索。所不能盡。而謂竭精蕩。



神於逸欲聲色者能之乎。人以爲知慎之深。慎嘗語人曰。妾性不足恃。日新得業。當自心力中來。故好學窮理。老而不倦。平生著述百餘種。幾三千卷。

瞿景淳字師道。華亭人。生十月。能誦詩。闕睡八歲。善屬文。爲經生業。其思川湧雲聚。頃刻得數百千言。時甫踰冠。而試輒屈其諸老先生。諸老先生人人自以爲弗如也。試不利。力學業。益精工。務究於所以作者之旨。而不爲蹈徇。所謂朱絃疏越。一唱三歎。有餘音者矣。天下稱王鏊經業爲明冠。獨景淳繼之。鏊會元及第。景淳久困諸生間。減文產。教授里中。自給。意豁如也。嘉靖癸卯。舉於鄉。明年甲辰。亦會元及第。授翰林院編修。滿九載。最遷侍讀。久之。進左諭德。侍讀如故。遷侍讀學士。視翰林篆。總校永樂大典。亡何以太常寺卿。領南京國子祭酒事。已卽南京爲吏部侍郎。三載。當入奏續。穆宗卽位。以禮部左侍郎召。旋用大典總校勞。兼翰林院學士。食二品祿。時大暑。就道而病。歸里。上疏請告。不許。強自力入朝。留侍經筵。修世宗實錄。上所以用之意益切。而病發益不支。疏復乞骸骨。予告歸。不及一歲而卒。贈禮部尙書。諡文恪。景淳爲人孝友。天性篤至。然不以峻行潔。寬然長者也。其爲諸生。貧甚。數棄不色戚。既第。日隆貴。不色喜。所接卽匹夫孺子。而不以惰見。其最重若相臣。而無卑儀。貌不能中人。而毅然有三軍不可奪之氣。封懷慶諸王爲副使。時鄭王以言事忤旨。徙鳳陽繫。而世子攝國事。懼。謬爲恭敬。餽迎用幣重。一切謝弗納。其正使吳恭順侯。以景淳故。亦弗納也。而世宗已密使調之矣。侯乃感悟。語調狀曰。微公。吾幾中明法。景淳曰。吾不知也。第吾所持使當如是耳。景淳當請告還京師。從衆謁嚴嵩。嵩莊謂客曰。倭旦夕平。云何。胡總督

才足辨也。而南中人往往爲倭挫。胡君何好亂也。胡宗憲者。嵩客也。景濬前立應曰。固也。相公雖明。遙度之。不如不佞目覩也。胡君擁十萬師。無尺寸效。而賊日夜鬪。赤子財賦地。不佞南中人。不得一單枕臥。何言好亂也。相公業不欲聞之。誰爲相公聞者。於是嵩改容而謝曰。善。夫生之箴我。然數已目攝之矣。景濬領治誥敕。而陸炳爲緹騎帥。與嵩表裏爲奸。勢傾天下。後先有四妻。至欲封其最後者。獨難。景濬騰。陝兵部移以請。景濬執不可。嵩爲請之。又不可。則囊金而夜要焉。景濬笑不顧曰。公毋溷我。吾所守禮也。炳不自憚去。竟不敢言封最後妻矣。學士地親而格重。不常祭酒。卽祭酒不常南。而景濬意殊安之。且曰。吾懼夫不稱乎抗顏者耳。居四載。無一書。政府人問其故。笑不容。四方造請碑誌序記。日踵門。投甃而應之。有餘功。其揮灑若不經意。而規歐藻蘇。舂容乎言之也。人稱其爲德不近名。爲文不近好。爲吏不近俗。初道病欲歸。而貽書李春芳曰。諸公在廟廊。固重用賢矣。而易於退不肖。夫退則錮之。與其輕而退賢也。夫甯誤而容不肖也。且縣官方急材。以南北無足使者。不於此時博選而厚植之。一旦何以應詔。春芳矍然稱服。景濬少時嘗扁舟巢湖中。夜有炬火數百千逼舟。乃厲聲叱之曰。吾在何爲者。卽應聲而滅。居昆湖人稱爲昆湖先生。有文集行世。

王慎中。字道思。別號遵巖。本固始人。徙居晉江。行二。因稱爲王仲子。生有奇質。母李教以詩。輒記誦不忘。父教以對語。應答如響。年十三。四通舉子業。且多讀古人書。嘉靖乙酉。年十七。舉鄉試。明年。舉進士。授戶部主事。監兌通州。往監兌者。惟取完事。不復及國家大計。慎中獨急轉輸。革侵耗。宿弊爲之一清。暇則讀

五經暨百家言詩文具秦漢魏晉風骨。又做晉人作書。遂擅臨池。未幾改禮曹。更得一意於文事。交遊如八才子外。給諫曾前川。提學江午坡。學士華鴻山。屠漸山。相與切劘。各成其學。世宗方重祀典。文制禮作樂。四郊改建。百役奔繁。慎中時典祠祭。督工考禮。克副尙書之託。辛卯。各省鄉試。以京朝官爲主考。慎中得廣東錄文甚佳。得林大欽爲首。明年殿試復第一。朝議破格用人。將取部屬充館職。識部屬無如慎中才者。權貴人欲其一見。而慎中固不肯往。曰。吾甯失館職。不敢失身。乃改吏部。慎中在吏部。以才高。事事得與謀。進驗封郎中。會忌之者。短於大學士張壁。因以覆方士張衍慶請封事。謫判常州。慎中在郡。能革吏弊。得民心。巡按御史郭宗皋夙重其才。譽揚之。而巡按候位待之不少假。委署江陰。縣多大族爲不法。慎中不以遷客少偃蹇。至則延見父老。舉廢事。除積害。怙勢不遷者。首置之。法一縣肅然。尋陞戶部主事。再陞禮部員外。俱留都冷曹。因得益肆力問學。嘗與龍溪王畿討論古文。儒言精心。求之於聖賢之微。多所契合。慎中夙好古。漢以下著作無取焉。至是始讀宋儒之書而喜之。又喜曾王歐三氏文。卽眉山兄弟。猶以爲過於豪而失之放矣。以此自信。乃取舊所爲文悉焚之。製作一以曾王爲準。唐順之初見。不肯服。久之相解。亦變而從之。嘗語人曰。吾學問得之龍溪。文字得之遵巖。其推許如此。丙申。陞山東提學僉事。慨然以古風教爲己任。章程條約爲之一新。時下寮參謁。曲膝過恭。乃痛爲革禁。士以士禮見。教官以教官禮見。踵舊習者一體懲戒之。所試卷品藻彈射。百無一失。其高等士。率以次得雋去。尋進江西參議。慎中往來白鹿鷺湖間。與聶豹羅倫歐陽德等交遊。講習聖學。益進。俄遷河南參政。抵任。禁有司不許科擾。

章聖梓宮過河南。供億繁多。下吏有棄官遁者。慎中身任其役。察吏咸仰賴之。歲饑。慎中親歷郡邑。開倉發粟。民獲更生。辛丑考察。以不附夏言報罷。慎中因至淇上。倘伴百泉蘇門之間。歸年三十有三。慎中少年英氣太露。如太阿出匣。知其難犯。久之。涵養深沈。而世竟莫能用矣。其爲文也。恆以構意爲難。每一篇必先反覆沈思。意定而辭立就。細觀之。鋪敘詳明。部伍整密。語華贍而意深長。按之不亂。而呼之應節。片紙隻字。得之者有如至寶。嘗言吾之爲文。不外古人。而有高出古人者。其自負如此。閩士日以所業請正。門牆幾不能容。凡監司部使者行縣。莫不造其廬。講道問政。居嘗念從仕之早。不獲盡力於父母之奉。故其罷也。葬父養母。極盡心力。又以爲國家承平日久。民不知兵。一旦變作東南。海上逋逃。是爲大患。泉固濱海。且與漳鄰。深爲可慮。建州爲八閩上遊。吾嘗有意於此。其子聞之。乃卜居焉。後倭患作。一如所料。戊午夏。賊自武榮入郡境。市鎮居民。扶老攜幼。驚逃山谷中。有倡爲清野之說者。督責入城。慎中撫髀嘆曰。是大失計。清野乃北邊寇至。急斂人畜。使彼無所掠。若內地。惟在郊關外村落生聚。然後能成治耳。今宜速令各鄉大姓。盡還故居。相度地利。自相團結。使盜至不得逞。而後城內可恃以爲安也。後數年卒。壽五十一。

趙時春。字景仁。別號浚谷。平涼人。爲人嚴毅介特。與士大夫處。意有所不可。議論有所不合。必引繩按矩詰責之。不少貸。故賢者服其正。而在中人。咸疾其太剛。幼與羣兒戲。每列旗部署。自長御之。年十四。舉陝西鄉試。十八。試禮部。哀然爲舉首。當是時。海內伺其有所製作。爭傳誦之。而時春則習騎射。談甲兵。日以

邊備之不修爲大戚。或語及北口。方持杯酒相譔笑。輒裂眦攘臂。謂所知曰。使吾得備偏校。領精兵五千人。操勁弓巨矢。間以長槍大斧。旣掩灘邱。福不足平也。故在賢者率壯其志。及再失官。敵果入犯。遊騎薄都城。世宗用薦。召爲兵部職方主事。遷山東按察僉事。領民兵。轉副使。遷巡撫山西都御史。提督鴈門諸關。初嘉靖丙戌。時春舉南宮第一人。改庶吉士。授戶部主事。調兵部武庫主事。卽疏請禁諛佞。正士風。又疏錄用諫官。明善惡。闢異端等七事。下詔獄爲民。尋改編修。兼司經局校書。疏請正東宮朝會禮儀。備文武官僚。以崇國本。又罷爲民。其爲政於晉。斥貪墨。省征徭。抑求請。絕餽遺。曰。吾不敢竊府庫以自潤。亦不能借府庫以市恩。宗藩貴官。相戒莫敢犯法。一時文學氣節政事之聲。振動天下。乃皆曰。此儒者之末事。其志專在攘夷。霍復祖宗之疆宇。遣後世以長治永安。而卒不獲試。此世所爲深慨也。其在職方。坐議馬市非策。又以能兵爲逆鸞所忌。幾得勝死。在山西。檄將士禦敵代州。身甲冑。督兵繼進。斬寇若干級。而總兵李淶乘勝入敵伏中。敗沒。詔解官聽調。卒以不起。時春少讀書。日記萬餘言。凡史所載天文地理戶口錢穀多少之數。與寇戎蠻貊之詭姓隱名。歷歷誦之無爽。所爲文若詩。豪宕閎肆。伸紙行墨。滾滾而出。若不經意。而於古人之法度。靡所不合。說者以爲有司馬子長李太白之風。唐順之於文士。鮮所稱許。嘗曰。宋有歐蘇。明有王趙。其推重若此。王謂遵巖也。

李攀龍。字于鱗。山東歷城人。其家近東海。因自號滄溟。當其業成時。海內學士大夫。無不知有滄溟先生者。父寶。以貨事德莊王爲郎。善酒任俠。不問家人生產。繼娶於張。夢日入懷而生攀龍。生九歲而孤。其母

張影相弔也。且繙繻不足以資修脯。而自其挾冊請益。塾師爲之遜席者數矣。補博士弟子。與左長史許邦才。少保殷士儵。結髻亂交。晉江王慎中來督山東學。奇攀龍文。擢諸生冠。然攀龍益厭時詩。調話學問。側弁而哦。若古文辭者。諸弟子不曉何語。咸相指攀龍狂生狂生。攀龍坦然不屑也。曰。吾而不狂。誰當狂者。亡何。舉其省試第二人。三年。成進士。授刑部廣東司主事。攀龍既以古文辭創起齊魯間。意不可一世。學而屬居曹無事。悉取諸名家言讀之。以爲紀述之文。厄於東京班氏。姑其狡狡者耳。不以規矩。不能方圓。擬議成變。日新富有。今夫尙書莊左氏。懷弓考工。司馬其成言。班如也。法則森如也。吾撫其華而裁其衷。琢字成辭。屬辭成篇。以求當於古之作者而已。操觚之士。不盡見古作者語。謂攀龍師心而務求高。以陰操其勝於人耳目之外而駭之。其駭與尊賞者相半。而至於有韻之文。則心服靡間言。蓋攀龍以詩歌自西京逮唐大歷代。有降而體不沿。格有變而才各至。故於法不必有所增損。而能縱其夙授神解於法之表。卽所稱古作者。其已至之語。出入於筆端而不見迹。未發之語。爲天地所祕者。創出於胸臆而不爲異。亡論建安而後。諸公有不徧之調。攀龍以全收之。卽其徧至而相角者。不啻敵也。當攀龍之爲主事遷員外郎。以至郎中曹。事寢以劇。守文法無害。而其業日益進。尙書凡有著作。輒以屬攀龍。藉藉公卿間。然攀龍竟無所造。請于贊。不爲名計。出曹一羸馬。鑿鑿歸杜門。手一編矣。與同舍郎徐中行。梁有譽。王世貞。中書吳國倫。考功郎宗臣。相與切劘千古之事。攀龍成弟蓄之。爲社會。時有所賦咏。人人意自得。最後攀龍出片語。則人人自失也。攀龍雅不欲以刀筆見長。然其聽識最號公平。柄臣子銜邊帥不通賄。中以法。



欲置之死。攀龍持不可。後其人卒。自奮功名。致大將。出爲順德知府。問所以守順德者。攀龍曰。使吾僕僕途道。事嚴客。容驕鞠。廳。晚上官之色而進之。則俱有所不能。晨興坐公堂。掛屬吏。考計。延見鄉老。問疾苦。爲興除。脫若承蜩矣。守順德可一載。所不報最。則曰。君子之至於斯也。吾或未之見也。奏記臺使者。手自削牘。牘多古文辭語。爲其名高已者而已之。然攀龍鬻鬻自濯洗。勤於大要。居久之。政聲流通。鄰郡嚴事攀龍。若大府。以故得請白媪志。嘗鬻馬牧地。垂三千金。留永濟倉粟。毋灌輸京師。以餉戍卒。裁將作供比。真定十之二。益永年傳於沙河。邯鄲界中。寬二邑力。移郡尉。置鉅鹿官亭。扼盜衝。又移巡司黃榆嶺。爲晉趙開。前後爭得之。臺使者毋以難也。攀龍又謂京師仰東南餉。不時至。而燕齊汴趙。邊河百里。而近者毋出賦錢。皆賦菽粟。游於河。達京師。緩急一策也。時頗隄之。尋擢陝西按察副使。視學政。攀龍謂陝古西京也。先朝士大夫。北地外多陽浮慕古文詞。而時離之。思以實反其始。有機矣。督府以檄致攀龍。使屬文。攀龍不擇曰。副使而屬視學政。非而屬也。且文可檄致耶。會其地多震動。念母老家居。遂上疏乞骸骨。拂衣東歸。吏部才攀龍而欲留之。度已發。無可奈何。爲特請予告。故事。外臣無予告者。僅攀龍與何景明二人耳。攀龍歸。則搆一樓。田居。東眺華不注。西揖鮑山。曰。他無所溷吾目也。繡衣直指。郡國二千石。干旄。屏息巷左。納履錯於戶。奈攀龍高枕何。去亦毋所報謝。以是得簡貴聲。而二三友人。獨殷許過從。靡間。時徐中行亦官罷家居。坐客恆滿。二人聞之。交相快也。攀龍乃差次古樂府擬之。又爲錄別諸篇。及他文。益工。不經而走四裔。復用薦。起浙江按察副使。嘗視海道篆。按覈軍實。一切治辨。俄遷布政司左參政。奉萬壽表。

入賀道拜河南按察使。中州士大夫聞攀龍來，鼓舞相慶。而攀龍亦能摧亢爲和，圓方互見。其客稍稍進，無何，以內艱還里。不勝毀病，卒。年五十七。所著白雲樓集三十卷，子駒博學能文章，有父風。

陸師道，字子傳，長洲人。生而穎儻，七歲能裁小語詩，稍長，詩文益進，秀眉美姿，玉立颯然。舉應天鄉試，再屈公車，而詞賦聲隆隆起。凡六載，始成進士。所射策入夏言手，大奇之，爲言於李時曰：「是子也。」其文賈董而書則鍾、王，以第一人聞。是時，上不盡寄相臣柄，移之二甲，得工部主事，任職潔廉無害。夏言內自恨，奏改禮部儀制司，供事制敕。師道雅不欲近權貴，而念越人勇之說，進所取應制酬代漸詭，因母陳病，請急歸侍。久之，母病浸劇，師道謝客，隱湯藥間，蚤暮無間。時時搏頰，籲天請代。又嘗割股，羹而進之。病良已，又病目，先生舐之，亦已。會所予告過期，遂不肯出。益肆力於學，其學自九流七略，稗官黃衣之屬，亡所不窺。獨抄典籍，後先積數百千卷，丹鉛儼然。益工歌詩及古文辭，又益習書，小楷以至古隸，皆精絕。又傍晚繪事，簡淡咄咄，逼倪元鎮。時待詔文璧里居，亦善詩及書繪事。師道造門，用師禮禮之。人謂師道業已貴，胡折節乃爾，且不聞世以執目璧耶。師道曰：「子言之誤。夫文先生，以執藏道者也。自吾見文先生，無適而非詩也者，奉之益篤，璧亦篤好之，卽膠漆莫喻也。諸臺使慰薦先生者，無慮數十疏。自世宗朝，執政者好拔其黨，據津要以明翼毗，而輕於棄名士大夫，而士大夫亦醜之，莫肯爲用。時有參議王庭，給事陸粲、袁襄，皆里居，與師道善，而其所取友如王寵、彭年、張鳳翼兄弟，多往來文璧家。與璧之子博士彭司諱嘉，日相從，評罵文字，考校金石三倉鴻都之學，與丹青理茗，盃鱸香脩，然竟日間，從諸賢出游汎口湖，取越來道。

放舟胥口尋覽虛邱上方支硎天池玄墓靈巖鄧尉萬笏大石之勝吳中好事人操酒船迹之於山水間師道亦無所拒取饋適而別輿到弄筆得薄蹠阿錫一點染若重寶蓋是時海內懸格以購璧迹次及師道師道不爲意尋其母卒師道哭毀幾滅性而愛弟安道亦卒以是邑鬱中風厥憤憤嘔沫久之漸愈而性理亦少錯矣林下踰二十年以屢薦起補南儀部召爲膳部郎中擢尙寶少卿尋奉使入秦祭秦先王殊自快以生平所慕者關中形勝今幸一寓目乃縱游二華觀龍門砥柱浴驪山溫泉弔漢唐諸陵所至皆有詩而秦之嗣王習聞其名厚幣以饗謝弗納歸穆宗卽位尙復作上疏乞歸六年卒師道初號元洲尋更曰五湖年六十四所著文集在史子漢鐫若干卷二子士謙士仁皆有名士風

王世貞字元美太倉人六歲出就外傅輒嗜古文辭十五淹緯如宿學有鸞寶刀者師命咏之應聲有少年醉舞洛陽街將軍血戰黃河漠之句師爲之避席弱冠舉嘉靖丁未進士授刑部主事曹務旣簡益以辭賦自雄與李攀龍宗臣吳國倫徐中行稱同調曰五子名藉公卿間世貞每當剖決案牒所讞獄度得請輒手錄付吏趣書之各以輕重決遣人或稱平自是銓部兩以督學擬世貞皆爲權相嵩所沮又半載遷青州兵備青多大俠巨盜探丸殺人有司不能制世貞集強壯教之射申飭保甲重捕盜之賞又於州邑畫地爲界以義官統之盜當時捕獲者爲上不出境獲者次之拒不能勦者又次之凡盜從其所起而不覺察者經其所過而夜巡不傳捕者罰釋盜而覺者立杖死以其法行之期年盜盡解散先是楊繼盛下獄世貞入獄共飲泣又爲盛妻草疏嚴嵩恚甚無何父子爲嵩搆死於法世貞解綬奔還伏草土中幾

十年嵩毀薦起之。堅不出。以八事應詔曰：此可藉手以謝朝命矣。固辭不報。乃起就官大名。大名爲州邑十有一。而真定三十餘。以軍興論供輸。則大名與真定等。而是時大名闕飭兵使。其治真定者。復委十之六於大名。曰：大名饒而真定瘠也。世貞力爭。乃不果增。居一年。移浙江參政。下車。摘一二墨吏及巨室。裁抑之。吳興久雨。郡富人故閉糴。粟踊貴。世貞首捐俸。郡縣長而下次之。又募民入粟。庫中給冠服。乃冬報粟得三十萬石。又疏乞改折。得十五萬石。人賴以活者甚衆。未幾。進山西按察使。以內艱去。服除。補湖廣。旋遷廣西。轄未一月。入領問卿。又八月。以御史中丞出鎮鄖。世貞爲糾劾貪縱。咨訪將才。刷軍政。清屯田。鄖爲改觀。張居正弗謂善也。世貞意不自得。解官歸。久之。補南大理。又久之。補應天府尹。皆不赴。其後。兩京臺省交薦。起刑侍郎。尋轉兵侍郎。以考編進南刑部尙書。自尙書郎歷卿長。凡四十年。其間條論封事。皆天下大計。而所至吏事精絕。尤不可悉數。最奇者。莫如青州治盜。及楚中樂平王事。都下盜劫。緹帥陸炳索不得。後濟南獲盜房四者。妄承之。世貞曰：狡賊欲緩死耳。立訊曰：若盜陸公耶。曰：然。賊安在。曰：在請械某而取之。曰：若劫陸公。何狀。曰：髻而肥。何衣。曰：衣朱而圍玉。世貞大笑曰：若未嘗識陸公。陸公非髻而肥者。盜搏額大服。部民雷齡。以捕盜橫萊蕪間。海道宋購之急。而遁。宋以屬世貞。世貞欲掩取。而微露其語於王尉。捕者還報。又遁矣。世貞陽曰：置之。又旬月。而王尉獲他盜。世貞知其爲齡力也。忽屏左右。召王尉詰之曰：若奈何。匿雷齡。往立階下。聞捕齡者汝耶。王驚謝。無所逃責。願以飛騎往。俄捧齡至。世貞曰：女當死。然女能執所善某盜。借來女生矣。而令王尉與之。日果得盜。世貞遂以還宋。而請寬之。官校捕七盜。

逸其二盜首妄報逸者姓名俄縛一人至稱冤乃令置盜首庭下差遠而呼縛者踞塔上其足躡絲履盜首數從後窺之世貞密呼一隸蒙縛者首同出而易其履以入令盜者證之盜首不知其易也卽指絲履者曰此是也世貞大笑曰爾乃以吾隸爲盜卽釋縛者去徐進道者蓄養亡命而以橫占伎女被訟捕之不獲俄有令請問曰進道勒兵反矣世貞偵之果然而故緩其獄令縛賊自效會有李卿者進道密友也世貞召謂之汝交關進道罪應死能以進道來貸汝卿應命去俄報進道飯某所矣卽遣二十騎往取之而以一騎入營立散其黨亡諱者在鄆時驛報有樂平王次子奉高皇帝御容金牒祝髮爲沙門行遊天下敕郡縣供帳世貞曰藩王有宗正條錮城中不得出而譁張如此遣輕騎孟光化偵之則其人以御女術游藩邸間崇王賜以椶轎紅杖所至嚮守令而姦人李汝貴等爲之翼鞠之則平涼民賀祿也諸摘發隱伏皆此類能聲日馳都下都下士聚而嘆曰王弇州文而豪乃任吏耶方陸炳貴幸用事受巨璫指匿奸狡闖奇欲貸其死世貞搜炳家得之炳宛轉請脫旣復因執政以請卒不許又才高不能無所睥睨當時無不側目世貞者已高拱柄國世貞引母疾乞休拱曰吾出而彼歸者何也已有伺拱旨中之者居正欲引世貞自近世貞謝唯唯會荊州地震世貞引李固京房占臣道太盛坤維不甯又有譁辱邑令者王生居正婦弟也世貞論奏不少貸居正積不能堪雖稍遷廷尉京兆以貌示用而竟以浮言嫉之去世貞生而美姿貌風采玉立與客談笑溫秀之氣溢於眉目間語及古人忠孝節烈則又慷慨淋漓爲泫然罷酒在浙中修岳武穆於忠肅祠墓爲文以奠辭極悲壯南陽祠張睢陽及鐵鉞在南都請崇文廟蓋配享

世貞嘗言曰。吾讀書萬卷。而未嘗從六經入。每欲牽衣窺廊廡之末。則世人齷齪。泉比招搖門戶。而聚生徒者。吾方恥之。吾雖未聞道。然誦法一念。迄死未敢忘。故其居喪也。凡三年。不茹葷御室。凡十年。始具衣冠。預燕會。家無姬侍。臧獲輩以百指。亦無一人曉聲律者。其父施義田千畝。倍拓之。生平於故舊兄弟。白首無間言。好推李攀龍。尤不惜以齒牙筆札。緩急人。客或一歲數及門。或一人迫得數十函書。或進而附世貞以成名。名成而更立門戶。且忍於詈世貞以示角。世貞弗爲異也。客至而復請者。與如初。其門賢愚醜好。靡所不具。而中間交態離合向背之故。亦幾百變。世貞皆安之。彌成其大而已。祖倬。仕至南京兵部侍郎。倬生南都察院右都御史兼兵部侍郎。贈尙書。悻弟世懋。仕至太常少卿。其詞學與世貞埒。所著曰。弇州四部稿。續稿。弇州別集。觚不觚錄若干卷。世貞天挺靈秀。博極羣書。古今宇宙之間。無所不知。氣雄偉。骨力蒼勁。下筆霆擊。颯馳。嶽立海運。說者謂明之文章。自李何而古。至攀龍道昆而精。至世貞而大。誠至言也。

王世懋。字敬美。號麟洲。別號牆東生。登嘉靖十四年進士。未授官。會父悻被嚴嵩害。歸。嵩敗。與其兄世貞。白父冤。除南京禮部主事。益肆力於古文章。而六季之綺麗名勝。觴酒詞筆。靡所不領。會居無何。遷北禮部郎。又遷尙寶丞。與故人黎惟敬等日相逐。詩酒之社。又善書。所揮染。篇翰流豔。人目忌者。緣飾有游閒公子之稱。出爲江西參議。精心訊諜。勤職業。屢遷福建督學。品藻甚當。進左參政。入爲南京太常少卿。縉紳先生欣得一選。以爲祥麟威鳳。筆研之請無虛日。尙能應之。已而疾作。請告歸。遂不起。年五十三。公精



周易、傍通諸經、亦喜讀釋老氏言、恆謂二氏學、吾於兩廡饜亡所貪、苟陰用其實而陽詆其名、或假竊其似而自文其陋者、俱恥之。所著撰望崖編等書、皆精至語、識者謂不下白香山、晁文元。於詩雖自濟南始、其所涵咏、多漢魏晉宋以至盛唐諸大家、然不肯從門入、亦不規規名某氏業、而神詣之境、爲勝七言律尤其踔絕者、文出入西京、韓歐諸大家間、采劉義慶世說、自以爲得彼三昧、而於游名山記、尤詳婉有力、善持論、往往以識勝、少卽工臨池、行草蕭散、小隸疏行、得晉人遺意、性嗜佳山水、其登泰岱、觀日出、憩靈岩、謁孔林、入關過華嶽、具行滕布屨、自青柯坪而上、西北臨大漠、稍南眺岷峨積雪、東俯中原、行部江右、窮匡廬表裏之勝、按閩、縱浪九鯉湖諸山、爲幽絕觀、歸自關中、軍騎走龍門、砥柱、嵩山、少林、神禹之所疏鑿、而菩提達磨之所紹統者、慨然若覩其人、至洞庭、兩山、京口三島、固几案間物也、意與境會、輒爲文以紀之、詩亦稱是、獨其於華嶽、謂文不能勝攀龍、攀龍已悉之、我復何道、尤好栽花果、晚治一圃、悉構奇卉、莖之、作學圃雜疏、謂兒輩、吾無他所漏汝、異日日致一花供我目足矣、所著奉常集若干卷、日損齋雜著數百卷。

明書卷一百四十八

列傳十

文學傳四

胡應麟字元瑞。自號少室山人。已而慕其鄉人皇初平叱石成羊事。更號曰石羊生。人亦曰元瑞。殆非人間人也。仙而謫者也。遂呼之石羊生。爲兒時。肌體玉雪。眉目朗秀。五歲。父按察副使僖。口授之書。輒成誦。見客。客使屬對。必工。九齡。從里社師。日佔傳習經生業。而心厭之。已。悉肱其父僖篋。得古人書讀之。父奇其意。弗禁也。稍長。遂能爲歌詩。籍籍傳里中。而於經生業亦不廢。會其父拜禮部郎。挾與俱。渡錢塘。過吳。闔。汎。楊子。歷齊魯。趙魏之墟。至燕市。所經由。弔古卽事。往往於詩歌發之。而是時。南海黎民表。歐大任。梁思泊。周公瑕。徐中行。戚希仲。沈純甫。康裕卿。先後抵燕。發應麟藏詩覽之。咸嘖嘖嘆賞。折行請交。至於琳宮梵宇。高會雅集。應麟以齒坐末坐。片語一出。無不悅然。披靡自失也。曰。使用昔賢隸事。奪席例。吾曹無坐所矣。臨淮小侯李惟寅慕其名。使客篋而致之。爲上賓。旬日不聽出。惟寅用是亦以詩名。而周宗正灌甫者。雅自負風雅。有人倫之鑒。貽應麟三十韻。首以北地信陽相屬。應麟益自信。尋以父僖外除。歸。從母里中。母患頭風甚劇。乃委身醫藥間。日夜扶持不休。母頭風良愈。而身過勞。得羸疾。因跳匿金華山中。而

會工尙書高安朱衡還過蘭谿。衡故從燕見應麟詩而驚賞者。至是從山中蹤迹得應麟。以書要之。泊舟待三日。應麟感其意。爲長歌七百言以贈。衡袖示督學使者滕伯輪曰。勿失天下之奇材也。舉於鄉書。上公車。報罷。其意殊不在一第。其所游從。皆天下賢豪長者。然所當心。李攀龍。王世貞兄弟。汪道昆。吳國倫。會攀龍死。餘皆散處不相及。久意邑邑不自得。會王世懋過蘭谿。卽應麟。劇語二日夕。臨別握手不忍釋。曰。吾於詩。獨畏於鱗耳。已矣。今得足下。又一畏也。應麟乃高臥山中。不復就公車。而蘭谿令喻邦相豪於詩。與之意合。忘形爾汝。臥山中凡六載。始就公車。至都下。遇張九一。九一奇應麟詩。擊節曰。二十年亡此調矣。應麟亦奇九一詩。晤賞亡間。且各自恨相遇晚。試復報罷。時兵尙書張佳允過其里。應麟避弗見。見其父僖曰。公郎君佳甚。故知之。今者難我。得非以使者惠文嶽嶽耶。爲我致之錢塘。請得具賓主禮。旣而強爲錢塘謁。佳允果以上客客之。會汪道昆來湖上。大將軍戚繼光系至。道昆數與應麟相聞問。把臂劇驢。出繼光所贈七絕句。詫之曰。大將軍健兒也。乃能作文語。不下沈太尉曹竟陵。生亦能賦贈我乎。應麟援筆千餘言立就。奇思滾滾。旣大將軍集。相向嘆賞。不置。應麟性孤介。時時苦吟沈思。不甚與客相當。而當其揮麈尾。品時藻。不能無置雌黃唇吻。有莫生者。躁而貪。以品不登上中。恨應麟切骨。屬道昆繼光遊西湖。故逼置坐客。欲以爲開端。應麟坦然弗屑也。築室山中。後先購書四萬餘卷。分別部類。彷彿劉氏七略。而加詳密。曰二酉山房。旦夕坐臥其間。意備如也。居恆笑畫魚去人意不遠。又謂我固識古人。恨古人乃不識我。其託尙如此。好稱說前輩風節。嘗怪其郡若梁劉孝標之介。唐駱賓王之忠。而世僅僅以文士

目之當由作史者旨於心故。且史第知有狄梁公、宋廣平賢，皆類首而從周、禿將，以視竇王、何徑庭也。上之巡按蘇禹、禹雅信敬之，亟下其事。竇王得祀祠鄉賢，而孝標亦暴顯。所著詩有寓燕、還越、計偕、巖棲、臥遊、長嘯、三洞、兩都、蘭陰、畸園等集二十餘卷。詩數內篇外編雜編二十卷。胡氏筆叢四十卷。六經疑義諸子折衷、史叢、史評、皇明詩統、皇明律範、擬古樂府、古韻交遊紀略、兜玄國志、酉陽續俎、隆萬新聞、隆萬雜聞、補劉氏山棲志卷、蒐緝諸書有羣祖心印、方外遐音、澄懷錄、抱膝編、真賞編、會心語、數百卷。

宗臣字子相，興化人。臣爲人秀髻眉豐下，目光奕奕，傍射負氣，豪儁自喜。當其踰阨時，習戴氏禮已竟，一日戲搆題而屬文，文成多奇語，父異之，爲益授臣業，俾卒焉。臣遂以時義名。十四試諸生第一，自是連試輒第一，而又十餘載始成鄉薦。明年成進士高第，授刑部主事。吏尙書李默見臣文而奇之，調爲其屬，得考功故事。吏部郎自相貴，絕不復通他曹郎，而臣日夜與其舊曹李攀龍、徐中行、梁有譽、王世貞游，益相切劘，爲古文詞，考功署中自公令外，多不復酬往，而臣少年驟貴顯，諸曹偶不無目攝之矣。臣亦以滿思故咯血，謝病歸，病良已，築室於百花洲，讀書其中，不復問世事。居二載，默復入政府，移文趣臣，乃強起。有遷人陳丞者，緣入重出，百金裝，臣不悅，曰：丞爲廉吏，惠吾邑，吾不啻百金者數也。而乃用邑金，溷我者何也。丞謝過罷去，自是贖贖俱絕。尋調文選，遷稽勳員外郎。臣強敏於職，不廢，亦時時佐其長有所推進，而其好爲古文詞日益甚。會李默與嚴嵩交惡，中法而臣又嘗賻楊繼盛，嵩恨臣甚，凡欲用考功令斥之，有救者獲免，竟出爲福建參議。臣遊燕子磯，爲文紀之。復游茅山，題詩刻石，愀然長嘯，有終焉之志。父趣之。

始行至而旋有倭難。當守西門。鄉氓極負求入者幾萬人。臣戒門者內之。或謂賊且近。奈何。臣曰。我在。不虞賊也。入甫畢。賊至。衆懼失色。且下。臣行求得善火具者百人。置要害間。手白金。人爲勞。且約曰。侯吾鼓而俱發。不然毋動也。賊輕城無人。凌睥睨上。魚貫其後。臣度賊已集。鼓之。累百發。洞中賊。死者無算。遂潰去。督府檄臣獲狼兵歸。兵出省。欲縱。臣令語之曰。吾日一酒肉犒若。若不歸伍宿。吾不止寢也。夫法不能貸若矣。狼兵。臣威名。竟度嶺。無敢譁者。臣兩佐文武試。其所著策論。若序傳。藝林中以爲式。久之。遷其省。按察副使。督學校。臣每出。按部校士坐堂上。取試題爲經義。以夕及旦日閱卷。又以次日進退諸生。無不人人厭服。已。徐出所爲程義示之。又無不人人厭服也。諸生貧者。調學田租贍之。不給。則爲捐月俸。減供具。繼之以爲常。臣既精強於其職。而兩臺使者諸司道大夫。用名重。故造請文事。填委。臣又以其間。劇意騷雅。嘔吟。非丙夜不已。遂寢瘵。日以亟。乃稍次其生平著述。凡十餘卷。梓之。疾革。衣冠坐廳事。手書三詩於帙。飄飄然有御風凌虛意。口擲筆而逝。臣於時好建安李杜。於文好司馬遷李夢陽。人謂其詩文橫放雄厲。莫可得而羈笑。高者凌太虛。秀者奪萬色。務出意氣之表。以自快愉。得年僅三十六。梁有譽。字公實。南海人。爲諸生。卽名能歌詩。傾嶺南矣。已成進士燕中。卽又傾燕中人。而居恆不自得。鬱鬱思歸。授刑部主事。與同舍郎李攀龍。王世貞游。乃稍自媮快。曰。世故有人哉。時郎宗臣已去。爲吏部。休瀚輒一來。俄卽徐中行來。中行故常與有譽遊南太學。深相結也。以是日相與切劘古文詞。甚懽。而一旦念其母滿。請告歸。有譽時聲愈籍甚。當徙郎吏部。吏部亦推擇嶺南郎一人。以風有譽。且止者。有譽笑曰。吾自欲歸。

豈以刑部郎少之故。而一吏部能廢我哉。竟去弗顧。至濟上。貽百韻詩。攀龍輩爲別。百韻卽古。自杜甫氏而外不恆見也。而文甚工。旣歸。乃杜門度圖史。丹青彝鼎之類。一小閣。卉木竹石環之。身吟誦其間。嚶嚶然不屑也。郡國大吏雅慕其名。千旄門相踵。有譽則以一蒼頭。不任客。鄉里執袴子。迹絕不相聞。而潦倒書生。挾册剝琢。則尋聲出。延食之矣。然有譽所最善者。攀龍輩。武昌吳國倫。最後定交。而謝榛以布衣故。有譽亦間從遊。其於鄉。師事黃文莊佐友。黎戶部民表。嘗與民表約游羅浮山。觀滄海日出沒。探句漏令丹鼎。庶幾其人一遇。而屬海颶作。不可以舟。乃止。宿田舍者三夕。颶益甚。山木盡拔。道爲徒。有譽亦意盡。乃賦詩而歸。是時屬疾寒中。湊矣。歸而疾大作。遂不起。年僅三十有六。有譽旣歸。養益謝棄。交游窮古作者之蘊。所爲集若干卷。取其上駟。而擬古作者無大媿。其下駟亦足以走夫後死者。官刑部日。其賓友過從。飯一肉。不能再簋。旣復過。具鮭菜。不能肉。以爲恆。青衫沓拖。其當榘處。時嚙殘。則縷以絲綫之。而問其家世。故嘗貴。爲諸生。日以意氣耗其數百金。不顧詰之。則笑而指其腹曰。是豈任肉者。又性不好食酒。事其母篤至。夔夔齋慄。與諸舅季友愛甚昵。卽獨飯。飯弗甘也。又督飭於言行。不侵然諾。取予一介不苟。然好言數。又能相嘗。一日。謂宗臣曰。子甚貴。而無身。奈何。有譽歿之六年。而宗臣亦年三十六以歿。徐獻忠。字伯臣。華亭人。神識茂暢。性操并介。自其髫髻時。雅已蜚俊聲。擅著作。久之。舉於鄉。凡六上禮部。不利。君旣不獲逞於時義。乃益務爲搜獵裨官。盡者外家之語。逸壁斷戟。摩削亡昏旦。農圃醫卜支離。覆逆音聲人伎。往往精探其所由造。雖專門名家。無以難之。而其爲詩。自建安以下。至大歷。鮮有不窺薄神。



情妙傳獨在江左與貞徽之際而已。文主爾雅，不離象質。賦頌碑誌，取材東京。然至於論說興革利害，物情時趣，有味乎言之也。華亭故推陸文裕深博，精於古，視獻忠爲父行，其揚挖風雅，下上今昔，耳語膝坐，忘其爲吾汝也。獻忠隸選人，當得縣令人，或謂其少遲之一令，何足溷徐先生爲。獻忠曰：令易及民耳目也。一第亦何足溷某也。得浙之奉化，奉化夷峻而城，蛇虺雜居，民俗陋而好訟，至不爲斤斤三尺溼束之節，用平稅，蠲役防水，務有以衽席其長老，稍推羨田，學官爲膏粥費，典禮揖遜，彬彬如也。所爲植培，務在單赤以下，其政術好近民而遠上，移牒條教，飭儒而不必緣吏，以故良士大夫草莽之臣，類能誦說之，他不盡爾也。甫二歲，入計道彭城，有監司者，以一籠篋授獻忠，致之京。獻忠佯爲不悟，抵京，以一籠篋報，亡何坐殿罷，會其父病，執其手曰：吾三世不益丁，得無於葬有所根哉。是而責也。獻忠拜受教，前爲諸生，固精堪輿家言，相地數百里，獲吳興之福山，葬其親，又愛其山水清遠，士風醕嘉，旣罷，則斥置墓田，旁構丙舍，爲終老計，不竟稱華亭人矣。五柳雙桐，偃蹇技門，疎櫺淨几，奇書古文，間以金石三代之器，萬巾羽氅，徜徉其間，客至，則留小飲，聽去，春容寂寥，隨取而足。時命單舫，漁童樵青，於茗響菰蘆間，不復可蹤迹也。故工尙書劉麟、蔣瑤、刑尙書顧應祥諸大老，爲耆英會，迫欲得獻忠，獻忠一再往，後了不復戀，肆力九經，作春秋稽傳錄、洪範或問、大易心印、四書本義分節，受鑰伯陽以破元扁，作參同契、亥步心測、璞算神啓，作大地圖衍義、山房九笈、三江水利攷、吳興掌故集，探始中聲，旁極正變，作樂府原、唐詩品、朱邑旣老，不忘桐鄉，作四明半政錄，其雜著詩文，又數十卷，行於世。

俞允文字仲蔚。崑山人。少從師受經生業。願好爲古文詞。多讀六季以前書。年十五爲馬鞍山賦。搜剔山事靡挂漏。而詞雅馴。絕不作時人語。名譽藉藉起。是時邑之著俊若張寰、吳中英、咸以爲忘年友。而歸有光行稍近名。能經術。允文以古文辭與之角。頗目爲甲乙。社云。然允文用調古。試輒少利。家世窳薄。又性嗜書。不別治生。日以產挫。其配梁。至泔澣統而助之。猶不給也。允文獨夷然。問曰。不能三食乎。則姑二食。乃至不二食乎。則又姑一食。得麥飯。少藜菜羹佐之。若梁肉矣。乃益刻精於學。所造五言古。進薄建安。退亦不失陶謝。而其於歌行絕句。俱宏麗。有景龍開元風。騷賦誄頌。宛然昭明所選次。少工臨池。久而益擅之。其小隸。駸駸歐柳。而上登吳興堂。行筆出入褚河南。稍縱之。則米襄陽。八分。自謂得西岳碑體。以方韓蔡。蔑如矣。允文白皙。美風神。秀眉目。膩頰飄鬚。時時稱病。病多頭風。暑月恆御氈袴。稍及冬。加以貂帽。客至。隱几而對之。焚香啜茗。竟日談笑。無凡語。所酬應亦札。頃刻數函。無凡筆。客去。亦無所報謁。其最後。菟益高。名益重。稱神交者徧天下。諸以文請者不虛月。以詩請者不虛日。以草隸請者不虛刻。往往得竟去。而里中子狎習允文先生者。謂允文先生虛和寡他嗜。願嗜奇。不食酒。頗耐食甘。聞於島渚間。洵一拳石。市甘果。袖而薦之。亦輒獲數行。以相矜重。而是時諸行部使者若徐中行。首造廬定交。於是郡守王道行。中丞張佳允繼之。而學使者吳遵與佳允共旌其廬。曰真逸。楚王以志楚聘。守李某以志吳聘。蓋鴈踵相接。而皆力辭之。獨參政王叔果。以三吳水利造質。爲成一編書而已。崑令之賢者曰王用。章程遠。右文。而高其行。每過輒談笑移刻。然欲伺允文色以間不得也。達每嘆曰。古所謂徵君。真先生其人哉。卒所著集。

若干卷。

盧枏字少樓一字子木大名濟人也其先世業農穫則什一而息之故以貨雄於鄉枏少負才敏甚讀書一再過終身不忘父爲入貨太學上舍數應鄉試罷免歸枏才高好古文辭不能類而就繩墨爲博士諸生業以故試輒不利而聲稱奕奕在薦紳間著也枏爲人趺弛不問活生產時時從倡家遊大飲飲醉輒弄酒罵其坐客毋敢以唇舌抗者而又豪歌詩當所得意下筆數千言立就客咸咋指遁去竟用是敗濟令某者數刻深名法家言於文非能好之陽浮慕之以張吏術耳謂枏邑諸生才得相從事幸甚枏亦欲借令謬恭敬爲相得極歡令嘗從容語枏曰吾且過若飲枏歸與翁媪益市牛酒夜共張至旦室邑子相戒盧生有重客門之履相蹈也而會令有他事日及不來枏愧且望之斗酒自勞醉則已臥報令至枏故徐徐出坐久之枏稱醉不能具賓主令恚去曰吾乃爲僮人子辱媿見其邑長者邑人素惡枏者爲枏讒曰是嘗見令君文笑而且唾令益怒亡何枏干撤其役夫得伏麥以爲盜也榜之役夫被酒自理而聲強枏復加榜焉旬日矣役夫夜壓於牆隕事聞令令色動曰嗜疊是復能倨見我耶匿役夫所由死狀當枏抵坐獄具上報可枏旣已坐大辟繫獄又令仇之故毋敢爲稱冤者而會枏鄉人間嘗侍枏不遜枏目攝之去已來爲獄吏夜縛枏格箠之數百髻踵悉潰爛且死矣吏以他事能得不死乃感慨折節益讀其所攜書著幽鞠放招賦以自廣其幽鞠賦曰盧枏旣用事逮濬獄與幽囚伍督潰迷惑目無日月不知晦朔仰天太息曰嗟乎聖人修身晉道立命不貳賢者推運循理以定所天願枏微眇離茲憲綱問諸造物而

已。因作賦以自廣。其辭曰。帝顓頊之嬋媛兮。皇波汪乎姬姜。儻海岱蜿蜒於北陬兮。靈宗嘉牒於范陽。逆雲雷之靄鬱兮。蹶蹶此改南服。淑凌土作甘美兮。躡康侯之芳躅。皇傑梧董道以迪惠兮。母氏靜約而告育。曰。余夢文杏。蠶仇於霄漢兮。芙蓉睥而尚粹。溢焱焰儵而進兮。應龍鬚鬚而下馳。偵蚺虬以誦談兮。頷挖攫而速惱。僂錯指以羣號兮。朋駸駸而決背。條恍恍以隕虛兮。覺懷妊而因基。奪余降於衡澚兮。幼好媵而婁巖。岌青雲之偉冠兮。挾長劍之陸離。朝晞余髮於崑崙兮。暮濯足於咸池。擊招搖以爲祛兮。履懸星以爲綦。余長喟其歷之未瑰兮。勛脩余之芳菲。裁薜荔以爲衣兮。衷芙蓉之翠裳。集菌茝以爲藉兮。糝杜衡以爲裊。揭旌於蘭皋兮。稅駕乎芳之塘。余迅或報以高舉兮。泊鑿翻而顛隕。謂曾參之殺人兮。談市虎而成憤。蒼蠅習習其貝錦兮。魚目效明月之璀璨。嫫母慙以媵媵兮。檜西施之頰。媿而自陶。螻虺仇仇於几筵兮。戈鋌森森以刺余目。既阨余之座。麗兮。又譖之以鈇。卒低曼隊彼狂狴兮。桀血斷而封囿。官閭怒以蹲踞兮。視將躓踞而矯鵠。檻糶蠹以黜札兮。棟偃螻而鬻鬻。縲纏纏於伏棧以苦余兮。仍反接而窘臂。耳嘈嘈若有聞兮。何速迴而佛帽。目炯炯以或見兮。佇鑑勿而復噴。神軼氛習習以潤澆兮。精憧憧而往來。覺塊然滯此一方兮。心惻惻而增哀。駭鼠淫啜以嚙余髮兮。魍魅含睇而瞋。保匪匪相喃以對泣兮。御紳糾而呵諶。般逮余兮紛懸。翳鷓鴣之巢蚊。匪兮。焉能戢此軀也。枕雕虎以燕憩兮。又誰知不我虞也。悲時晷之過邁兮。矚靈忽其西藏。微霜淪而下降兮。恐瑤草之不芳。高馳志乎雲中兮。桀精氣而相羊。王喬銜銜而弗顧兮。赤松告余又荒唐。行僂僂獨曰暮兮。安放乎不死之鄉。橫衝波而微舟楫兮。天吳搖

首而振怒。歷太山之坎珂兮。翹翹鬱盼以常路。發狻塞以在柙兮。雖輕捷其焉去。鳳凰之罹罽羅兮。縛芟  
芟之華羽。抱鬱軫以顛處兮。呼蒼天以爲直。戒五嶽與嚮服兮。被河海使聽殛。咎由遠以不聞兮。玄武遠  
而莫測。何羣神之豐豐兮。靈炳燿而罔恤。夫余旣不能蟬蛻於茲蕪穢兮。眇桀風而長驚。心結思於大荒  
兮。魂煢煢而上度。徵青雲之霏霏兮。飄風回而霏霧。載玉女於後乘兮。飭豐隆以先路。羲和儷以瞻桀兮。  
望舒轟而傲御。征輕輶之闐闐兮。八鸞鏘鏘以迺步。承雲霓之氛藹兮。靈旂繽紛。縹虬乎翠羽。挹朝霞以  
爲餐兮。吸沆瀣之精英。漱華池之飛泉兮。聆鈞天於帝庭。素女涕泣以淋浪兮。聞鼙瑟而呻嚶。慮妃歎歎  
以結軫兮。潛咨語而沈情。余凌軫虛而佚蕩兮。將擊結乎三光。撰余轡而馳騁兮。問元化於句芒。採三秀  
兮。眺瀛洲之微茫。弭余節兮。聊解珮乎扶桑。睇南州以凌厲兮。嘉桂樹之叢叢。召風伯以驅煥兮。謁炎帝  
於清宮。何蒼梧之麤藹兮。重華稷以揚靈。湘密鱗而瀝灑兮。二妃胡爲而弗從。決白門以西望兮。覲帝  
於金樞。氣澹澹以莽曠兮。薄暎暎而誰須。騰王母之仙姝兮。挾瑤池之芳都。指玉勝以爲約兮。歌白雲以  
相愉。荃旣歸余以好艾兮。絕弱水而進輅。齊玉轂之碾碾兮。指寒門而並驚。軼鍾山之幽曉兮。令照之以  
燭龍。召玄武爲備禦兮。句辰翼乎紫宮。託鷲鳥爲之先後兮。問太乙之燎垣。靈刻刻以黜約兮。鳳凰承旂  
而飛軒。雷師礪礪轟礪以震盪兮。烈缺閃爍而施鞭。護鳳凰以摺兮。余闐咤噫而俾還。卒攬涕反此舊都  
兮。潔筵筭從卜乎巫咸。曰天地無隘兮。物無終始。變化互渝兮。幹流遷徙。形氣轉薄兮。或浮而沈。造化沕  
穆兮。禍福無門。聿性命之難言兮。誰知其極。萬物糾以霧盪兮。又安所止息。惟大人齊物我兮。以天地爲

廬舍總山川於毛髮兮。騎日月以爲馬。夫有虞之潛歷阪兮。常歷數之在躬。夏后胼胝而陟大寶兮。季有光於黃熊。震龍縈而夏禮兮。顧駕禍於周庭。白魚躍以膺天命兮。劉氏顯而有功。奚伍羊以自鬻兮。由余振於西戎。尙鼓刀於海濱兮。仲父射鉤而桓榮。仲連談兵以卻嬴兮。皆重繭而存楚。條相后而餓死兮。贊搖筆以光輔。墨不黔以衛道兮。孔轍旋而徵伍。光狷介以自湛兮。夷顛頷而振古。夫道固無涯涘兮。行焉知其所如。惟恬澹與冥漠兮。斯真人之攸居。從委命而桀流兮。遊寥廓之鄉。忽喪我而無是兮。觀泰初之茫茫。余託蜉蝣與遊兮。曾日月之徜徉。忽歸魄於元壤兮。又何足傷。勉修余之俶服兮。瓊芳澤之幽蘭。緝揭車之落英兮。裴茫離與射干。飾翡翠而綴珠被兮。爛的蹀而芊眠。組綺縞而飄飄兮。下結之以雙璠。余媿美而自鑑兮。何媒灼之可攀。夫君政而弗御兮。亦余心之嬾嬾。詩曰。天地緼縕何時明。我欲見之心傍徨。輾轉懷憂祇自傷。超軼絕世窮大荒。帝極洪洞不可量。絨悲歸來卜巫陽。勵志肥遯含大章。獲我所思樂無疆。放招文多不盡錄。居頃之。盜行剽。迫柑父自剄死。燒其廬。子錢家成貨不償。柑固已壁立矣。令亦更悔。念魚肉盧生何酷耶。陰稍稍寬柑琴。有所讎詩辭。呼使從獄。具草。草上。予酒肉食飲。洗沐。尋令去。潘爲大官。事益解。而故人謝榛者。攜柑賦游京師。貴人間絮泣曰。天乎。冤哉。盧生也。及柑在。而諸君不以時白之。乃罔罔從千古哀湘而弔賈乎。時陸光祖有心計。俄謁選得濟令。至。則首爲更爰書上。論鬼薪。輸作三歲。盧柑旣出獄。家益貧。乃爲九騷謝陸令。而謝榛方留滯鄴。柑走謁之。因上賦。趙王。趙王覽而奇其文。立召見。賜金百鎰。於是諸王人人更置邸延柑。柑則稱客坐右坐。握麈尾辨說。揮霍數百千萬言。風雨集。



而江波流也。鳴毫颯颯，儵忽而爲辭。若賦各得以意去，旣酒醉，故態畢發，罵其坐人，則人人掩耳走避。枴竟亦不自得罷還。顧囊中所餘金幾何，趣付酒家也。婦囁嚅咎枴，不顧曰：天生盧枴爲女曹地耶？王世貞治獄大名，飛書大任山中，勒邑吏具筆札授枴，所著集若干卷，枴故亦慕稱世貞，嘗爲文託謝榛致之，不達。至是見世貞郡臺，把臂爲布衣飲三日，酒語慷慨，恨相見晚也。世貞序其賦，略曰：余迹盧枴所造逢及狀貌，殆中庸人耳。旣稍得其古詩歌行讀而小異之，至讀諸賦，則未嘗不爽然自失也。三閩家言忠愛悱剛，怨而不怒，悠然詩之風哉。長卿務以靡麗宏博，旁引廣喻，其要歸卒澤於雅，子雲謂之從神化來耶。然自東京而下，蔑如也。諸儒先生號名能文章家，奈何取其所論者而姑韻之以爲賦，若茲乎哉。卽盧生所就幽鞠放招，凡三十餘篇，其概不得離津筏而上之，然而大指可諷也。窮天地之紀，采人物之變，與天喬走飛之態，經緯臚列，假二三能言之士，如宋玉景差者，蟬緩於左從之門，豈其先枴而室哉。枴旣以別世貞去，南遊金陵，陸光祖爲祠部郎，留月餘，走越歷吳，毋所遇，益落魄嗜酒，病三日卒。所著有集。

孫一元者，嘗放遊吳越間，莫知其所自來。人問其姓名曰：我孫一元。問其字曰：我字太初。問何以稱太白山人曰：我秦人也。嘗棲太白之巔，於是稱云。人始知爲秦人。及問其家世，不答。善詩，有超逸才。嘗出秦四遊浮湘漢，躡衡廬，踰河涉泗，謁闕里，登岱嶽之峰，憩日觀，觀日出焉。奇之，駭叫狂走，人頗異之。然弗識之也。於是南走吳會，吳會人見一元行事，又見其詩，於是爭相禮敬。一元固善說玄虛，又膚瑩渥顏，口鬚望之如神仙中人。於是愈禮敬，而好異之士踵接於門矣。一元往來越湖間，多在支硎南屏山寺中，鉅家則

爭造寺餽美飲食鞋服。以是饒裕。冠珮之士。慕名來訪。輒供具。懽洽竟日。酒酣暢歌。意態超脫。令人起塵外之思。於是人士轉相譽。稱爲孫山人。聞四方矣。一日病且革。倉皇屬其友曰。死。葬我佳山。幸題我墓曰。明詩人孫一元之墓。已而甦。起而憤曰。幾負我志。而吳越人。以是覘知山人。初無羽化術。徒空談。放浪形骸。稍稍疑避。而山人則顯益說世務。恆七齒不平。其詩亦多爲忿激悲壯之音。於是用世之士。顧益喜之。樂與之交。義投情合。泛濤弄月。扣絃和歌。俛仰一笑。每自許與世無雙。而湖舉人施侃者。雅喜其人。而病其放。因說之居。於是買田苕溪之旁。又說之婚。則婚侃妻妹張氏。喜山人者聞之。率移書相慶曰。太初爲全人矣。是時。建業劉麟龍。覽咸徙居湖。與吳充陸崑。暨山人結社遊。號苕溪五隱。山人始講吾儒性命之學。無何病卒。年三十七。有太白山人集行世。

宋登春。字應元。趙郡新河人。生壯歲。鬚髮卽衰白。因自號海翁。人業以海翁稱之。晚居江陵之天鵝池。更號鵝池生。宋氏故新河農家。其先嘗累高貲。登春少失父母。以亡警省。家益貧。然性嗜酒。家貧不能長得。酒時發憤。讀古人書。見前世結纓射書。擊筑。棄印。諸賢豪急難奇節。未嘗不慷慨悲歌。泣數行下也。登春始慕俠。能挽強馳騎。間出其餘智爲小詩。輒自喜。不欲以示人。又稍稍通繪事。師江夏吳偉鄰之父。有顧而歎者。登春戲爲之貌。絕肖。父因勸登春益習此。可作生業。何乃日沈酣落魄里中也。登春不應。以是里中盡目爲狂生。亡所知名。年三十。會一歲間。妻子女五人俱相繼死。生仰天歎曰。咄嗟。天乎。將驅我於埃壙之外乎。遂屏家於其兄。而自囊書遠遊。遊至博陵。博陵有故所善客憐之。餼之。塾。合二年。登春默默。

不自得、竟謝去。去之京師、日跨一蹇驢、行長安道中、往來覓詩。方是時、臨淄布衣謝榛、以詩遊公卿間、聲籍甚。登春間得其詩、唾之曰：「作詩何爲者、而令七尺軀、津津諛貴人、丐活耶？」居京師月餘、亡所遇。又去之渤海、入兗州、登嶧山、觀秦皇帝遺碑、還居長白山一蕭寺。出囊中故所貯漢魏盛唐名家詩、閉閣揣摩。如是者三年、頗窺作者之戶、遂大放厥詞。而於五言尤工。眼駸駸白、亡時人矣。又去而浮淮海、渡揚子江、登北固山、以望金陵、鍾山紫氣、過雲陽、匍伏延陵季子祠下。涉吳會、訪錢塘天竺靈隱諸峰。已復走徐青、歸新河。數日、又去、出居庸、循太行山、而西窮關陝、澤潞諸邊塞。其在井陘、嘗居龍窩寺、瓶粟罄矣。寺僧厭苦之。登春曰：「僧毋窘我、我試繪一小圖、持至市中、當得粟。」已而果鬻粟五升。伺粟不盡、不更繪。而市人爭欲得生之繪、則日擔粟詣寺門相聒。登春不能堪、乃避至城外一山樓。已由棧道入西川、遊峨眉、山、邛巫、巴、下荆鄂、將達於潯陽、返於黃迂雲夢、而北走大梁。偶憩鈞州酒肆、而鈞州有黨中丞者、得其所題酒肆中絕句詩、強致之家、留數月、復自宛涉襄、過京山。登春所跨驢、馱於唐氏之淖、傾其囊中書、曝之衢。唐氏異登春所爲、要與之飲食、歡相得也。遂主唐氏、一歲而行。唐氏爲刻其詩、傳荆郢間。更贈登春二童子、命名曰丹砂白石。登春挾二童子、轉江陵。登王桀樓、讀其賦、感昔賢沆寓地、有終焉之志。始登春數年前、嘗至江陵、居城西開元觀。故遼王奇其詩、召謁便殿。登春久在遼王所、絕不與用事者比。遼王常召登春遊別宮、聲妓滿前、他客或故爲調笑、以悅遼王。登春第端坐、竟日夜、卽飲至大醉、目不流睨。遼王益敬憚之。每見登春、輒爲斂容。登春之不及於難、以此。自遼王廢、登春不樂居江陵、乃自攜少貨、逍遙七澤間。最後、又

還江陵、遍謝其故所往來人、而斥其二童子姑去之、乃自童髮、爲頭陀、不知其所之云。  
徐渭、字文長、山陰人、幼孤、性絕警敏、九歲能文、年十餘、傲楊雄解嘲、作釋毀、二十、爲邑諸生、試屢雋、胡宗憲總督浙江、或薦渭善古文詞者、招致幕府、筦書記、時方獲白鹿海上、表以獻、表成、召渭視之、渭覽罷、瞠視不答、宗憲曰、生有不足耶、試爲之、具稿進、宗憲故豪武、不甚能別識、乃寫爲兩函、戒使者以視所善諸學士董份等、謂孰優者、卽上之、至都、諸學士見之、果賞渭作、表進、世宗大嘉悅其文、旬月間、遍誦人口、宗憲以是始重渭、寵禮獨甚、時都御史武進唐順之、以古文負重名、宗憲嘗袖出渭所代謬之曰、公謂子文若何、順之驚曰、此文殆甚善、後又出他人文、順之曰、向固謂非公作、然其人誰耶、願一見之、宗憲乃呼渭偕飲、順之深獎嘆、與結懽而去、歸安茅坤時遊與軍府、素重順之、嘗大酒會、文士畢集、宗憲又隱渭文語曰、能識是爲誰筆乎、坤讀未半、遽曰、此非吾荆川、必不能、宗憲笑謂渭曰、坤雅意師荆川、今北而於子矣、坤慙慍而赤、勉卒讀、謬曰、惜後不逮耳、其爲名輩所賞服如此、渭性通脫、多與羣少年昵、輟市肆、幕中有急需、召渭不得、夜深、開戟門以待之、偵者得狀、報曰、徐秀才方大醉、囁囁、不可致也、宗憲聞、反稱善、時督府勢嚴重、文武將吏庭見、懼誅責、無敢仰者、而渭戴敝烏巾、衣白布澣衣、直闖門入、示無忌諱、宗憲常優容之、而渭亦矯節自好、無所顧請、然性豪恣、間或籍其勢以酬所不快、人亦畏而怨焉、及宗憲被逮、渭慮禍遂及、發狂、引巨錐刺耳、深數寸、流血幾殆、又以椎擊腎囊、碎之、不死、渭爲人猜而妒、妻死、後有所娶、輒以嫌棄、至是、又擊殺其後婦、遂坐法繫獄中、憤懣欲自決、爲文自銘其墓曰、山陰徐渭者、少慕古文詞、及

長益力。既而有慕於道，往從前長沙守季先生究王氏宗旨，謂道類禪，又去扣於禪。久之，人稍許之。然文與道終兩無得也。賤而惰且直，故憚貴交，似傲與衆處，不洩袒裸，似玩人或病之。然傲與玩，亦終兩不得其情也。舉於鄉者，八而不一售，做數椽儲瓶粟者十年。一旦客於幕府，典文章，數赴而數辭，投筆出門，人爭愚而危之，而已深以爲安。其後公愈折節，等布衣交，留者兩期，贈金以數百計，人爭榮而安之，而已深以爲危。至是忽自覓死，人曰：謂文士且操潔，可無死，不知古文士以入幕操潔而死者衆矣。乃謂則自死，孰與人死之。謂爲人度於義，無所關，時輒疎縱，不爲儒縛，一涉義所否，然斷頭不可奪，故其死也，親莫制，友莫解焉。平生有過不肯掩，有不知恥以爲知，斯言蓋不妄者。其自名如此，然卒以援者力獲免。既出獄，縱遊金陵，北客於上谷，居京師者數年，獄事之解，詹事張元忭力爲多。渭心德之，館其舍旁甚驥好，然性縱誕，而所與處者，頗引禮法。久之，心不樂，時大言曰：吾殺人常死，頸一茹刀耳。今乃碎磔吾肉，遂病發乘歸。既歸，病時作時止，日閉門與狎者數人飲，噓而深惡諸富貴人。自郡守丞以下，求與見者，皆不得也。嘗有詣者，伺便排戶半入，渭遽手指扉，口應曰：某不在。人多以是怪恨之。晚，絕穀食者十餘歲。人問何居，曰：吾噉之久，偶厭不食耳。無他也。尤不事生業。客幕時，有餽之洮絨十許疋者，遂大製衣被，下及所嬖私褻之服，靡不備者。一日都盡，及老，貧甚，鬻手自給。然人操金請詩文書繪者，值其稍裕，卽百方不得。遇窘時，乃肯爲之。所受物，人人題識，必償已，乃以給費。不卽餒，不妄用也。有書數千卷，後斥賣殆盡。轉筭破弊，不能再易。至藉稿寢，年七十三卒。渭爲諸生時，提學副使薛應旂閱所試論，異之，置第一。判牘尾曰：句句

鬼語、李長吉之流也。及被遇宗憲，值比歲，宗憲思爲涇地，諸籬官入謁，屬之曰：徐涇，異才也。諸君校士而得涇者，吾爲報之。時宗憲權震天下，所出口無不欲爭得，以媚者而偶一令晚謁，其人貢士也，公心輕之，忘不與語。及試涇牘，適屬令事將竣，諸人乃大索獲之，則彈撻逼紙矣。人以是歎涇無命，而服應旂知人焉。涇於行草書猶精奇偉傑，嘗言吾書第一，詩二，文三，畫四，識者許之。其論書主於運筆，大槩昉諸宋氏云。所著文長集、闕篇、櫻桃館集，各若干卷。註莊子內篇，參同契，黃帝素問，郭璞葬書，各若干卷。四書解首楞嚴經解各數篇，皆有新意。涇父總，以累戍龍里衛，始至龍里，土人諱之，總以教讀自晦，授童子孝經，故謬其讀。土人笑曰：是不足逐也。已而領貴州鄉薦第一，仕至夔州府同知。涇貌修偉，肥白，音朗然而唳鶴，常終夜呼嘯，有羣鶴應焉。二子曰：故俱涇負才性，不能謹飾節目，然迹其初終，蓋有處士之氣。其詩文豪宕，雖未免瑕類，自成一家言。中被詬辱，老而病發，其才力所詣，質諸古人，當不少媿。涇沒數年，楚人袁宏道見所爲詩文，稱爲奇絕，謂有明一人，聞者駭之。涇題跋多自稱田水月。

孫宜，字仲可，華客人，宜五歲穎異，讀書數行俱下，稍長，工屬文。父榮爲兵部郎，所師友何仲默、崔仲彙、鄭善夫、薛君來、楊用修，時相過從，奇宜而試之，下筆萬言立就，而當是時，宜慕諸名士爲古文辭，私已有所撰著矣。年十九，舉於楚，是時宜業破萬卷，而氣象視第一無足芥拾。家世仕宦，又少從父遊燕中，所習聞國家掌故，將相文武之業甚詳，抵掌而談，今古毋能難者。宜旣久有名公卿間，時霍公縉欲疏薦宜，不果，宜罷試歸，道聞其父訃，日夜奔馳哭踊，兩目爲損，凡四載，遇醫得神方，砭之，復明。宜年三十有八而歎曰：



丈夫安得老死齷齪轅下駒哉。且夫能衡命者我也，能衡命者我也。因故自號洞庭漁人，人以漁人呼之。則應他呼則不應。宜既有家世祿羨，盡斥爲園臺館亭榭之屬，購異書名畫古器實其中，而奇卉怪木環之，素嗜酒，乃益釀酒，客來過從者，毋問貴賤，輒留飲，飲輒醉，醉亦不問客所嚮，宜間與友人遊石門元頂諸湖山勝地，遇羽人縉流能飲者，卽傾攜釀共之，宜旣自命爲漁人，又不爲衣冠，時時與樵青釣童狎亡異也。興至，泚筆而書所爲詩，奇逸飛動，龍虬鬱盤，已又自歌之，感激用壯，節奏頓挫，雲停石裂，宜所著詩文爲集前後六十九卷，兩都集十卷，遯言十七篇，洞玄誌三卷，宋元史論二卷，明初略二卷，岳州誌三十卷，所輯有孫氏日抄六十二卷，王氏易七卷，天文書八十二卷，國朝事蹟百二十卷，求言錄十五卷，宜固挫名而不能盡闕其書，諸方岳部使慕而請見者，漁人弗見也，卽迫之亦見，見亦無所報謝，素強無疾，一夕卒，年五十。

明書卷一百四十九

列傳十一

權臣傳一

史官論曰。叢之神不可藉人。神龍失勢。與邱蟪同。積威約之漸也。古者天子以道德爲銜勒。以刑罰爲策。以萬民爲馬。六官在手以爲轡。御天下數百年而不失後代。所任者法也。德昏則法墮。所尊者勢分也。柄授則勢忘。非必季葉。屏主而後然。多有盛強威察。席方中之運。雄武可以鞭撻六宇。而制於一。聰明足以握萬幾。而昧於一指。如口皇之於李斯。玄宗之於李林。而身死國葬而不悟者。何也。主德既髦。逸欲生於勞勩。諫言不入。蠹竊成於瘞蔽也。故曰偏聽生奸。獨任成亂。漢以章奏付尙書。唐以諫官隨宰相。防之密矣。明太祖鑒胡惟庸之亂。革中書省。不置丞相。分其職於六官。兵刑錢穀各有主者。絲分牙制。故外無安史。淮蔡之憂。內無博陸上官之禍。然自宸旒流拱。票擬漸專。外廷罕畫接。掖垣多仗馬。而嚴張之得政。儼然古丞相矣。賢不肖雖殊。然專則盈。盈則覆。其禍國與自禍一也。表而出之。爲來者鑑。

嚴嵩傳

嚴嵩字惟中。江西之分宜人。父爲藩司吏。母方娠。而有光起麻舍。已生嵩。藩使奇之。齎醪備錢布以贈。嵩

身長。竦瘦如削。疏眉目。大音聲。二十二。舉於鄉。二十六。進士高第。改翰林院庶吉士。授編修。數移疾告歸。讀書鈴山中。嵩好爲詩。清雅有態。然弱而不能爲沈雄之思。文亦類之。其治家。纖嗇近小慧。時人莫之重也。嘗奉使至廣西。道謁鄉人李遂。遂故御史司其省試。而得嵩者。當宴鹿鳴日。諸生前爲壽。時嵩額羸。衣遂不復盼接。至是投刺見。而講鈞禮。遂出巨刺漫應之。次日始修門人禮。布幣再拜。而曰。某非敢薄公也。以公嚮厭之。恐終棄之耳。其狷隘急暉。如此。久之。進侍讀。領南京翰林院事。召爲國子監祭酒。嵩於資薄。不當祭酒。輔臣費宏。其鄉人。私之。既去位。言官有及嵩者。疏辯得留。進爲禮部右侍郎。給事中陸燾等論。糾輔臣桂萼所私。復及嵩。嵩奏辯。復得留。尋遷左侍郎。轉吏部左侍郎。久之。進南京禮部尙書。改南京吏部尙書。其在南京。踰五載。不召。以萬壽賀表至京。時議重修宋史。方開局經理。嵩謀於輔臣。時以少保夏言在禮部。日奉行諸祀典。而尙書顧鼎臣。教習庶吉士。皆不暇兼職。言亦從臾之。遂請留嵩。以禮部尙書兼翰林院學士。專司董理。逾歲。間言入內閣。鼎臣當次長禮部。而嵩復私於言。躡得之。自是始謬爲共謹。以迎合上意。而是時御史桑喬。以災異列嵩等罪。嵩辯之強。給事中胡汝霖復糾之。有詔。大臣被劾。宜省已。勿得強辯。於是嵩懼。益爲共謹。而其子世蕃。由廢敍。授都督府幕。已恣行諸曹。居間有所賄納矣。時世宗入諛臣言。欲祀獻皇帝。以明堂以配上帝。嵩不敢違。已又欲獻皇帝稱宗。而入太廟。嵩與羣臣廷議。皆難之。上不悅。著明堂或問。以見志。嵩皇恐。盡變前說。所以條畫禮儀良備。遂尊獻皇帝曰睿宗。祔武廟。上禮成。而賜嵩白金百兩。綵幣四。有副鈔四千貫。上皇上帝尊號冊寶。尋加上高皇帝尊號。聖號以

配嵩奏慶雲見上悅受羣臣賀嵩爲慶雲賦及大禮告成頌上嘉之付史館明年加太子太保已從幸承天賞賜優渥與輔臣埒嵩歸益驕於藩國請卹乞封所挾受賄積資且巨萬而南北給事御史以大察交章論貪污大臣皆首嵩而上皆勉留之嵩奏辯中謂人臣於人主將必使孤立自勞而身觀望禍福乃爲得計上摘其語稱之於是御史謝瑜復論嵩強辯請斥之不聽嵩恚甚乃因員外郎衛元確復命遲歸罪於吏科都給事中丁湛爲寬予之限以市恩參論之俱坐謫已復參其郎中熊過等謫之邊方欲以自張且快意而公論益鄙之言路顯與讐矣是時大學士夏言有所不悅於嵩語見言傳御史葉經疏稱交城王諸孫輔國將軍表柵謀襲爵永壽王庶子惟燧與嫡長孫懷燁爭國封嵩俱納其重賄爲之請勘乞斥嵩以戒貪墨言乃擬旨下臺勘而他多右經語嵩急歸誠於上上憫之弗罪也時邊警告迫上以嵩非所職而咨詢之既條對平平耳上必爲之激賞欲以風止言者嵩既已傾夏言而斥之愈益寵幸所供醜祀青祠額獨對嵩居最乃以聖誕恩進武英殿大學士入直文淵閣仍掌禮部事免其奏事承旨時嵩年已六十三而神采溢發如壯時於是吏科都給事中沈良才等首論嵩汙佞不當干大位不聽而南京給事中王暉御史陳經等復論嵩并及其子世蕃饕餮助焰實跡下所司嵩疏辯且乞休優詔慰留之嵩意不快復上疏謂古語云朝廷輕重係大臣臣今動遭詆目爲姦惡海內流傳損傷國體一宜去言官論事乃其職然或聽指使或代報復如昨歲羣奸構謀呈藁首臣然後封進今不卽退轉相傷害益煩聖心二宜去上果爲溫諭百餘言答之且謂攻擊不休故違君命須罪以無君之律嵩乃出視事時宮婢構逆旅伏

誅嵩請詔告天下。人謂宮闈而祕密。悉揚之。其國體傷於論大臣多矣。尋代嵩爲禮部者張璧。至自南京。嵩請解部事。許之。賜御饌金幣羊酒。且諭曰。比以異禮勞卿。卿以赤誠匡朕可也。前已賜嵩銀記曰忠勤敏達。至是復賜其家藏蠶書之樓曰瓊翰流輝。奉玄之閣曰延恩堂。曰忠弼。嵩以吏部尙書許讚等訐其請托事。不勝益橫。先是考察御史謝瑜不及當調。嵩特擬旨。用貪酷例黜之。而御史葉經監山東試。嵩乃摘其錄語。以爲狂悖不道。俾禮部參論。逮至京。杖死闕下。藩臬預試事者。皆爲邊邑尉。中外愈側目嵩矣。時尙書許讚以一品六年滿。加兼太子太傅。未幾。上特加嵩官視讚。時輔臣翟鑾特以資序在嵩上。上待之不能如嵩。每有所咨問及齋予時。時首嵩。而不及鑾。其厭鑾久。特以其舊臣。不忍去之。而鑾不悟也。其二子俱進士。高第嵩乃授風旨於給事中王交龍。俾發其事。鑾與二子俱削職爲民。嵩得益發舒。上一意用之矣。時吏部尙書許讚兼文淵閣大學士。禮部尙書張璧兼文淵閣大學士。同嵩預機務。然不獲入直。應制嵩事取獨斷。不復相關白。墨墨而已。讚至自歎曰。何必奪我吏部。使我傍睨人。尋進嵩兼吏部尙書。謹身殿大學士。亡何。復以六年滿。加少傅。兼食大學士俸。子一子中書舍人。給四代誥命。嵩乃上言。每獨蒙宣召。於心未安。思往歲夏言惡與郭鄖同列。以致生隙。夫臣子比肩事主。當協恭同心。豈宜有此嫌疑。今臣希忠臣元臣讚。臣璧。凡有宣召。乞與臣同。如祖宗朝。塞夏三楊故事。嵩蓋欲示厚希忠等。且見言妬也。報聞。時上方好言長生。而都御史盛端明。右參議顧可學。家居久。各自詭。有不死術。嵩爲進可學所治。餌而薦盛端明。上悉召用之。巡按福建御史何維柏條時事。而中論劾嵩甚切。上怒。逮治之。維柏在道久。

嵩不測上意。乃請寬維柏獄。上爲霽威。杖而奪其職。時諸曹皆受嵩及世蕃請。屬如外府。獨吏部尙書熊浹持不肯行。莫能難也。會浹以罪去。則無所不靡。俄而太廟工告成。加兼太子太師。賜金幣。渥時上微覺嵩橫。而許讚老罷。張壁死。乃思用夏言。時禮部尙書費棗。故善言。而不能得嵩意。探得之。因疏留郎中周琬高簡。而謂大理評事孫學思假嵩名求出使。而臣執不與。學思嵩私人也。多機警。好以萋斐中臣。臣以孤危而失此二臣。助愈難自立矣。因乞休。其言頗散漫不根。上以其托指攻訐。切責之。然不決日。而召言之命下。嵩以是恨費棗。言既至。盡復原官。遂復据嵩上。上爲加嵩少師。以慰安之。言既以銜嵩。則頗斥逐其黨與。嵩唯唯而已。不敢救。時世蕃已用恩澤。累遷至太常寺少卿。掌尙寶司事。橫行中外。嵩乃上疏。遣世蕃歸省墓。以避言。上猶使之馳驛還。往嵩以萬壽加特進。又以考九年滿。加華蓋殿大學士。璽書褒諭。仍賜宴禮部。言尋用復河套。失上指。爲嵩及崔元陸炳搆。伏法。嵩遂獨相。上益安之。而費棗亦自以撰齋詞得上幸。嵩度無可報。乃坐其子以不當使事。謫之。而棗亦自恨病死。於是南京吏部尙書張治。國子祭酒李本。以疏遠擢共事。不敢與可否。久之。懇於嵩。始得入直。治不任煩。竟鬱鬱以卒。時宣大督臣翁萬達。大將周尙文。拒卻敵。而嵩復錄一子中書舍人。賜金幣。上以罪人王聯訐而信之。捕故都御史胡纘宗。及株林新舊朝士數十。皆欲寘之重典。嵩與方士陶仲文頗爲救解。得釋。上以嵩對制平獄可嘉。令兼文學士。俸而仲文遂封伯。然意殊不樂。嵩乃與仲文疏辭。俱報許。而仍以萬壽節封仲文伯爵。加嵩上柱國。嵩乃力辭。謂人臣無上。引郭子儀不敢當尙書令爲比。且欲以示謙。而見夏言悖。上悅。進世蕃爲太常寺卿。



仍行尙寶司事。亡何敵大入犯。掠三輔。旋薄京師。右中允趙貞吉叩嵩直所問計。嵩以撰齋詞辭不見。而義子右通政趙文華自其室脅肩出。貞吉見而詈斥之。俄而禮部尙書徐階以敵嫚書請和。會廷臣議。吉貞勵聲言。敵在城下。何可和。但請皇上御奉天門。赦沈束。旌周尙文。士氣當百倍。而貞吉又自具疏。請遣羣臣有才識辯博者。詣行營宣諭諸將。得一賊首。予百金。敢戰者。損卒亦賞。逗遛者。全軍亦罰。上雖壯之。而內不悅也。嵩因請卽命貞吉往。往而驩。至仇鸞軍。卒不得要領還。嵩乃激上怒。杖貞吉而謫之。荒徼以自快。兵部尙書丁汝夔。雖以調度失宜。然爲人潔廉。巡撫都御史楊守謙。守土臣也。倍道勤王。上怒其不能破賊。殺之。嵩皆不救。而巡撫王汝孝。總兵羅希韓。逮稍緩。世蕃盡羅其賄。與嵩計。伺上喜而解之。卒以仇鸞故。以嵩去言而脫其罪。深德嵩。約結爲父子。復起爲大同帥。帥其衆入援。無功。而爲大言。聳上聽。嵩從臾之。遂總京營兵。進太保。仍督諸路兵馬。入二萬金謝嵩。嵩受之。敵退。始上疏請發粟賑中虜者。并掩膏幣。及它選將練兵。碌碌紙上語而已。於是中外怨嵩。父子刺骨。而刑部郎中徐學詩。歷指其誤國無狀。凡數十事。且謂其威權足以假手下石。機械足以先發制人。財勢足以廣交自固。乘機構隙。足以示威劫衆。文詞辯給。足以飾非強辯。精神警敏。揣摩精巧。足以趨避利害。而彌縫闕失。私交密惠。令色脂言。足以結納權路。而緘杜人口。故諸凡論嵩者。卽不能顯禍於正言。直指之頃。亦必托事假人。陰中之於遷除考察之際。臣不能悉記。卽如先任給事中王曄。陳壇。御史謝瑜。董漢臣等。於時幸蒙寬宥。而今安在哉。故天下之人。視嵩父子。如鬼如域。不可測識。甯是痛心疾首。敢怒而不敢言。何者。誠畏其陰中之也。上乃捕

學詩。下詔獄。斥爲民。而溫旨慰留嵩。嵩不自安。請遣世蕃歸田里。不許。令給假隨任侍觀而已。學詩疏雖不見用。然天下傳誦以爲名言。仇鸞始雖由嵩入。旣挾敵得上重而驕。嵩猶欲以兒子畜之。不應遂凌嵩。出其上。嵩悲數以密疏言之。沮止萬狀。皆不聽。而諸部臣言官有抗觸鸞者。立碎。鸞之捕敵姦細以爲大功。要重爵賞。而嵩子世蕃亦緣而進。工部右侍郎予一子錦衣衛千戶。鸞以是益恨嵩而侮之。其所詆謀嵩上亦爲心動。至宣召亦稀矣。時陸炳掌錦衣緹騎。與鸞爭寵。妬嵩乃厚收炳以爲腹心。使詞伺鸞。鸞亦爲之備。然其所從卒不能如緹騎猖獗。鸞自是墮炳窠中。然炳陽爲推重。鸞以爲中山定興之流亞。鸞不疑也。旣敵勢日迫。而鸞病甚。上聞收其大將軍印。鸞暴死。炳乃謀於嵩。忱鸞之義子。逃之。而道執之。盡得其交通狀。誅其妻子。嵩以是益親信。父子貪亦益甚。南京廣東道御史王宗茂復疏其貪黷數十事。事皆有實。上復爲之醵宗茂二秩。補外以安嵩。而給事中袁洪愈劾去其所善客翰林檢討梁紹儒。亦弗收。赦也。前是兵部員外郎楊繼盛以嘗論與□市馬非策。忤仇鸞。下獄。謫邊邑。倅鸞旣敗。繼盛得累遷復官。嵩欲以名收之。繼盛不應。復抗疏極論其十大罪五姦。中外傳誦以爲破的中感。可以必勝。而上獨怒之。摘其中有召問二王語。以詐傳親王令旨律。坐絞。而復杖之百。復以手札諭留嵩。嵩乞休。上報以羣邪黨比。謂逆賊句敵。其本在卿。蓋指摘贊直玄修。不阻朕耳。朕非內色外禽者。崇事上玄。又與宋徽。梁武不同。人臣邀譽賣直。卿以此乞休。墮邪孽計。宜安心供職。奉順天休。時嵩有義孫鵠。未十六。而冒兩廣功級。得錦衣千戶。繼盛及之下。兵部尙書聶豹皆曲爲掩庇。而郎中周冕獨發之。亦坐奪職。當是時。雲貴清軍御

史趙錦亦有疏論嵩。謂嵩窺伺逢迎之巧。似於忠勤。諂側媚之態。似於恭順。能引植私人。布列要地。以探諸臣之動靜。先發而制之。故不敗露。又善以厚賂結陛下左右之人。凡深宮起居意向。無不先得。故多稱旨。或候聖意所發。因而行之。以成其私。或因事機所會。從而執之。以肆其毒。使陛下思之。則其端本發於朝廷。使天下指之。則其事不由於內閣。幸而洞察於聖心。則諸司代嵩受其罰。不幸而遂傳於後世。則陛下代嵩任其咎。錦工於中。嵩惡。而它語尤凱。至上亦使緹騎捕之。兩月而至。怒少解。斥爲民。亡何。嵩之義子趙文華重文華者。故無賴小人也。數經吏部察。嵩強而用之。至通政使。乃自以百花酒進上。嵩亦跪而冒數之矣。會吏部尙書萬鏜者。嵩同年。相善。坐言事廢田間。賴嵩以起。至爲吏部。數與嵩崖異。不甚用其言。至是。復推文華督撫鄖陽。以遠嵩。而給事中朱伯辰上疏。劾文華邪媚奔競。寵賂日章。不宜玷臺憲。有旨再推文華。迫則謀於世蕃。乃教之使劾鏜。前爲右都御史。中以侍郎起用。而併二品通考。以臣欲糺之。故出臣於外。不已。而嗾伯辰論臣。欲以鉗衆口。嵩爲內主。激上怒。悉奪鏜伯辰官。俱爲民。而文華愈橫矣。嵩以滿十五年考。賜金幣御饌。肥粃上尊。錄一子中書舍人。仍賜敕褒諭。再以京師外城完。嵩與有閱視勞。遷世蕃爲工部左侍郎。仍侍親而不奪俸。尋以萬壽節。推恩。令世蕃出理部事。嵩辭。許之。再以卻敵推恩。錄一子尙寶司丞。嵩辭。上諭以盡誠贊玄。實爲忠首。往往與陶仲文並論。嵩不恥也。江南連歲倭大作。南京兵部尙書張經爲總督討之。久未平。而趙文華乃疏陳用兵七事。首以祀海神爲言。人皆笑其誕。而上獨然之。爲切責兵部。覆議上。上以問嵩。嵩言江南奏報多失實。宜遣大臣往祭海。卽令察視賊情。求

可以區處長策。其實奏聞所使。卽文華亦可。上乃命文華。文華行而大鐵威福。所挾持將吏。金寶無算。時總督張經。自恃其位高而望隆。不肯折節文華。諸發兵守便宜。又不與計。會有流言聞於上。上怒。文華伺得其指。露章劾之。上發緹騎逮經。而經則已大破賊。俘斬千計。捷聞。上怒亦不釋。經迫。則行五千金賄世蕃。世蕃與嵩謀。欲爲上解。不解。則姑爲溫言款經。至死方悟。因詈嵩父子於市。而李默者。骨鯁士也。少有文。數更顯宦。至浙江左布政使。嘗候嵩。嵩謂其貌類我。援之。入爲國子祭酒。累薦於上。得躡拜吏部尙書。乃稍稍自持。見不能贊其意。嵩更譖於上。嗾給事中梁夢龍劾之。得罪去。而陸炳由武科爲默門生。乘上之思默。使所厚中貴人稱之。遂得復官。尋以撰齋詞入直。幸矣。念不自嵩起。動與抗世蕃。威無所不加。獨不能得之吏部。而會文華歸復命。上以御饌勞之。問倭事。何時可息肩。文華對。殘寇行且滅。不足憂。上爲之悅。而文華行珍寶。值萬金於嵩夫婦。及世蕃。直入內室叩首嵩夫人。夫人勞苦文華。謂尙不能爲郎君。易腰帶。我相公責也。而兵部尙書楊博以憂去。文華幾得之。默所推。絕不及。其見默。欲有陳。默厲色待之。怏怏而退。乃刺得默。試士策問。以爲誹謗。上爲漢武。唐憲。又所推東南督臣。不用胡宗憲。而用王誥。蓋欲敗東南事。爲鄉人張經報讐。上大怒。下默詔獄。論死。尋屬輔臣李本。行部事。品第羣臣。九卿而下。及言官。悉以次去。嵩所惡。而薦其客吳鵬代默。而亟稱文華於上。遂進工部尙書。躡加太子太保。罷王誥。不用。用胡宗憲。中外大權一歸於嵩矣。文華又以都督陸炳嘗薦默。復刺得其陰事。將劾之。炳懼。重賄世蕃。挾以謁文華。始解。既而知其謀出自世蕃。遂併恨世蕃。而徐階以次輔日重。爲羣望所屬。炳乃委腹階以自固。

嵩父子亦稍稍覺之。倭復大張。詔遣兵部侍郎沈良才討之。嵩知上意以文華昔對殘寇且平爲不實。懼而使文華自以督師請。上悅。許之。與宗憲合而誘降寇首徐海等。因掩擊平之。文華加少保。宗憲爲右都御史。而嵩等皆賜金幣。嵩又以十八年滿。官一子中書舍人。賜宴及璽書褒諭。自文華等之有功。推遷及罷職。尙寶卿史際。通政呂布周等。而世蕃所納賄。復以巨萬計。文華乃上疏歸功嵩。以爲嵩實授之。成算而嵩亦薦文華有學行。宜供撰齋詞。其後文華以驕蹇忤旨。逐嵩不之救。上亦不以咎嵩。而宗憲自是益傾江南庫藏爲世蕃餽。所需古法書名畫種種。宗憲皆爲索之。富人世家豪歛巧獵靡所不極。而它撫臣監司相習成風。不以爲諱。其所欲鼎彝尊勳之數。或發塚剽攻它寶玩。多起大獄而後得之。世蕃猶汲汲無已。尋以萬壽節加嵩兼食尙書俸。仍免廷謝。自是凡有旌錫。皆免謝。至一切祭祀救護日月。無嵩跡矣。前是敵入犯邊。錦衣衛經歷沈鍊抗疏論嵩父子姦惡。詔以鍊誣諉大臣。自爲名廷榜之。適貶嶺外之保安。鍊悻悻不得志。乃招四方遊士。以講學名。多及時政得失。或馳馬至居庸關下。戟手詈嵩父子。或爲草人象而射之。事稍稍聞。嵩惡之。使世蕃授指宜大總督楊順圖鍊。順故嵩客。時邊事多損敗。方藉嵩父子屏蔽。卽嚮應。而與巡按御史路楷謀。世蕃復以入內五品。啖楷。乃因妖人閻浩等通敵事發。捕鍊。竄名其中。而張大之。兵部尙書許論不敢執。遂斬鍊。并戍其一子。瘐死者復二人。遷賞順楷以下如初約。天下聞而痛之。於是給事中吳時來極論楊順靡費邊餉。縱敵出入。而以重賄納路楷。相率爲蒙蔽。致右衛危困。尙書許論昏酣。不能有裨廟謨。上以問嵩。嵩曲爲順楷掩覆。且謂言官風聞論人。不可盡信。上不聽。捕順

楮下錦衣獄而奪尙書論職。時來遂謂嵩可勝也。亟上疏極論嵩世蕃罪惡而刑部主事張紳董傳策亦言之。前是輔臣徐階爲禮部時敵入犯數有所建白觸嵩忌諱以是百方阻其進不得而階潔廉又時時爲人語時政輒歎息流涕稍稍聞於嵩至是以時來紳皆階所取士而傳策又其鄉人乃密奏三人同日而搆臣必有使之者且時來已奉命使琉球疑其悔行欲藉口自脫自封進時來紳試錄上乃下之詔獄令追究主使之人以聞而時時自語曰階固賢雖然嵩老矣何不小需歲月而忍若是階危且甚而時來等下獄考掠窮五毒竟不言主使者第曰高廟神靈教臣耳而亦會都督炳心向階故坐紳傳策相主使時來避遠役獄上各發戍煙瘴衛所而慰留嵩嵩以是益恨階并及炳其後順楷就逮至詔獄嵩復爲之寬解順僅坐戍而楷謫外當是時上坐深宮中欲以威福遠攝連率大臣時時有所逮訊若阮鶚吳嘉會章煥等多從重典雖甚親禮嵩不盡信之間一取獨斷或故示異同欲以殺離其勢而嵩與世蕃能得其竅欲有救解則必順上意極譽之而微婉曲解釋以中上所不忍其欲有排陷必先稱其媿露若與彼親者而以冷語中之或觸上所恥與諱上更爲之怒以是卒不能脫其籠絡而威福益廣時吏部兵部與文選職方郎號爲文武庫吏而尙書吳鵬歐陽必進許論郎萬策方祥爲尤著必進者嵩內親也數以賄通嵩得出入臥內會大殿災議興工而必進自刑部調工部上老之以問嵩嵩盛稱其精力才識遂以工屢就驟遷至少保而倦於事嵩復爲之改都察院上勿悅也於辭疏旨曰必進已之任矣何更辭嵩謂必進毋再辭但居任兩月而吏部尙書缺嵩復勒廷推必進衆莫應嵩怒慢罵之不得已而以必進名上上投



之地。嵩密疏曰：必進內親也。臣老矣，非必進無可以慰臣者。乃以必進爲吏部尙書，僅三月而假他事去之。世蕃猶張於人，謂用必進上無若我何，乘必進我亦無若上何。前是上以嵩直舍隘，別撤小殿材，營室於側，多蒔花木，其隙以娛之。復發中金百爲製什器，朝夕割御膳法酒，使中貴人調而賜嵩。嵩老尙健饜，始聽腰輿出入禁苑矣。已而嘉其年滿八十，特賜肩輿，且令支伯爵俸。嵩復以京師居第之中堂，請額上名之曰忠正，又名其南昌居第之中堂曰耆德樓。曰寶翰，嵩故有高第在宜春分宜，并京師南昌，而賜皆宏廠壯麗，分輦金寶以實之，猶不足，而縱子世蕃之羅取益甚。初，皇太子薨，裕王以序當立，禮部數請期，而上意嫌代已，屢報寢。嵩念上獨所信任，迫衆情，時時亦爲請，而與陶仲文比而阿上意。上亦自知之時，裕景二王並居外邸，禮服無異，外論洵洵謂莫知適從，而故左中允郭希顏失職家居，欲以危釣奇，乃具疏謂自攻嵩者有問二王之說而得罪，恐不相安，幸各召而面諭之，使二王毋疑嵩，嵩毋自疑，且請出景王於外，以安裕王。疏既上，嵩雖恨希顏，而巨測上旨，請下禮部詳，上乃露怒希顏意，嵩始得發舒。上命御史卽其家，傳希顏傳首海內。世蕃念以多樹敵，恐嵩一旦老死，不易支，而謂上意搖，或可因而更樹，乃多行金左右，謀立景王。庶幾異日代嵩執政，而上一日忽諭禮部令景王之國，世蕃猶令嵩與禮部尙書吳山言，上意未必爾，或欲因以試物情，山不可，乃具儀上。景王卒之國，而世蕃之謀解。俄以世蕃三品滿九載，加服俸視尙書，再以萬壽節加嵩歲祿二百石，而世蕃亦兼支尙寶司卿俸。尋嵩夫人歐陽氏卒，時世蕃方戀權，不欲歸，而嵩無次子，可以扶柩者，嵩請於上，謂年已老耄，不可無世蕃侍，詔聽留共養如故。嵩

故以警敏得上意。亦善自卑屈。至士大夫入謁。人人慰勞。務得其懽心。間標故所憶記。以示聰明。晚節知天下之怨之。間捨舊郗而收錄知名士。若故編修唐順之。中允趙貞吉。皆以淪落爲感。不自覺入其彀。至顯庸。因而有稱者。然其陰賊發於心。而動於機械。不自覺也。世蕃尤險悍。獯豸。每謂天下才。惟己與陸炳。楊博而三。然與炳晚節相妬。炳暴死。世蕃稱快。頗亦能習國家典故。曉暢時務。嵩旣老。上時有所問。而不能答。謀之其客。皆不稱旨。屬世蕃草。輒報美。嵩以是心益仗世蕃。而心愛之。諸曹白事者。輒問曾以質兒子否。至云東樓謂何。東樓者。世蕃別號也。世蕃以是益驕橫。九卿臺諫。至浹日不得見。或停使至暮。而遣之。或有嵩許而世蕃不許者。卒弗許也。嵩在直。或累月不出。世蕃日與所狎客縱倡樂豪飲。益拓居第。連三四坊。堰水以爲方塘。踰數十畝。傍值奇樹異卉。乘輿張綺蓋。遊行其中。若輔臣階與李木。其父執也。成國公朱希忠。元助也。虐之酒。不潦倒不已。性尤強記。於中外官職。饒瘠險易。亡不關熟。其責賄多寡。毫髮不能匿。上亦稍稍聞之。而世蕃以衰服不能入之。嵩直所。嵩所報札。漸不如上旨。而齋詞亦稍倦。時上所居萬壽宮火。而大朝殿工方急。嵩以煩費難之。欲請上還大內。則不敢。乃請暫徙南城之離宮。南城。英宗故稱太上皇時所居也。上迺以問階。階爲規畫。萬壽宮甚詳。且費省而力易。上大悅。宮旣成。而所以褒擢階至厚。嵩僅加祿米百石。不能敵矣。自是。上有顧問。不及嵩。卽及嵩。不過齋詞事而已。嵩故與階郗。懼而置酒要階。入內。使子孫家人羅拜之。舉觴屬曰。嵩且夕死矣。此曹唯公哺乳。階謝不敢當。而是時方士藍道行以亂得幸。上故有所問。密封使中官至亂所焚之。不能答。則咎中官穢。不能格真仙。中官乃與

方士謀啓示而後焚之。則所答具如旨。道行狡。乃僞爲紙封。若中官所贖者。及焚而匿其真跡。以僞封應。上一日問。今天下何以不治。對曰。賢不竟用。不肖不退耳。則問誰爲賢不肖。曰。賢者輔臣階。尙書博。不肖者嵩父子。上復問。吾亦知嵩父子貪。念其奉玄久。且彼誠不肖。上真胡以不震而殛之。答曰。上真殛之。則益用之者咎。故弗殛也。而以屬汝。既答報。袖以示御史鄒應龍。會嵩等請考庶吉士。而諸進士中有貸金於司禮監中貴錦者。錦密以聞。上卽日罷考。應龍乃抗疏論嵩父子貪姦誤國。詣大罪十餘條。上以名捕世蕃及舞法行賄者。皆下之詔獄。而猶謂嵩小心忠慎。壽君愛國。人所嫉惡。其致仕去。仍馳驛。歲給祿米百石。嵩獨爲世蕃求解。上謂念若忠勤。已加優處。又何以兇兒瀆教。嵩乃不敢復言。獄上。世蕃及其子鶴皆坐戍。煙瘴衛所。家奴及隸人永年等坐絞。當世蕃之用事。吏部郎賄最重。御史次之。給事中又次之。所以先御史者。其巡按得盡收贖。鏹鬻卿寺缺。而給事中獨不能。至吏部郎之始。以三千金。而後遂至萬二千。若頃治元者。竟就逮。瘐死詔獄。其家亦破。天下笑之。世蕃迫。則行十餘萬金於諸幸姬家。猶能脅調藍道行陰事。下刑部獄。侍郎葉鏜鄢懋卿。誘使誣伏前僞狀。而引徐階道行。不聽。論死。而復得釋。應龍以敢諫。進通政司參議。上猶悔之。且追思嵩贊玄勤誠。欲退居西內。專祈長生。以示輔臣。階等極言不可。上乃勒階等必贊玄如嵩乃可。而謂嵩已退。其子已伏罪。敢有再言者。同應龍俱斬。中外洶洶。虞嵩且復用。而久之。階益見信。乃已。於是嵩之黨鏜懋卿萬燊。何遷。張雨。唐汝楫。王材。及其壻袁應樞。先後以白簡革職。而胡宗憲自浙直總督被逮。尋釋之。宗憲旣得志。首以書畫賄嵩父子。金玉珍玩。相繼半入其囊。江南公

私爲之一空。奢淫縱恣。靡復風紀。而其殲徐海執直功。亦有足當者。上以其屢進白鹿白龜。不忍罪也。伊庶人之爲王也。以殘暴婁見。紕臺使者迫。則行十萬餘金於嵩。得小綏。至是使其校卒十餘輩造嵩家。脅償金。嵩置酒款之。而好謂曰。所言金十萬。則無之。僅得半耳。而又半費。請以二萬金償。因盡以上所賜金。有印識者予之。既去。而聞於郡。曰。有江盜劫吾家二萬金去矣。速掩之。可獲也。郡發卒追得金。悉捕校卒下獄。論死。而世蕃之自戍所私歸。益廣拓第舍。又用金多爲盜窺。乃召募伎勇材力之士。合數百人。日夜擊刁斗自衛。郡邑頗疑其跡。而嵩故所養舍家子。出外爲非者。推官郭鍊臣受民間訟牒滿百紙。輒封以與嵩。嵩怒而卻之。它臺使監司。小有違言。嵩輒呼具舟。我且入京而奏。以時恫喝。而會前賀萬壽表得報。且常見憐。因懇疏請移世蕃。便地供養。上不許。報曰。嚴嵩有一子侍。已恩待矣。諫臣乃疏以聞。巡江御史林潤。遂露章劾世蕃。與歙人羅文龍表裏相約。多招納亡命。有叛心。文龍故世蕃客。爲通賄。與同戍者也。詔卽委潤捕世蕃。文龍既至京。潤盡發其罪狀。下三法司比擬。俱依子罵父律。斬上不憚。令更擬。乃擬謀叛律。而猶未及嵩。上令卽棄之市。而謂嵩畏子欺君。大負恩眷。并其諸孫。見任文武職。俱奪爲編氓。拘役籍其家。黃金可三萬餘兩。白金二萬餘兩。它寶玉重器。服玩所直。又數百萬。而知者尙恨其以緩故。散匿不少。臺臣乃益論戍萬竄。鄴懋卿追其受寄金錢。垂二十年不盡。竄由選部郎至大理卿。懋卿至刑部右侍郎。皆世蕃腹心。突貪而懋卿尤恣橫。其以都御史出覈饑。所經行兩畿。齊晉河洛吳楚。幾天下半。皆挾世蕃父子。叱咤風生。守令而下。膝行蒲伏。上食惟謹。至以文錦被廁牀。白金爲溺器。妻妾隨行者。錦幃綵

輿以民婦十二昇之。卽趙文華胡宗憲不能過之也。嵩死時寄食墓舍不能具棺槨亦無弔者。時年八十有六。子世蕃。

世蕃性巧便深險能辦事。世宗信任之以應官任工部侍郎。放恣蠹政。賣官鬻爵。門日如市。又善藥禍。以故內外大小文武官員及各王府往往以重遺。一時勳臣如戚公希忠寵倖如都督陸炳及衍聖公皆結爲姻親。以自植。各邊將鎮撫官及各省藩臬守令凡遷轉必賂世蕃始得不爾。必不遷官。且中以禍主事楊繼盛以論嵩殺之。御史王宗茂爲民主事張紳董傳策謫戍皆因嵩得罪。世蕃益得志。慈谿人趙文華新喻人張春結爲乾子。拜世蕃爲兄弟。唐汝楫先爲世蕃門客。後得中及第。唐順之已罷官家居。有父喪。緣趙文華通世蕃奪情起爲兵部郎中。尋陞鳳陽都御史。討倭不克發憤死。一時豪士皆顛倒世蕃之手。先是羅文龍重賂結世蕃得爲中書。遂奔走門下。乘勢橫恣。爲官所謫。戍廣西潯州衛。嘉靖壬戌夏。御史鄒應龍劾世蕃誤國罪狀。世宗怒。收世蕃下獄。謫戍廣東。嵩致仕。甲子冬十一月。御史林潤巡視上江。時賊警報訪爲羅文龍主匿。潤因論奏。文龍係世蕃之黨。今不赴戍。逃回原籍。稔惡不悛。句聚江洋劫盜。且所居去縣五十餘里。據山爲險。大嘯勢焰。擅著蟒衣。妓女環列。又潛往世蕃家。劫爲怨望。今世蕃之暴橫無異在朝。或肆爲訕謗。或縱爲淫樂。或奪人財產。家僕至數百人。日聚門候。至數千羣。機謀詭秘。人心動搖。履霜堅冰。誠社稷之憂也。乞正典刑。庶弭禍端。上覽奏曰。噫。逆犯乃爾。命林潤逮之。時文龍逃潛住梧州。潤於彼處緝獲。明年乙丑春三月。逮羅文龍至京。斬之。仍籍其家。則二十萬沒入官。已而嚴嵩上疏辯。

子世蕃在戍未敢逃回不報。是月。逮世蕃至京。亦斬之。林潤復奏。謂世蕃任彭孔爲主謀。羅文龍爲羽翼。男嚴鴻等家人嚴珍一等爲爪牙。窮狠極恣。無所不至。占省城倉基。而又并吞宗室之府第。占袁州官地。而又侵奪貧民之居房。改祝聖寺以爲宗祠。鑿穿城池以象西海。袁州居第。列爲五府。南府居其子鵠。北府居鴻。東府居其孫紹慶。西府居慶祥。而嵩則與世蕃同居相府。廓房迴繞。店舍聯兼。招集亡命。聚斂貨寶。且揚揚號於衆曰。朝廷有我富乎。粉黛列侍。衣龍鳳而列珍珠。牀象牙而帳金絲。朝歌夜舞。荒淫無度。又揚揚號於衆曰。朝廷有我樂乎。其家人嚴珍一窩盜行劫。嚴恩一等強奪易江等之妻。嚴富等強占陳室等之產。嚴保等強奪李元三之屋基。又曰。宸濠逆謀之初。不過結納賊首。誘致姦人。受獻田土而已。今世蕃之不法。揆之於宸濠無異。又曰。近日伊王典樸。妄懷異念。然陰結於內者。實世蕃也。世蕃受典樸賄金十餘萬。而主其謀。故典樸逞其狂悖之志。是世蕃之陰結典樸。何異於錢甯威賢輩之交通宸濠乎。嵩位極人臣。寵絕百僚。忍心欺君。縱子不戢。奏至上震怒。謂侍臣曰。嚴嵩畏子欺君。大負恩眷。并伊孫見在文武職官皆爲民。仍命御史成守節籍其家財。淨金一萬三千七十一兩六錢零。純金嵌珠玉珍玩壺杯盤盞共三千八百事有奇。重一萬三千二百兩有奇。純金嵌珠玉苗。購寶石首飾六千五百五十事有奇。白金二百二萬七千有奇。銀合山屏人物等共重一萬三千六百兩零。玉如漢始建國元年注水卮。管永和鎮宅世寶杯。及玉人玉馬玉鑪玉斗玉壺等共八百五十七件。又白玉碧玉黑玉與夫嵌金渡金花素玉帶共二百二條。金箱并花素犀角香等帶共一百二十四條。金摺絲純金花素金箱珠玉帶條環闌妝



頭鑲三十三條。金箱壺。玉壽鹿犀象璫。珎法藍杯盤。甌盆等。共二千六百八十件。雙龍卵五箇。金箱雙龍卵壺二把。金小酒甕二座。大珠九百六十顆。大寶石七顆。又次珠寶六百六十六兩零。珊瑚樹六十株。大學士牙牌二面。珊瑚玻璃瑪瑙象牙珎珎人物壺。孟杯盤等奇玩三千五百五十六件。副古瀾水四罇。薔薇露四錫盆。曾空青四枝。熊膽四罐。廣砂三百八十五兩。珠砂六百五十斤。檀沈降等香五千五十八斤。沈香山四座。大紅織金蟒龍斗牛飛魚等緞。絹綾羅紗絨緞機絨。緜番揭鎮服并蟒葛西洋雲絲絨等。四萬一千六百一十九匹。成服大紅織金蟒龍等。緞絹綾羅等男女服及貂裘共一萬八千三百餘件。金銀鉸牙檀烏木沈金等扇二萬七千六百把。古銅龍耳等鼎大小蓮豆酒海蟻螭罇。相金獅象龜鶴犀兔寶鴨等鑪。蒜頭玉簪等餅。溜金花餅獸鑪。水火鑪。衣鏡共九千四百二十四件。倭金并大理石各色屏峯圍屏共一百八座。金徽玉軫等古今名琴五十四張。御製及晉唐宋元墨跡三百五十八冊。軸宣宗御筆及清甯上河海天落等古今名畫冊葉共三千二百一軸。卷冊雕嵌大理石璫珎螺鈿彩素金漆等牀共六百五十七張。各色帷帳香珠卓圍燬耳之類共二萬二千四百二十七件。雕漆方圓等盤。大而青缸。雲南刀劍及茶鍾酒杯各色家伙等件共九萬四千九百二十六件。把雙大小兵器并倭刀共五百餘件。第宅田地山塘及各莊房牛馬等共估價二十九萬五千八百六十兩有奇。此在江西原籍者然耳。他在京及揚州第宅莊田財物猶不下數十萬。皆沒入官。又籍嵩之婿袁應樞受寄金銀諸物五萬餘兩。萬榮受寄金銀八萬二千餘兩。又親黨趙濂受寄金銀二萬九百餘兩。及漳澤熊襄張仁受與瑞昌王多燉等。又

借貸債約銀一十九萬兩有奇。

史官曰。宰相之賢。度爲上。才爲下。書云。以公滅私。公則視人才爲朝廷有。私則必欲爲己有。其度狹矣。嚴嵩姦巧陰譎。挾沾沾之小技。以順爲悅。內固主寵。而外籠天下之利。殺諫臣。逐異己。望風投拜者。獲榮顯。剛直自好者。嬰挫辱。藐法負恩。目無祖憲。雖無孽子。甯毋敗也。及至世蕃隔外。所條對率不稱上旨。其才又可知矣。世蕃積惡取罪。而死以謀叛。雖非正律。允當厥辜也。所籍沒資產。紀實瑣瑣。匪史體。以見元載之鍾乳三千未爲侈耳。





明書卷一百五十

列傳十一

權臣傳二

張居正傳

張居正字時大湖廣之江陵人也少穎敏絕人爲諸生渺小而時尙書顧璘撫楚行郡試其文奇之已行招與語復大奇之曰此兒國器也遺以金錢爲膏油費舉於鄉謁謝璘解所繫犀帶以贈曰爲君異時圍腰飾然當且玉不足久涸也又六年登進士高第改翰林院庶吉士是時爲嘉靖之丁未戊申間諸進士多談詩爲古文以西京開元相砥礪而居正獨孳然不屑也與人多墨墨潛求國家典故與政務之要切者衷之時時稱老易以爲得能其用諸大老如徐階輩皆器重之相推許得授編修居正爲人頗長眉目娟秀鬢幾至腹沈深有城府莫能測也時嚴嵩爲首輔忌徐階爲階者皆避匿而居正行意自如嘗同會考試而其門生自喜客於嵩能得嵩意居正棄斥之曰李樹不代桃僵耶亟去毋辱吾門衆稍莊憚之而有天幸毋爲嵩耳目者嵩顧亦稱居正久之遷右春坊右中允領國子司業事居正待諸生嚴無所寬假而獨與祭酒高拱善相期以相業尋還理坊事以選侍裕王講讀王頗賢之邸中閣亦無不賢居正者

而李芳數從問書義。頗及天下事。尋進右諭德。兼侍讀。預重修永樂大典。復預修興都志。始解裕邸講進。翰林院侍讀學士。領院事。時階代嚴嵩首輔。盡以志事委居正。而其所具藁草。輒爲輔臣袁煒所削。及煒卒。階乃復從居正草進於上。上意不懌。亡遷賞。然中外目屬居正。必爲大用矣。世宗崩。階草遺詔。頗引以共謀。尋遷禮部右侍郎。兼翰林院學士。月餘。與裕邸故講臣陳以勤俱入閣。而居正爲吏部左侍郎兼東閣大學士。尋充世宗實錄總裁。穆宗開經筵。爲同知經筵事。至秋。進禮部尚書兼武英殿大學士。亡何。加少保。兼太子太保。去學士之五品。僅歲餘而至一品。其登進之速。雖張璉桂萼不能過也。時年僅四十三。當居正之入閣。閣臣凡七人。徐階最爲老宿。與李春芳皆好折節禮士。郭僕陳以勤皆忠厚長者。獨高拱躁率。不得志於言路。稍絀。尋引去。居正最後拜。獨謂輔相體當尊重於朝堂。倨見九卿。他亦無所延納。而間出一語。輒中的人。以是愈畏憚之。重於他相矣。徐階既去位。而春芳代。居正意狎視之。以爲不足與有爲。而大學士趙貞吉入。其位居居正下。然自負長輩而材。間呼居正張子。有所語朝事。則曰。唉。非爾少年輩所解。居正內恨。不復答。而與閣李芳輩謀。召用高拱。俾領吏部。計以扼貞吉。而奪春芳政。拱至。益與居正善。當是時。天子頗好遊。而重武。居正上疏言六事。其一曰。簡議論。謂朝廷之間。議論太多。或一事而甲可乙否。或一人而朝由暮跲。或前後背馳。或毀譽予盾。是非淆乎唇吻。用舍決於愛憎。政多紛更。事鮮統紀。大抵事無全利。亦無全害。有所長。亦有所短。要在權利害之多寡。酌長短之輕重。斷而行之。信而任之。二曰。振紀綱。謂近年以來。紀綱不肅。法度不行。上下務爲姑息。百事悉從委徇。以模稜兩可爲調停。以委

曲遷就爲善處。刑法之加。惟在微賤。庶人之議。反重朝廷。賈誼所謂蹶蹙者。欲上攬乾綱。張紀律。法所當加。雖貴近不宥。事有所枉。雖疏賤必伸。三曰重詔令。謂天子之號令。譬之風靈。若風不能動。而靈不能擊。則乾坤之用息。造化之機滯。欲部院覆奏者。數日卽報。不得諉之撫按。行撫按議處者。嚴令期限。不得延緩停閣。四曰覈名實。謂今用人者。稱人之才。不必試之。以事任之。以事不必更考其成。至於債事之時。人未必明正其罪。惟魯少文者。無用而見譏。大言無當者。虛聲而竊譽。僞儻抗直者。忤時而難合。脂韋逢迎者。巧宦而易容。或以卑微見忽。或以名高見崇。或因一善而借資終身。或因一疵而取病衆口。官不久任。事不責成。更調太繁。遷轉太驟。資格太拘。毀譽太易。欲以嚴考課。審名實。責之吏部。官各久任。毋遽遷轉。五曰固邦本。謂近以蠲賦至半。國用不足。邊費重大。內帑空乏。分道檢括。庫藏盡掃。以致水旱災傷。坐視而不能振。用兵餉百出而不能支。欲上停免一切不急工程。無微辨。精擇守令。講求出納。其分道之使。一切取回。六曰飭武備。則欲上修祖宗大閱故事。張皇六師。躬賜校肄。旌別技勇。汰易老弱。疏上。褒諭。下部院議行。於是各推演疏指。事別爲演。多至十餘條。以媚居正。而所謂大閱者。上意果爲動。令所司擇日行矣。大閱費不資。時方黜。而給事中略問禮。頗言其非急。居正亦覺之。乃復上疏請停止。上不允。居正以善筆札。諸公有密勿疏。草多委之。如救給事石星。御史詹仰庇。停取戶部合三十萬。請皇太子出閣講書。其草皆自居正。而同列李春芳。陳以勤。趙貞吉。殷士儉之見逐。雖發之自高拱。而其機皆出居正。故所獨厚者。司禮閣李芳。一日言官有忤旨而當懲者。春芳顧而言曰。當何處。居正遽曰。不過示責而貸之耳。春芳



具如居正語而俄頃居正以片紙使小吏投芳曰此人狂妄卽上貸之恐有繼言者須謫譴而後可芳請於上改停三月俸而春芳後得之心恨居正而不敢發尋李芳以強諫失上意杖錮之獄而居正小屈後諸公去且盡獨居正與高拱在兩人相得益密會北夷請入貢通互市亦惟居正贊之初以滿三載加柱國進太子太傅再以六年滿加少傅吏部尙書建極殿大學士兼支大學士俸遼東戰功加太子太師和市成加少師餘如故向者階居正故受業知己也其去由張齊之爲拱而修伎然居正實言之李芳謂階久倦官以是亟報許既許而心愧之階既去然約束其三子事居正謹而拱銜階甚必欲殺之嗾言路追論階不已而使其所讎誣飾其諸子罪下撫按置獄事益急階求救於居正居正從容爲拱言階一旦巨測公負薄舊僚名拱稍心動而居正頗復爲撫按居間業稍緩而拱之客乃搆於拱謂居正納階子三萬金賄不足信也拱無子而居正多子一日戲謂居正曰造物者胡不均而公獨多子也居正曰多子多費甚爲衣食憂拱忽正色曰有徐氏三萬金何憂衣食也居正色變指天而誓詞甚苦拱徐曰外人言之我何知以故兩自疑而拱之客謂間可乘也日稍稍以居正過聞拱而都給事中宋之韓遂具疏且論居正草成而居正知之走見拱乘氣言曰公不念香火盟忍逐我耶拱錯愕出不意曰誰敢論公者居正曰公之門人宋之韓已具草矣拱曰果有此亟呼止之居正曰公發之安能止之拱曰請出之外以明我心晨入部出爲參政因是疑居正益甚拱又前後薦其所善閻陳洪孟冲柄司禮而抑馮保時尙寶卿劉奮庸疏摘時政數事語侵拱給事中曹大埜則極論拱諸大罪居正爲擬旨謫大埜於外奮庸亦坐謫或云居

正實使之。或云獨大莖受之馮保。莫能明也。上日甫視朝。忽馳而下。且蹈於陛間。第云國有長君。社稷之福。語且不了。居正與拱趨而掖之起。還宮。卽不豫者月餘。羣臣詣闕問安。而上方臥。蹶然興。肩輿至內閣。居正與拱驚出俯伏。上掖之起。而掖拱臂。仰天氣逆結。久始云。祖宗法壞。且盡。奈何。亦復不了了。而持拱袂步。且至乾清宮門。始復謂第。還閣。別有諭。明日寂然而居。正察知上色若黃葉。而骨立神朽。慮有巨測。爲處分十餘條。札而封之。使小吏持以投馮保。卽有報拱者。急使吏跡之。則已久矣。拱亦不知爲何語。第恚甚。至閣而詰居正曰。昨密封之。謂何。天下事不以屬我曹。而屬之內豎。何也。居正面發赤。不能答。強笑而已。徐曰。日與飲食通。公安能一切瞰我。拱淺謂實然。不復置臆。而上崩。拱與居正。懽然具遺詔草。拱復自具草以聞。凡數事。皆欲敎司禮權歸內閣。馮保聞之。恚。神宗立方諒陰。拱有請。必報。可以爲能得上心。而嗾所善言官四五人。列疏論保。疏必下拱。卽擬旨逐之。而使其所厚韓楫報居正。行且建不世功。與公共。居正陽笑曰。去此閣。若腐鼠耳。卽功。胡不世也。陰使人馳報保。得預爲備。乃遂拱語。見拱傳。居正既代。拱首卽請還楊漣吏部。頃之上御平臺。召居正。諭曰。父皇昔在御日。嘗一再聆德音。謂先生忠而高。拱邪。先生幸自愛。悉心見輔。因賜居正金幣及繡蟒斗牛服。居正頓首泣謝。謂今國家要務。惟在遵守祖宗舊制。不必紛紛更改。至於講學親賢。愛民節用。又君道所先。乞聖明留意。上曰。善。亡何。復賜居正白玉帶。自是賜賚繁渥無虛日。時上幼沖。虛已委居正。居正既得當國。慨然以天下爲己任。中外想望丰采。既已大計廷臣。於拱所厚。多所屏斥。而不附己者。亦稱是。復具詔草請於上。召羣臣廷飭之。謂近歲以來。士習

澆漓官箴剝缺。鑽窺竇隙。巧謀躡取。鼓煽朋黨。公事排擠。詆老成廉退爲無用。誇讒佞便捷爲有才。愛惡橫生。恩讎交錯。遂使朝廷威福之柄。徒爲人臣酬報之資。是用去其太甚。薄其懲戒。餘皆曲賜矜原。與之更始。書不云乎。無偏無黨。王道蕩蕩。無黨無偏。王道平平。朕安嘉與臣民。會歸皇極。諸臣亦宜痛滌宿垢。共襄至道。自今以後。其尙精白乃心。恪恭乃職。毋懷私以罔上。毋持祿以養交。毋依阿澆惡以隨時。毋嗜吝。以亂政。任輔弼者。毋昵淫朋。以塞公正之路。典銓衡者。毋作好惡。以開邪枉之門。有官守者。宜分猷念。以濟艱難。有言責者。宜竭謏直。以資聽納。大臣當崇養德望。有正色立朝之風。小臣當砥礪廉隅。有退食自公之節。若或沈溺故常。堅守途轍。以朝廷爲必可背。以法紀爲必可干。則宗祖憲典甚嚴。朕不敢赦。詔下。百司惕然。是時。上嘗尊崇兩宮。故事。天子非嫡生。而尊皇后。稱皇太后。若生母。亦稱皇太后。則加徽號於皇后。以別之。馮保欲媚生母李貴妃。乃風居正。以竝尊。居正不敢違。於是下議尊皇后曰仁聖皇太后。皇貴妃曰慈聖皇太后。而兩宮不復別矣。慈聖徙居乾清。撫視上。主持國乘柄。而倚馮保爲重。又與保俱德居正。中外大柄。悉以委之。而居正亦自淬勵。亡所受徇。然漸專壇矣。經筵開。爲知經筵事。修世廟實錄。爲總裁。尋加左柱國。進兼中極殿大學士。予一子尙寶司丞。辭不許。賜白金百兩。文幣四。有副。繡蟒衣一襲。復力辭前命。乃許之。下璽書褒諭。以風示百僚。居正之爲政。大約以尊主權。課吏實。明賞罰。一號令。萬里之外。朝下而夕奉行。如疾雷迅風。無所不披靡。乃愉快於志。居恆謂高皇帝。真得聖之威者也。世宗能識其意。是以高臥法宮之中。朝委裘而天下不亂。以太阿不下授也。今上世宗孫也。奈何不使之法。

祖黔國公朝弼。數犯法當逮。而朝議皆難之。以爲朝弼綱紀之卒。且萬人。不易逮。恐失諸夷心。居正擢用其子。而馳單使縛之。卒不敢動。既至。請於上。貸其死。而錮之南京。人以爲快。漕河通。居正於歲賦。往往迂緩。逾春而後發。卽水橫溢。非決則涸。乃採漕臣議。督艘卒。以孟冬月兌運。及歲初而畢發。少罹水患。其始農頗不便之。久而習以爲常。太倉粟至支十年。歲與敵互市。饒馬。則減太僕種。而多令民以其價納。民既樂於不擾。價以時上。太僕金亦積至四百餘萬。又爲考成法。以責吏治。前是六部都察院有覆奏而行。撫按勘者。度事之不易行。或有所按覈。或兩訐當賞成者。其人各以私軋。則稽緩之。至數十年而不決。遂廢寢。居正下所司。以大小緩急爲限行之。誤者抵罪。自是一切不敢飾非。政體稍肅。而居正則多行其意之。所便者。尋以六載滿。加特進中極殿大學士。賜白金綵緞寶鈔羊酒加等。居正有子曰懋修。與孽弟居謙俱。試於湖廣。得中式。懋修僅能成文。主司庇之。乃登賢書。至會試不第。居正悲甚。斷斷修怨。其主者人無不識其意。是時吏部尙書楊溥病免。當代廷議。以左都御史萬守禮。工部尙書朱衡。南京工部尙書張瀚。推衡自謂官宮保。當前敍。而又素善事居正。頗以驕於公卿間。居正聞而厭之。然亦惡守禮。不能訛。故如意。故特拔用瀚。瀚資望最凡薄。自是忽見拔。舉朝大駭。益相率趨事居正。無敢忤者。始輔臣高儀不久卒。居正以呂調陽弱。薦代之。調陽與居正行同而年差長。然秩尙卑。居正引之。數加恩。至保傅。調陽雖不敢有所持諍。然內不甚附之。居正凡事傲然取獨斷。不復諮訪。嘗病假一日。而遽入取調陽所擬旨。皆更定。曰。如此。何以示遠近。部院大臣緣居正指。益易調陽。甚或故抑繼其鄉人及親厚者。以見公。調陽惟仰

屋歎詫而已。上以師臣待居正。凡所下御札。皆不名稱先生。或稱元輔。有二白燕育於翰林院。白蓮雙蒂者三。居正以爲瑞。進之上。不自有歸德於居正。而居正父母皆老。壽無恙。上嘗出蟒繡金髻。裝重綵。以手書慰諭賜焉。居正故窶。無居第。乃大買地於江陵城。使錦衣百戶龐興。假干阪顯陵之便。而爲督治。舍宇甫建。馮保言於上。名其堂曰純忠。左曰社稷之臣。右曰股肱之佐。名其樓曰捧日。又爲儷語。以正氣萬世。休光百年美之。皆御筆大書。出內帑百千金爲資費。於是全楚之官。無不納重賄。四方督撫按都監司以下。亦無不賄助。凡三載而就鉅萬。窮極侈麗。自居正出者。不十之一。留都有小閹醉辱一給事中。其長已執而榜笞數十。且請旨繫治矣。而他給事中爭上疏請究闕。其語激居正。取首趙參魯謫之外。謂其欺幼主。不道。以悅馮保。保故以德居正。居正稍說以裁抑諸閹。諸閹非保黨。多怨居正。居正念御史在外驕傲。往往凌撫臣。出其上。痛欲折之一事。小不合。詰責隨下。敕令其長加考察。以故御史給事。雖畏居正。然中多不平。而抗勁喜事者出。南京戶科給事中余懋學。疏請行寬大之政。居正以爲風已。奪其職爲庶人。御史傅應禎繼言之。尤切。然不敢有所侵於居正也。居正以經筵進講。訴於上。謂此輩欲市國恩。收召朋黨。以便姦縱私。乃下詔獄。杖戍之賓海。給事中徐貞明等坐就獄。視具橐。亦逮謫外。御史劉臺。居正所取士也。由刑部郎改。居正擬以爲德。而臺居頗近。數刺得其陰事。俄出按遼東。遼東捷。御史不常報。而臺誤報。居正以故事。裁斥臺。臺益惡居正。且分不得免。遂極論其贖橫十餘事。居正怒甚。見上。俯伏而泣。不肯起。上爲下御座。以手掖之。曰。先生起。吾爲逮臺。竟其獄。以慰先生。臺至下詔獄。上命內閣杖之百。而遠戍。

之時物議頗鬻剝居正不自安乃陽具疏爲解得不杖奪職還里客有賀居正者公真宰相度哉居正盛額曰不過宋宰相事耳古人殆不然蓋以輕處爲未嫌也亡何吏部左侍郎張四維進禮部尙書文淵閣大學士入內閣者曰同某人等辦事至是直曰隨著元輔居正等辦事不欲彝之倣佐也於是四維恂恂若屬吏矣張四維字子維山西平陽之蒲州人少於居正一歲舉進士改翰林庶吉士授編修以久次爲右春坊右中允經筵日講進右諭德兼侍讀四維北人豪率讀書能文章頗有幹用才累進吏部左侍郎掌詹事府其父鹽鹽長蘆累資數千百萬四維既饒於財歲時候居正不絕而慈聖太后之父武清伯偉故籍山西得四維重賂爲之白太后聲譽頗起時呂調陽樸而老病數求去不能當居正意而四維頗精悍其督視修實錄踰於昔雖出不盡由居正非其所惡也既入內閣事推居正雅亦相狎尋實錄成調陽加少傅兼太子太傅而四維加太子太保居正加左柱國支尙書俸頗再疏辭上謂實錄國家最大典且一句一字孰非出先生筆者而何獨辭居正復疏言一句一字果出臣筆第此臣子常分何足言邇年以來人臣苟效微勞輒萌非分之想小有不酬則深獨賢之怨臣實恥之故不敢苟就冀以少勵此輩上始允其辭溫諭百餘言頒示史館諸拜恩者皆不樂而是時少詹事王錫爵遷詹事亦上疏辭不許居正以錫爵官不及辭而辭者常有激也意銜之錫爵侃侃自若尋禮部舉會試而次子嗣修與呂調陽之子皆中式居正等以嫌請避不允於是假其柄於四維而詹事申時行使所知以懋修卷上之四維已次名二甲第一矣既進御上啓姓名拔懋修一甲第一名而召居正謂曰無以報先生功貴先生之子孫以少報



耳。居正叩首謝出。語於人。冀塞言者口。而劉臺言漸驗。敵款塞。久不爲中國害。獨小王子之部十餘萬衆。東北直遼左。以不獲通互市。數入寇。然其人少弱。非久卽退。而總兵李成梁勇悍善戰。數拒卻之。秦甯福餘女直諸屬國。好侵盜爲不利。成梁伺入。輒劫其後營。敵殺老弱。焚掠輻重。又以春中。率精騎掩之。斬首□□略歲以千計。居正張皇上捷。天子數褒美。加恩輔臣。居正多辭不受。僅受賞。而成梁媚居正。至封甯遠伯。位三公。而兩廣之破山賊。督撫殷正茂。凌雲翼所斬敵尤多。至數萬。其爵賞亞遼左。天子謂居正運籌功多。居正益重。戚繼光者。亦東南良將也。旣移鎮薊門。多挾南兵。而北人嫉之。繼光懼。而是時兵部尙書譚綸。與繼光以財通。綸善用女術。頗干居正。居正試之而驗。則益厚綸。以示寵。繼光乃時時搆千金姬進之。居正且他所摹畫。多得居正意。以是事與之商確。諸督撫大臣。維繼光所擇欲爲不利繼光者。卽爲之徙去。而成梁與二廣之賂。亦接踵至。居正所居。正性整潔。好鮮麗。日必易一衣。冰執霞綺。尙方所不逮。時掌錦衣朱希孝。所蓄名書畫甚富。且死。喪其精絕者。以識別。居正旣露之。於是日有進以博一解顏。然尙不能當嚴氏之十二。而他珍奇瑰異。稍浮之矣。居正天資刻薄。好申韓法。以智術馭下。而士大夫之儉黠者。爭欲投中意。張瀚以久任之說進。然僅能行之。藩臬守令。而不能行之。給事御史。吏部屬譚綸。用給事中楊言。以蘇驛遞之說進。則兩都大臣。諸方面之任。咸儆民舟車。就旅店食。與商賈無別。而其屬以公使行。則馳驛呵殿。道路不勝其陵替。而遠宦者雖貴。不任行矣。省冗官。卽郎署多長僚。而待補者累累。無罪而褫祿矣。清庠序。則大邑之挾經就試者千餘人。而獲隸學官者僅百之一。貧書生改業而賈矣。皆

觀以爲名美。而奉行之人卒不能堅久。以故見害而不見利。承平日久。姦盜蠅起。至深入城市。剽府庫。以去。有司秘之。莫敢發。居正特嚴其禁。匿弗舉者。雖循吏亦必黜。得盜卽報斬決。以是有司莫敢飾情。以故有盜賊多。倉卒不審。輒報斬。以迎居正意。例盜邊海錢米盈數。皆斬首示衆。然往往取長繫。不能完。至瘐死。居正獨亟斬之。而追捕其家屬。千百株連。怨詈叢起。居正知之不恤也。又以糧運阻。喜進者議通海運。然不能得。故時舟子長年。且謂山島多岩壘。能觸舟。於是膠州人某。謂有膠河故道。自海入青。穿而出。可以避之。其意欲通故河以利其鄉邑。而大僚之下。佐久滯淫。不獲登八座。和而請從事焉。居正大喜。命以侍郎兼憲職。發青登萊三郡夫數萬人鑿之。然河中道高下不能達。稍深。則岸立頽。遷道。而其下多石。費十餘萬金。卒不可復。而東省人未見利。不勝調發。相與逐而噪之。乃中寢。然居正竟不罪此兩人而用之。其自用類如此。世宗朝。上大夫之言祥瑞者。居正顰額而醜之。其秉政。乃獨好飾祥瑞。以上下兩蠱媚。言及災異。則怒而見辭色。於是一切爲蒙蔽。滿九載。不上考。請罷。溫旨慰諭如例。賜白金鱗繡御膳。肥豕上尊外。復加賜白金二百兩。坐蟒衣一襲。綵幣八有副。坐蟒者。禁服也。居正凡三被錫。吏部具故事上。進左柱國太傅。予一子尙寶司丞。璽書褒美。給四代誥命。賜宴吏部。上將行大婚禮。斂髮用幘。欲加恩。居正疏辭。仍賜白金綵幣。調陽等。賜各有差。慈聖皇太后去乾清宮。將返慈甯宮。敕諭居正。謂吾不視皇帝朝夕。恐不若前者之向學勤政。有累聖德。先生親受先帝付託。有師保之責。與諸臣異。其爲我朝夕納誨。以輔台德。用終先帝憑几之誼。社稷蒼生。永有賴焉。因資坐蟒衣白金綵幣。居正侈之外。光動朝野。尋馮保之

實與託孤約略埒是而亡何其父文明卒同列以聞上遣大閹慰問居正視粥藥止哭絡繹道路三宮賻贈白金甚夥鈔幣白粲麻布至堆積寓所上雖加恩居正而心知其驕橫未嘗有意留之居正出錯愕無專見而其黨戶部侍郎李幼孜等倡諛辭謂上冲年不能親萬幾不可一日無相公何忍舍而遠去遂以奪情之說進而居正惑矣故事首輔去位之三日則次輔遷坐左翰林諸僚吏衣緋以謁至是諸僚吏皆衣緋入調陽樞不識物情雖不遷坐左而不先期止其僚入揖有報居正者謂翰林皆衣緋入閣矣居正悲謂我尚在而不復少顧忌卽一旦出春明門何望更入乃陽上疏請乞守制而露意馮保使固留之時有識者皆以爲非然而不敢言之朝時王錫爵張位趙志皋吳中行趙用賢習孔教沈懋學輩皆以爲不可懋學移書李幼孜責使諫止且責給事御史不言幼孜唯唯而已乃泄之居正居正怒甚時上遣吏部尙書張翰慰留居正宣旨畢瀚在吏部其事居正無不茅靡且以汙濫數爲言官所譏藉居正以安不敢以居正奪情爲是而左都御史陳瓚倡六部請留居正禮部馬自強頗持之而未上而居正悲則請於上謂瀚昏聩敕令致仕矣御史曾士楚等遂上章請留居正吏科陳三謨故居正客也而迫於同事者遲聞居正怒因蒲伏謁居正涕泣求解俄而疏亦上用賢不能平約中行具疏勒居正歸除服而後用之刑部員外郎艾穆主事沈思孝繼之且榜刺譏居正他事皆留中不報馮保蓋欲取居正指而居正怒不知所爲將擬居重辟於是王錫爵要申時行謁居正而請解時行不可錫爵乃獨身往質居正於喪所辭甚峻居正勃然且拜且言曰上強留我而諸曹子力逐我我何以處使有尺刃在我且自刎矣遂跪作劾狀曰

爾殺我爾殺我錫爵辭不可已而居正麾之出則進士鄒元標者復上章極言居正以元宰首數大倫何以師表天下且其人非能以仁義輔人主不過智力把持耳用之何所利前是上已下旨廷杖艾穆思孝八十謫遠戍用賢中行六十爲編氓而元標袖疏草入左掖門覩諸臣宛轉血肉心不爲懼疏上而中外壯之亦杖戍如穆思孝皆頻絕而蘇時彗星從東南方起長亘天無所不掃人情洶洶諸言者皆得罪以爲居正實應之街議巷謫至作謗書懸之兩長安通衢謂居正通內結黨且反居正不得已適草詔戒勵羣臣諭所以留居正而罪言者意再及之必誅無赦馮保爲請於上宣之朝言者稍息於是使居正子編修嗣修與司禮大璫魏朝馳傳往代司喪禮主事曹詰治祭工主事徐應聘爲治葬居正請不遣朝而以青衣素服角帶入閣理政及侍經筵講讀日給酒饌二席月給米粢十石油燭茶鹽薪炭稱是始居正自矯飭雖不能無任情而英敏善斷關闔揮霍其客面諛之謂漢唐所未覩至相率爲伊周居正雅自負不世出爲劉臺等所謫志意漸恍惚而至是始知天下之不見與思以威權劫之益無所顧忌居正爲羅倫小賢子何所知其書當投廟中以昔年閣臣李賢奪情修撰羅倫非之上書數千言其言雖不行而嗣後人稍知自愛非兵革無有言奪者矣居正之聞喪薦紳先生傳錄倫疏紙幾貴居正知之以故追恨倫尋上舉大婚禮故事諸授冊遣聘皆勳臣主之而首輔爲副使居正以有服不當與慈聖亦疑之而使閣問居正恐難於易吉居正聽其事乃曰爲天下母國之大事孰有重者且居正受上恩厚卽使之赴湯火不辭而矧茲易吉於是居正遂被紫橫玉以從事凡十餘日夜給事中李涑疏謂使居正不服吉不可以將

禮將禮而服吉。恐非上所處。居正與居正所以自處。夫吉禮非金革比也。閣部大臣皆可使不止一居正也。上苟惜居正。幸更之。居正報甚悲。遂以其辭直。姑切責。付吏部處分。乃出。諫按察僉事王錫爵意益憤。請以省覲告人。謂相君不有父。而君故省父以形若短。且君何以責相君深乎。錫爵曰。吾自知父不知有相君。且相君之自爲情而自奪之。夫上奪之可也。今乃徵太后中貴人以要上。卽如所請。不入朝。不衣錦。可也。而今且衣錦而從吉。卽從吉。吾意其額之有泚。而願揚揚自誇。謂人何幸。躬逢其盛。於是竟請告以歸。故事。大婚禮成。閣臣第有賞而無遷拜。居正知馮保謫中貴。欲得之。思以爲恩市。而身力辭之。以釣奇。乃擬調陽進建極殿大學士。兼支尙書俸。張四維加少保。兼武英殿大學士。仍各錄一子中書舍人。而馮保等皆加秩。蔭。敍上。果謂居正讓而有禮。錫璽書褒諭。累百餘言。命吏部候服除。援旨以請。已。習遼東捷。賜居正白金綵幣。先是。上所賜札。稱元輔。或稱先生。而不名。稱先生者。獨孝宗朝。而諭則有之。不以施筆札。至是。始兼稱元輔。張少師先生。且待以師禮。而居正有奏謝。亦自負以爲帝者師。且引贊拜不名之禮。人謂居正傲於上。而卑於馮保。卽陳蹇所不論也。居正見人情已定。乃始乞歸葬。疏再上。始允。使尙寶司少卿鄭欽等護歸。以一月爲期。葬畢。卽北上道。仍命撫按先期馳報。璽書敦諭。純白金爲印。曰帝賚。忠良以賜之。如先朝楊士奇。張孚敬。例得密封言事。仍戒內閣臣調陽等。有大事。毋得專決。仍馳驛之。江陵。聽張先生處分。人謂古稱伴食。同事則有之。未有伴食於三千里之外者。以調陽四維常拂衣。而調陽獨怏怏不樂。然未能果也。始居正念以閣臣里居者高拱在。未嘗一日忘。而殷士儻多左右奧援。或能

乘間以出。謂徐階老。易侍。擬薦之。自代。遣人布腹心於階。階諸子且信之。而居正復自念。階出而居正被召。還任名位固相等。而階前輩受業師。不敢据其上。乃請廣內閣員。詔卽令居正推。乃疏推禮部尙書馬自強。吏部右侍郎申時行。自強文淵閣大學士。時行東閣大學士。士強伉直。數與居正左。自分不敢望之人。以居正是舉。稍不易云。時行以文字受知居正。又蘊藉不輕崖異。居正安之。且念權寵盛。多樹敵。欲拔一二後進爲之繼。而得時行。旣入閣。與四維皆自昵於居正。談笑無間。居正當行。上及兩宮。賜道里費數千金。旣辭朝。復請見於平臺。上撫諭之曰。朕不能捨先生。恐重傷先生懷。是以忍而允所請。雖然。國家事重。朕將何所依。居正乃勸上以大婚之後。宜樽節愛養。留心萬機。因伏地哭。上亦爲之墮淚。爲居正奏辭慈甯宮。皇太后復以銀八寶六十兩賜之。所以慰諭有加。出國門。遣司禮太監張宏供帳郊外。以餞。百官皆班送。於是所經由。有司飭廚傳治道路。然意居正奔喪。參用凶禮。則飭白羅傘幔。執事輿臺。胥吏之徒。皆具素服以俟。而居正以邊將所餽遺兵器羅列禁衛。千兵百騎前後部鼓吹。光彩耀日。於是復皇恐。相率易繪彩一新。費復不訖。前是居正父初死。巡撫都御史陳瑞馳至江陵。乘輿以謁。入門。易白服。解紗帽。出麻冕於袖而戴之。加絰。伏哭盡哀。畢。則請見居正母。母不出。跪於庭良久。出。復伏哭前謁。致慰。乃坐其傍。有小閣侍。居正所私留以役者也。母睨而謂陳君。幸一眄。膝之。瑞拱立揖。閣曰。陳瑞安能爲公公重。如公公乃能重陳瑞耳。公公者。中貴之尊稱。咸獲見而呼者也。母爲之啓顏。至是陳瑞已遷刑侍郎。復與鄖陽都御史徐學詩及司道守令會葬。所以賻遺。不可勝計。光彩傾遠邇。時有御史于業者。罷久矣。與居



正故善會葬。自詭工堪輿言。密語居正。吾相地多。毋踰此者。是且有天子氣。居正懼。掩耳走。既畢葬。而諸兵備闖帥約。請居正閱操。用大帥禮。居正欣然許之。改服上所賜蟒以御。禮成大出其金帛。勞賜加等。時遼東續奏大捷。生復歸功居正。使使馳諭。俾定爵賞。居正爲條列以聞。而大學士呂調陽內慚。臥乞休。居正疏以母老。不能冒炎暑。請俟秋。於是內閣部及兩京官俱上章請取居正亟還朝。上遣錦衣指揮霍汝敬等馳傳往迎。爲日以俟。汝敬陞辭。錫之白金綵幣。而令大閣侍其母。以秋日取江路上。汝敬至。居正就道。先具疏閣。而撫按諸臣各馳報前。是所經由藩臬而下。皆望塵跪迎。諸御史在差者。越界趨迎。身爲前驅。約束吏卒。干輒飭廚傳。居正所坐步輿。則真定守錢普所創。以供奉者。前爲重軒。後爲寢室。以便偃息。傍翼兩廡。廡各一童子。立而左右侍。爲揮箠炷香。凡用卒三十二。昇之始。所過州邑。郵牙盤上食。水陸過百品。居正猶以爲無下箸處。而錢普無錫人。獨能爲吳饌。居正甘之。曰。吾行路至此。僅得一飽餐。此語聞於是。吳中之善爲庖者。召募殆盡。皆得善價以歸。道經襄陽。襄王出候。折東要居正宴。故事。人臣雖貴。極公侯。謁王。執臣禮。居正不欲執臣禮。辭不入。王強而後可。於是直入至便殿。具寶主而出。王者之有北面。自襄王始。過南陽。唐王亦如之。諸撫臣爭競以異禮待居正。而獨保定之孟重爲甚。雖同事者亦羞稱之。居正入。則遷孟重兵部侍郎。協理戎政。居正既過良鄉。抵郊外。詔遣司禮大閣宴勞於真空寺。口諭先生以午入。卽召見平臺。以未入。則質明見兩宮。亦各遣大璫宣諭。賜八寶金釘川扇御膳餅果醪醴。百僚復班迎。以次日質明入朝。上延之平臺。慰勞懇篤。且訊以途路所見。歲計物情。與此敵衰敗之狀。良久。子假

十日而後入閣。仍賜金幣鈔錠甚厚。雙羊上尊御膳。因引見兩宮。先是居正歸日。御史趙應元以候代襄陽不及會葬。卽得代而中悔。恐獲罪。上書移病歸。故事。御史在外不得輕移病。必撫臣爲代請。否者都察院密察參以聞。此法久不舉。而居正之門客僉都御史王篆時佐院。要脅其長陳煥。使論應元。遂斥應元爲民。中外知其自感憤懣。而戶部員外郎王用汲遂劾煥以非法陷應元。阿附權臣。且謂托星變考察。所懲抑者皆居正所不喜。宜斥煥而留應元。其詞甚峻。詔奪用汲官。居正初見用汲疏。怒甚。畫其事。謂臣賦性愚戇。不能委曲徇人。凡所指辯。注施一概之法。法所當加。親故不宥。才有可用。疏遠不遺。又務綜數名。實搜剔隱姦。推抑浮競。以是大不便於小人。而傾危躁進之士。從而鼓煽其間。相與慝慝。擯職冒險。釣奇以觀幸於後日。爲擢取富貴之計。故向者劉臺爲專權之論。今日用汲造阿附之言。夫專權阿附者。人主之所深疑也。日浸月潤。鏤金銷骨。小則使臣冒大嫌而不自安。大則使臣中奇禍而不自保。明主左右。旣無親信重臣。孤立於上。然後呼朋引類。藉勢秉權。恣其所欲爲。紛更變亂。不至於傾覆國家不已。此孔子所以惡利口。大舜所以疾讒言也。臣是顧命大臣。義以死報國。雖赴湯火。皆所不避。況於毀譽得喪之間。皇上不用臣。則已。必欲用臣。臣必不能枉己以徇人。必不能違道以干譽。臺省紀綱。必欲振肅。朝廷法令。必欲奉行。姦宄之人。必不姑息。以撓三尺之公。險造之徒。必不敢引進。以壞國家之事。如有捏造浮言。欲以榮惑上聽。紊亂朝政者。必舉祖宗之法。而明正其罪。此臣之所以報先帝而忠於皇上之職分也。優詔褒美。居正累百餘言。戒飭言者。居正本意欲速用汲。置之死。而四維等爲乞哀。輕之。乃厲色而待。一語不

接握筆縱橫了無顧盼。咸捧手受成而已。及秋而魏朝奉其母。所經由游步。皆設席屋。張綵幔。徐州兵備副使林紹。至身雜撓船卒中。爲之導護。遠邇奔趨。將抵京。上遣司禮大閹郊迎。與魏相結騎隊。鳴鼓角。列旌幟。橫穿御道而過。觀者皆驚汗。上復賜金纒絲珍珠青紅寶石首飾。雜色繡蟒帛羅。絢綺無算。兩宮之賜稱是。凡所待居正母子。幾用家人禮。居正乃收綺繡奇器寶玩以進。上及皇太后李所費鉅萬萬。而錦衣緹帥如劉守有史繼書。皆受役如奴客。爲之收斂羅織作矣。不遺餘力。凡不附居正者。皆以緝訪計逐之。先是居正與馮保逐高拱。拱內恨刺骨。而畏其權與文深。不敢出一語。居正始歸葬。道新鄭。拱已病若瘵。故爲篤狀。輿詣居正。乃哭謝。謂往者幾死。馮璫手雖賴公活。而璫意向未已。奈何。居正笑曰。有我在。無憂也。拱因是獲令終。時殷士儻歸歷城。其家親戚爲閹中掾。與故裕邸閹善。謀乘居正歸。而用士儻。居正知復切責掾。怖而不能答。數日死。馮保有私代筆札人徐爵者。居正爲擢用。至錦衣指揮同知。掌南鎮撫司。又使其蒼頭游七與結爲兄弟。居正有所使。游七入以告徐爵。爵以達馮保。有所謀。亦如之。凡上之獎慰居正。詔旨皆出爵手。游七亦冒功得官。勳親文武大臣。至翰苑給事御史。多與還往。通姻好。游七具衣冠報謁。據上坐爲款。宵飲。譴呼無間。居正固與馮保通關。然意忌。聞張四維之私結保。恫喝止之。四維以是恨居正。俺答入貢。久而以兵西逼。回夷使使之烏思藏。迎所謂國師。鎮南堅者。創利以居。鎮南堅投書上。居正乞賞。而賄以大士像。璣璣金剛諸佛。無算。結居正。上疏辭卻之。上褒稱居正輔理勳猷。宜播遐邇。戎狄咸賓。朕得以垂拱受成。深用嘉悅。敕受之。而別爲答賜。時上病疹瘥。御朝羣臣皆廷賀。而居正以

持服不與。上先爲之御平臺以見。慰諭有加。賜金帛御膳。殺蒸上尊。居正還閣。乃鳴鐘鼓見羣臣。先是嘉靖末。李春芳在禮部。忠宗室日藩衍。中外數萬人。皆仰給縣官。國土之入。不足以供歲額。相計議爲宗藩條例。於封襲婚姻子女名數祿賜之屬。皆爲之限。至是居正條摘苛細。請下禮部入會典。而禮部尙書潘晟。於居正爲前輩。謬恭謹。其在留都。率九卿疏請亟迎居正入朝。居正憐而用之。而晟多爲藩王道地。居正聞之。怒。嗾言者論去之。而擢用刑部侍郎徐學謨。初守荊州。居正爲編修。使歸治妻葬。學謨禮厚之甚。以是心德之。居正既貴用事。學謨兩遇劾歸。皆居正力持起之。自是凡四起。皆不離居正鄉土。未久輒遷。自成弘後百餘年來。禮尙書必翰林擢。惟嘉靖初以席書言大禮。獨由他曹進。言路攻之。至數十疏不止。學謨自刑部擢。亡敢出一語者。人謂居正威在世宗上矣。居正所善者。卽侍郎李幼孜。嘗爲郡守。見辱於儒生。附居正。居正爲左右之。不十載。至八座。居正復與通姻。驟遷至工部尙書。幼孜無他長。每見居正。輒語移日。多布腹心。及廣樹朋黨。援引所私。而時一進逆耳語。以示忠赤。如所爲奪情擅權事。未嘗不開端引之。出則傾身以交。伉直聲者。謂吾力言之。如相公不聽何。殷正茂爲戶部尙書。進大珠瑰寶。鵝闕以媚居正。而得用。居正專以鬪奉進。慈甯爲坐褥。上見之。知其自居正。心恚之。幼孜與正茂爭寵。而妬。數嗾言路。論之歸。而王篆入吏部。其見知愛。甚於幼孜。數爲居正書。幼孜時時在外。揚相公之愎諫。而已力逢迎之。冀爲他日地。居正微伺得悉之。乃投札幼孜曰。吾憊矣。寡助之至。親戚叛之。奈何。幼孜懼。遂乞歸。而以會省吾代之省。吾居正所取士也。爲人貪而巧媚。小有才。其撫四川。借軍興。乾沒萬計。入佐兵部。以右都

御史掌南院。至是代幼孜。吏部尙書王國光山西人。與四維同鄉。有連。恐居正疑之。而篆從傍爲耳目。於是六曹咸傾心事居正。雖對妻子牀第無不稱居正爲聖賢。其始士大夫之諛以伊周漸爲常談。不能得居正色喜。則進爲五臣。又有以稷契皋陶不爲重。則直進之舜禹。而居正恬然不以爲駭怪。中允高啓愚主試事。遂以舜亦以命禹命題。天下紛紛目啓愚勸進矣。時上漸備六宮。太倉所儲金錢多所宣進。居正乃使戶部進御覽數目而陳之。爲歲每入數減而出數溢。恐其不可繼。而請上置之座隅。時賜省覽。量入爲出。罷節浮費。疏入留中。時言官請停蘇松織造。不聽。居正爲委曲以請。得損其半。復請停武英殿工。及裁省外戚遷官恩數。上多曲從之。一日上御文華殿。居正侍講讀畢。而以給事中所上災傷疏問之。因言鳳陽及江南諸郡屢無歲。而徐宿之間民至屑榆皮而食。不急賑之。則相聚爲盜。賑之切不可緩。上曰。惟先生處居正復奏上至仁愛民如子。凡請獨請賑無不賜允。而在外諸司往往營私背公。剝民間上。非惟下體皇上子惠困窮之德意。且不知臣等所以贊皇上之愚忠。殊可恨也。今給事中傅作舟疏云。報災則曰不敢報。請賑則曰不敢請。有何不敢報與請。而推調支吾。歸怨君上。卽積穀一事。屢爲申飭。竟成虛文。彼處有自理贖贖未嘗佐公家之急。將焉往。臣等不勝憤懣。竊以爲此輩若遇聖祖。不知當處以何法。上怒曰。審爾何不重處之。居正拜領命。乃又曰。邇來正賦不虧。府庫克實。皆以考成法行。徵解不爽。今江南困窮甚矣。河南災畿輔亢旱。將來獨賑恐不容已。惟皇上加意撙節。於宮中一切用度及服御可省者省之。賞賚可裁者裁之。至於布施一事。尤當禁止。與其惠緇黃之流以求福利。孰若寬恤百姓。全活億兆之

命有功德尤大。上曰：然於是有獨貸而督責奉行者之旨肅如矣。江南貴豪如華亭金壇上海各恃勢若  
姦滑巧避匿而不肯完賦者。與瀉鹵蠅蝶之民錯莫知所辨析。居正深恨之。以是選擇大吏精悍者。嚴行  
督責。賦以時起。而民不勝楚樸。則相率而歸怨居正。國家日益以富。閭閻日益以窮。然功與罪實相當。時  
會居正斬服將除。而上宣召吏部問期日。於是手敕元輔張少師先生忠孝兩全。今制服已滿。朕心嘉慰。  
特賜玉帶大紅坐蟒。蟒各一襲。金壺金爵。用示眷念。俾朝見後。仍御平臺召對。以後朝參經筵。俱吉服  
如舊。既對。慰諭久之。使大閹引見兩宮。仁聖皇太后賜白金文幣。慈聖皇太后慰獎尤至。賜御膳九品金  
絲壺臺盞。金箸白金彩帛。暈素甜食酒器。使司禮太監張宏侍宴。甫就職。而吏部以大婚敕諭請。特詔元  
輔社稷重臣。受先帝顧託。翊載朕躬。以及大婚。獨成治理。勳績茂著。復加太傅。增歲祿百石。進錦衣千戶。  
張問修爲指揮僉事。於南鎮撫理事。居正復辭太傅。而受其餘。尋吏部復舉居正守制歲月。爲之請十二  
年滿加恩。復再辭。詔復加慰諭。凡百餘言。爲卿之所處。恩義兩盡。足以垂範萬世。特允所請。以全忠孝大  
節。至於卿之勳勞。簡在朕心。常有酬眷。時復當會試。大學士申時行許國爲主司。而居正二子懋修敬修。  
與四維之子甲徵。皆中式矣。居正扈上謁諸陵歸。卽具疏乞休。中云。拜手稽首歸政。則隱然復子明辟。凡  
再上。而天子慰留懇切。最後。手書稱慈聖口諭。張先生親受先帝付託。豈忍言去。俟輔爾歲至三十。而後  
商處。先生毋復興此念。居正乃出。而懋修卽狀元及第矣。敬修中進士高等。甲徵次之。皆得禮部主事。皆  
邑邑不樂。人爲之語。首甲幸有三人。云胡靳此二子。而懋修嗣修。俱列史官。每出。則衆相指而詛。或作俚



諺書而黏之宮牆門下。客至引以相告。指得外補。王篆與會省。吾益橫。南北給事御史。則傳作舟。王蔚秦舜翰。李選。朱璉。錢岱。顧爾行。爲之牙爪。而作舟璉尤恣肆。巽鄙無恥。而南京兵部主事趙世卿。抗章言時政。皆陰譏居正之操切。居正怒。欲譴之。吏部尙書王國光爲畫策曰。譴之是成其名也。且或以動上聽。某謀爲公任其怨。不旬日出爲楚府左長史。蓋杜其遷轉地也。又半載當大察。屬南京吏部都察院去之時。尙書何寬與郎中李已比。而併譴司業張位。位先以居正聞喪有所刺譏。其望實甚。誓以王篆屬不敢抗。李已素有直聲。人爲之恨。且惜。居正聞位譴亦不悅。曰。何至乃爾。而是時上章抗居正者。穆茂。孝。鄒元標。皆已遠戍。督撫大臣故折挫之使不堪。冀以聞於居正。取一快。而王篆旦夕待居正。知其不釋意於劉臺。臺之歸。類不理於鄉人口。於是乘間使其鄉御史賀一桂。曠怨家。疏其盜邊銀不法數事。於是江西巡撫王宗載下有司。悉爲證實。而遼東撫按於景昌。傅會之。坐遠戍。而繫追其贓金。又繫其父子。竭產以償。不得。則別以富人犯法者。寬其罪。使爲之償。而後遣戍。至嶺外。無何。飲於其戍主所。歸而暴死。蓋戍主有所受毒焉。人咸知之。爲作傳語傳京師。時趙用賢。吳中行。亦家居。王篆與省。吾承居正旨。風陳炯。使用故嘗請奪情。御史曾士楚按吳。使伺用賢中行短。而甘心焉。士楚之吳。初爲御史。新脅於長。不得已具疏而中悔之。既至。歎曰。吾嚮者猶象齒也。而今乃使我鷹犬耶。且吾已愧之人。復安敢愧之天。因移疾歸。而居正竟亦無他。有狂生吳士期者。甯國人也。與沈懋學善。懋學時移疾里居。而士期常欲走京師。上書有所規於居正。而懋學切止之。其語頗流聞。而吳中輕薄子。僞爲故都御史海瑞論劾居正罪惡。亦傳至甯國。

而有梓之者。操江都御史胡纘。屬同知龍宗武。使究其人。不得。則執士期以塞。而纘知其爲懋學友也。使宗武捕而引懋學。且報居正欲自以爲功。而居正意不欲彰。使焚其書。王篆則貽書宗武。必令引懋學。而宗武不可。而士期乃餓死於獄。遂寢其事。王篆思所以媚居正。與尙書王國光謀曰。彼前後上疏戾斥者。皆壬夫也。而意未嘗一日忘復用。欲杜之。則莫若中之考察之例。於是因大覲。疏請錄諸戾斥者姓名於察吏後。而榜之。示不收。居正悅。報可。上初卽位。馮保朝夕視起居。擁護提抱。差有力焉。小所扞格。卽以聞慈聖。而慈聖素誨上嚴切責之。且曰。內庭可耳。使張先生聞之。奈何。於是上嚴重居正。而馮保意自得。所以事上不能一切順。多逆上旨。上漸長而厭之。保內恃太后。外挾居正。待上左右殊苛竣。每在上前輒牽下加笞責。諸有財力可資藉。監局多持不與。而與所黨閹張大受輩。使爲上耳目。頗倚保勢。藐上左右。諸閹如孫海客用孫德秀溫泰周海輩。皆貴倖善媚。每不甘保之見凌。上頗好馳騎。挽強弩。擊劍。豪飲至醉。海等因以言激之。上怒甚。睨視其側。有二監皆保養子。手劍殺之。卽騎而馳之。保所呼保欲殺之。保覺。因擁大石支門。會上醉甚。扶歸。熟寐至曉。保亟趨謁慈聖爲廣受語。慈聖怒且駭。召上跪而責之。上哭謝罪。曰。此孫海客用誘我耳。慈聖乃使保捕海用杖之。發孝陵種菜。而盡收乾清宮所蓄兵仗。庫鑰之。逼使上手書詔自責論內閣。而居正謂海用處之輕。復削爲淨軍。復請將德秀泰及周海併逐之。其諸中貴內侍。皆勒令自陳。居正與保逼上爲去留之。居正因上疏戒遊宴以重起居。專精神以廣胤嗣。節賞賚以省浮費。卻珍玩以端好尙。親萬幾以明庶政。勤講學以資治理。上迫於太后。不得已。皆報可。於是上左右親信。

不附保者殆盡。居正嘗纂古君人治亂之事。而條治者八十一。亂者三十六。以應陰陽之數。繪而爲圖。以俗語解之。進之上。至是復屬儒臣紀高皇帝及列聖寶訓實錄。分類成書。凡四十。曰創業艱難。曰勵精圖治。曰勤學。曰敬天。曰法祖。曰保民。曰謹祭祀。曰崇孝敬。曰端好尚。曰慎起居。曰戒遊佚。曰正宮闈。曰教儲貳。曰睦宗藩。曰親賢臣。曰去邪姦。曰納諫。曰理財。曰守法。曰警戒。曰務實。曰正紀綱。曰審官。曰久任。曰重守令。曰馭近習。曰待外戚。曰重農。曰興教化。曰明賞罰。曰信詔令。曰謹名分。曰裁貢獻。曰慎賞賚。曰敦節儉。曰慎刑獄。曰褒功德。曰屏異端。曰飭武備。曰御夷狄。其辭多簡切。請以經筵之暇進講。又請立起居注。紀上言動。及朝內外事。爲修史張本。日輪翰林臣四員入直。應制詩文及備顧問。上皆優詔許之。旋以滿十二載。奏最。上爲召吏禮二部傳諭。元輔居正受先帝顧命。夙夜在公。任事任怨。雖稱十二年滿。實在開十五年。忠勳異常。恩典宜厚。尋使司禮太監張成。賜白金三百兩。綵幣四十。有副坐蟒蟠蟒各一襲。酒六十瓶。鈔十萬貫。饌脩五桌。羊豕鵝雞。餈蜜油麵棗果薪燭之數。多以千百計。吏禮二部議上。加上柱國太傅。支伯爵俸。仍加歲米二百石。予一子尙寶司丞。給四代誥命。下璽書褒揚。錫宴禮部。止疏辭。上柱國及伯爵俸而已。明興文臣無拜三公者。謂居正當力辭。至是皆驚怪。以爲且必封公侯。加九錫。而居正亦益汰。毋論六卿。其視四維等。若不屑與稱僚案者。四維等事之益謹。而居正病。病由多御內。日不給。則時餌房中藥。發強陽而燥。則又飲寒劑。泄之大腸出。日以羸削。上時下諭問疾。大出金帛。以爲醫藥資。凡四閱月。竟不愈。而自六卿大臣翰林科道部曹。下至冗散。亡不設齋醮祠廟。爲居正祈禱者。皆舍職業。朝夕奔

走仲夏曝身赤日中。延至南都山陝。楚汴淮漕。撫按藩臬。亡不皆然。居正深居不出。欲使知之。則厚賂其僕以達。上始令四維等理閣中細務。而大事猶卽家令。居正平章。居正始自力。而其後體甚不能徧閱。混領之。尙不使四維等參預。遼東以捷聞。居正遂進太師。歲加祿二百石。子爲指揮僉事者。進同知。居正病益欲不可爲。乃乞歸。上復優詔慰留。稱之爲太師張太岳先生。居正度不起。會上使人問堪次入閣者。居正薦前禮尙書潘晟。兵部侍郎余有丁。許國陳經邦。又薦尙書徐學謨。曾省吾。張學顏。侍郎王篆等。皆可用。而指王錫爵等爲姦邪。上爲黏之御屏。晟雖居正故讖。然不甚重之。而馮保則晟故所授書。所以居正爲首薦之。居正待其子弟嚴。每三五日入問安。不交一言而退。以貌羸甚。惡人見之。臥帷中。至明不聞聲。家人怪而發焉。則氣絕矣。計聞。上愴悼。輟朝。上及兩宮皆賜齋。檀麻布各五百匹。米各二百石。潞王等合贖白金二千三百兩。香及油燭以數千計。薪以數萬計。祭十六壇。卽國公兼師傅。不若也。贈上柱國。諡文忠。遣營葬。仍命京堂之四品者。錦衣之在堂上者。護喪歸。其子編修嗣修等疏辭謝。上報諭。朕念先生受先帝顧命。鞠躬盡瘁。歿而後已。忠勞可憫。遣司禮中貴人陳政護喪歸。俱令馳驛。居正之喪。輿輻重。凡七十餘艘。用夫三千餘人。前後十餘里。不絕。於是四維始爲政。而事漸變矣。馮保亟爲上言。起潘晟爲武英殿大學士。使行人趣召之。晟鄙而貪。士論所不齒。每追恨居正。四維度時行不欲爲晟下。於是風言官數上章攻之。御史薦吳中行等諸臣。當召用。馮保怒而黜之。而言官多有詆居正時政者。居正之客諸大臣猶持不肯行。於是徐學謨歸女於時行之少子。以自固。而馮保以病在告。給事御史復乘間論劾晟。

晨上疏辭四維擬旨放之歸。時晨已至臨安道中。委頓返駕。馮保病起。悲曰。我小病也。而遽無我。居正之黨王篆。曾省吾朱璉。微知之。且謂四維之且甘心於居正。而逐我曹。因委身自昵於時行。還往無間。皇太子生。上喜甚。因上兩宮徽號。頒詔赦天下。四維進少師中極殿大學士。時行等進。費有差。馮保至錄一姪都督僉事。保始欲封伯爵。而四維以無故事難之。保詭曰。爾由誰得今日耶。而負我。於是篆省吾行數萬金。謁保與權佞。得從容言四維短。而極稱時行。相約逐王國光。則省吾代爲吏部。逐陳煥。則篆代爲都察院。四維故煥所造士也。而省吾以陵工驟進。太子太保御史某者。篆所厚也。遂上書極論王國光。而中謂國光媚四維。拔其中表弟王謙爲吏部主事。四維避嫌不出。時行遂擬罷國光。而於工部覆謙交代疏。以御批責其鑽刺而譏之。於是言者紛然起。攻四維窘甚。求徐爵張大受爲保道地。皆有賄。於是時行小謂言者以解。而四維謂時行與謀。遂水火矣。國光既去。而擬當代者。馮保私其鄉人某。王篆不敢違。遂託省吾以篆之負約也。怒而相詬。至相擊。朱璉復爲之交。閩其間。遂不可解。而上故所幸閹張誠者。見惡馮保。上不得已斥之。而使密調保所爲。遂及居正。至是誠復入。悉以兩家交結恣橫狀聞上。且謂其珍玩寶藏。踰於天府。上心動。四維屬其門人御史李植。使極論徐爵擅入宮禁。爲保擬旨挾詐通姦諸違法事。而他復論曾省吾貪邪縱欲。欲以嘗上。而御史江東之亦極論保罪狀。尋逮徐爵下詔獄。省吾勒致仕。譴馮保爲奉御。居南京。籍其家。金銀百餘萬兩。珠寶瑰異以鉅萬計。他宅舍田產器用稱是。內藏爲充物。而上益心豔居正。疑其贏積或過當矣。始居正卒。而王篆猶挾馮保以恫疑恐喝。士大夫尙畏之。其銜恩者。趣之

若流水有兩子。一試其鄉。一試於南都。試南都者。九卿御史出郊迎。巡按以下爲之飭傳舍。其郵供提學。至檄屬邑之雋同經者與處。而監試御史當試時。委曲使之同號。竟日至暮。美酒梁肉水陸之珍。絡繹饋餉。御史至自具草。使同號者酌量之。且代爲書。惟坐飲噉耳。竟得中前列。而其鄉之試者。亦與選人情益憤憤。而言官乃列上其事。并論劾居正三子。躡取上第。而四維之子甲微。已爲山西之第二人。時行之子用嘉。順天第六人。而次子用懋。昌浙籍。與選如篆矣。四維雖恨居正。而畏其不利己。乃不復窮究。而第擢居正篆之亂政。悉削籍爲編氓。時給事御史新進者。益務攻居正爲奇。併及其黨。而御史楊四知語尤峻。於是居正始奪上柱國太師。再奪諡。而王篆曾省。吾朱璉。陳璘輩。毋不斥削。吳中行。趙用賢等。皆召用補官。有差。劉臺贈光祿少卿。還其產。御史魏允貞。見四維時行之子。先後預薦。而無有及之者。意不平。乃於建言疏。頗譏切時政。而謂二相不改居正之覆轍。而私其子。坐貶。二相皆有疏辯。而時行尤齷齪強飾。人莫不唾之。四維知海內之怨居正深。一切務爲寬大。以收人心。而法度斬廢弛。至大計。貪酷不謹罷削者。亦得復官及章服。而祖宗之法。圯且盡矣。時行既已爲王篆輩所推。意不自安。會得寒疾。踰月不能起。四維語時行之客曰。夫首相者。若四時之有春行。必有夏。何俟煎迫耶。時行起。不敢謝過。唯默默而已。而甲微用嘉復登第。四維嗾其門客之在言路者。俾具草。令先攻尙書徐學謨。以嘗上學謨斥。卽攻時行。草具將上。會四維以父喪歸。四維家素富。累積金至鉅萬。而尤納賂不已。度不可如居正例奪情。乃大行金於上。左右諸用事者。使爲問曰。時行故居正所私。今復得其家金寶萬計。爲覆露之矣。上又爲心動。而御史



羊可立者。四維客也。乃復追論居正罪惡。而謂居正以私憾搆遼庶人憲燾。遼庶人之妃。因而上疏辯冤。且曰。庶人之庫金寶萬計。悉入居正家。上喜。以法籍居正。乃命司禮太監張程。刑部侍郎邱橐。偕錦衣指揮給事中往籍其家。併勘故構王憲燾者。其父王堯。以幼未立。而居正之祖父爲護衛軍。太妃聞居正少警穎。且與王同歲。召而奇之。賜之食。而坐王憲燾其下。且謂而不才。終當爲張生穿鼻。王憲燾以是漸居正。而會居正登第。召其祖虐之酒至死。故居正心銜之。張程等行。居正諸子於夜焚毀其奇貨禁物。而荊州守令以御史意。先期錄其人口出。而子女遁避空室者。不及發。已錮其門。則餓死者十餘曹。皆爲犬所殘食。而盡發其諸子兄弟藏。得黃金將萬兩。白金十餘萬兩。長子懋修不勝刑。自誣服寄三十萬金於會省。吾王篆萬。而懋修自縊死。於是詔留田千畝。以贍其母。而省吾等皆追究。時御史丁此呂復追論科場事。謂高啓愚之以舜禹命題爲媚居正策。禪受。且旁及諸黨人。時行擬旨留啓愚。而報處其餘。於是吏部尙書楊巍等駁此。呂爲曖昧。中人以大辟。若先朝之趙文華。王聯等。旨下。雖出此呂外。而奪啓愚職。給事中王士性。等窺上旨所嚮。遂極論楊巍。且謂時行實黨居正而主之。於是內閣部院諸大臣復劾士性等。旃席之地。幾成訟庭。於是彼此相率而詣內臣求援。時行巍雖得留。而大權悉旁落矣。其後言者復攻居正不已。以媚上。於是復敕法司盡削居正官秩。奪其前所賜璽書。四代誥命。以罪狀布天下。謂當剖棺僂屍。而姑免之。其弟都指揮居易。子指揮同知問修。及編修嗣修等。俱發戍邊瘴地方。李植江東之等。以能發姦。遷京秩有差。

史官曰。託孤寄命。伊霍成其偉績。呢黨落憎。孺閔名曰盜儒。自非穆穆休休。奚以經國據鼎鉉也。居正祖申商之餘習。結曹王之奧援。能以法劫持天下。使天子幾有尙父之號。羣臣俱成結舌之風。呼朋引穢。終身不悛。器滿而驕。宵小羣激。虎負不下。魚爛不顧。寒暑移易。日月虧蔽。沒身之後。名臭家滅。宜矣。子曰。如有周公之才之美。使驕且吝。其餘不足觀也已。說者謂其功在社稷。過在身家。明當中葉。天下磐石社稷之功。何以云然。蓋其根本已撥。萬死莫贖者矣。悲夫。





明書卷一百五十一

列傳十二

藝術傳

史官論曰。夫通方利用。帝王以之右民。習器入神。聖賢以之寓道。託物喻志。達人以之藏身。藝之時用大矣。姬旦自負多材。齊桓不廢九九。君相之弘時務也。鈞可以悟弋。弋可以悟道。君子之遊於藝也。至如牙曠之調音。梓慎裨竈之占氣。史蘇季主之拂龜。端策倉公。秦和之見垣一方。莫不窮極眇眇。驚猶鬼神。格之技流。豈猶形下者乎。世衰道降。藝亦因之。良由淺者習有粗。拙而深者又好爲迂怪。心無專志。而學有多歧也。故聖人賤其無恆。明君斥其玩物。若京郭之流。炫奇示異。致隕厥身。抑所謂見毫末而不見其睫者歟。茲采明興以來。藝精而不詭於道者。數人著於篇。以其爲藝也。故多疏失。聊備其選云爾。

宋克趙搆謙祝允明文璧傳

宋克字仲溫。長洲人。別號南宮生。偉軀幹。博涉書傳。任俠。喜擊劍走馬。尤善彈指飛鳥。下之家素藏用。周養賓客及四方豪士。時與少年博飲遊戲。盡喪其資。逮壯。見天下亂。思自樹功業。乃謝酒徒。去學兵。得風后握奇陳法。兼工騎射。將北走中原。從豪傑計事。會道梗無所合。遂泝大江遊金陵。入金華會稽諸山。蒐

覽瓌怪。渡浙江。汎具區而歸。家居。以氣節聞。衣冠慕之。爭往迎候。素善交。無貴賤。皆傾身與接。有二軍將。恃武橫甚。數毆辱士類。號虎冠。其一嘗召飲。或曰。彼醜。不可近。笑曰。使酒人。惡能勇。吾將柔之。卽往往上座。爲語古賢將事。慷慨風生。其人竦聽。拜起爲壽。至罷會。無失儀。其一嘗遇客次。顧克不下。以目攝之。他日見克獨騎出。其人從健兒帶刀策馬踵後。若將肆暴者。克故緩轡垂鞭。當中道徐進。不少避。知非儒。遂引去。曰。此老精神。望之尙可畏。況覲面耶。吾不可不一見。明旦介客詣謝。請結驢。性抗直多辨。好箴切人。過有忤己。則面數之。無留怨。與人議論。斬必勝。然援事析理。衆終不能折。時藩府欲致幕下。不能得。將中危法。以智免。家雖貧。然喜事。故人或饋酒肉。立召客。與飲啗相樂。四方遊士至吳者。必與周旋。款曲延譽。上下所知。有喪疾不能葬療者。以告。輒令削牘疏所乏。爲請諸公。間營具之。終飲其惠。不言。故人皆德之。謂婁君卿原臣先之流。久之。稍厭事。闔門寡將迎。闔一室。皮法書彝鼎古琴自娛。工草隸。遂以書名。章草久不傳。至克始得其法。用筆精妙。而與古人並驅。日費千紙。厭之。遂自闔。希復執筆。欲慕靜退。時賦詩見志。怡然處約。若將終身。洪武初。同知鳳翔。輒棄官歸。卒。時宋廣字昌裔。亦善草書。人稱二宋。祝允明謂仲溫書如初筵。忽見三代鹵彝。蓋有天授。非人工。所傳七姬志等。大類鍾允常。

趙撝謙。字古則。餘姚人。洪武初。徵修正韻。衆以謙年少。黜爲中都國子監典簿。同官論事不直。罷歸。築考古臺。述六書之音注聲音文字通及易學提綱諸書。凡三百餘卷。大臣薦召爲瓊山教諭。進所著書。不報。還瓊山。初謙來京。宋濂遣子璟受業。謙歸。璟校正韻。多用謙說。謙六書之學最精。旣沒。門人柴廣敬以聲

音文字通進學書者心好之莫得而見也謙於世利聲華澹然無罣礙直義所在目無王公以在厄窮無悔卒於番禺

祝允明字希哲吳人生而右手指枝因自號指枝生爲人好酒色陸博不修行檢嘗傅粉黛從優伶酒間度新聲俠少年好慕之多齋金游允明甚洽舉鄉從春官試下第是時海內漸熟允明名索其文及書者接踵或輦金幣至門允明輒以疾辭不見然允明多醉伎館中掩之雖累紙可得而家故給以不問僮奴作業又捐業蓄古法書名籍售者或故昂直欺之弗算至或留客計無所出酒窘甚以所蓄易置得初值什一二耳當其窘時黠者持少錢米乞文及子書輒與已小饒更自貴也嘗遺黑貂裘甚美欲市之或曰霜落矣何故市允明曰蒼頭言始識不市而忘蔽之篋何益後拜廣南令未幾歸橐裝可千金日張酒呼故狎游宴歌呼爲壽不兩年輒盡允明好負逋債出則羣萃而訶諍者至接踵竟弗顧去所著祝子通祝子雜罪知蠶衣浮野記語怪蘇材小慕輿甯志各詩文數百卷卒年六十七其草書爲明第一云

文璧字徵明以字行更字徵仲吳人生而外椎八九歲語猶不甚了了或疑其不慧其父楸則獨異之曰兒晚成無害也既長從父宦於滁以文贊郎中莊景景奇之及父以病報徵明爲廢食挾醫馳至則歿三日矣慟哭且絕久之乃蘇郡察合數百金爲贖固謝不受曰勞苦諸君孤不欲以生汗逝者其詩文書畫冠絕一時日與吳士祝允明唐寅徐禎卿遊都御史俞諫念徵明貧而才欲遺之金謂曰若不苦朝夕耶對曰朝夕具饘粥詎指其藍衫曰敝乃至此乎乃佯爲不悟曰兩暫敝吾衣耳諫竟不忍言遺金事一日



過其廬而門渠沮洳。顧謂曰：「通此渠，若於堪輿言，當第。」謝曰：「公幸無念渠，渠邇當捐傍民舍，甯庶人濠。慕其名，貽書及金幣聘，辭病臥不起。於金幣無所受，亦無所報。亡何，濠竟以反敗，尚書李克嗣撫吳，薦於朝。超授翰林待詔，爲待詔可二年。修國史，侍經筵。歲時上尊餼幣，所以慰賜甚厚。然居恆邑，邑不自得上疏乞歸，寢不報。又一年，當滿考，再上疏乞歸，又不報。楊廷和以召入，徵明見獨後。廷和亟謂曰：「生不知而父之與我友耶，而後見我，乃毅然曰：『先君子棄，不肖三十餘年，而以一字及者，不肖弗敢忘也。故不知相公之與先君子友也。』竟立弗肯謝。廷和悵然久之，曰：『老諍甚，媿見生。』幸寬我，迫欲歸，疏三上，得致仕歸。杜門不復與世事，以翰墨自娛。諸造請戶外屢常滿，前是周王以古鼎古鏡，徽王以金寶瓶他珍貨，直數百鎰。贊使者曰：『王無所求於先生，慕先生耳。』盡爲一啓封，遜謝曰：『王賜也。』啓之而後辭，不恭，竟弗啓。其書畫徧海內外，往往真不能當贗十二。好爲詩，傳情而發，娟秀妍雅。文取達意，書法清挺，而小楷尤精。亦時八分丹青遊戲，得象外理。二子彭嘉亦多知名，能精其業。每焚香燕坐，蕭然若世外。而吳中好事家，日相與載酒船，候迎之湖山間，以得一幸爲快。至九十，猶矍矍不衰。方爲文章，擲筆而逝。簡然若蛻者。有詩文集若干卷，有甫田集行於世。久之，獨以畫顯，得之者若拱璧焉。

戴元禮蔣用文許紳傳

戴元禮，名思恭，以字行。金華人，學於丹溪朱彥修。初任御醫，事太祖藥餌，輒效。每風雨，免元禮朝。洪武三十一年五月，上病少間，輦出御右順門，召諸醫官治疾，無狀者，盡付獄。獨召元禮至榻前，曰：「汝仁義人也。」

事無預汝無恐。建文皇帝卽位。誅諸侍醫者。獨拜元禮太醫院使。遼簡王肅。莊王慶。靖王皆奔喪至京。聞建文道太祖語。哭問勞元禮。簡王題仁義字大軸。莊王靖王爲贊詠。賜元禮初。洪武丙寅。太宗患瘕。韓公懋治久不愈。元禮至。問所用藥。曰是也。又問太宗嗜何物。曰生芹。元禮曰得之矣。投一劑。夜暴下。視之皆細蠶也。晉恭王病。亦以元禮藥。餌愈。未幾薨。太祖怒。逮治王國諸臣。元禮侍曰。臣嘗奉命療王。王飲臣藥數矣。臣對王病。毒在膏肓。卽復作不可治。今果然。太祖遂釋。晉諸臣尙書嚴震直病。上令元禮好治之。否且償命。一劑而愈。有妃嗜燒酒。腹痛治之。愈。曰十年必復發。發不可治。後十年。竟病腹痛死。王賓者。吳中高士。願受元禮方書。元禮索賓拜師事我。乃與書。賓不肯。一日詣元禮。值他出。有書八册。案上。賓袖去。元禮歸。驚歎自失。賓不妄。臨終。以其書授盛啓東。韓叔暘。

蔣用文。初名武生。以字行。儀真人。洪武中爲御醫。永樂八年。陞院判。專侍文華殿。用文能視病制方。性謹。愿恭恪。有行義。達世務。事東宮。每效規益。卒之明年。仁宗贈太醫院使。諡恭靖。官其長子主善爲院判。明朝稱醫方。以用文爲最。

許紳。應天人。質實謹厚。不喜交遊。以精醫術。仕至工部尙書。掌太醫院事。嘉靖中西苑宮人之變。聖躬甚危。中官召紳用藥。上蘇紳語人曰。此變禍不測。論官守。非紳輩事。切念受聖主深恩。當以死報。乃用桃仁。紅花。大黃。諸下血藥。藥進。自分不效。必自盡。賴天之靈。長時進藥。未時。上忽作聲起。去紫血數升。申時。遂能言。又三四劑。平氣活血。聖躬遂安。天地廟社之靈也。上加紳宮保。後數月。紳病。曰紳必不復起矣。曩西

苑用藥驚憂所致。至今神魂不甯。百藥不效。紳卽死。主上萬壽。死撫恤。竟以此病卒。上憐之。卹典甚厚。

劉日新全寅皇甫仲和萬祺傳

劉日新。當太祖克金華時。召令推命。答曰。將軍當極富極貴。又推諸將校。則言或爲公。或爲侯。上怒其不言官職。劉請屏去左右。曰。極富者。富有四海。極貴者。貴爲天子。上大喜。洪武四年。召至。問欲貴乎。對曰。不願。又問欲富乎。對曰。不願。問所以欲。曰。臣所欲者。求一符。可以徧遊天下耳。上因以手所揮白扇。題曰。江南一老叟。腹內羅星斗。許朕作君王。果應神仙口。賜官官不要。賜金金不受。持此一握扇。橫行天下走。識以御籙。日新持此。徧遊天下。名山水。十二年。回家。忽對妻子。言我常死於非命。故歸。欲作別去遊京師。妻留之曰。旣當死。死於家耳。答曰。當死於京都。遂至南京。都市中推算。但講命而已。蓋先被旨。不許與人算。故也。藍玉平雲南回。因詣日新。日新言。將軍將星見梁地。當封涼國公。然七日後。必有一險。我當與將軍同死。後果封涼國公。數日後。玉誅。臨刑時。歎曰。神乎。劉先生之言。問爲何人。曰。劉日新。上聞。因逮日新。至。問汝與藍玉算命乎。對曰。曾算。又問汝命盡幾時。曰。盡今日。因殺之。子孫猶存。賜扇焉。

全寅。安邑人。少善學易卜筮。以京房斷占。輒奇中。正統中。隨父清大同。英宗北狩。令大同守闕。裴常問全筮。得乾之復。寅密附奏曰。大吉。夫四初應也。初潛。四躍。明年歲在午。其于庚午。躍候也。庚更新也。龍歲一躍。秋潛。泱歲也。明年秋。駕當復矣。由勿用。應或之。或之者。疑之也。還而復也。幽然象龍也。數九也。四近五。躍近飛。龍在丑。曰。赤奮若。復在午。午色赤也。午奮於丑。若順也。天順之也。其於丁象大明也。位於南。火方

也。寅其生也。午其王也。壬其合也。其復辟也。其當六年之後歲丁丑月寅日午合於壬乎。英宗心識之。寅至京也。先犯京城。將官召寅筮曰。敵無能爲。彼驕我驍。戰必勝。敵果敗。庚午也。先行成。朝議未堅決。寅勸石亨協謀於謙。迎駕至。以太上皇居南城。已而錦衣使盧忠上變告密。筮寅所。寅佯不知者。驚曰。是何占也。而凶若是。不滅族且殺身禍已種矣。奈何。忠大懼。佯狂事不得竟。忠卒坐誅。丁丑正月壬午。駕出南城。登極。召欲官寅。辭。乃範金陰陽神靈四字爲筮錢十有八。貯之牙合。賜之。會清以指揮出薶徐州。上留寅京師。授錦衣百戶。寅又辭。不允。時石亨大貴。幸寅每筮戒持滿。石不悟。及禍。公卿大夫喜接寅。寅語不及私。大抵抑邪與正。拯人顛隕。年九十卒。

皇甫仲和有異術。居京師。負重名。正統十四年。有旨親征。大學士曹鼐急歸。召與議。曰。胡王兩尙書率百官諫。可止乎。仲和曰。不能止也。紫薇垣諸星皆動矣。曰。事將若何。仲和曰。以老夫計之。當先治內而後行。曰。已有旨議。監國某。仲和曰。不如立儲君而後行。曰。東宮幼。且未易立也。仲和曰。恐終不免。方遭土木之難。敵騎逼城。城中皆哭。仲和登高望。謂家人曰。雲頭不向南乎。曰。然。大將氣至。敵將退矣。明日。楊洪至。自宣府。石亨至。自大同。入援。敵遂遁。仲和一日出朝。有衛士見之。曰。願爲我相之。仲和不肯。固請之。仲和曰。若不能正內。何相爲。衛士怒曰。何以知我不能正內也。曰。汝不有妻妾乎。曰。然。曰。二人正相。鬪不解。衛士不信。至家。果然。後又問仲和何以知之。終不言。所以堂上官固問之。乃曰。彼問時。見室上兩鷓。正相鬪。是以知之。其術神妙如是。

萬祺南昌人。少遇異人相之曰：有仙骨，否則極貴。因留一書與之，乃祿命法也。於是研精，以卜公卿貴人。多奇中。景泰間，以吏胥辦事吏部，衆奇其術，薦授鴻臚序班。既而景帝不豫，有議召襄藩者，石亨以問祺。祺曰：皇帝在南宮，災事他求，刻期復辟，與全寅筮占及徐有禎迎駕觀象合。英宗既復位，召見文華殿。卽日擢驗封主事。累進員外郎中。曹欽反，執玉翎李賢時祺在旁，欽問對之曰：公勿負國，宜以死上謝，則自求多福。又徐謂曰：尊翁碑文，非李公筆耶？公當勿忘。欽俛首。其兄鐸曰：萬君言是也。王李二人獲免，事平。上聞而壯之，召祺賜宴勞，陞太常寺卿。

袁珙附子忠敬傳

珙字廷玉，鄞人。珙智悟迥絕，術相通神。在元時嘗遊東海，普怛洛伽山有僧曰古崖善相，見而悅之，謂其眼光如電，法當以術顯，因給令仰視赤日，待兩目盡眩，潛布黑豆於暗處，使辨之。又夜懸五綵絨線窗紙外，使映月光，別有色，所試皆中。然後授之術，且曰：子後當出我右，慎勿輕洩，遂以相著名。適元亂，珙亦不輕以試人。然遇者言吉凶屢中。洪武初遊至嵩山寺，遇僧道衍，謂曰：甯馨胖和尚乃爾耶？目三角，影白，形如病虎，性必嗜殺。他日劉秉忠之流也。建文在東宮，召見命相，對言害氣在西北，常預備之。後道衍選入侍燕，王預密謀，言珙於王，王亦素聞其人，乃託以句逃軍爲名。洪武丁丑，以幣徵之，珙至燕，未許見，乃先選衛士中長身多髯貌與王類者九人，王雜其中，俱微服適市，拉珙入酒肆飲。王位列第三，珙見王，卽引

前俯伏呼殿下。衆晒其妄。珙言愈切。王起還宮。召珙入見。珙曰：「殿下召臣而於肆酒相見乎？」王詢其所由。識對曰：「殿下入肆時，手操弓矢，臣望見知之。皮皺而瘦，龍掌無肉也。更使詳視，珙稽首言曰：『太平天子也。龍形鳳姿，天廣地闊，額如圓璧，伏犀貫頂，日嚴中天，五岳附地，重瞳龍髯，五事分明。二肘若肉印狀，龍行虎步，聲如撞鐘，足底龜文，有雙黑痣。』年交四十，髯過於臍，當登大寶，必爲二十年天子。王大悅，遂館於道衍僧舍。既而語流聞京師，王懼有他虞，歲己卯，遣還鄉，無何，燕兵起，爲里人周繼祖訐告，械赴京，詔宥之，取其相書以進。壬午六月，太宗卽位，召至京，拜太常寺丞，賜賚甚厚。時建儲，上意有所屬，持議久之，命珙相仁宗。曰：「後代人主，又相宣宗。」曰：「萬年天子，議遂決。」太宗又出宋元諸帝容令相之。珙見宋太祖、太宗，曰：「英武之主，及真宗至度宗，曰：『此皆秀才皇帝。』元自世祖至文宗，曰：『皆是喫蘇羊肉郎主。』見順帝，則曰：『又是秀才皇帝也。』太宗大笑，厚賜之。他日，見仁宗於東宮，問曰：『吾壽得幾何？』曰：『過七七之年，天壽無疆。』及己巳，竟如其數云。永樂庚寅卒，賜葬祭人，稱爲柳莊先生。子忠徹，有美質，世其術，亦緣父得侍太宗，先是燕兵起，嘗一日宴耿璠、景清及三司官，密令忠徹行酒相之。宴徹告王曰：『宋忠年五十四，面方五大，身短氣昏，張昺年三十六，面方五小，行步如蛇，謝貴年三十一，擁腫早肥而氣短，俱主行禍。』景清身矮聲雄，耿璠額骨插鬢，色如飛火，皆凶相，不足憂也。後歷歷應初，忠徹嘗入濠城，有徐氏生子，適三朝，方浴而啼，忠徹聞之，曰：『是強盜也。』徐怒，幾欲捶之。其子既壯，以探丸論死，如此類甚多。官尙寶司少卿。時仁宗居東宮，惡其言常不遜，及卽位，欲誅之。夏元吉曰：『忠徹固當罪，禮父母所愛，待之終身不衰。今山陵未畢，刑近侍，臣不』



可乃罷其官。

王賢、廖均卿、金世忠傳

王賢、甯陽人。少時嘗夢人授之書，讀吾書，可衣緋，不讀吾書，止衣綠。覺而異之。數日路得一書，視之，青鳥之說也。漢王有異志，遣人購之，不往。曰：欲得予，非詔旨不可。漢以名聞，時太宗有事於壽陵，乃遂取以往。與廖均卿同定長陵，對面有小阜，勸上去之。曰：恐有妨於皇嗣。上問無後乎？曰：非也。但自偏室出耳。上曰：偏室何妨？遂不去。後累皆驗。自卑秩歷遷順天府尹。釐穀之下，兵民雜處，賢不剛不柔，釐奸剔蠹，一處以公道。人見其嚴重，亦不敢以非禮干。吏民大化之。嘗以柴炭爲民病，走語工部尚書石瑛曰：京民勞疲極矣。今採運夫役與真保諸郡等，無乃不可乎？瑛默然爲遞減之。又惜薪中貴縱其下非法凌府屬，吐跪於庭，熾火圍之。賢聞趨至，縛其人，欲以聞。主者溫言謝，乃釋去。一日坐公堂，有懸金牌直入，稱權勢，索板席。若干賢曰：明日來取，察知其詐。及至，執之，實於法。其處事多類如此。景泰六年考九年滿，乞致仕，不許。加正二品，仍尹順天府。又五年致仕。

廖均卿，江西人，精地理。太宗擇壽陵，久不得吉壤。永樂七年，仁孝皇后尙未葬，禮部尚書趙玘以均卿至，畿輔相地。人言房山有興龍地，均卿相之，曰：此公侯地耳，不用。又至昌平縣，徧閱諸山，得縣東黃土山，最吉。曰：勢如萬馬自天而下，此真帝王陵也。太宗卽日臨視定議，封爲天壽山，命武義伯王通等董役，授均卿官。

金忠初名世忠。鄞縣人。精於卜居地。居韓嶺。洪武中同邑袁廷玉以相名。一日過縣前。見一婦人乳女於榜廊下。哭聲慘甚。廷玉就詢之。婦人告曰。夫當戍趙州。今在酒肆。旗軍飲畢即行矣。言既。復哭之悲。袁心憐之。往見其夫。夫曰。我韓嶺金世忠也。素以卜地度日。今缺戍。爲族人賂旗軍。以我代行。袁相之曰。此尙書骨法也。他日當大貴。此行勿憂。因貸價其酒值。卽貸米二斗贈之。別告之曰。登州卽順境。他日富貴無相忘。旣而舟泊西渡。共濟者病腹疼。金與之卜。言用衣帶刮喉下卽愈。如其言。果瘥。驚爲神。因厚謝之。以故旅資不匱。至戍所。開卜肆。以奇驗聞於燕邸。召至問吉凶。卜云。吉。遂署爲紀善。侍帷幄。用其謀。有成。後官兵部尙書。永樂三年。冊立皇太子。兼詹事府詹事。尋卒。贈少師。諡忠襄。子達。年十七歲。授檢討。還鄉支俸。以幼童廢官自此始。

### 于梓人冷謙傳

于梓人者。武岡州人。其父嘗夜夢梓潼神。遂能雕塑神像。極其工緻。梓人生七八歲。眉目如畫。資性聰警。其州將愛之。因其父藝。以梓人名之。及長。有雋才。且多異術。舉洪武乙丑進士。歷知登州府。有訴其家人傷於虎者。梓人命卒持牒入山捕。卒泣不肯行。梓人吾之。更命他兩卒曰。第焚此牒。山中虎自來。兩卒不得已。入山焚其牒。火方熄。而虎隨至。弭耳帖尾。隨行入城。觀者如堵。虎至庭下。伏不動。梓人厲聲叱杖之。百而舍之。虎復遁。故道去。尋爲部民告訐。以爲妖術惑衆。詔逮下刑部獄治之。數月。瘐死獄中。棄其屍。家人發喪成服。一夜忽聞扣門聲。問爲誰。答曰。是梓人。家人驚以爲鬼。曰。吾實以間逃去。云死者詐也。勿疑。

家人不信。謂鬼衣無縫。驗之乃不然。遂內之。梓人不自晦匿。日與故遊宴。或泛舟不用篙楫。逆水而上。以爲樂。里人劉氏。其怨家也。執而繫之。白知州伍芳。請奏聞。芳不許。劉遂詣闕告之。朝命法官來州推索。未至一日。忽失梓人所在。但存鐵索而已。劉無以自明。竟坐欺罔得重譴。而梓人自是不復見云。梓人自號七十一峰道人。詞翰遒逸可觀。

冷謙字啓敬。武陵人。號龍陽子。元中統初。與劉秉忠從沙門海雲游。博學精於易。尤深邵學。及百家方術。靡不洞習。至元間。秉忠爲相。謙乃棄釋從儒。嘗川交趙孟頫。嘗同於四明。故相史彌遠家。觀李思訓畫。因契之。遂以善繪名。後過淮陽。遇異人。授中黃大舟。傳張氏契真之旨。迨至正間。年百餘歲。如童顏。以避亂金陵。日市藥。多神效。入明。太祖徵拜太常博士。正樂律樂器。甚當上意。嘗館於京。因逆旅人貧。謙就數給之。未有處也。一日。卽館壁畫爲公門狀。語館人曰。吾與爾同入。慎無將帶片物遺落。館人如戒。謙引手推門。挽之入。見大帑金寶。百貨充物。謙令恣取之。同出。如是數數爲之。其後館人入。遺一路引。比出。驚視之。亡之矣。謙曰。爾遺物矣。爾則不終。吾亦從此逝矣。遂入壁。不復見。初。內帑屢失物。守吏數被誅。於是得引捕館人研實。乃正其辜。而謙竟莫得。

王冕。周元素。吳偉。王紱。唐寅。沈周傳。

王冕。字元章。會稽人。貌魁偉。資敏志奇。其父不之識也。七八歲時。受父命。牧牛壠上。乘牛入學宮。聽諸生誦書。暮乃忘其牛而歸。父怒。杖之。他日命往。復如是。父遂不理。冕往依寺僧以居。夜執策坐佛堂。映長明

燈讀書兼學數。遂成通儒。尤工於畫。其所爲梅花。斷縑尺楮。人爭寶之。每畫多自書所題於上。屢應元進士。不第。竟棄去。買舟狂遊。北入燕都。館於祕書卿秦不花家。秦不花欲薦以館職。冕歎曰。不滿十年。此中狐兔遊矣。去之還鄉里。時海內無事。對人輒言天下將亂。乃攜其家往九里山隱焉。結茅廬三間。自題云梅花屋。耕田讀書。嘗傲周禮。著書一卷。祕不與人觀。每更深人寂時。輒執燈朗誦。既而撫卷歎曰。吾未卽死。持此一遇明主。伊周事業。不難致也。未幾。汝穎兵起。一一如所言。元至正庚子。太祖兵定婺州。將入越。物色得冕。應制題梅詩。有云。獵獵北風吹倒人。乾坤無處不沙塵。吳兒凍死長城下。誰信江南別有春。上覽之大悅。授以資議參軍。甚見眷注。以病卒。人謂其磊落有大志。不得少試以死。又目之爲怪民云。

周元素。太倉人。善畫。太祖一日命畫天下江山圖於便殿壁。元素頓首曰。臣精能繪事。天下江山。非臣所諳。陛下東征西伐。熟知險易。請陛下規模大勢。臣從中潤色之。太祖卽援毫左右揮灑。顯元素成之。元素復從殿下頓首賀曰。陛下江山已定。臣無所措矣。太祖笑而頷之。

吳偉。江夏人。少爲農。忽遇一羽士。言爾有異骨。當享大名。旦日於豬市大石上相會。至則命坐石側。袖出一鐵錐。刺石傍。出泉一線。命偉掬飲之。乃曰。任爾學藝。名聞天下。遂不見。偉後學畫。專十二科。山水人物。入神品。性躑直。交與甚寡。成公延見。以小仙呼之。後自識小仙。憲宗召至闕下。授錦衣鎮撫。待詔仁智殿。有時大醉。蓬首垢面。曳破阜履。踉蹌行。中官扶掖以見。上大笑。命作松泉圖。偉跪翻墨汁。信手塗抹。而風雲慘澹。生屏障間。上歎曰。真仙筆也。偉出入傲慢。權貴求畫。又多不與。於是權貴人數短之。居無何。放歸。

南都日喜從諸豪客競集妓館劇飲。孝宗卽位。復召見命畫。稱旨。授錦衣百戶。賜章曰畫狀元。後稱疾歸。武宗復遣使召之。使至未就道。中火酒死。偉挾一技。辱召者三。獎借賜予。浮於大臣。人以爲榮遇焉。

王紱字孟端。常州人。性介。博學能詩。所交皆一時名士。遇流俗。輒白眼視。尤工於畫。凡山水竹石稱絕。未仕時。士遇名畫。人不易得。後被薦爲中書舍人。於京邸夜聞洞簫聲。佳。遂乘輿寫竹石一幅。詰旦尋訪吹洞簫者。大商也。因以遺之。商人大喜。拜受。越數日。具駝龍段。乞配幅。孟端厲言曰。俗子何足當吾筆。亟索前幅而碎之。一日退朝。黔公從後呼之。紱不爲應。時同行者告曰。黔公呼君。紱云。吾亦聞之。必其與吾索畫耳。黔公追及。果然。紱亦不答。黔公又遺其第。乃數年後始作一幀。且曰。吾不可直致。西省平仲徹者。吾故友也。吾且寫寄之。待後與求耳。其介如此。其畫人多寶之。

唐寅字子畏。一字伯虎。吳人。以諸生舉鄉試第一。當赴會試。而有所同載者。以賄主司。得題事。株累。罷爲吏。謝弗就。寅才高。少嗜聲色。旣坐廢。見以爲不復收。益放浪名教外。嘗一赴甯王宸濠聘。度有反形。乃陽爲清狂不慧。以免。卒年五十四。始爲詩。奇麗自喜。晚節稍放。格諧俚俗。冀託以風人之指。其合者。猶能令人解頤。畫品高甚。在五代北宋間。人多寶之。

沈周字啓南。長洲人。自號石田。晚更號白石翁。以處士卒。年八十三。周博學。無所不通。喜爲詩。其源出白蘇。兼情事。雜雅俗。當所意到。營壘不得休。書法雙井。砭砭未化。至畫法蒼老。久而天下愈寶之。以爲北苑巨然徐熙父子復出。元諸賢勿論也。願因名重。贖本四出。得其真者甚鮮。

明書卷一百五十二

列傳十三

列女傳

史官論曰。夫驚飈隕棄。則貞卉明心。枉渚奔流。斯井潔著潔。粵稽上世。周南無行露之女。衛國有靡他之婦。此則王道之行也。若乃教化微缺。風俗凌替。朝無貞臣。野鮮志士。而之子少長委巷。目不識彤史。耳不聞保訓。奮乎帷牆之中。立於刀鋸之側。成仁取義。蹈死如歸。此則丈夫之所難。而巾幗之女。無少自紆曲。夫食人之食。而躋嵬顯。視此何如也。嗚呼。可以爲豪傑矣。前史博采懿風。如樊姬孟母之良箴。少君德曜之隱約。龐娥曹女之殉親。皆卓然裨益世教。操雖不同。其性一也。嗚呼。吾疑人性之有無久矣。至傳列女。而後知仁義之果出於性也。無他。未嘗學也。

郃氏花雲妻。時雲方戰急。有一子。僅三歲。郃祭家廟。會家人泣曰。今城且破。吾夫忠義人。必以身死之。吾夫死。吾必不獨生。然不可使花氏無後。嬰兒在。若等善撫育之。聞雲被執。郃赴水死。年三十五。侍兒孫瘞屍抱兒以行。僞漢軍擄之。至九江。軍中惡養小兒。逼投水中。伴諾乘間投漁家。脫簪資令善視之。尋明兵破友諒。孫往漁家視兒。故在。矚漁人出。負以走。夜宿陶穴中。天曙。僦舟渡江。遇債軍奪舟。棄江中。孫抱兒。



遇斷木浮至。附入葦洲。採蓮實哺兒。七日不死。夜半聞人語聲呼之。逢老父號雷老。告之故。與俱行。明年二月。達太祖前。孫泣抱兒拜上。上亦泣。真兒於膝曰。此將種也。賜雷老衣帛。遣之。復其舊。忽不見。兒八歲。賜名煒。侍皇太子就學。年十三。授虎賁右衛副千戶。後七年。拜指揮僉事。偕孫氏至太平。奉部骸骨束草像雲葬之。世宗初立。其五世孫遼東復州衛指揮僉事。請於朝。部氏贈貞烈夫人。孫氏安人。立祠致祭。二女者。方孝孺之女也。當孝孺死時。二女年俱未笄。被逮過淮。相與投橋水死。王宗元曰。孝孺篤學守道。矢死君難。精誠熏浸家庭間。雖小女子。臨變赴義。視死如歸。不懼不回。與孝孺伯仲之死。同時爭光云。胡郡奴。大理寺少卿胡閏女也。胡閏在忠節傳。收閏時。郡奴方四歲。母任縛就刑。郡奴自懷中墮地。有一卒提入功臣家。付爨下婢收之。郡奴昏睡。夢與父母相持泣。覺則抱一貓臥也。稍長。識大意。髮至寸。即自截去。日以爨墨汚面。秃垢不作人狀。苟活二十餘年。功臣家不以人類畜之。永樂二十二年。赦諸死事者。苗裔。郡奴得與同難。女流乞丐歸鄱陽。依姻家老嫗王安人居。誓不有家。鄉人憐之。餽遺不絕。郡奴所受。免死而已。年五十六而終。尙處子也。鄉人謚曰忠允貞姑。萬歷中。饒州知府楊際會。祀於父祠。宗室知恚。娶賀氏。生三女。患病革。度不起。賀即潛靜室自縊。家人驚救之。後吞水銀求死。又救之。遂閉口不食。亦不言。與恚同時卒。慶成王以聞。世宗嘉其節。詔旌之。肅府沿山王繼妃楊氏。未配。王薨。楊願入府奉姑。守節終身。嘉靖二十八年九月。巡按御史題其貞烈。詔楊氏准封沿山王繼妃。入府守節。

梅氏東安人年十八適士人謝黑兒夫疾篤囑曰爾年少勿爲我慮梅泣下欲自盡以隨姑覺而止之曰吾夫婦無他兄弟備養況汝娠未晚倘得一子以續吾祀豈不美乎梅悟後果生一子夙夜紡績奉舅姑課幼子舅姑卒脫簪珥以襄事其子俊亦成立孀居四十餘年有司以聞宣德間旌表其門

房氏鉅鹿人爲魏溥妻溥病革顧房曰死不足惜但母老家貧赤子蒙眇房垂泣曰母慮母子在妾一身溥卒房操刀自割左耳置棺中曰鬼神有知相期泉壤終身不預燕席事姑敬養調子成立後孫爲濟南太守

崔氏真定深州周傑妻洪武間傑任兵科給事中以疾沒崔氏奉骸骨歸奠祭畢告其親戚曰夫婦義當同穴今夫死我無生理遂經死合葬

高氏真定深州人適清河李茂茂充吉安衛總旗墮馬臥病高氏奉湯藥不離左右茂亡悲泣甚哀乃盡散家貲爲喪具復買一閒棺置尸側至夜沐浴更衣自經死與茂合葬事聞詔旌表之

岳氏深州岳興女適傅嘉嘉病革呼岳曰爾年少善事後夫岳涕泣曰吾豈忍事他人甯俱死及嘉卒岳憑尸號哭遂經死合葬之事聞表其門曰貞烈

施氏定州衛百戶何毅妻年二十一生子甫二齡毅死哀痛漿水不入口欲自殺姑知有孕勸咀之後生子舅姑親戚憐其少欲嫁之施曰夫亡子幼況舅姑年老無依可適人乎遂奉舅姑以終撫二子至於成立年六十二歲事聞旌表

陳氏牛氏高邑人。洪武初，監察御史許顥之妾。顥病卒，二妾皆自經死。事聞，旌爲雙節。

吳復妻張氏，金陵民家女。復爵安陸侯，守黔陽，以疾亡。張氏自縊以殉。太祖親降手敕，封爲貞夫人。

孫氏，劉彥陽妻。高瀛人。彥陽授平江倉官，卒於任。值兵亂，孫與一子二女守旅櫬，城陷，子死於兵，孫不從。遇害，賊脇二女，二女給賊爲埋父母。至江濱，皆赴水死。詔旌表之。

陳忠妻王氏，江東人。忠爲都指揮，守交趾。王隨之，會黎賊叛，忠陣亡。王與二女登竹筏，出交趾，東海城，進海門，潛賂賊徒，收忠尸殮之，扶柩浮海南歸，以葬。後毀容紡績度朝夕。卒，與忠合葬。鄉人謂夫妻忠節，兩不愧云。

鄭瑾妻袁氏，六合人。年十八，受鄭聘，而瑾得奇疾，不得治。袁告於父母，歸鄭侍夫疾。二年不懈，及歿，求自盡。家人救之，不死。曰：「我一寡婦耳，留此何爲？」聞者感泣。吏尙書蕭山魏驥，作鄭節婦傳。

俞氏，顧春妻。春患病將革，與俞訣，勉其守節。俞號泣不止，因以指抉雙目，不得出。乃以翦先刺其左目，又欲刺其右。姑奪其翦，諭曰：「汝欲養舅姑，育二子，留一目可也。」俞乃止。遂守節終焉。

鄒氏，適葉芸。成婚僅兩月，芸卒。鄒毀容誓死不出房限，不見男子。姑曰：「如火盜疾病何？」鄒曰：「火至，委軀灰燼，盜至，先自刎。疾聽其死，不得令醫診察。」如是終其身。

趙氏女，北京人。幼有令質，刑部尙書張鑿爲次子昱聘之。未婚而昱卒，父母將嫁之。女曰：「我聘於張，又誰適乎？」姑衛夫人迎歸華亭，守制終身。弘治中，旌表。

何氏女華亭人。楊允修妻。未婚而夫卒。父母強令再適。不從。何自往夫家守制。終身以盤車傳餐。家人亦莫觀其面。壽七十事聞。旌表。

金氏。上海岸生金應登女。美姿容。隆慶中。嫁富人徐茅爲妻。茅性好賭。宦家悍奴因誘之。家遂傾。復誘其鬻妻。因獻於主。主遣數十人。要迫之。金氏義不受辱。自縊死。

吳氏。江陰人。華緯妻。正德壬申。避賊。賊追及。吳詐仆負塗。賊繫之。問曰。洗塗。曰。不洗。更衣。曰。不更。且罵曰。汝當速殺我。我江國公勳臣家女。奈何汚耶。明日。又問。答如之。賊怒。爭刃之。沈於江。

萬敬妻史氏。金壇人。適敬未閱歲。敬得惡疾。終。家人依俗火葬。史躍入火。衆救獲免。瘞畢。自經。詔旌表。復其家。

高氏婦。高郵人。攜其女從夫避亂。見道旁空舍。入其中。賊將迫。脫金纏臂與女。且語夫令疾行。夫挈女稍遠。乃解足纏。自經。賊至。焚其舍。夫抵儀真。夜夢婦告曰。我已縊死彼舍。其精靈如此。

陶氏。四節婦。桐城人。陶鏞妻。鍾氏。鏞子繼妻。方氏。繼子亮。領景泰癸酉鄉薦。妻王氏。妾吳氏。鏞繼俱早喪。鍾方各守節。亮亦早卒。妻妾共守一室。抗節終身。詔表門曰。陶氏三世四節。

汪世衡妻戴氏。桐城人。正德間。遇流賊。欲驅掠之。戴抱樹不動。賊以刀厲頸。戴厲聲曰。何不速殺我。賊怒。遂殺之。

張友妻洪氏。歙人。友死。預治塋。誓必同穴。姑憐其早寡無子。欲嫁之。不聽。乃陰納富人聘。至期逼之。洪曰。

嫁不辭。富與夫別。乃造夫墓。慟哭而歸。拜姑告別。入室閉門自縊。

李氏。桐鄉人。年十八。適高逾。生子熊。方期而逾亡。家貧。舅姑相繼亡。往依母居。母諭之改適。輒慟絕。母止不復強。熊長。娶曹氏。無子。爲置妾陸氏。甫得子。熊又亡。曹與陸皆勵操事姑。以撫幼。兩世三節。

沙氏。主事郎理妻。吉安人。洪武初。從夫官京師。理死。沙哭曰。夫爲忠臣。妾獨不得爲烈婦乎。遂自經。賜祭。馳驛歸葬。

石門烈婦。湖州人。莫知姓氏。正德初。湖饑。婦與其夫及姑走崇德石門市乞食。婦有殊色。市人欲挑之。與之食。不顧。與之財。亦不顧。寓東高橋上。伺夫與姑不至。及三日。聚觀者益衆。乃從橋躍入水中以死。

石氏。金華人。諱勝。浦江義門鄭洪妻。洪爲內藏庫提點。以他累死獄。石乃絕粒不食者八日。求死不可得。遂引繩自絕。太祖聞而歎曰。此真義門婦也。

陳氏。永康人。王和欽妻。年二十九。夫亡。遺孤歲餘。苦志守節。勤以自給。孤德中。性至孝。一日。東門失火。德中向火稽首。火遂西轉。人謂節孝所感。詔旌其門。

蔡儼妻包氏。宣平人。正統中。鄉寇作亂。包從舅姑避難東巖。被執。給賊曰。我有金銀藏巖穴中。當往取之。賊以爲然。同至其所。遂自投崖以死。事聞。旌表。

葉孔賓妻鄭氏。青田人。孔賓以父卒於官。迎喪。覆舟死。鄭年二十有三。遺子十月。矢心自守。其妾何氏年猶少。鄭謂之曰。我守夫家。汝無子。宜自擇也。妾曰。主母旣以節守。妾當奉承以全其節。何以出爲。相與同。

處年各八十餘。時人謂之雙節。

潘氏妙圓。山陰人。徐允讓妻。元末兵變。允讓與潘奉父安避山谷。遇寇。斫傷安頸。允讓呼曰。汝寧殺我。勿殺吾父。寇捨安。殺讓。將辱潘。給曰。吾從必矣。若能焚吾夫。吾則無憾焉。寇爲聚薪焚其夫。火方烈。潘赴火死。安始獲免。詔旌之。

寶氏。餘姚姜榮妾。京師人。榮判瑞縣。護郡符。時華林賊攻陷其城。突入郡堂。寶匿其符。而榮未之知也。賊竟擄寶以行。去之數里。賊中有一郡民求歸。賊許之。寶乃密語以符之所在。俾歸以告榮。再行。見道傍有井。給賊求飲。遂投井以死。

吳江妻李氏。餘姚人。舅與夫俱疫死。姑幸存。有澄水黃姓者。謀娶之。李誓死不從。黃乃通其父。詐稱母暴病。迎李歸省。陰令肩輿者輿至黃氏。及出輿。則非母家。姑亦徐至。李度不可脫。乃從容請湯沐。湯具。求如廁。久之不出。開廁戶視之。則已經矣。

馬德真。山陰朱偉妻。家病疫。舅與夫偕亡。姑張氏亦病篤。德真艱難萬狀。待姑疾少愈。而母家欲奪其志。德真斷指爲誓。屹不肯從。及姑歿。德真撫膺大慟。殮畢。明日死之。

陳氏名真。黃巖程友德妻。洪武間。以軍生至京。鎮撫陸林見陳美。欲污之。不從。百計脅之。陳愈嚴厲。遂被毆而死。夫訴於朝。林以罪誅。

林汝殷妻王氏。黃巖人。生二十。歸林。未幾。汝殷卒。里人欲娶之。王斷髮以死自誓。其父母防之。且勸之力。



王佯許既而防者少懈。乃陰囑侍婢分其嫁服。一歸其母。一予其妹。一以爲殯殮之具。遂自經死。陳氏名小奴。臨海人。適王三狗。一日其夫爲虎所攫。卽攘奮悲號而往。虎驚駭舍之去。負夫以還。夫死未幾。有欲納爲妾者。陳不從。乃強致聘物。促迫以歸。陳度不免。亟走姜巖。自投而死。

熊氏名審奴。豐城人。余繼妻。年二十一歸繼。繼疾度不能起。語以備後事。熊出篋中衣對繼。紉定。每襲爲二。泣且謂曰。卽有不幸。吾當服之以俱死。不能獨生。繼卒。熊視殮畢。聞家人議舉棺焚化。卽衣所紉衣。期赴火。家人察其意。防之少懈。卽自經。與繼同日合葬。

陳氏豐城人。譙娃妻。娃爲江州巡司掾。流寇掠其境。娃被執。陳氏同女壽華俱美色。賊欲污之。遂殺娃。陳指賊厲罵。賊怒。又殺之。壽華哭抱二屍。以血塗面。籲天而呼。復厲聲以罵賊。又殺之。有司奇其節。聞之。旌表。

徐氏豐城都御史吳祺繼室。又妾張氏李氏。俱芳齡。徐事姑以孝聞。嘗從祺北上。抵河西。忽祺墜舟。徐躍出。俱下水。頃抱以出。祺逝。奉榷泝長沙。風烈舟顛。危甚。徐哀籲天。舟乃定。李無出。張嗣孩提。或有以他意諷之者。徐曰。婦人夫死。稱未亡人。無再醮禮。守適。各惟所志。張與李泣曰。烈女無二。肯憚一死。辱大人於地下。茹苦服縞。共撫其孤。事聞。旌表。

陳氏樂平人。徐德安妻。年二十。夫病革。曰。汝年少無子。我死。汝更善事他人。陳泣曰。旣爲君婦。尙忍事二姓乎。卽割耳翦髮爲誓。夫死。納之棺中。終身不改節。詔旌表。

吳氏葉梁妻。正德間盜起。梁被創垂死。屢目吳。意以吳年若貌。必有奪其志者。吳知之。以爪碎其容。又斷二指納棺中。後母家欲他遺。不食而死。

團氏上饒鄭贊妻。桃源賊至。團度難兼免。使夫舁其姑先走。自負子從之。不及。被執。賊欲污之。給求緩。乃并其子俱赴水死。

祝氏鉛山人。傅岡妻。岡歿。祝年少。姑議改嫁。祝泣辭甚確。姑竟欲奪之。聘至。祝祥爲閉門檢飭狀。竟赴河邊。抱石入水而死。是秋大旱。知縣張曷禱不應。乃集耆老問故。有以祝氏節義告者。曷卽具牲醴爲文親詣死所奠之。是夕大雨。祝之死節處水深莫測。後湧成洲。俗呼爲節婦洲。

劉氏名玉蘭。彭澤人。年十八。適同邑民計偉。越五載。夫亡。哀痛殊切。圖與俱死。旣而翁舉夫喪。劉泣告。願少留。乃移別室。停之。劉苦塊以居。悲號傷心。嘔血數升。父母恐。遷柩蓋葬。劉曰。吾今得死期矣。遂不解衰經。七日不食而卒。舉其屍。見袖中所遺巾帨。皆夫之遺物。

譚氏南豐人。年十九。適傅志華。閱九月而夫卒。居喪守節。事舅姑益謹。父娶繼母。悍戾。譚逐諸子。譚規練憾之。謀奪其志。密聘鄉人戚姓者。而譚不覺。一日誘之歸。見戚備妝具。請期。哭謂父曰。夫死肉未寒。何忍爲禽獸之行。亟潛匿於樓之複壁。累日不進水漿而死。

揭氏廣昌人。高宏妻。宏以較藝卒。建昌家僮歸其喪。揭迎於邑之東門外。哭拜畢。遂自肩輿。視如男子。表歷者然。旣殯。朝夕哀哭。屢絕而甦。越月餘。以鎖鑰納兒袖中。誘之出戶。遂自縊死。旌表之。

聶氏名妙真。樂安人。年十五。納同邑王所聘。未嫁而所亡。計聞。涕泣欲往。嗚。父母不可。聶曰。兒雖未入王門。然既以身許之。不可再醮。遂闔戶自經死。以其喪歸王氏合葬焉。詔旌表。

陳氏。新淦人。幼納庠生黃體堅聘。堅謫吏金陵。貽書娶陳。父母欲易他女以往。陳曰。吾命也。遂遣歸。後體堅以誑誤棄市。累訴不得白。徒步收其屍。殮而瘞之。乃自經於柩側。學士曾榮贊曰。生以義歸。死以節殉。簡氏名祥貞。新喻簡啓女。適鄒濟泰。夫亡。父母欲改嫁。簡死誓不從。服闋。又私納采。簡持刀哭於濟泰靈右。斷二指。誓不再適。父母患之。乃止事。聞旌表。

易氏。清江縣諸生鄧介妻。正德乙亥。盜入介室。易奔出。遇賊。盡脫簪珥。祈免。賊執不舍。欲汙之。易紿與偕行。賊不備。至江。赴水死。

羅氏三節。歐陽氏。吉水人。諱壽娘。鵝田羅韞妻。價卒。婦年少。長子篤溫。方三歲。次篤良。尙在妊。越四月而生。氏撫二孤。無他志。溫長。娶歐陽西貞。生子甫期而溫亡。良娶袁氏。蘭秀。生子五歲而良卒。西貞蘭秀相告曰。姑爲節婦。我屬獨改節乎。協力共守。姑年六十卒。蘭年五十五卒。西貞年幾九十卒。

王氏素英。吉水諸生周必登妻。王年十九。歸必登。必登以疾卒。王氏誓與同死。不食數日。會母死。歸弔。一日。語弟曰。我死。屍還周氏。弟方出。忽以無疾終。弟如其言。還屍周氏。里人莫不慟之。

李氏。臨汾張晟妻。晟爲乾州學正。卒。時關中兵起。道梗不能還。子文瑗甫九歲。李紡績度日。兵稍息。遂與子徒步負骸骨歸葬。守志不易。詔旌表之。

孫氏青城人。陳策妻。正德六年。流賊入境。策守東門拒敵。死之。孫守其屍。悲號不食。居數日。自縊死。合葬焉。事聞。旌之。

高氏武城人。王俊妻。夫卒。與其妾蔣氏同縊死。柩側。三人同穴而葬。旌曰雙烈。

趙氏汝上人。張鳳翥妻。夫疾。語趙曰。汝年少。雖有女。不可恃。以終身。慎圖之。趙未答。夫方迷亂將絕。趙卽縊死。頃之。夫復蘇。家人語故。夫遂瞑目。合葬之事。聞。旌表。

李茂妻王氏。堂邑人。引治間。茂同吏焦讓輸稅京師。讓誘茂醉酣。夜分殺之。匿其屍。王聞。馳至京。擊登聞鼓。訴之。白其冤。負骸歸。事聞。旌表。

孫氏陽武人。陳之英妻。英充飛虎衛小旗。弘治初。從北征。謂孫曰。吾生死未可知。幸有二弱息。汝肯撫育乎。孫曰。君能盡忠報國。吾母子弗煩憂也。英果死於戰。父母欲奪其志。孫泣曰。吾不忍背夫而生。卽欲自盡。父母懼。乃止。矢志終其身。

趙錢兒膠州人。劉倫妻。正德六年。流賊入其家。值趙擣衣。奮椎擊殺二賊。會賊大至。遂遇害。旌表。

張二姐陳留縣民。鄭瑄聘爲妻。未婚而瑄卒。竟以死殉。得合葬。事聞。旌表。

吳氏封邱人。生員彭儀妻。儀卒。守志不三載而姑亡。子死。其母欲改適。吳卽更衣沐體。潛行至夫墓。以手扒墓側。土崩尺餘。欲進不得。飲泣淚竭。血繼衣。有痕漬。自縊於棠樹。而時仲冬。棠復生花。盛寒不隕。人謂貞烈所致。事聞。旌表。

曹氏歸德人張琮妻琮卒曹給匠曰夫嘗囑我作棺必寬大匠如其言是夕竟自縊合棺而葬事聞旌表之

沈氏光州人郝昂妻夫亡沈年十九生男文宿甫一歲鄉人憐其年少子幼勸其改適沈焚香籲天斷左手一指誓不再醮始終一節旌表之

李氏寧夏人李承恩叛句寇著力免助惡括城中美婦獻之李罵賊不從子母五口悉死之

任氏吳景妻沔陽人景卒任誓以死守調子欽十年不出戶姑病痿痺抱持左右寢處必偕每夜焚香籲天願以身代姑歿竟絕葷蔬食比葬得二白兔人以爲孝感旌表之

程氏王谷樹妻澧人夫病篤刲股啖之夫遺命適人程翦髮誓無他終身足不踰闔旌表

靳水烈婦陳氏甫十四適鐵匠周世文姑寡贅夫蔡鳳鳴旁又通於僧嘖婦不肯已令鳳鳴及僧百計誘之而身作威力搖撼不已鳳鳴遂強持婦婦力拒堅不從歸以語其父東陽冀助已父反謂當從其家俗於是自誓必死謂太姑曰兒不能爲狗彘必死太姑慰諭給以不死是夜自縊死七日姑暴死鳳鳴避走英山中不踰月亦死始婦死鄰黨喧傳觀者如堵無不揮涕烈日中面色如生

賈氏潘耀卿妻沅陵人爲諸生正德中挈賈省父於南京至湖口卿卒賈卽赴水女奴持之旣見舅姑入室自縊以救免自是減食凡四十餘日絕食者累日竟自刎應天尹以事聞受旌

袁氏龍安人嚴庸妻事舅姑孝姑疾侍湯藥庸補諸生因歸省墜輿文棧道溺死袁年十八亟趨夫溺處

尋屍不見大哭亦投水死兩月不得屍後漁人於沙回頭河得二屍同處人以爲節義所感事聞旌爲貞烈。

許氏同安人生員洪伯大妻數年無子勸伯大娶妾陳生二子伯大遘疾許水漿不入口數日泣誓曰君不起妾寧獨生及卒許爲殮畢收遺書付陳囑以善撫幼穉陳初不覺許遂潛入臥內自縊而死。

應氏建寧人歸邱伯春年二十夫卒號天願同死自投池中鄰婦援出之氣息奄奄忽斷左手指置夫懷中既葬旦夕慟哭未幾不食卒合葬之。

雍氏長秦人黃伯英妻夫亡守節終身嘗攜幼子負豆至水濱置磨磨之有廖姓者奪其磨雍氏號天磨爲不轉廖驚還之人傳以爲異。

蔡氏鄧華清妻歸未一年清故翦髮斷衿納棺中遂絕粒七日而死學道方應選題旌。

萬氏南海人王受祖妻洪武中蘇友輕作亂萬爲官軍所獲獻於衛指揮盧諸諸愛其才美欲納之萬號泣投衣於火諸怒以刃試之萬唾罵不輟就死於南門外聞者流涕。

黃氏女名千金潛山人許嫁張大中未嫁而大中卒父欲改議千金曰天有二日乎父卒事母孝邑中有求聘者母許之千金再拜而起伏父木主前號泣以簪刺目逾三月而卒時年方十九旌之。

寶氏女丹徒人父母俱亡許嫁之人乃家舊僕也成婚日始識之遂投井死郡守義之爲立石於蒼鑿山前以旌之。



黃善聰。成化中南京淮清橋女子。年十二。失母。有姊。已適人。其父販線香爲業。往來廬鳳間。憐其幼。且無母。不可寄食於姊。乃令爲男服。攜之旅遊者數年。後父死於客。女詭姓名爲張勝。有李英自故鄉來。亦販賣線者。勝遂與結爲夥伴。同寢食。踰年。恆稱病。不脫衣襪。溲溺必以夜。弘治辛亥正月。乃與英偕還南京。時年已二十。突然義冠。往見其姊。姊謂我本無弟。惟一女弟。隨父在外耳。胡爲來。乃笑曰。我卽善聰也。泣語之。故姊惡之。曰。男女同處。何以自明。汝辱我家矣。因拒不納。善聰不勝其憤。謂曰。妹此身要分明。苟有污。死未晚也。姊亟求隱。婆視之。果處子。始返初服。一日。英來候。善聰出見。英大驚愕。遂歸。快快如有所失。飲食頓減。姊曰。無憂也。以英猶未娶。且年相方。爲求婚。善聰不從。曰。此身若歸英。人其謂我何。鄰里強之。竟不肯。事聞。上下皆驚異。遂勒爲夫婦。人有歌之者。以爲木蘭。復見於今。

陳淑貞。撫州陳璧之女。七歲。能誦詩鼓琴。陳友諒寇隆興。淑貞取琴鼓之。曲終。泣然流涕。曰。吾絕絃於斯乎。父母怪問之。曰。城陷必遭辱。不如早死。明日賊至。遂投東湖死之。時同郡李宗頤妻夏氏。亦以賊至投井死。

葉貞女。名兆姚。南昌人。聘新建李光庭。未娶而光庭卒。女年十三。先期。夢光庭騎白馬。衣素入其室。相攜補綴。覺以告媼母。越數日。赴聞。傷之。誓不改節。父母憐其幼。強爲轉聘。女聞之。卽於密室衣裝自縊而死。易妹貞。聘儀賓子楊鑽。未婚。鑽卒。妹貞聞訃。墜樓幾死。誓不再夫。奔弔楊氏。舟至河。索夫神主成親迎禮。用小竹籬抱主入柩。前行合卺禮。朝夕哭奠。及葬。夜焚香畢。自縊於夫柩前。事聞。旌表之。

張烈女名桂秀。浮梁小民。張啓明女。有殊色。聘凌氏子。凌日貧落。女父母欲解盟。會祁門少年鄭天祐。以星術止其家。未有室。父母私許以女妻之。懼女素剛不可動。乃俱伴出。屬天祐逼近。女覺。給天祐曰。俟沐浴以從。浴竟。執父所業。打縣槌。奮擊天祐。中其額。昏眩仆地。女自縊死。

胡烈女名貴真。樂平人。父母生欲不舉。鄰曾母陳氏。鞠爲養子。天福配同乳之。甫長。天福父母與陳繼亡。家益窶落。女父欲奪爲富家配。女曰。我鞠於曾氏。婦於曾氏。分姑媳。恩母子。豈可以飢寒去。仍死。依從姑以居。雖華舍單淺。外未嘗識其面。女兄乘其未婚。撻曳以歸。出示求聘者。金銀并飾。卜日以行。女知不可免。潛浴更衣。入房縊死。時年十八。邑令張文應禮葬之。以事聞旌。

張玘女名仙貞。繁昌人。正德七年流賊剽掠。仙貞年十七。以護母疾不走。羣盜劫之去。至江潯。抱樹哭。義不受辱。罵不絕口。賊不能奪。乃衆磔之。

甘清秀。星子人。甘孟珊女。年十五。正德間。值逆濠變。賊入境。清秀隨母逃避。賊獲其母。清秀義不辱。卽投玉京潭而死。賊退。屍浮水如生。里人收葬於山前。

雙貞女。不知其姓。盱眙何雄育爲己女。正德辛未歲饑。雄欲鬻於娼。以賈厚利。二女知之。一夕。以巾聯兩臂投淮河而死。嘉靖十年。詔立廟祀之。賜額雙貞。

姚貞女。孝感縣庠生姚貞之女。聘鄭一德。未笄而一德卒。卽痛哭欲躬視衾殮。其家不從。潛取鼠藥自噎。母覺。急灌水得甦。屢自縊。皆以防護不遂。然兩目霍然。已血漬矣。竟往會葬。盤礴墓間。悲號不休。草土爲

溼。自是歸翁姑。稿容蓬首。足不出闔外。十有五載。如一日。始鄰媪解之曰。汝未離。何苦執婦義。女曰。義自盟始。卽未離。將路人其夫耶。如媪言。何用盟爲。里以聞於當道。核得實。鏤其楣曰貞。

張氏女。含山人。父誠。貧而無子。疾將革。張痛切。且恨以女子不能爲父後。遂籲天割股和藥以進。請以身代。父得愈。

劉氏女。名美玉。博平人。生員劉俊女。正德十六年。同父遇賊。殺俊女。以身翼之。賊脇女以行。女罵曰。恨不能殺汝。豈同汝行。奪賊刀。賊遂殺之。有司給葬祭。立石旌表之。

康孝女。濟源人。父友賢。年老無子。贅王珏爲壻。康勸母納妾。生子而乏乳。康亦生女。遂捨之乳其弟。曰。父老矣。女可得。弟不可再得。母病。康嘗糞。夫早歿。誓不再適。時人稱之。

劉氏。新樂人。韓太初妻。太初仕元爲顯官。洪武七年。徙和州。劉奉姑甯氏以從。至南宮。姑仆地傷腰。劉刺血和湯以進。乃愈。至瓜州。姑疾再進再愈。至和州。嚮蔬供養無違禮。姑患風疾。時盛暑。劉晝夜驅蚊蠅不怠。後姑病危。嚙劉小指。意與之永訣。劉不悟。斬指滴血和粥以進。姑卒。殯之淺土。欲歸葬。五年。弗果。哀號常如袒括之日。事聞。召至京。厚賜之。官爲送甯氏喪歸葬。新樂旌表其閭。

甄氏。無極人。嫁樂城李大舅。早卒。事姑甚孝。大與其弟異居。一日。姑出。往次子家。甄隨侍。不忍去。姑命之還。甫三日。忽心動。舉身流汗。少頃。果有來告其姑病篤者。甄沿途拜禱。往至姑側侍病。數日而愈。後姑年九十一卒。合葬舅墓。甄廬墓側三年。旦夕悲慟不輟。里人稱爲孝婦。旌表。

何氏永嘉人。王木叔妻。王氏家淡泊。何佐夫起家。資用遂饒。一日語夫曰。子可出仕。奈子之弟妹貧寒。何囊中餘資。久藏奚益。夫曰。此吾素志。旦日盡散簪珥。不遺木叔。既出仕。又曰。子之弟尙困。有田若干。何不畀之。夫曰。此尤吾志也。遂以田與弟。時稱賢婦。

周氏遂昌人。永樂間。許聘蘇仲善爲繼室。未行而仲善死。周遂號慟。至夫家。服衰麻。撫夫前室子。事姑以孝。年七十餘而卒。鄉里稱爲蘇老安人。

熊氏南昌人。劉天瑞妻。少寡。生子仲高。娶喻氏。亦少寡。生子觀。方四歲。熊自念鰥居艱難。諷喻曰。此笑笑四歲兒。安可冀望。喻泣曰。姑能不負所天。吾獨不能乎。前途明暗。一聽命。於是婦姑紡績自給。觀竟有成立。孫曹不下二十餘人。熊歿年九十一。喻八十二。人以爲孝節之報。

李氏廣昌人。何永孚妻。嫁時年十四。越二年。孚卒。李弛容釋妝。每欲與俱。柩前設一木橙。坐而哭。橙爲之剝。姑病。朝夕祝告。請以身代。哭曰。吾所以不死者。姑在也。姑既逝。吾何生爲。哀慟嘔血。不一月而死。

甯氏安邱人。許嫁同里劉真。真死。甯年十六。聞訃甚哀。謂父母曰。烈女不更二夫。請往事舅姑。至真家。爲服衰麻。晝夜勤女紅。以養舅姑。及歿。賣衾珥以葬。節行完美。旌表之。

張德瑜妻姚氏。華亭人。夫亡。屏食待斃。及葬。嚙棺號慟。聲震里巷。結廬墓側。抱痛終天。姑宋氏老病。不解襟帶。而侍奉湯藥者經年。子某亦以孝聞。每按部使者至。並以節孝旌異之。

陳氏安陽人。李諒妻。年十九。生一子晏。夫歿於役。聞訃。哀慟絕粒。三日不死。乃復食。織紉以養舅姑。姑患

疽吮之愈。撫髮成立。孀居五十餘年。旌之。

吉慶奴。大學士胡廣女也。永樂初。解縉胡廣並爲學士。一日侍譔文淵閣。太宗曰。縉廣少同業。仕同官。今縉已有子。廣宜妻之以女。廣對曰。臣妻有娠。未卜男女。上曰。定生女勿疑。已而果生女。因名吉慶奴。以上所料也。遂訂盟。縉子貞亮無何。縉被誣。累家謫戍遼東。廣欲悔議。其女竊入家。刀截耳。家人覺而救之。血被兩頰。且曰。薄妾之壻。皇上主之。父而承之一。與之盟。終身不改。況背主違父。何用生爲。越數年。洪熙改元。特宥解氏。貞亮得歸。完娶焉。既歸。解氏事二姑極孝。事夫惟謹。姑徐氏多病。不離牀席。十餘年。雖洗滌穢污。皆躬備之。且通書史。性柔慤。側室子女。視如已出。卒年八十有五。

金氏。溫州人。樂清章文寶聘之。未成婚。納妾包氏。有娠。而文寶得疾。且死。金氏聞。請往視。父母不許。卒往焉。金氏躬爲殮之。撫妾生子。綸。親課讀書。通經書大義。始遣就外傅。登正統元年進士。官禮部主事。先欲疏請復儲。恐貽母憂。未敢行。金氏聞之。謂曰。吾平日教爾何爲。汝能諫死職。我雖無子。實有子也。綸乃以疏入。忤旨。杖幾死。禁錮詔獄。金氏怡然。天順二年。綸復官。終養。金氏嘗自爲詩。見其志。詩曰。誰云妾無夫。妾猶及見夫方殂。誰云妾無子。側室生兒與夫似。兒讀書。妾辟繡。空房夜夜聞啼鳥。兒能成名妾不嫁。良人瞑目黃泉下。後綸官至禮侍郎。

劉氏。歸王錫第。甫十六。劉年十三。婉嫻有志操。善女紅。錫第父爲滋陽令。以母李往。留錫第與劉家居。錫第少年。美姿貌。負才氣。芥視一第。而小不響。卽發憤下帷。不勝飮。故得疾。寢甚。劉晨昏進湯藥。慘瘁廢貌。

夜輒跪而祝天呼願以身代錫第疾歲餘日進一粥則劉亦進一粥生不食亦不食錫第卒時家衆環哭顧獨不見劉乃扇戶自縊救不死頃之則又縊復救不死顧謂人曰吾死決矣慎毋令外人手吾屍也明日復縊偶係脫墜地蘇哭曰奈何東我而不使我與夫偕乎天哉家衆乃益晝夜嚴視之乃陽若爲不死者而密製殮服又翦皮金爲香字示侍女曰吾骨亦若是一日晨奠有異風起靈輜者再劉憚其侍女曰爲我而風乎毋忤我風立觸汝矣及夕顧侍女且食於廚復扇戶自縊乃絕其母兄解之則異風復歛起者再踰三日而殮色如生

尤氏崑山人。生而淑美。善女紅。通曉文義。少字諸生趙一鳳。一鳳貧不能授室。脫身贅於尤。時尤氏年十六。日夜機杼閒。佐一鳳讀。有偶聲。三試而三不利。竟邑卒。尤氏將殉之。旣而強食曰。棄君之二孺子。而以從君。君寧與我亡何。二孺子殤。尤氏益大悲痛。曰。可以從吾君矣。旣而復曰。君猶未葬也。吾忍暴吾君骨。則徒之墓所。視治土方中。日夜拊棺慟哭。乃有利尤氏之嫁。以其聘奩者。謂人曰。彼姝少且艾。誰能容彼久也。則又營其目曰。彼盼美而流。烏能久也。尤氏聞之曰。乃以色疑我耶。夜就工所取石灰。手按久之。血出潰灰。目枯利嫁者大愧悔。尤氏目楚痛益劇。度必死。真一棺自隨。可歲許。視一鳳葬畢。卽自縊。有抱而解之者。復觸石額裂且死。乃仰臥棺中。喉喀喀死。事聞。詔旌其門曰烈婦。

張甯有二妾。一寒香。姓高氏。一晚翠。姓李氏。年皆十六七。俱端潔慧悟。甯老愛重之。及病將革。無子。諸姬年長者悉命出之。二氏獨不去。因泣請曰。妾二人有死無二幸。及公目未瞑。願賜一閣同處。且封鑰之。第



留一竇以湯粥。誓以死殉公也。遂引刀各截其髮。以示無他腸。甯命從之。乃甯居小閣。絕不與外間通聲問。及卒。乃設席閣中。旦夕哭臨。服三年喪。不闕戶者五十餘年。子嘉秀。字文英。舉嘉靖己丑進士。歸里門。二氏曰。妾等犬馬之齒。已踰七旬。幸不辱先公於地下。又況有佳後耶。令啓鑰出。則幡然雙媪矣。親戚莫不憐敬。奏聞。旌之曰雙節。

史官曰。性秉貞淑者。易鑿刃。情飭流俗者。輕脂韋。何也。心堅於金石。節墮於瞻顧也。若者窈窕令名。垂於瓊球。臨大節。輕死生。見定不移。而富貴威武。無所施其散怵。以義士畸人。競譽表烈。可謂守禮不渝。誠足風矣。以視衣冠有中。蔣之行者。真霄壤哉。興言及此。掇管浩嘆。而涕零。

# 明書卷一百五十三

## 列傳十四

### 外戚傳

史官論曰。昔人喻貴戚之家。福祿重疊。如再實之木。其根必傷。知言哉。夫福人不過其量。祿人不逾其序。此天與帝王之仁。受萬物也。祥桑拱朝。枯無故之利。聖人所畏。故五侯封而黃霧塞。禹山滅而家妖絕。寵祿既過。侵迫陰陽。良由志驕氣溢。窮富貴而不以功也。是以謹制之君。敬慎姻婭。明德之后。裁抑外家。而竇長君之退讓。陰衛尉之守約。非惟豫遠傾軛。亦以永全令祀。呂霍爲我戒。豈不厚乎。明初家法最嚴。高后戚里無尺組。徒以廟號隆其本生。魏定二國。俱盟白馬。無與椒房。惟秦陵時二張張甚。致動徒薪之議。抑如田蚡所云。志不過富貴。好不過聲色。狗馬而已。無赫赫之施。亦無赫赫之禍。豈非蔭薄流卑。末於鬼神之圖歟。抑祖宗家法嚴。外戚不得預政。故龍縵之孽不生。雉罌之亂永絕歟。考茲禍福。鑒戒備矣。

揚王陳公太祖於建國之初。念高皇后母家。贈后父陳公爲揚王。母揚王夫人立祠太廟。東歲遣大臣祀。洪武三年。中都守臣上言。伏惟皇上肇紀開天。功德殷茂。隆周恩於甥舅。陋漢禮於靈文。眷惟陳氏。本乏允宗。更迷元夢。軫心揮涕。日夕靡遑。臣等旁詢父老。徧歷村墟。得陳公葬地在下縣盱眙。風氣包凝。天地

之藏如故。樵蘇絡繹，樊衛之禁甚疏。宜崇華表，兼建廟祠。臣又聞諸人言：公本維揚尺籍，當宋祚將傾，屢蹕南遷。師住海島，將殞君崩，士卒死溺，莫可數計。公舟破中濤，脫死登岸，招攜瘡殘，匍匐沙嶼，累石支釜，調糜苟活。已而食盡，自分天亡。旁有死馬，衆欲烹食，曰：「我等飢且死，食死馬肉亦死，死等食馬肉，得爲飽鬼。」公夢白衣人謂公勿食馬肉，吾舟擊汝，恍惚未信。俄夢如初，是夜未央，櫓聲入耳，若寤若寐，復有紫衣人杖觸公，勝曰：「舟且至，奈何不起。」公驚立，熟視身在緩中，食頃，颺發舟如輪轉。公夙諳巫呪，叩齒揮神，須臾風濤靖恬，檣柁甯捷，舉皆謝公共進酒食。比至通州，復饋巨魚，歸於故里，厭棄弓矢，假藉符術，避地盱眙。津里鎮，久之始生二女，季卽瀆皇后也。作配仁祖，誕育聖躬。公卒年九十，有九臣等無任嗟異。伏惟宋元之交，華綱塗地，戎貫滔天，神胄攸鍾，乾靈未殞，瀆皇后之有父，乃皇上之有母也。豈偶然之故哉。臣等昧死奏，上曰：「朕固聞之，立命中書省爲朕外王父，揚王廟盱眙墓次，置灑掃戶三十家，設祠祭署，有司歲仲春秋祀，召儒臣宋濂爲文，鐫神道碑。」

徐王馬公高皇后父也。洪武四年六月丙申，上坐皇宮門，召禮部尚書陶凱諭曰：「皇后德懋塗辛，功高任嬖，佐朕布衣，永清寰海，實惟慶宗，發此靈允。惟后父馬翁，世籍宿州，鄉聯閔子，少力耕農，邠勤魏儉，長負膂力，虎視鷹揚，疾惡如讐，拊順如狎，墟中敬憚，莫敢誚顏。元末使氣殺人，藏命定遠，已而江淮繹騷，閩井飢困，避地轉徙，蓄器俟時，謀諸室人鄭媼，乃以愛女託諸好友郭子興。子興定遠豪俠，首難稱雄，衆推元帥，收召民兵，朕邁歸慶部，積著勳庸。子興願朕喜曰：「行且爲汝擇配。」又曰：「莫如吾女。」乃館朕甥廬，薦成嘉

禮。又曰。吾女馬公季女也。惟吾夫婦愛如己女。昔本嗣徽。祥由天定。朕時敬諾。周旋有年。既登大寶。遂正軒龍。娶贈翁爲徐王媼。徐王夫人物色嗣昆。並遭闕天。朕悲悼益深。情文未備。立廟太廟之東。歲時奉祀。願旋類有別。典禮無稽。始卽王塋。闢地作廟。奉安神靈。歲仲春秋。俾有司祇供祀事。汝凱宗伯。典司人鬼。其次第朕言。刻石。凱再拜頓首受命。設宿州祠祭署。以王鄰家武氏。世爲奉祀。守王墳。灑埽戶九十家。呂本。鳳陽壽州人。仕元爲元帥府都事。其後來歸。歲丙午。爲中書掾史。吳元年。授湖廣行省照磨。洪武二年。陞中書右司郎中。四年。改左司郎中。五年。陞刑部侍郎。尋進吏部尙書。六年。改太常寺卿。七年。以事左遷北平僉書。尋召還。授禮部尙書。未幾。出爲兩浙運使。十二年。復授太常寺卿。疾卒。賜葬鍾山之陰。無子。其女爲皇太子妃。建文卽位。册封爲皇太后。本已卒。贈侯。

張昶。永城人。父麟。洪武二十年。以女爲燕世子妃。授兵馬副指揮。食俸京師。二十八年。老。昶從燕兵戰永平。大甯有功。至鄭村壩。遇齊秦兵大戰。先登。陞義勇中衛指揮同知。建文四年。與內臣瑛東援薊州。又從梁銘戰沈都。司兵白河上。陷陣斬首有功。陞都指揮。永樂中。調金吾。再調錦衣旗手。二十二年。妃正位中宮。陞昶左都督。洪熙元年。封彭城伯。食祿千五百石。與世券。贈麟彭城侯。諡恭靖。宣宗奉母后謁二陵。昶兄弟從。太后特召見行宮。諭令謹飭保家祚。宣宗厚母家。禮昶兄弟。正統三年。卒。子輔病廢。孫瑾。嗣伯。成化十六年。卒。子信。嗣伯。正德三年。子欽。嗣伯。嘉靖八年。釐恩澤侯。惟彭城惠安以軍功半。得世嗣。如故。十六年。卒。明年。子勳。嗣伯。昶家本謹厚。又孝誠。昭皇后有功德。仁宗在東宮。非孝誠。禍且不測。宣德正統間。

天下治平皆昭皇后力也。以故其恩澤兩封。傳世最久。

張昇。昶弟。燕兵起。以舍人守北平。有功。陞義勇中衛正千戶。永樂三年。陞指揮僉事。十二年。從上出塞。至忽刺忽失溫。遇敵。有戰功。稍進官。二十二年冬。陞都督同知。明年。陞左都督。正統五年秋。封惠安伯。食祿千一百石。與世券。六年卒。子軾爲典寶。先卒。孫宗嗣伯。成化三年卒。無子。弟瑛嗣伯。無子。庶兄瓚嗣伯。弘治六年卒。子偉嗣伯。正德中。爲總兵。征流賊。失律。下獄。論死。會赦。得釋。嘉靖初。復爲京營總兵。十四年卒。贈侯太傅。諡靖襄。子綱嗣伯。二十二年。坐郭勛姻黨。下詔獄。未減。得出。卒。子慶葵嗣。國變。闔室自焚死。孫忠。字子敬。鄆平人。初名愚。貢入太學。歷介休永城主簿。率人供役天壽山。陞鴻臚序班。宣德初。以女配宣宗。賜名忠。陞督府僉事。又明年。封會昌伯。食祿千石。與世券。忠長厚好施。年八十五卒。贈侯。諡康靖。五子。長繼宗。次紹宗。顯宗。續宗。皆都指揮。純宗。錦衣指揮僉事。孫十八。皆錦衣千戶。顯宗稍驕橫。忠不喜。景泰三年。繼宗嗣伯。英宗復辟。進繼宗侯。加祿二百石。與世券。逾年。贈忠安國公。改諡恭憲。已而革奪門功。繼宗家子弟蒼頭冒功。得官者二十餘人。疏謝罪。辭免。英宗念繼宗母家。革諸蒼頭官。官諸子弟如故。五年。總兵討曹賊。加太保。弟顯宗蒼頭坐法。繼宗爲請。上不悅。繼宗頓首。以母九十老。爲辭。上終不允。一日。諭輔臣曰。祖宗來外戚不得預政。今繼宗得典兵。太后顧不樂。初爲內庭寺人言。防閑須戚里。惑其言。至今猶悔。李賢對曰。孫侯醜謹無他腸。後更不可爲例耳。成化元年。又革奪官。傳旨繼宗出。特恩如故。卒。贈鄴國公。諡榮襄。子連錦。衣衛指揮使。先卒。十六年。連子鎮嗣侯。避英宗諱。改名銘。正德十五年卒。明年子

杲嗣侯嘉靖初坐營八年以安昌伯故盡革外戚恩澤封十六年杲卒子應乾不得嗣  
吳安丹徒人父彥名有女入宮洪熙初召彥名子忠爲錦衣百戶宣德三年卒安以忠弟嗣官正統十四  
年十二月陞忠府軍前衛指揮使是月景帝尊生母爲皇太后詔天下太后卽彥名女也改安錦衣衛景  
泰四年陞左都督前府安弟信陞南京前軍都督七年太監王誠傳旨封安安平伯食祿千石天順元年  
太后復爲貴妃安削爵

周壽昌平人父能孝肅太后父也太后初入宮侍英宗爲貴嬪冊爲貴妃生太子天順元年授錦衣正千  
戶卒子壽嗣官八年陞左府都督僉事憲宗卽位尊貴妃爲皇太后陞壽督府同知成化三年封慶雲伯  
食祿千石與世券贈能慶雲侯十七年進壽侯加祿二百石是年加贈能甯國公諡榮靖弘治元年加壽  
太保祿一百石正德二年卒贈宣國公諡恭和又明年子瑛嗣侯壽弟彥初以恩授錦衣正千戶成化三  
年陞指揮使十七年傳陞都督同知二十一年封長甯伯食祿千石與世券弘治元年加祿百石卒明年  
子瑋嗣卒子大經嗣嘉靖中革

錢承宗海州人五世祖整從燕兵克懷來大甯鄭村壩功陞燕山右護衛副千戶老子通嗣官以白溝河  
滄州灤河功陞指揮使老子貴嗣官從太宗北征宣德十年陞都指揮僉事正統七年睿皇后恩陞中軍  
都督同知卒子欽嗣錦衣帶指揮使正統十四年欽與弟鍾北征沒於土木欽無子鍾子雄天順元年陞  
都指揮使成化二年累陞後府都督同知成化十五年卒承宗幼陞都指揮使錦衣帶俸優給弘治二年



比王源乞恩封安昌伯。食祿千石。與世券。嘉靖四年卒。諡榮僖。明年子維圻嗣。伯是年卒。弟維垣乞嗣。伯吏部請與維垣錦衣帶俸指揮使。如欽官制。曰可。已而維垣又乞嗣。伯制曰。外戚無功。坐享重職。非古帝王報功之典。朕甚不取。廷臣屢建議。愛國重名器也。下會九卿言官議。議上。詔曰。戚里濫膺重爵。名器既輕。人不知勸。維垣停伯。不得嗣。著爲令。

王源。上元人。父鎮。孝貞皇后父也。天順六年爲中府都督同知。成化二十年。源以嗣都督封瑞安伯。食祿千石。與世券。弘治元年。增祿五年。進侯。又增祿。與世券。加贈鎮。阜國公。諡康穆。十年。源弟清以都督同知封崇善伯。食祿千石。與世券。十六年。加源太保。又明年。加太傅。又增祿。正德二年。源弟濬以左都督封安仁伯。食祿如清。是年。濬卒。子桓嗣。伯。十三年。又增源祿。嘉靖年卒。贈太師。諡榮靖。子橋嗣。伯。後革。

張懋。興濟人。孝康皇后父也。成化中。皇后爲東宮妃。授懋鴻臚卿。弘治三年。陞督府同知。是年冬。封壽甯伯。食祿千石。與世券。五年。立東宮。懋得進侯。加祿二百石。是秋卒。贈太保。昌國公。諡莊肅。懋本儒家。從兄岐舉進士。亦有吏才。懋子鶴齡。延齡。懋卒。封鶴齡壽甯侯。延齡封建昌侯。武宗崩。鶴齡迎世宗於安陸。私語左右。欲得召見。申皇太后本意。上不應。而心惡之。道中。數有怪夢。墜馬傷臂。鞭馭者至死。上聞。大不懌。普令在道死者予棺。具所由。以聞。鶴齡頗亦悔懼。每率諸大臣朝夕候拜。仰瞻威容。心悸歸。謂其弟曰。新天子矚我。時有怒色。只爲一馬卒。何介介至此。延齡懋。初不爲意。八年。盡革外戚世爵。二張在革中。以皇太后尙存。得免。止襲一輩。方鶴齡封公。尙書胡世甯言名器當惜。保全外家。須限其制。陛下天授。戚臣奉

迎道路奔走。初非難事。加以金帛。亦足酬勞。若曰定策。有祖訓與先帝遺命在。誰人敢居。況公爵止以增。不以封。不宜使外戚封公。自陛下始。上心是之。以有前詔。不欲改也。考明朝。孝慈馬皇后。兵亂。外家無存者。父馬公。追封徐王。歲祀。仁孝徐王后。中山王長女。本元功。無可加。仁聖張皇后。二弟。半以軍功封。此後孫周二戚。雖封伯加侯。贈公。斤斤守禮法。令終。昭聖儷。孝宗時。二張甚橫。數入禁中。內臣何文鼎素忠直。二張窺御帷。文鼎持大爪籬之。幾死。孝宗無以罪也。多奪民田廬。請官寺舍。豪奴姻親。凌官府。篡獄囚。金玉積如山。厭市肆。壟斷。在在皆是。揚州同知葉元。嘗辱張僕人。元至京。羣僕入吏部。撲元。尙書馬文升。讓元得免。言官時論劾。不問。至正德時。待外家稍薄。十年。日者曹祖。有子鼎。爲延齡家奴。祖行其術。頗有驗。鼎嘗語同儕馬景等。謂其父通六甲六丁神術。能役使鬼丁。景等初信。言於延齡。出入關說。後祖父子不相能。景等亦厭祖。譖逐之。祖忿。奏延齡與其子鼎及景等陰謀不軌。詔逮祖下刑部獄。鼎等下錦衣衛獄。景等下東廠獄。有旨。將會多官廷鞫。祖仰藥死。上疑之。提獄巡風主事皆得罪。尙書張子麟奪俸。昭聖居閒往來。亦厚有所獻。乃得解。尙免朝參。延齡尋囑天文生董昶爲草奏。求進爵。不允。駱橫如故。嘉靖初。都督張銳。太監谷大用等。伏法沒產。延齡擇便美者。抑價買之。爲山池臺榭。僭侈踰制。而是時。上以外藩世子入承大統。母妃至通州。未正尊稱。閣臣固持之。大不喜。旣入宮。昭聖猶以故事。倨見。益不堪。遂排羣議。尊爲聖母。章母皇太后。而愷昭聖殊甚。怒無所發。盡鍾之二張矣。二年。延齡以強占人地土。爲給事中張原所糾。自是稍稍斂戢。鶴齡雖以定策功進爵。然謙退自保。絕不敢與邵蔣並。亦無有疵摘之者。延齡

婢嘗竊金施僧事覺。執僧與婢杖之死。奴畜指揮司聰委之行錢。聰負延齡五百金。被索急。遂謀於昶。子至曹祖所奏事。將許延齡。至陰以草奏示延齡。邀其賄。延齡密遣人執聰。發篋得奏牘。榜聰死。令聰子昇焚其屍。乃折券優遇之。昇噤不敢言。然常忿。詈恨甚。遂拾聰前牘奏之。事下刑部。尙書聶賢。逮延齡。並諸奴。勘結言其擅買田宅。及杖死司聰婢僧事。皆有證。其云陰謀不軌。無左驗。延齡係應議親臣。請上裁。上怒曰。夫謀逆者。只論謀與不謀。豈論成否。賢等黨比欺罔。令戴罪。其曹祖服毒死。想當時有主使容縱之者。宜追論以聞。賢等懼。遁具獄。謂司聰以絞死。曹祖及鼎爲妖言。與景等私相傳語。謀不軌。延齡逆謀。雖無左證。而僭侈兇殘。罪應論死。其兄鶴齡居第相連。坐視不諫。責亦難辭。前任尙書張子麟。侍郎張論等。皆宜追問。奏上。上曰。延齡犯在十惡。宜從重典。第告變人亡。無從質證。今但以多殺無辜。僭恣不法之罪。誅之。鶴齡同惡相濟。姑革其爵。張子麟等。逮赴京治罪。賢奪俸一年。延齡具疏自明。上責其獄中擅奏。通政司官皆奪俸。已。子麟等。逮至。俱革職。方獄急時。在十三年七月。將致族誅。昭聖計無所出。乘上生子。欲過宮稱賀。且求解。上辭者再。乃止。遂令內臣傳口語。張延齡事。姑從寬貸。上怒。錄其語示閣臣。張孚敬議處。孚敬力爲解。且云。殺人罪。誠難恕。然恐傷皇伯母心。參之議親之條。待以不死。削爵。覈其占據田宅。悉入之官。遠而編戍爲民。皆可。上曰。婦人以夫爲家。皇伯母上配孝廟。宜感恩發奸。曰。傷心是導之啓私庇。必欲害國也。朕欲保神器。正法紀。如欲不問。亦自卿等行之。孚敬皇恐。依部議。票上。上卽欲論決。時馮恩以星變上疏。郭宗皋以奏疏忤旨。皆繫獄。將并決。孚敬又力救宗皋。杖四十。釋爲民。方獻夫亦力言不可。

且云何人導陛下爲此失德事。上屢詰問。孚敬對如初。上不悅。諭卿等愛重囚。煩奏。自古強臣令君一矣。又以大禮爲言。欲悔己以從廷和。與此本要朕批。朕止知殺人必以殺報。孚敬再引罪。上不得已。停刑。仍諭之。但當承君之意。勿曰某某之幸。實非爲亂賊而屈刑焉。又因孚敬乞休。上諭之曰。卿求去。或因大同事者。又或以今日之事爲難處。堅不欲法處。延齡者曰。爲昭聖太后。恐君上失德。此皆不足慮。孚敬遜詞以謝。時孚敬方堅欲討大同。無效。慚而引疾。故上云然。已而南兵部主事劉世龍。以南太廟災。上封事。一請杜諛諂。以正風俗。一請廣容納。以開言路。其一則言張延齡。憑寵爲非。罪固難貸。然一旦置之重辟。何以慰孝宗昔日寵待之意。安昭聖皇太后垂老之情。上責其誦上庇逆。械入京。黜爲民。始延齡之下獄也。提獄主事沈椿。以戚畹。故不令入重獄。置之別所。後代者益寬假之。聽其家人出入扶持。恩通親知。往來置酒譚諧爲樂。至是。主事羅虞臣。有鄉人陳邦憲者。亦坐死繫獄。虞臣置之延齡所。相得甚歡。常爲延齡草奏。而罪繫邊將郤永。宋贊王祿。亦與延齡燕飲。祿因稱貸延齡八百金。延齡嘗書聖學心法一幅。題君道不明。賞罰六字於其端。十五年。奸徒劉東山。以他罪坐繫。贖肆不受囚。東虞臣笞之。恨甚。圖報。遂撫奏延齡前事。謂惡言譏謗。賄結邊臣。爲外援。招匿國勳。爲內黨。其妻崔氏。動以宮闈藉口。又自謂有先朝恩養。終不至死。且有賜田產業百餘所。令子侄奴屬多通賄賂。以希脫罪。奏入。下拷訊具狀。上謂延齡誦上法司非人類。乃與死囚爲黨。備查。先令提獄官執送鎮撫司鞠之。責尙書唐龍等欺公濫法。戴罪聽處分。先後提獄官主事沈椿等二十四人在京任者。俱逮下獄。其公差給假致仕丁憂諸在籍主事陳公陞等。

俱命各巡按執赴京師並訊。又有劉琦者亦許奏延齡陰附權閹傳遞宮禁金幣暗結將官賂遣真人邵元節等事俱下詔獄。二疏所株累凡百餘人。錦衣衛訊上言東山琦所奏多誣罔。下都察院擬罪。於是都御史王廷相等擬上延齡永贛等俱仍原擬繫獄。椿等贖杖還職。東山發配。琦發遣邊衛。得旨如擬。延齡雖在繫。其諸子宗儉宗說等席故貨富厚擅行都下諸奸人及家奴利其所有率危言恐嚇之索賄不遂則首諸官。十六年冬有班明於雲鶴者上章告變。搆及中官戚里。鶴齡自南京逮赴詔獄。瘐死。雲鶴以誣奏遣戍。而言者猶接踵。東山又自配所逃歸京師復許奏延齡夫妻父子魘魅呪咀事皆實。班明等奏不誣併讓珊瑚致之。仍取張氏奴陳文紳奏詞一紙連封以進。諸奸猶龐永洪等和之。詞連大學士張孚敬。遂安伯陳鏜。西甯侯宋良臣。京山侯崔元。太監麥福等所蔓引凡數十人。章下錦衣衛訊鞫。獨令鏜良臣赴訊。奏請時孚敬已致仕。錦衣衛以爲言。上曰延齡事與孚敬無與。勿問。於是錦衣衛指揮使王佐力爲推鞠。言東山等所奏皆無實。不足聽。法司唐龍王廷相屠僑等如佐言。讞上。因言延齡罪狀多端。久留禁獄。其子姪驕溢斂怨。致奸兒垂涎財物。紛紛告許。動輒指斥乘輿。干犯宮禁。於國體實多所損。乞將延齡早賜處決。時章聖方病。上徧禱祈福。命釋鏜等。予原職。讓珊瑚贖杖還職。東山枷戍。延齡仍禁錮。宗儉宗說等調發南京。盡沒所賜產。東山荷校死。二十年。昭聖皇太后崩。尋張延齡死西市。

邵喜昌化人。寓杭州。父林。孝惠太后父也。太后初入宮爲貴妃。生興獻王及岐雍二王。喜歷陞錦衣指揮使。嘉靖初。尊貴妃爲皇太后。封喜昌化伯。食祿千石。與世券。明年卒。諡榮和。子蕙嗣。伯。五年卒。無子。族人

爭嗣。上下吏部議。又令郭勳張璠方獻夫胡世甯李承勳議。世甯言。皇上必欲邵氏嗣封。益推皇考獻皇帝之所自出。於其父母邵林楊氏。而欲榮富其子孫也。不幸林子孫皆絕。今爭襲者乃其旁枝。非林子孫。其不當嗣明矣。臣恐賜彼一代之爵。而或亂彼百代之宗。誤我皇上明倫之智。達孝之仁。可不慎乎。臣觀江南蘇松諸郡。浙江諸省。未見有侯伯世嗣者。喜封伯未逾年。遂卒。傳其子蕙。僅再世而遂絕。輔陞指揮弟弼。卽天圯三子。長次二人。皆以疾廢。其不幸門祚之薄如此。蓋亦地氣使然。故臣愚以爲與之嗣伯。則宜考覈倫序。若濫及旁枝。誤及異姓。彼弟曰弟。彼姪曰姪。太后兄弟。不得以之爲子。父母不得以之爲孫。他人富貴。而本親告絕。幽明之間。各生嫌隙。生者不得安其養。死者不得歆其祀。況門祚薄而福蔭隆。恐非邵氏之利。莫若停其封爵。量與恩澤。蔭卑流遠。乃久長之福。七年春。上特令杰嗣伯。八年革外戚封。停嗣。

夏儒。上元人。毅皇后父也。始以錦衣指揮使陞都督同知。正德二年。封慶陽伯。食祿千石。與世券。十年卒。子臣。十六年嗣伯。嘉靖二年。加太子太保。卒。八年停嗣。

蔣輪。徐州人。父敷。以獻皇后家。授兵馬指揮。從之安陸。老無子。以輪爲後。嘉靖元年。輪以錦衣指揮僉事。封玉田伯。食祿千石。與世券。羣從弟山。錦衣指揮同知。壽僉事。太正千戶。四年。輪卒。贈太保。諡榮僖。明年。子榮。初爲奉祀。顯陵嗣伯。榮弟華。爲奉祀。爲都督。守顯陵。

陳萬言。元城人。孝潔皇后父也。初爲諸生。頗解科舉文字。嘉靖元年。立中宮。以萬言爲鴻臚卿。陞都督同



知二年封太和伯食祿千石與世券官其子紹祖尙寶司丞八年盡革外戚封十四年萬言卒太和伯不得嗣萬言孫書乞恩得錦衣都指揮同知帶俸

方銳江甯人孝烈皇后父也嘉靖九年十一月皇后選入掖廷充九嬪明年二月陞銳錦衣署鎮撫八月  
上諭兵部朕慎選淑女爲嬪御用廣嗣續九嬪之父授署職似於人情有未盡銳可與錦衣正千戶十三年正月皇后正位中宮陞銳衛都指揮使十八年二月隨幸承天至衛輝陞後府左都督十九年正月封安平伯食祿一千石二十一年二月敕吏兵二部朕恭奉皇妣慈孝獻皇后几筵痛憶遺音周足三期贊成朕孝后妃列御宜加恩遇銳進封侯二十五年二月卒五月子承裕嗣伯三十三年十一月加太子太保

李偉孝定皇太后父也宛平人起於泥工孝定事穆宗爲才人生神宗進都指揮使神宗立封武清伯進侯祿千五百石子券孝定極厚外家費予無算而偉父子好居室無時不興土木第宅園亭奇麗徧京師人稱爲李瓦刀家卒子誠銘嗣侯諸子誠鍾誠鉅皆都督

郭振明灤縣人孝元皇后兄也初爲諸生天啓元年封博平伯崇禎元年進侯振明文雅韶秀專志文墨日與知名士遊不爲戚畹態善鼓琴行草書字亦秀雅人皆以其戚也而易之其實諸文士名筆不及也國變死節

王長錫順天人孝和皇太后兄天啓元年封永甯伯食祿千石後進侯劉文炳亦順天人孝純皇太后兄

崇禎元年封新樂侯。二人於國變日皆死節。

張國紀。祥符人。熹宗后父。以諸生進。封太康伯。懷宗卽位。進侯。國紀儒雅自好。每與博平侯郭振明遊。雖無所長。不爲戚畹。威福安靜和恬。都人稱之。

周奎。順天人。懷宗皇后父。初起於卜。皇后少時。奎推其命。當大貴。旣而選爲信王妃。奎爲兵馬指揮。人賀曰。君言驗矣。奎笑曰。不止此也。旣而熹宗崩。無子。懷宗卽位。皇后正位中宮。封嘉定伯。國變死。而其子鑑爲都督。雄幹長鬚。行多暴橫。都人恨之。李賊入。桎而死。人以爲快。

李堅。武陟人。父英。開國有功。爲驍騎右衛指揮僉事。力戰死。烏撒贈指揮使。堅尙太祖第七女大名公主。爲駙馬都尉。嘗與駙馬歐陽倫。梅般。陸賢。賑北平。建文皇帝卽位。進公主大長公主。堅素負才勇。充左副將軍。佐耿炳文北進。遇燕兵。炳文謹備西北。燕兵突擊。出不意。破東南。炳文敗。邱福又攻子城。堅出接戰。互有勝負。封樂城侯。食祿千石。與券已。而兵駐漕沱河。薛祿引梁中堅墮馬。祿揮刀斫堅。堅大呼。我李駙馬。勿殺。祿擒堅。見太宗。謂爾至親。今至此。奈何。械送北平。道卒。子莊以公主故。特宥。當嗣侯。公主懼禍。織誥券。莊流寓南京。詩酒自娛。後嗣侯諡威。莊弟成爲中都留守。改山東都指揮。成子陞世。南京衛指揮使。胡觀。東川侯海之子。尙太祖第十女。爲駙馬都尉。建文三年。充副將軍。佐李景隆北征。燕王謂諸將曰。李景隆志大無謀。喜專遠衆。郭英老邁。縮平安。復而自用。胡觀驕縱不治。英傑儒而無謀。數子皆匹夫。無能爲也。此景隆敗於白溝。觀爲燕兵所執。後歸京師。爲陳瑛譖奏。勒自縊死。

袁容壽州人父洪開國入官至都督容初選燕府儀賓配永安郡主燕兵起城守從征皆有功太宗卽位進郡主爲公主容駙馬都尉食祿千石永樂元年再論功封廣平侯食祿一千五百石與世券凡大駕出入皆命容居守公主卒仁宗停容侯祿與駙馬祿一千石宣宗卽位與侯祿容端謹謙和通敏有才智卒贈沂國公諡忠穆子禎宣德四年嗣侯孝友廉慎卒無子庶弟瑄正統元年乞嗣上曰容封以公主恩禎嗣以公主子瑄庶子可長陵衛指揮僉事帝俸奉公主祀祠後屢乞嗣侯不許

李讓舒城人父申留守左衛指揮同知讓初選燕邸儀賓燕兵起率府兵執謝貴等取大甯戰白溝河有功署掌北平布政司事佐仁宗居守防禦有功建文皇帝聞之大怒欲讓且宥申讓不肯願其家力戰破平安兵九門建文皇帝遂殺申沒其產并殺諸男子族居人沒其幼子婦女異姓姻屬盡謫戍邊讓聞之慟哭誓死戰益力永樂元年進駙馬都尉封富陽侯食祿千石掌北京刑部事卒贈景國公諡恭敏子茂芳八歲嗣侯二十二年坐事上曰茂芳早失父不知禮停祿革冠服讀書國子監十年能改過復爵祿否則削奪爲編氓是年奪券卒子輿正統二年授長陵衛指揮僉事天順元年詔與伯爵卒子欽成化十五年乞嗣伯吏部言輿伯出言恩詔無世伯文欽嗣官長陵衛

崔元代州人尙憲宗女永康公主爲駙馬都尉嘉靖初以奉迎車駕封京山侯食祿千五百石與世券已而坐張皇親事下詔獄得釋元好交文士流聲譽上喜元寵信得與內閣大臣及郭勳朱希忠並召見燕語元得乘間發動奸惡勳坐死元弟允嘉靖二年進士官至按察副使元卒其子不肖盡破其家

明書卷一百五十四

列傳十五

佞幸傳一

史官曰。嗚呼。天不可不剛。主不可不陽。剛陽則苦勁正之。陰柔則甘悅媚之。孽狐晝伏而爲祥於夜。夜陰也。裴矩佞隋而忠於唐。唐之主當陽也。亦有明主當陽。知之不能遠之者。文帝之於鄧通。太宗之於宇文士及。豈不知之者乎。殿上之戲。嘉樹之譽。猶以弄臣畜之。曰是能適我。夫天子至尊貴也。列粉黛。吹笙竽。芝草珍禽。日進於前。太平封禪之書。不絕於御。亦曰爲適而已矣。匹士招朋。亦思慳媚。豈尊臨萬乘。而不庇一前魚乎。然二主猶未爲盛德累者。以有申屠嘉。魏徵在其側也。山有猛獸。則藜藿不採。正士立於朝。則僉壬喪魂。故終文帝太宗之世。二小人偃伏。僉息而不敢動。若以成哀爲君。以孔光張禹爲相。則張放董賢。皆能以狎邪遊戲。導主而爲厲。然則國家欲遠佞人。有陽剛之君。尤賴有苦勁之臣哉。作佞幸傳。

紀綱傳

紀綱。山東臨邑人。以郡劣生。觀子衿。憤從燕兵爲參謀。太宗卽位。爲錦衣衛指揮使。陞都指揮僉事。日見信任。恃恩驕橫。朋比罔上。與指揮僉事莊敬等興販。居處服飾器皿。僭擬上用。蓄歌童舞女於家。出入迎

導詐傳詔旨。役臨邑之民。營創私第。擅作威福。以危法中人。受四方賂遺。及侵盜官物。不可勝紀。氣勢傾中外。事覺時。敬在海上。逮至上命。繫網敬於市。籍其家。無少長。咸戍邊。都察院上紀綱罪狀。略曰。故都指揮紀綱。儂薄。隞僧。陰斂陽卻。搗搗蠶尾。包藏虺心。積稔惡極。未易指數。按綱前後使腹心。幹僞爲詔。下諸司鹽場。勒鹽四百餘萬。還復稱詔。奪官船二十艘。牛車四百輛。載入私第。弗予直。人牛立槁。又卽獄。喝持大賈數十百家。家索賂不等。得黃金三百五十兩。白金二千兩。鈔四十萬貫。帛千五百疋。又挾詐取交趾使黃金八十兩。金盆一。異寶二十枚。奪民人倪貴等房舍莊宅十七所。計值金三十餘萬。匿縣官予民地八所。直二十餘萬。從籍故晉王。沒黃金五百兩。金盆一。寶劍二。白金鞍轡二。又從籍故吳王。沒瑟瑟御龍服王冠。還輒衣故王冠服。高坐置酒。命優童真保道真吉祥等。效伎樂。奉觴上壽。呼萬歲。徐勞卿等無恙。敬舉卿之觴。綱諸所用金裝八寶環八寶帽飾玉盞玉水池硯。珊瑚犀毗玉束帶。紅鋪牀。玉石馬几。成飾交龍日月星斗。度如乘輿副。又上所怒內侍石班。當下綱論棄市者。輒將至家。具洗沐。好食食之。陽爲言見上赦。若誘取金帛且盡。更數日。將至市殺之。而先日以行刑報。嘗喜道姑陳氏姿色。欲買置媵。爲都督薛祿所先。怨之。遇於大內。持鏹鏹祿首。膝裂。幾死。祿噤不敢言。又道恚都指揮啞失帖木。不避誣。持其冒賞事。捶之死。綱家蓄養亡命。託山劉等多造鐵甲弓弩萬計。腐取良家子十八以下數百人。充左右役。詔選捷好才人。既試。可令暫出待歲。綱輒簿錄其尤者內之。別以次塞。莫敢問。吳人故大豪沈萬三子文度。萬三伏法。高皇籍沒其家。所漏貨尙富。而文度頗爲人把持。其短患之。因綱舍人蒲伏見。進黃金百兩。白

金千兩。龍文被一牀。龍角一株。奇寶十具。異繪綺四十疋。願得從費。御列爲外府外廩。歲致粟六百石。鈔二十萬貫。醴百石。布帛以時進。食餌羞果以月進。綱許之。仍語文度。吾後庭未充。若爲我吳中徵好者。不爲數。文度因是挾綱什伍。而分民間室。亡誰何者。綱曰。惟其威日重。且迫上冀得所欲。當端午。上射柳。綱私司射。鎮撫龐英曰。我故射不中。而子折柳鼓噪以觀。兵部尙書御史既射。綱謬爲不中。英折柳鼓噪。竟射無紀者。綱乃喜。咤曰。是無能難我矣。按綱爲天子腹心之臣。負委任。妄意不軌。擢綱髮不足數罪。其僚指揮莊敬。袁江。千戶王謙。李春。比周爲誣罔。當死。并諸應坐人。以輕重受條。詔曰。可。頒示天下。史官曰。太宗英武聰察。綱非有腹心帷幄之寄。婉孌泣斷之姿。而能恣意竊柄。觀釁逞欲。挾姦回之性。爲蓄逆之思。揆時度勢。有難解者矣。至今循覽爰書。窮悉穢惡。藁街寸樹。奚云弗宜者乎。

石亨

附從  
姪彪傳

石亨。渭南人。方面豐臙。美髯及膝。從姪彪。體貌亦雄偉。髯亦過膝。亨嘗與彪貰酒。相工遇之。酒肆大奇之。曰。今當平世。奈何二人有封侯之相。亨家本軍官。伯父巖。無子。亨嗣。寬河衛指揮僉事。亨不學。然識字。英果壯毅。善騎射。有膽略。提大刀輪舞如飛。每從征。挺刃當先。輒立奇功。累陞都指揮使。彪亦驍勇。能挽強弓。善揮斧。始以官舍從亨有功。授大同衛鎮撫。正統十二年。亨遷都督僉事。爲大同左參將。守萬全路。彪亦陞至都指揮使。從亨參謀。十四年八月。王師敗績。亨與總兵官楊洪等。並械繫錦衣衛獄。十月□□也。



先犯京城。有言亨勇者。景帝出亨獄。令立功贖罪。亨統兵出安定門。卽與敵遇。挺刃單騎進。左右馳突。獨殺數十人。彪又持斧率親兵從之。諸軍懼呼。踴躍聲震天地。敵卻而西。亨等追戰城西。敵復卻而南。亨令彪率精兵千人誘敵。南至彰義門。敵見彪軍少。逼之。亨率衆乘之。蹂敵大潰。南奔。亨日夜追敵。三日。至清風店。北去。將出紫荆倒馬關。懼我躡後。亨遣諜者給敵。亨且未至陣中。將者假亨名耳。敵信之。來攻。亨率彪與精銳數十騎奮擊。大呼直貫敵陣。刀斧齊下。殺敵數百人。敵衆知亨在。鬻亂相蹂踐。亨悉衆乘之。大捷。敵所掠羊馬財物。盡棄餌我兵。敵得遁去。亨旣數敗敵。威名益震。敵自是不敢復踰塞。深入輒請和議。見邊人呼石亨爺爺。論功。亨第一。封武清伯。尋進封侯。兼太子太師。總京營。彪陞都督僉事。爲大同左參將。諸子姪澗。溟。濬。仁。並陞千戶。鎮撫。澗戰沒。彪爲參將。敵畏之。稱石王。於謙請敕亨巡邊。至大同。召還。爲團營總兵。謙忠義清直。不避強禦。景帝倚任之。亨恃功驕橫。謙又時時裁抑。亨畏謙不敢動。然積恨之。天順元年正月。景帝不豫。亨與都督張軏。都御史徐有貞。太監曹吉祥。蔣冕等。定謀奉。上皇復辟。爲飛語。謂於謙及王文矯取金牌敕符。迎襄世子矣。又曰。上令內官張永等捕亨數人。掌兵者矣。庚辰。遂因吉祥。矯稱得皇太后懿旨曰。天子疾大漸。殆弗興。天位久虛。上皇居南內。春秋鼎盛。於今八年。聖德無虧。天意有在。人心所屬。傾以奸臣擅謀。闕而不聞。欲迎立藩王。以承大統。將不利於國家。亨等其率兵以迎上皇。是月壬午。四更。亨與軏。吉祥等。暨羣從子弟家兵。叩南內宮門。請上皇陞輿。從東華門入。奉天殿卽位。侍衛都督范廣禦戰死。闕下。亨遂言於謙有反謀。不欲立皇上。請殺謙。上意未決。亨有貞力言。不殺謙。今日

事無名。上不得已。殺謙。及文。陳循商輅尙書江淵俞旨悅等。戍邊歸田。廢景皇帝爲郕王。亨以奪門功。第一進封忠國公。歲祿三千石。與世券。有貞封武功伯。入內閣。彪封定遠伯。爲大同副總兵。諸從弟子姪及諸義壻子孫。皆以奪門功。得官錦衣都指揮。指揮者三十二人。千戶鎮撫者二十一。其諸竄名奪門。冒官者四千餘人。亨矜功恃寵。日與吉祥出入禁廷。在上左右弄權。進退文武大臣。盡革邊鎮撫。奪民間婦女田廬財物無算。彪亦益驕橫。凌鎮守文武大臣。御史楊瑄等聯章劾亨。亨疑有貞李賢等。嗾言官見上泣訴。強下賢有貞并都御史耿九疇御史瑄等於獄。會天大變異。得釋賢留。有貞九疇竟逐去。諸御史譏戍調除有差。及賢再入閣。亨亦有力。賢竟不悅。亨益干朝政。乞請無忌。上亦厭亨。左右怒亨者。伺隙數言亨短。上漸疑亨。一日上登翔鳳樓。見亨新第極偉麗。顧問恭順侯吳瑾撫甯伯朱永曰。此何人居。永謝不知。瑾曰。此必王府。上笑曰。非也。瑾頓首曰。非王府。誰敢僭如此。上不應。顧內臣裴當曰。汝聞若言乎。亨橫睚眦中傷人。莫敢告亨者。上又諭賢曰。總兵官豈可無故輒入內廷。令左順門關者。非宜召。不得輒入。總兵又以軍官貪暴。復設巡撫。亨慚憤。必欲上復革巡撫。上不許。會兵部尙書陳汝言奸賊得罪。上嘆息。思好箇於謙。亨益不自安。又知衆不容己。乃薦處士吳與弼。上又諭賢。左右干預奈何。賢請上獨斷。上嘗與賢論及奪門功。賢曰。迎駕可。奪門不可。又曰。郕王不諱。天命人心咸屬陛下。何必奪門。且內府門豈可奪。奪字尤非順。不可示後世。賴天靈佑助。事幸成。脫郕王左右先知。亨輩不足惜。不審置陛下何地。上愕然。又曰。臣彼時極知此舉之非。亦有邀臣與謀者。臣不從。臣愚謂郕王果不起。率文武羣臣請陛下復位。

安用如此勞攘。論功陞賞。誰復敢招權納賂者。上曰。善。由是益薄亨。亨生子男未彌月。上見亨喜。令亨負兒見朕。上見兒。又喜。摩其頂曰。虎兒也。往喜撫之。朕行與卿結姻。上意寵欲亨子駙馬。且探亨意。亨不喻。輒對曰。不敢。不敢。臣兒無福。上笑而領之。命左右取金鎖繫兒項。賜封鎖定侯。亨頓首謝。召出。上益疑亨。彪在大同肆貪暴。誣劾都御史年富。逮至京。上疑問賢。賢乞遣官卽訊。果不實。彪又數言侮其總兵。總兵因彪嘗奏城威甯海子。遂爲流言。誣彪有異志。上固疑彪。欲召彪還。大同人又乞彪爲總兵。上遂大怒。或又曰。彪結死黨。必欲留據大同。爲亨外援。上亦疑出亨意。尋進彪侯。召還京。侍衛亨覺上疑。令人促彪疾馳入京。彪既至。會北使入貢。見彪於朝。羅拜稱石王。上聞益疑不可解。天順四年二月。上密詔御史按劾。卽日縛彪棄市。籍其家。亨逮繫錦衣獄死。亨既死。法司請瘞其屍。上念亨功。欲從之。問賢。賢請盡法斬首。上不肯。竟瘞亨。都御史寇深等素惡亨。論彪大逆。收亨家。籍其財產。亨從孫進士石俊。亦被收死。獨從姪錦衣都指揮使溟得戍彬州。少子潛鎖定侯者。幼未收。溟在彬。累建功。陞指揮。潛至正德末。尙游食京師。亨縣人孫宏初。以舉人。歷肥鄉洛陽令。歷陞太僕寺丞。少卿。以迎駕功。陞工部右侍郎。亨再薦宏爲尙書。上陞吏部左侍郎。曰。再陞。當爲尙書。亨曰。卽尙書。何不可。何再陞耐煩邪。亨粗豪直爽。軒豁無機巧。嘗薦馬昂爲兵部尙書。又力薦賢有貞入內閣。已。遂有貞留賢。亨權日重。威名震主。不知謙損。竟及於難。五年

七月朔。吉祥及其姪昭武伯欽反。皆伏誅。

史官曰。人恆言曹石。曹反闕下。兵火逼禁。姚令言朱泚其數也。亨父子劣犢耳。恃功驕恣。失人臣禮。反

謀未著。卽獄詞亦曰。快快懷不軌。而別錄謂童督勸其反。進讖曰。惟有石人不動。而亨以布置未徧後之。童督唾。謂不足有爲。此亦渺茫之談。乃俱坐死。前當寇躡畿輔。享父子戰功。瓌偉。一旦至此。上公彙於孱卒。干城等於孤豚。常時李賢主之。逸臬摘之。英宗恐恐焉。記過不賞其功。寇螫不留其種。卒激曹氏之變。夫石外疽也。曹內癰也。治外忘內。兇毒驟發。幾至攻心。臬死賢免。至今譚之心悸焉。至亨。彭心無祖法。目無天子。其死也宜哉。

### 馬良馬昂傳

馬良。江南人。貌溫嚴。少以幼童侍英宗於青宮。有同榻之幸。旣卽位。襲父職。爲金吾指揮使。累戰功。爲都指揮。上復辟。召見之。進都督僉事。平曹欽。進都督同知。賜蟒衣玉帶。凡行幸。必從。賞賚不貲。一日。上早朝。罷出獵南海子。羣臣候送。駕於午門外。見有乘馬從中門諸璫夾而出者。以爲上也。衆跪。乃知非上。良出矣。最後上騎而出。衆驚詫。良喪婦。上賚賻甚厚。不數月而娶。鼓吹達禁中。上聞之。唾曰。奴薄行。乃爾耶。自是不復召。至成化初。坐與中官玉綸有私。出廣東。從大帥自效。後入協贊南京守備。出鎮貴州。卒。

馬昂。宣府人。世指揮。累戰功。至都督僉事。總宣府兵。有女弟。已適畢。指揮有娠矣。美嚴善騎射。曉番語。武宗聞而召嬖之甚。遂進昂右都督。一門大小皆賜衣蟒。諸大璫畏之。呼爲馬舅。臺諫皆有言不聽。一日。上過昂賜第。飲酣。欲召幸其妾。昂不可。上怒而起。昂懼。請解任。女弟亦疎。後以事累奪職死。其弟都督昊。都指揮景。晏。皆得罪。

史官曰。二馬姓氏官爵恩倖見疏。俱絕相類。一以龍陽。一以女弟。皆得致巍顯膺殊眷。奇矣。而後一以妻。一以妾。皆致疎斥。又奇矣。嗚呼。人主愛憎之際。可不戒哉。

神英

附同時  
封者 傳

神英。京師人。高祖保立功。洪武時爲大同指揮僉事。父傑。雲南功。進指揮使。陞陝西都指揮。天順初。英嗣指揮使。延安衛驍勇敢戰。先登。累有斬將功。成化弘治間。充總兵官。守甯夏。延綏宣府大同。歷四鎮。累官署都督。正德五年。給事中歐豸劾英年老不任。金革致仕。是年。賂瑾金寶萬計。矯旨。英居官五十餘年。有戰功。欲封英爵。下兵部議。尙書曹元阿瑾。卽稱英功。傳會。盡錄上。英前後首功。中律。瑾又欲籍衆口。下廷臣再議。莫敢異同。是年四月。封英涇陽伯。食祿八百石。與世券數月。瑾敗。言官交章劾英。奪爵。繳誥券。爲右都督。時有張富。保定新城人。少力耕。自給。弟永。太監。正德時。與劉瑾導上非。幾得倖。用事。大臣請誅入黨者。有永名。永初與瑾好。相結。左右富得爲錦衣指揮使。已而瑾勢盛。益橫。永不能堪。正德五年。安化王寘鐺反。甯夏永督軍。與楊一清西討。兵未至。仇鉞等已擒諸反者。班師還京。入見。上發瑾罪狀。誅瑾。遂論功。封富泰安伯。永弟容。安定伯。並食祿千石。與世券。時容已爲錦衣都指揮僉事矣。嘉靖初。詔盡革正德間傳陞乞陞冒陞者官爵。永出奉康陵。富容並革爵奪券。與容都督富錦衣指揮使。已而霍韜又論容賄一清坐罪。減級。安化之役。未嘗一接戰。倭幸封者六人。武德未詳。始所以進爲義兒。冒國姓。封永壽伯。太

監谷大用兄大寬高平伯馬永成兄山平涼伯魏彬弟英鎮安伯並食祿千石與世券大用弟大亮又以平流寇功冒封永清伯五人者皆已官錦衣指揮封一詔盡勦罷奪券英獨以彬在得爲都督同知又有江彬者自有傳時又有許泰者起指揮驍勇通文爲遊擊將軍征流賊有功陞都督冒國姓爲義兒從上巡邊矯斬寇功封安邊伯泰頗知法度不敢挾威福肆毒以故得不誅謫戍邊史官曰孔子惜繁縷以爲惟名與器不可以假人夫名器者朝廷之所以尊有德重有功也故位以配德爵以酬功故明太祖勒爲訓曰人臣非有汗馬功不得侯至武宗朝如神英輩或以賄進或以佞起得以列五等膺圭玉甚者亂國姓於市井敗紀廢法亦已極矣昔人謂爵位者出於口而無窮爵位豈可任口予哉斯言誠大罪者矣

### 江彬傳

江彬蔚州衛指揮使祖父時嘗調閱宣府鎮城因家焉彬儀狀魁偉善射性權譎便辟人多悅之正德六年畿內苦流賊京軍不能制議調邊兵時彬隸總兵張俊部下戰淮上中三矢其一著面鏃出於耳拔之更戰事聞上固識之七年七月部議盜未平倣各邊事例於山東河南南北直隸各設鎮守武臣一人事甯裁革咸甯伯仇鉞言邊軍久勞風土不宜人馬俱病今賊漸平請留三之一討賊餘遣還邊俱下廷議乃以劉暉戍山東時源戍河南鄒永北直隸李鉞南直隸所部各千人益以內地兵五千人分屬之暫留鎮守其副參許泰等軍俱遣還鎮從之延綏軍取道徑還遼東大同宣府軍仍過京輻勞後三鎮軍士至



京遂留不遣。未幾延綏兵復召入。稱四鎮云。彬厚賂錢甯。引入豹房。得見上。上閱前痕。呼彬兒健能爾耶。應對稱旨。卽晉都指揮僉事。置左右。出入起臥與俱。每搏虎爲戲。江彬盛言宣府軍可用。遂有京邊軍互調操習之說。上喜。下部議。言祖宗成憲。京軍衛內。不以無故而出外。恐有四方窺伺之虞。邊兵捍外。不以無事而弛備。恐有一旦倉卒之患。今使外兵拱衛內。兵輕出。恐非居重馭輕。安內攘外之要。上竟於宣府調三千人京營。赴宣府備禦者。亦如其數。大學士李東陽等條十不便之說。不納。許泰張俊等因得復入。是後四鎮士馬團操大內。間以角觝之戲。號外四家。上戎服臨之。每出入。彬與上聯騎。鎧胄略同。幾不可辨。各軍馮恃威寵。出縱恣。市里畏而避之。八年正月。命許泰敢勇營。彬伸威營。俱管操。三月戊子。改太平倉爲鎮國府。毀廠口爲府廳。又罔上振耀國威。六月。於奮武營西造官廳。爲操練申令之所。名西官廳。以彬爲都督。彬前與都御史甯杲征流賊。彬次新河。不進。及盜去。乃殺居民及耦耕者數十人。冒首功。累爲言官所劾。輒縱舍之。姑令行勘。至是。給事中潘垺等覈實以聞。上亦不罪。六月。賜彬冒國姓爲義兒。同時賜姓者。指揮楊瑄。焦睿。焦椿。焦桂。張天祐。張廷鸞等。且更其名。俱改錦衣衛帶俸。初。劉瑾蠹政。用趙高之術。導上深居。不視朝。當奏事及陛見辭謝者。皆候左順門。瑾西而捧旨。代上酬應。恣行威福。是時。瑾誅。上復嬖錢甯。常侍左右。有言輒用。彬更內妒。導上巡遊。疎之上。始躍然。然憚太后。不敢輕出。九年二月。始微行。至教坊司。七月。彬巧造神銳箭。盜甲倭刀。鐵矢數萬。又於陝西造鋪花氍毹房一百六十二間。重門堂廡。庖廔。漏。乃戶牖。樁。檝。影。壁。圍。幕。地氈之數。皆具。且有壇。內遊幸。出哨。趕聲。息。諸名號。至是進之。凡郊

祀皆陳設帳房不復宿齋宮矣十一月令鎮國府各兵俱西官廳操練而以彬及許泰提調之於是兵權歸之矣後與上遊幸益類十年六月大學士梁儲等言日者竊聞聖駕自西安門出經宿而回不知臨幸何處臣等憂懼謂至尊出入必備法駕必傳蹕南郊大祀不過一宿直廬拱衛將士數萬今聖駕之出環衛者何兵扈從者何官居守者何大臣文武絕不與聞若徒無故輕出擾擾塵埃中萬一車馬驚蹶之虞姦盜竊發之變出於意料之不及未知何以備之臣等聞之寒心倘以爲所聞不的冒干天威明示黜罰安敢辭避不報十一年二月設東西兩官廳於禁中視圍營東以太監張忠領之西以張泰領之而神周者常以罪坐謫亦彘緣進用管勇士營未幾益以劉暉皆賜國姓爲義子四鎮兵彬兼統之上又自領闖人善騎射者爲一營謂之中軍辰夕馳逐呼噪火礮之聲達於九門浴鐵文組照耀宮苑上親閱之名曰過錦言望之如錦也諸軍悉衣黃罩甲中外化之雖金緋盛服者亦必加此於上下至市井細民無不然秦及周等頂遮陽帽上飄氍染天鵝翎爲貴飾貴者飄三英次二英兵部尙書王瓊得賜一英冠之下教場自謂殊遇其後巡狩所經雖督餉侍郎巡撫都御史無不衣罩甲見上者十二月上於郊後獵南海子夜半還以所獲獐鹿賜文武大臣曰彬所贊也三月上與彬騎出北安門軍校從者纔數人四月折西安門外積慶鳴玉二坊民居造皇店酒館并營義子府第開設教場六月上獵近郊問彬邊計指畫山川險易道路直紆狀甚明審上曰信若此朕何難擒黠寇耶彬又言宜先駐宣府觀釁且遠廷臣可無煩聒上深然之密裝治行欲自領西官廳兵馬巡邊八月上微服從德勝門出幸昌平外廷猶無知者次日大學

士梁儲蔣冕毛紀追至沙河懸留不聽將度居庸巡關御史張欽自言職掌陛下卽欲出關萬死不敢奉詔上不問亦不果行乃自昌平還幸諸御馬房尋還豹房不十日復夜出德勝門趨居庸出關遂幸宣府令太監谷大用守關無縱出者既至宣府營鎮國府第居之晏然忘歸時時夜出見高大門戶卽馳入或索其婦女於是富民厚賂彬求免久之軍士樵蘇不繼至毀民屋廬以供饗市肆蕭然白晝戶閉九月移蹕陽和自稱威武大將軍總兵官調發皆以大將軍鈞帖行之庚子獵城外大雨冰雹士卒有死者其夜星隕示異上驚怪天甫明移入大同鎮城以賞賜不足發戶部銀一百萬兩輸宣府備用壬寅諭百官朕以懷來等處切近敵境特因巡幸嚴督將領振揚威武凡官員朝見者令如常行禮章疏亦如常陳奏諜報敵五萬餘騎營玉林將入犯上令諸將分布要地旣而敵分道南下大同總兵王助等率所部禦之遇敵於緜女村督軍力戰口南遁應州而去明日復戰於五里寨又明日戰敵於澗子村上乃率彬等自陽和來援衆殊死戰敵卻諸軍令會暮卽其地爲營乘輿止焉明日敵來攻禦之助等自辰至酉戰百餘合敵乃退明日引而西上與諸將且戰且進追至平口朔州等邊上復欲進兵會大風黑霧晝晦軍亦疲困乃還遂令巡撫胡瓚以捷聞於朝是冬上駐大同左衛大學士楊廷和率諸大臣詣居庸請駕禁不得出而還閏十二月丁亥迎春於宣府備諸戲劇又飭大車令僧與娼婦數百載娼婦各執圓毬車旣馳交擊僧頭或大觸而墮上視之大笑以爲樂前後論諫者內閣事有之至引土木爲言都給事中石天柱刺血上書御史葉忠等言尤深切彬皆計概擲之上不省亦無所發其喜怒也十三年正月駕將還諭文武

羣臣各服曳撒大帽。鶯帶見各賜大紅紵絲羅紗一。其綵繡一品斗牛。二品飛魚。三品鱗。四品麒麟。五六品虎彪。翰林科道不限品級得服繡。部屬五品以下不與。諸與賜者裁製一夕皆就。明旦奉迎德勝門外。頒賜既衆。內庫告竭。迎時具綵帳數十。綵聯千數。皆金織字。序詞惟稱威武大將軍。不敢及尊號。衆官列名於下。亦不敢稱臣。又具羊酒白金綵幣。手一紅梵夾。進御爲賀儀。比夜深。上戎服乘赤馬佩劍而來。彬與邊騎簇擁。見火毬閃戈矛。煙直上。乃知駕至。羣臣皆道左叩頭。彬恬然隨上行。至德勝門。上下馬坐御輦。大學士楊廷和奉觴。梁儲注酒。蔣冕奉果。楊毛紀奉金花。稱賀。上飲畢云。朕在榆河。親斬敵首。廷和等叩首曰。皇上聖武。臣民不勝慶幸。上遂馳馬入宿豹房。時大雨雪。羣臣迎者狼狽。夜半後。僅得入城。有病殆者。尋賜文武羣臣銀牌於左順門。一品二十兩。二品三品十兩。鏤其上曰慶功。五采飾之。貫以朱組。四五品及都給事中五兩。左右給事中四兩。給事中及御史三兩。鏤曰賞功。貫以青組。又各被以花紅而退。先是羣臣具綵帳及賀儀。出銀以品級爲差。故所賜亦如之。翰林以無賀儀。獨不與。賜已。上復如宣府。彬從。二月己卯。太皇太后王氏崩。越三日。上至自宣府。發喪。彬爲營卒報怨。遣百戶朱英執人於平谷。勢張甚。御史董相杖而繫之。欲奏聞。彬遽譖於上。謂相擅辱軍職。降徐州判官。太皇太后將祔葬。上如昌平。幸黃花鎮密雲等處。時車駕所至。彬等各先掠良家女子以充幸御。至數十車。在道日有死者。左右不敢聞也。猶載以隨。且令有司餼廩之外。別具女衣首飾爲賞賚費。遠近騷動。多驚疑避匿。哭泣相聞。永平知府毛思義下令以爲大喪未舉。車駕必不遠遊。此皆奸徒矯詐。煽惑人心。百姓其各安業。敢稱駕至者。

捕治之。彬等奏其言。上怒。逮下詔獄。五月。上駐大喜峰口。獵於古北。漁於灤河。將致朵顏三衛。夷人花當把兒孫等納質宴勞。御史劉士元陳四不可。轉幸河西務。太皇太后葬期迫。遠京指揮黃勳以供應爲名。因而科擾侵盜事發。劉士元按之。勳逃至行在。因彬等譖士元。聞駕至。令民間盡嫁其女。藏匿婦人。遂命裸縛。而訊之。時野次無杖。取生柳幹杖四十。幾死。囚繫於車。馳入京。并執知縣曹俊等十餘人。下錦衣獄。皆降調。六月。庚申。梓宮發引。上戎服馳馬。當神主。祈太廟。上入廟。雷電風雨大作。燭盡滅。七月。傳旨。近年以來。敵屢犯順。兵政廢弛。特命總督軍務威武大將軍總兵官朱壽統率六軍。或攻或守。卽寫各地方制。敕與之。務期翦絕。朱壽者。上自稱也。又欲以彬爲威武副將軍。命內閣草制。楊廷和等上疏反覆言其不可。上大怒。乃自稱之。是日。二閣臣入門。門卽闔。尙書毛澄等排闥不得入。皆感憤而泣。大理少卿吳堂被酒。厲聲呵止。欲以希寵。衆怒。羣擊之。走免。雖武夫亦有不平者。門內聞喧呼聲。不知堂欲止衆也。責堂不恭。無人臣禮。調外任。卽日逐出城。衆皆快之。錄應州功。陞賞內外各臣及旗舍九千五百五十人。有差。其餘冒濫者。凡五萬六千四百餘人。七月辛丑。諭兵部。特加威武大將軍公爵祿米。丙午。上復及威武副將軍祿米。度居庸關。歷懷來保安諸城。遂駐宣府。初。彬勸上於宣府治行宮。越歲。乃就。靡費不可勝計。復輦豹房。所貯諸珍玩。及巡遊所收婦女。實其中。上甚樂焉。每稱曰。家裏。還京後。數數念之。不置。彬亦欲專寵。俾諸幸臣不得近。數導上遠出。及再度居庸。仍戒守者。毋令京朝人來往。蓋上厭大內。初以豹房爲家。至是。更以宣府爲家矣。八月。自萬全天城至大同。九月。上自稱鎮國公。并製牙牌。誥券。封朱彬爲平□伯。朱

秦爲安邊伯。世襲。上欲自耀武功。假重兩人。親定爵名。十月上渡黃河。次榆林。十一月。至綏德州。幸總兵戴欽第。納其女。十二月。自榆林。歷米脂。綏德。渡河。歷石州。文水。諸州縣。初在偏頭關。索女樂於太原。有劉良女者。晉府樂工楊騰妻也。以謳進。遂當上意。及自榆林還。至太原。復召之。載以歸。自是大見寵幸。左右或觸上怒。陰求之。輒一笑而解。彬以母呼之曰。劉娘云。十四年正月。發太原。王子還。至宣府。二月。命彬提督十二團營。壬申。自宣府還京。是日。先駐外教場。親閱所獲首。器械。申刻。乃入。文武羣臣具綵帳。銀幣。羊酒奉迎。及頌賜銀牌花紅。俱如前。上自加太師。敕諭南幸。廷臣伏闕極諫者百餘人。宣諭乃退。彬患之。激上怒。三月望日。託氣疾免朝。越四日。悉下庭臣於獄。考訊死杖者十二人。指揮張英上言。車駕出。必不利。乃肉袒赴闕。刺刀於胸。以諫。法司阿彬意。擬斬。并杖死。於是京師連日陰霾晝晦。禁中水自溢。高於橋四尺許。橋下七鐵柱。齊折如斬。南行之議始寢。頗怒不解。意勃勃未已。會宸濠反報。至議親征。下令有諫者。必處以極刑。彬兼督東廠。是時。張銳居東廠。錢甯居錦衣。彬兼兩人之任。其權愈重。勢益熾。命楊廷和居守。毛紀贊之。梁儲蔣冕扈行。八月癸未。發京師。彬提督贊畫機密軍務。仍軍門提督。官校辦事。丁亥。至涿州。時都御史王守仁平濠之奏已至。上決意南幸。太監張忠勸彬等。各以兵從。欲掩爲己功。於是留守仁疏不下。戊子。上至保定府。九月。張宴堂上。巡撫五符。巡按管糧主事。皆侍宴行酒。上問符。知善飲。與爲藏闢之戲。符偶勝。上不悅。故投闢於地。令符拾之。罰飲數瓢。符頽然。上復大笑。戊戌。上至臨清。山東鎮巡官皆迎。越三日。傳令進宴。宴具草略。上視之。笑曰。慢我何甚。竟不怒。及宴。都御史王珣獻觴。步緩。上目



之彬等。忱珣謂上意不測。明日復宴。漕都御史龔宏趨進。自言姓名。蓋恐上誤以爲珣也。彬從旁厲聲叱之。冀并罪兩人。上不爲動。上之南征。劉娘娘疾未卽從。與約。召以玉簪爲信。過蘆溝橋。因馳馬失之。大索數日。不可得。及至臨清。遣人召劉。劉以非信辭不至。癸丑。上獨乘舸晨夜疾歸。至張家灣。與劉氏俱載而南。其發臨清時。內外從官無知者。旣而始有數人追及之。道遇湖廣參議材文。續入其舟。奪一妾而去。十一月辛丑。龍舟自徐州順流而下。至清江浦。所至捕得魚鳥。分賜左右。受一櫛一毛者。各獻金帛爲謝。至是。漁於浦者累日。南京及河南山東淮揚等處文武官。皆以迎送。彙集戎裝。徒行道路間。無復貴賤。彬不時傳旨號召。有所徵索。拷縛縣長吏。不異奴隸。通判胡琮懼而自縊。南京守備成國公朱輔。見彬卽長跪。總兵鎮遠侯顧仕隆。稍不爲屈。彬怒。數窘之。彬又遣官校四出。至民家。矯旨索鷹犬珍寶古器。民惴惴不敢詰。或稍拂之。輒捽以去。近淮四五百里間。無得免者。甲寅。至淮安。屏侍衛。徒步入城。幸總兵顧仕隆第。至寶應。漁於汜光湖。十二月。至揚州。先太監吳經至揚。選民居壯麗者。改提督府。將駐蹕焉。經矯旨。刷處女寡婦。民間洶洶。有女者。一夕皆適人。乘夜靜爭門逃。不可禁。知府蔣瑤詣經懇免。經大怒曰。汝小官敢爾。汝頭顱欲欲邪。瑤不爲動。徐曰。小官苟逆上意。自分必死。但百姓者。朝廷之百姓。倘激生他變。恐將來責有所歸。經愈怒。揮使去。經密覘寡婦及娼家。夜半。忽遣數人叩城門。呼駕至。令通衢燃炬。光照如白日。經逼入其家。捽諸婦出。有匿者。破垣毀屋。必得乃已。無一脫者。哭聲震遠近。尋以諸婦分住尼寺。有二人。憤悲不食死。瑤爲具棺殮之。自是諸婦家皆厚以金贖。方得歸。貧者悉收入總督府。壬戌。上以數騎獵於

城西遂幸上方寺。自是數出獵。以劉娘諫而止。辛未。漁於儀真之新闢。因視大江。命彬攝祭。明日。幸民黃昌本家。閱太監張雄及守備馬昊所選妓。以其半送舟中。丙戌。至南京。十五年正月丁丑。迎春。南京備諸戲劇。如官府復欲就南京郊祀。梁儲疏止之。彬率邊卒數萬。恃恩跋扈。無人臣禮。公卿而下。側足事之。魏公徐鵬舉宅不啓中門。不坐中堂。因高皇帝數臨幸。避之一日。招彬宴。遵故事。大怒。告以故。嘿然而止。時喬宇爲參贊尙書。守正侃侃。府尹胡宗道樸慎。數被辱。如傳吏憂懼。臥病。五月。竟卒。府丞寇天敘代署。與宇並督而長。挺身協力。每事裁抑。且募健兒置左右。彬每矯旨有所索。必請而覆。其計稍沮。素輕南人。弱可欺。戲命從者手搏。不勝。驚懾。人皆倚以爲重。一日。彬遣使索諸城門鑰。城中大駭。督府使問宇。宇曰。守備者所以謹非常。城門鑰有祖宗法制。孰敢索。亦孰敢與。雖天子詔奈何。督府以宇言拒。乃止。六月。幸牛首山。宿焉。諸軍夜驚。左右皆不知上所在。大擾。久之乃定。傳者或謂江彬將爲逆。俄噤而止。理或然也。時有物狀如豬首。墮於上前。其色綠。又拘留婦人之所。滿壁皆有若人頭。懸掛於上者。而濠繫舟中。泊江干。日夕傳微。上頗疑之。閏八月八日。詣孝陵辭。癸巳。受江西俘。丁酉。自南京旋蹕。九月戊辰。至清江浦。上不豫。進及臨清。太醫吳傑自京召至。上視之而責曰。何不蚤看我。傑奏萬福無恙。諸內侍密問狀。曰。病亟矣。幸可及。還內耳。彬來問。故寬之。曰。何害。行卽愈矣。十月庚戌。至通州。兵部尙書王瓊入見。彬尙欲導上幸宣府。恐一至京。有郊祀廷試事淹留。又恐廷臣習前事力爭。乃說上。召皇親勳戚內閣府部科道官俱至通州議宸濠獄。彬上言。奉鎮國公朱壽指示方略。將濠逆黨申宗遠等十五人并家屬擒獲。乞明正其罪。

批答褒賜。敕歲加祿百石。磨一子錦衣衛正千戶。戶部媚之。援慶雲侯例。先給千石。彬在上前。談笑任情。至是。指斥朱壽名。若敵己云。上之北還也。每令濠舟近御舟。銜尾而行。意甚防之。既用彬言。謂左右曰。吾必決此獄。乃入楊廷和等。已至通州。請如先年處置高煦。贖例。祭告天地宗廟。仍救天下諸王議罪。然後明正其法。乃爲合體。上使人諭意再三。竟莫能奪。己丑。賜宸濠死。焚其屍。然上體已憊。諸內侍更疊。德輿還京。彬計不得行。甲午。上至正陽門城外。文武百官迎於橋南。是日。大耀軍容。彬等皆戎衣侍上。俘諸逆者及家屬數千人。陳輦道東西。陸完錢甯等亦皆裸體反接。以白幟標姓名於首。死者懸於竿。亦標白幟。凡數里不絕。上戎服乘馬立門下。閱視良久。乃入。諸俘者自東安門踰大內而出。彌望皆白幟者。訝其非佳兆。丁酉。南郊初獻。上拜。嘔血於地。不能終禮。扶歸齋宮。踰宿。駕入。遂病不起。三月八日。庚申。改團營。西官廳爲威武團練營。以西官廳監督太監張忠。安邊伯朱泰。平□伯朱彬。都督朱洪。朱暉。朱周。朱琮。俱提督團營教場。與威武團練營操練人馬。令別開團營教場。十四日。丙寅。上崩於豹房。大學士楊廷和等舉哀畢。卽定策往奉迎。傳遺旨。令太監張永。武定侯郭勛。安邊伯許泰。尙書王憲。選各營馬步官軍防守皇城四門。京城九門。及草橋蘆溝橋等處。九門防守之命及下。許泰意若不怡。邀兵部尙書王憲至東閣。欲有所言。問則徒倚不對。而私相降語。廷和曰。危疑之際。所仗在提兵。諸公報國。正在今日。欲言則直言。何令我輩揣摩耶。憲曰。許總兵與江平敵同事。西官廳今用許防守。而遣平□。以此未安。蓋爲彬地。且以脇也。曰。團營根本。故留平□。主調發。秦不應。以舌澤吻。作怒色。且微語曰。這箇賊。問誰是賊。秦曰。李琮。又

曰秦家止有三百人防護。蓋又以琮脇也。廷和曰：今日忠臣義士無不奮力，琮欲何爲？自取滅族禍。秦曰：琮兇狠，平□腹心也。秦亦憂之，曰：有諸公在，琮不足憂，亦何能爲也？若必欲與平□同事，可一言決之。秦意不明，與江彬異同，欲持兩端，以窺趨避耳。頃之提督張洪至，言彬可防，曰：君疑江反耶？江征流賊，回豹房過隊，先帝親閱，見其驍勇，因留置左右，旣而獲從巡狩，一時內外文武皆有之，不獨江也。江何罪欲反？近年反者，內真鑄宸濠，外劉七藍五鄆老人，俱隨起隨滅。江親臣，家屬在人掌握，不比數賊耳。從兵雖多，皆朝廷爪牙，先帝遺愛在人，餘威可畏，假欲萌非望，卽顧盼間盡粉矣。誰肯同之？自取滅亡哉？若江能與諸君協力共濟嗣君，至日閉門辭爵，不失富貴，何必自疑？人亦政不須疑之耳。諸公本兵安所出策？我書生握數寸管，其何能爲？洪唯唯而退。洪蓋爲彬遊說探意者，對語明快。彬聞之，稍安。是夕京城市間人馬介然有聲，人心皇皇，以爲彬且反矣。又聞彬在家不成服齋宿，廷和聞笑曰：豎子何能爲？以一刺投彬曰：謝江公大事多賴鎮定，彬喜以爲揚公不我虞也。乃成服齋宿。十七日臨朝罷，密語同寅，皆曰：連日介介於懷者，正以此耳。曰：彬手握重兵，發之須得機會。是日坤甯宮安獸吻，彬入與工書李鐸吉服行禮，廷和等赴文華殿右坊寫上銘旌，大闈俱在。廷和屏左右，謂魏霽曰：大功已定，大患未除，未爲全美。魏問其故，以魏與江連姻，不可徑言。先慰之曰：古人大義滅親，周公誅管蔡，王導滅王敦，至今流芳青史，公雖與江爲親，乃勉奉大行命，非本意也。今外議紛紛，若不早請太后擒之，恐彼不自安，將貽嗣君憂，未免爲大功之累也。張銳疾言言彬有何罪。廷和曰：如擅入邊軍，禁內擅立威武團練宮，擅改團營爲西官廳，擅立鎮

國府所犯不一。真死有餘數。魏曰實然。銳猶極力爲辯。曰不須回護。我輩言出禍隨。已委致身家。公雖無子孫。獨不念祖宗墳墓與兄弟耶。嗣君途中萬一聞變而驚。張公請任其責。辭色俱厲。陳嚴贊之曰。且收住。俟嗣君處分。廷和曰。亦擬旨監候耳。異日事在我等。自當斟酌從寬。卽擬旨奏太后。出閣中候命。久之未下。廷和曰。權璫對我輩言。尙百計攔截。在宮闈豈肯贊成乎。若不捷。禍必先我等數家。我輩豈可離此地。誠死此亦得死所。衆曰。天祚我明。必無此事。頃有報宣候右順門者。久之。陳嚴來曰。江彬已擒矣。幾逸出。初。彬行禮畢。張永知其謀。留彬鑕於宮外飲。蓋欲以計擒之也。未發。張銳潛使人報之。遂奔西安門。以西官廳文書爲辭。中道折向北安門。當關者曰。有旨留提督。彬叱曰。皇帝何在。旨安從得。手批門者。守門人羣擁之。追者至。就縛。拔其鬚幾盡。頃之神周李琮亦自其家縛至。罵彬曰。汝蚤聽我言。豈至於此。彬曰。悔不自斷。其子杰。鰲。皆錦衣指揮。并其母亦然。收捕者云。彬已分布腹心於東西北三門。衷甲裹糧。立馬以伺動息矣。彬之未擒也。或有請於廷和者。曰。一力士之力。曰。安有許大力士。時久旱。遂雨。城中喧聲雷動。周琮亦以邊將得幸。俱賜國姓。至都督與彬聲勢相倚。隨駕所至。彬索賂累數千萬。周琮亦十之二三。時各鎮奏報。有爲彬壅滯二三歲不得達者。彬既執。一時赴鴻臚寺投進者。凡九十九封。赴通政司者七封。藏於彬家及鎮國府者三十封。千戶常洪以彬僞旨。採方物於湖廣。其中多奇怪難致者。巡撫官折價以進。爲銀萬五千有奇。北至張家灣。洪聞彬敗。潛遁去。又曹成王宣者。稱彬旗校。至杭州。設香案於鎮守府。召致仕尙書洪鍾至。謂之曰。有密旨。令汝傾資產謝恩。因羈之別所。趣其家營辦。然實無所奉旨也。

又王銳者亦稱錦衣千戶。至杭以收誌書爲名。索賂數千。至是亦潛遜。所司以聞。太后命法司緝捕洪等。世宗立。六月戊子。磔彬於市。子及神周皆斬。頌其圖於天下。

史官曰。書云三風十愆。有一者。家喪國亡。若武宗者。可謂兼之矣。江彬無它材能。特以便給取容悅。弄天子如傀儡。提之東則東。提之西則西。盜竊威福。惟賄是圖。毒流縱淫。騷半天下。及其握重兵。稱大帥。未嘗有所樹立。不知武宗何以信任不疑若此。非廷和識力屏斷。定難俄傾。京師百萬流血。尙可言哉。







明書卷一百五十五

列傳十五

倭幸傳二

錢甯傳

錢甯不知所出。幼鬻於太監錢能家爲奴。能嘗鎮雲南。私通安南。爲巡撫王恕所發。後召歸。復守備南京。能死。甯冒其姓。正德初。逆瑾用事。甯結納之。因得見上。瓊狡善伺察。迎合。又善射。拓左右弓。大被寵幸。賜國姓。爲錦衣正千戶。累陞左都督。掌錦衣衛事。典詔獄。權日益重。引樂工。戚賢及番僧等。相比爲姦。又請於禁內建豹房新寺。誘上。改遊爲娛樂。雜陳伎術。以固寵。甯朝夕侍上。醉常枕之而臥。百官候朝。每至。晡莫得上起居。惟探伺甯。甯來。則知駕將出矣。都察院經歷錢岌拜甯爲父。任以腹心。令潛察中外官有非議己者。輒計去之。諸司事必與甯關白。諸大臣造詣。惟恐後。小絕其意。輒遭中害。或事危急。往往叩甯。卽得解。內官武將欲轉爲鎮守總兵官。率持重資投其門。貨賄無算。大學士楊一清先爲吏尙書考察。甯有所請。不遂。嗾其黨肆劾。遣人鬻鈔於浙。鈔敵價重。皆抑配於民。布政方良。永疏其狀。請詰責令罷。若懷詐遂非。宜明正典刑。甯見大怒。欲中以危法。或說之曰。彼豈畏罪。害之適成其名。乃止。密召所遣人還。良永

以母老身病。乞致仕。不允。下巡按查勘。乃得請。初。良永之上疏也。常以書抵當路。爲甯所覺。其人大懼。請謝罪。爲十二拜禮。乃已。一時相埒者。東廠太監張銳。中外稱曰。廠衛衛校。諍爭三法。司道三司。務林華出。不避。因杖之。校語不遜。評事沈光大復杖而囚之。甯遂奏校乃執。駕人役二官。擅辱違例。執光大華下錦衣拷訊。黜光大爲民。華降級調外。廠衛聲勢赫奕。校卒每至各部白事。呼卿佐爲老尊長。卿佐亦降顏禮遇之。體貌陵彝。公事掣肘。論者每太息焉。甯富貴已極。於石經山造寺。窮極壯麗。邀上幸之。數日乃還。宸濠久蓄異志。甯得濠重賄。因與圖復護衛屯田。且令數進金玉玩好。每進必賄甯以達。甯又日伺朝廷動靜。泄之於濠。謀令世子赴闕爲立儲地。甯爲畫計。先以玉帶綵幣附典寶萬銳馳歸。詐稱上賜。以眩衆聽。江西副使胡世甯。典寶閻順。發其事。甯又爲之隱蔽。文致世甯及順罪。戍邊。時江彬得進。擅寵用事。甯思間之一日搏虎。召甯使前。縮不敢往。上笑曰。誰謂汝勇者。彬見。亟趨進。上爲虎所迫。幾傷。彬力撲之。乃解。上喜。猶戲曰。吾自足辦。安用汝。甯信爲然。潛伺彬短。言於上。不應。而心訝。且厭之。彬亦知甯必不相容。乃探微旨。調邊兵與京營兵互出入操練。又言宜府近敵。兵精。應合大同兵勦敵。可立大功。壯威武。如前朝喜峰口故事。且山川壯麗。民居豐密。多美婦人。可取。何如居大內。邑邑爲廷臣所制。日聒耳不得自由。空享華屋細廬。失馳逐瞬息千里之樂耶。上大以爲然。彬私計謂甯掌衛事。居中刺姦。勢不及從。上一出國門。獨侍側。惟所欲爲。盤桓不歸。可居外制中。蓋反其術用之。上亦適投所欲。自居庸至宣大。以及陝西。幾忘歸。甯已失所。馮依。竟不悟。既度上必不宜子。密主宸濠。一日事成。已與王瓊爲功首。彬在掌握中。不足

憚瓊故有威名可仗。甯又遣妖人交關其間。謂帝星已明。王有異相。府中有異兆。事在必成。成則封公。如魏國故事。瓊比李韓公其實先許。李士實劉養正以此嘆之。令爲死間也。彬亦頗聞之。見上。未敢直言。惟言北巡勤武。則凡百姦宄盜賊。自當消鑠。且寬甯目前之疑。甯亦喜。自得自擅。省常待之勞。安享富貴之樂。恣睢暴戾。益無所忌。故御史李鳳鳴者。爲劉瑾所喜。與甯杲同捕賊。酷暴爲衆切齒。瑾誅得罪。削仕籍。家居無賴益甚。出入諸貴幸門下。倚馮聲勢。甯通其愛妾。故庇之。嘗與從弟鳳翔有怨。嗾緝事者發其陰事。收詣刑部。當死。刑部疑有冤。併捕鳳鳴鞫之。鳳鳴使其妾懷狀赴闕。因自經死。門者以狀聞。乃仍坐鳳翔死。而釋鳳鳴。御史張仕隆許寬以失入譴調。周鷄潘傲亦爲所搆。鷄陰賂甯。得復職。傲逮問。尋免。刑部獄卒例有供食錢。復移爲公費。而以囚糧之贏者給之。積弊已久。會錦衣千戶王注與甯結好。挾甯勢。縱恣有善歌。出入注家。善者之兄與人鬪。不勝。注爲執鬪者。撈掠死之。其家訟於刑部。攝注就理。甯庇之。不發。尙書張子麟郎中林文纘知其故。置不問。而員外郎劉秉鑑攝注急。又不發。秉鑑卽據衆證成獄。甯聞怒曰。我親戚人誰不知。乃待我言。陰諷東廠發盜用囚糧事。主事鄭懋德等收繫獄。且言諸堂官皆利其贏。請窮治。於是三法司皆恐。詣甯謝過。甯佯不知。皆以乘監觸禍。尤之。甯必欲改獄。乃覆看。指爲病死。注得釋。而死者之家以誣反坐。注始出。造法司與揖拜。若賓客禮。甯意釋。乃寢囚糧事不治。懋德等降調。畿內盜賊縱橫。參將宋賀桂勇賈鑑等獲劇賊申窰頭趙祥何通及其黨九十餘人於近郊。賜救獎。勳提督太監張忠都督許泰而下。太加賞蔭。旣而窰頭等六人越獄。走匿故賊郝聚家。兵部募擒賊者賞。

百金。陞二級。匿者同罪。聚乃首於官。擒祥等四人。密頭及通皆格鬪死。又以所捕他盜。皆指爲密頭黨。甯奏聞行在。兵部以爲甯功。亦賜敕獎勵。增俸加廕。初。賊之逸。上在宣府。聞之。謂甯居守。顧有此變。頗不悅。江彬因譖之。甯寵由是漸衰。而濠反謀已露。朝議遣官宣諭。甯從中勸沮。不可得。與戚賢密報濠。且謂議者欲離間宗室。將坐以罪。不知上已先疑甯黨。附蹤跡益顯。適值天亡之期矣。濠既反。收戚賢杖議。謫戍甯。恐連及。遣人殺於塗。盡并其家。猶務爲掩飾。祈免罪。上親征。勒兵。諸內侍及江彬以下。皆從。初不及甯。留之居守。甯恐離上左右。爲人所發。乃私求扈從。及駕發出正陽門。始令甯俱南。江彬計已得行。至臨清。用間止甯董皇店役。遂白其通濠狀。上大怒。曰。我固疑之。黠奴乃敢爾。時將渡淮。遂令卽臨清拘繫之。又遣人至京。錄妻子家屬。并收其黨。太監劉璟都指揮廖鵬齊佐王準都督同知王瓚於錦衣獄。璟初鎮浙江。貪利亡厭。賂改兩廣總鎮。及還。又賂甯。得再鎮河南。過江西時。受濠饋。遂與通。鵬福建人。投附太監廖堂。冒姓稱爲弟。與子鏗銳等皆冒功。得陞官。錦衣堂鎮河南時。鵬隨往。百計賂削公私一空。及廖鑾鎮陝西。復令鏗隨。賂削亦如之。河陝之人。怨之入骨。鵬姦瑣詭猾。貌寢如鬼。諂事甯。無所不至。後掌南鎮撫事。各僭無度。公卿士夫多與往還。及宴會其家。靡然不以爲非。璫亦累冒功。起白身。至都督。依憑權倖。出入公卿家。有所求請。無不立應。拂其意。用計傾之。爲甯通賄。自入者亦數萬計。與鵬皆與濠通。佐準皆甯壻。驟貴者。明年駕還。械甯以從。與諸從逆者俱俘以入。藉其家。玉帶至二千五百束。金十餘萬兩。銀三千箱。胡椒千石。他珍玩財貨。不可勝計。會上崩。世宗卽位。命磔於市。仍揭其罪狀。并繪圖榜示天下。甯子永

安甫八歲已爲右都督。養子錢傑等十一人。姦惡相濟。俱官錦衣。併斬。王準已先死。鵬瓚佐鎰。以交結朋黨紊亂朝政。論斬。妻子沒爲奴。瓚僅革職。旣而鵬等屢奏辯。延久未決。鵬鎰死獄中。

史官曰。錢甯奮狙儉之習。當昏靡之主。駕其譎智。益以姦謀。遂使鴟張於法紀之場。競爭於肘腋之地。命儻嚙侶。潛通逆藩。而陰發於江彬。至身死禍及而不覺。可謂惡人磨惡矣。劉瓚廖鵬等。佐益兇逆。橫肆貪殘。招權市欺。誅戮隨至。實其自取。亦又何尤。夫太陽麗空。則羣陰消伏。昏靈晝晦。則狐皆爲祥。君子未嘗不致憾於武宗之爲君也。悲夫。

張孚敬桂萼席書方獻夫霍縉黃綰熊浹黃宗明傳

張孚敬初名璉。字乘用。永嘉人。父昇。凡三娶而生孚敬。孚敬生負異質。動止不凡。及長。貌秀偉。美鬚髯。有大入度。踰冠。舉鄉試。明年不第。孚敬產不能中人。而恢廓從性。動止若大豪。築羅山書院於姚溪。聚徒。其中與講治經術。傍析時務。孚敬精於五禮。旣七試春官。而七不利。將爲吏部選人。御史蕭鳴鳳善日者言。得孚敬干支而異之。曰。毋爲選人也。屈指曰。從此而三載。當成進士。成進士。卽與人主若一身。傾動海內。於世無比。孚敬乃強歸。及其成進士。則年已四十七矣。世宗自興邸來卽帝位。議追尊其父興獻王。與母蔣妃。時少師楊廷和居首。揆要禮臣議。以上入繼武宗。武宗於上。兄也。不當後。卽後孝宗。而稱皇考。孝宗之后。皇太后。張曰聖母。武宗曰皇兄。而稱興獻王曰皇叔父。興獻王王妃蔣曰皇叔母。興國王妃而封益王之次子崇仁王爲興王。以承獻王祀。頗引漢唐事爲據。上意不懌。孚敬乃奮上疏言。上旣以興世



子入繼武宗皇帝統。非繼孝宗嗣也。今以後武宗則弟。以後孝宗則自有子。奈何舍獻王弗考而考孝宗。使獻王有子而無子。上有父而無父哉。上心是之而不能決。姑報聞。於是連駁禮官疏。乃合議。議尊孝宗曰皇考。興王曰本生父。獻皇帝時孚敬已去。爲南京刑部主事。復上疏爭之。曰。是二本也。孝宗法得稱皇伯考。不得稱考。獻帝得稱考。不得稱本生。因上所草大禮或問。自孚敬之疏上。舉朝擲揄之。毋有與過往者。而上則益心動。士大夫如南京兵部侍郎席書。吏部員外郎方獻夫。兵部主事霍韜。給事中熊浹。都督府經歷黃綰。輩亦稍稍爲議。及疏如孚敬指矣。久之。尙未決。桂萼時方自邑令轉刑部主事。復具疏力伸其說。因悉錄孚敬前後疏上之。朝具奏而夕報可。且召孚敬。萼二臣入廷辯。道拜翰林院學士。時部院大臣給事御史俱言其不可用。不聽。翰林自學士以下。羞與孚敬等爲僚。俱乞骸。亦不聽。孚敬萼復上書論尊皇考聖母諸禮。悉從之。明年進廟街議。俱擢詹事府詹事兼學士。桂萼前孚敬登第者十年。三調邑令。好剛使氣。與上官忤。被笞。汙白簡者再三。而得解。萼素非與孚敬善。旣言禮合同貴幸。乃相暱。屢上疏攻首輔費宏。而推楊一清。一清亦虛懷待之。明年孚敬乞歸省墓。且陛辭矣。上忽使中使止之。遷兵部右侍郎。轉左侍郎。時費宏欲有所屬於尙書李鉞。鉞弗能應。而病甚。乞歸。孚敬卽上疏言宏劫制鉞。不得行志。邑邑且死。而萼所以醜詆宏。尤不可聞。宏旣去。萼遷爲禮部右侍郎。尋與孚敬俱兼學士。禮兵二部侍郎。之得兼學士。自孚敬萼始也。獻王旣已稱皇帝。復稱皇考。而諛者遂欲宗之。列祀太廟。孚敬萼與禮部尙書席書力爭之而止。時故有妖人李福達者。正德間亡命遊江南。而武定侯郭勛所善客曰張寅。自云家

山西善丹竈之術。且能使鬼。與其子皆以輸粟得指揮使。及省曹掾。還山西。而遇其鄉人。群良曰。此故李福達也。首之御史馬錄所獄具。而侯助爲之居間。錄併劾助。助奏辯。上疑之。下法司重讞。如錄擬。上益疑其與錄比。而傾侯助。屬孚敬署都察院。時桂萼已爲吏部左侍郎。俾署刑部。而少詹事方獻夫署大理寺。悉逮法司。尙書顏頤壽左都御史聶賢大理寺卿湯沐等廷鞫之。盡反其獄。坐錄等皆永戍。頤壽等皆罷職有差。而張寅之爲福達與否。意莫能明也。皆召對內殿。賜璽書獎諭。予二品服金花帶。而以獄事出孚敬手。益愛重之。且念御史縱。非孚敬莫能制。旬日間。進孚敬爲禮部尙書文淵閣大學士。俾仍掌都察院。而萼爲禮部尙書。獻夫亦代萼爲吏部左侍郎。尋賜孚敬萼銀記各二。孚敬曰。忠良貞一。曰。繩愆糾繆。萼曰。忠誠靜慎。曰。繩愆糾違。孚敬念以書生片言當主意。非久取相位。思有所稱塞。大要以破人臣之弘交。而離其黨。一意奉公守法。不復郵譏怨。其駁御史一以威。時時有所糾按。然事頗毛鷲。而性稍廉介。萼外示緩而中實險急。嘗以考察。請令給事御史相論。紕上從之。以是益失中外心。時首輔一清議散館。欲留陸燾等數人爲翰林。而上難之。孚敬密疏言。此曹子皆費宏所植私士。而一清成之。勿留便。上於是出燾爲給事中。三四人得御史。餘皆用故資。選補皆恨孚敬切骨矣。明年。孚敬與萼加太子太保。孚敬獨辭。以上未有太子。官不當虛設。遂改爲少保。上享太廟。回孚敬候道左。上奇其貌。而目屬之。賦詩以賜。曰。子喜荷天春。實賢作邦。珍賜玉帶蟒衣。上旣以追崇獻皇帝。后得愉志。欲錄以成書。而孚敬爲總裁。萼等副焉。旣成。進之名曰明倫大典。孚敬進少傅。加太子太傅。吏部尙書謹身殿大學士。萼已爲吏部尙書。加少保。

太子太傅方獻夫亦加太子太保。霍縉進禮部尚書，獨固辭不就。而熊浹、黃綰以下，皆驩貴矣。孚敬乃下詔罪狀抗議者，楊廷和諸大臣皆削奪官職，有差。桂萼之爲吏部，尤私其所厚善，而修暉、臧，其故咎萼者。都御史則逐之，知府則擊而戍，獨以名薦魏校爲國子祭酒，屬使代疏草。其條對及經學時政，往往精深，常上意。孚敬問者，覺不知，而意恨之。而校與新建伯王守仁爭名不相下，萼爲之搆，守仁奪世封，而校入侍經筵，忤旨，改補太常。萼不能救，當孚敬之入內閣，上愈傾向之。所密問還往，月以十數，問稱字及號而不名。楊一清雖居首揆，以老成爲上所禮重，然信之則不能如孚敬深，而桂萼自吏部入居孚敬下，孚敬氣益發舒，下視六卿，莫敢與抗。乃至輕一清，亦不復修後進禮。萼有所逮白，往往爲孚敬所抑，屈孚敬亦以氣凌之，用是俱憾孚敬。而一清亦自與萼隙，三人鼎而相詆謀。上聞，亦厭之，而孚敬又復上疏，謂三楊以後，姦人鄙夫，占據內閣，貪污無恥，習以爲常。復以閒廢有年，陰求起用，去而復來，略不懲悔。前軌來而復去，尤且陰爲後圖。其人日輕，其勢日重，且不知何緣，止推首者一人，餘皆唯唯。小有異同，旋加擠斥。乞聖明嚴諭，毋得懷姦設險，詭隨便己意。蓋指一清也。於是一清奏辯，爲孚敬惡，最能遷之攻之。欲臣擬重處，而臣不敢聽。以是恨，且傍及孚敬他語，乞骸骨。上兩爲溫旨以解之，而於一清尤厚。前是陸粲爲給事中，有所建白，一清輒擊節稱歎，謂而家敬與不過。粲內感一清國士知，而禮部侍郎徐縉次當柄用，素事一清，而爲粲座主。時時以上意語粲，謂且厭張桂，有武定侯郭助帥營務，時大闞張永久廢。一清以其知兵，要孚敬共薦之，與侯助同爲帥。遂訐發助貪汙跡，俄而永暴卒。中外頗疑中助毒言，路遂擊助。助

故以大獄事獨感孚敬而嚴事之於萼不爾。萼亦數密攻勛。且謂孚敬實庇之。至是上下給事御史擊勛。章於一清。言孚敬私助。必曲救勿聽也。一清泄之。縉縉以語榮。而是時桂萼尤爲公論所不齒。會給事孫應奎疏論一清雖練事而尙通多私。故舊此可與諮謀。難獨任也。孚敬雖博學而性偏。傷於自恃。猶飭厲功名。常抑其過而任之。桂萼則鷲鳩之資。桀驁之性。作威福。援黨與。政以賄成。事多沮撓。使天下之人敢怒而不敢言。不可留也。上頗是之。於是一清辭疏上。優詔勉慰而至。孚敬萼疏各有策勵語。一清乃復上章辭。謂今之持論者多尙紛更。臣獨勸以安靜。多尙刻削。臣獨矯以寬平。欲變法。臣謂只宜守法。欲生事。臣謂不如省事。用人則謂才難當惜。斷獄則謂罪疑惟輕。以故齟齬參差。顯賜骸骨。避賢者路。蓋指孚敬萼。冀以動搖也。而給事中榮果有疏論孚敬罔上行私。專權納賄。擅用威福。廣報恩讐。因指摘其罪狀。而謂孚敬雖狼戾自執。拘多私。其術猶疏。爲害猶淺。桂萼外若寬迂。中實深刻。忮忍之毒發於心。如蝮蛇猛獸。犯者必死。上乃責孚敬萼負君忘義。令孚敬以原職回家。削悔責後用。萼革保傅大學士銜。以尙書致仕。仍許孚敬馳驛。而罪陸燾以不蚤聞奏。逮下詔獄。杖謫荒裔。居二日而榜示朝堂。明孚敬萼功罪。且戒中外毋得更加齟齬。孚敬既陞辭。而上密諭一清。謂孚敬可還之。閣否。一清言。上欲還孚敬。固當等渙汗大號。甫揚庭而遽改之。非所以取信天下。少遲孚敬至家而後召可也。上乃止。於是詹事霍縉上疏力攻一清。謂其納賄壞綱。專權誤主大罪。因自劾乞歸。上溫旨諭留縉。一清上疏辯。上亦溫旨諭留之。而已移矣。孚敬行至天津。而上使人以璽書召還。復職。上疏辭。優詔不許。一清亦三乞休。亦不許。霍縉以省母

給假。因復爲桂萼辯冤而攻一清。時一清之所薦者閣張永。既用以黃金器酬一清。永死且葬。其家復以黃金器乞一清爲志銘。至是事亦發。上乃報輶。謂一清居內閣輔臣首。乃大肆納賄。不畏人言。非大臣體念。係善舊。法司會奏處置。既法司議上。乃令一清自陳。而孚敬三上密疏。引一清贊禮功。乞賜寬假。上允之。許致仕。陛辭。令馳驛。予金帛從優。一清歸。復有旨追所受張永金。而悉奪其官爵。一清大恨曰。老矣。乃爲儒子所賣。豈非天乎。邑邑疽發背卒。又四年。復其官。又十二年。贈太保。謚文襄。桂萼亦以是月復故官。致仕。亡何。召還職。然氣黯然。竟其身不復振。復請告歸。病羸卒。而孚敬益獨見任矣。乃上疏請求節行道。義足以服人者。寘之首。而臣居其下。上嘉其退讓。下其章於所司。時國家優外戚。至有一門三侯伯者。有一公一侯者。皆得世封。爵日以繁。祿費日以冗。而功臣爲之解體。安昌伯故外戚也。而家請封。孚敬謀之。方獻夫。俾引唐宋故事。如長孫無忌。郭子儀。曹彬。皆以大勳挾椒房。然封爵不及世。而安昌伯等。乃世乎。孚敬白之。上悉議從革。其見封者。僅終身。人以爲快。上嘗諭孚敬。留都天下首地。而事皆中貴人專之。何謬也。擇一宗室近而賢者。守之。留守便。孚敬言。高帝以親王領宗正。不久而罷之。宗室不預機政者久矣。臣不敢奉詔。然自是能得上意。數數言中官之使外者多貪橫。爲國蠹賊。上具悉其狀。悉裁革。鎮守監槍。市舶之數。後先殆盡。孚敬所疏。審幾微。專委任。借人才。求民隱。諸事。上悉嘉納。是時。上日事經筵。講求聖學。作敬一箴。及宋儒五箴注。皆發之。孚敬。天下欣然望太平。而孚敬又自議禮起。上以明聖。述作爲任事。取孚敬裁決。大者若分祭天地南北郊。又別爲朝日夕月壇於東南郭。費大司農金錢以鉅萬計。細至武

弁燕居冠服之制。毋不有所更定。獨於文廟易孔子像。去王號。識者猶以爲宜。而至減樂舞。裁蓬豆。表天下惟人主尊。上意乃悅。而儒者不謂然。孚敬行之不顧也。又請倣古立九嬪。以廣儲嗣。孚敬始名璉。至是以與上諱嫌。請改至再。上爲易名孚敬。字懋恭。手書賜之。西第成。以獻皇帝遺墨扁其堂。而侑以白金十錠。綵幣肥羜。上以故所讀書姚溪書院。敕特命有司新而廣之。賜名曰貞義。其堂曰抱忠。孚敬於居第。復爲崇閣。以奉誥敕御札名之曰寶綸。居第延袤可二里。其土木工石一賁之官。凡孚敬所議。上無不合。而獨議郊祀配天禮稍抵牾。初。上不欲太祖太宗並配。而定以冬至圓邱。用太祖配。孚敬等議。謂太宗功德並太祖。不欲離而去之。禮則圓邱重。太祀輕。序則大祀先而圓邱後。竊以爲不可。凡三四往復。甚苦。而孚敬卒不可。乃下禮部徑行之。於是太宗始不得從配天矣。建南郊。孚敬以閣臣知建造。非故事也。而是時吏科都給事中夏言重言。故以議皇后親蠶禮得幸。上賜四品俸。言事見聽。乃論劾吏部尙書方獻夫。進用私暱。而其大者如浙江參政黃卿。以孚敬之不悅而調卿以平。以孚敬之悅而補彭澤。姦回無故而改右諭德。又無故而超太常卿。因勦孚敬。喜怒任己。好惡拂人。上雖留孚敬及獻夫。而爲停卿以平。它補。敬乃上書力辯言之。挾私上溫旨褒諭而已。獻夫亦力辯之。且辭。上亦不允。乃復諭獻夫。令卿以平調補。如前。薄責言以解。夏言之議親蠶禮。實自孚敬。以是孚敬在彭澤。皆恨言。莫能問也。而上尙猶優禮孚敬。嘗召與禮卿李時對西苑。故仁壽宮。議皇后蠶地。賜名醞珍饌。出所草賦示之。俾和以進。次日復諭孚敬。謂君臣之際。在朝當慎。他則猶家人禮。然且漢文召見賈生。語久前席。至今稱美。朕冲昧。世事未經。卿之



於朕無異。周公愛成王，首以孝訓，他特餘事耳。卿夙夜在公，敬君盡禮，昨退遲太過，恐非輔臣所宜。夫輔臣與他諸臣不同，故曰導之教訓，傳以德義，保其身體，此則不可以。在朝之制，相與明矣。今後卿有奏，無拘時而來，面相與計處，侯性志有定，方可廣接他人，酌別賢否。朕又欲與今春時奉兩宮豫遊，後與卿輩一游，以仰遵我聖祖不訓。孚敬復請慎選歲薦諸生，與進士舉子三途並用，一切考覈課成，皆爲嚴切，亡所寬假。而監生詹榮有所恨於徐縉，時縉已爲吏部侍郎，榮乃摺摭縉它事奏之。下都察院，當坐榮誣。孚敬忽上言，縉夜使人以黃白金，賂請解刺入而捕之，則已逃矣。上怒爲罷縉，而特仲榮。孚敬之妻死，以繼娶告。上賜白金二鎰，大紅蟒幣四襲，羊八角，酒四十瓶，手敕以資吉禮。久之，行人司正濮侃言：上春秋鼎盛，未有皇子，宜擇宗藩之親賢者一人，留之京邸，以俟皇子生而後就國。上怒甚，命法司會文武大臣臺諫廷鞠。前是孚敬已心恨少詹事夏言欲去之，未有間，而太常卿彭澤孚敬客也，故與言爭爲都御史。有郤，而皆侃同年。侃嘗出疏草示澤，澤懷以與孚敬，謂茲事上所諱，而侃與言故善。若疏上而侃得罪，使之引言，則併禍矣。孚敬以爲然而澤，乃語侃少傅甚善。君疏上當爲從，與使必行。既有日矣，澤復報孚敬錄藁以聞，而且謂言實使之。侃疏上既就鞠，備受五毒，不肯吐主者。累日詞不具，彭澤從旁以微詞挑之，使引言。侃瞑目曰：疏吾自具，汝謂張少傅許而趣上之。於言何與？都御史汪鉞乃攘臂稱言實使侃言拍案。詈鉞，幾欲拳毆之。時孚敬猶在列，給事中孫應奎曹汴前揖孚敬，且迴避。孚敬悲趣入閣，復具疏言狀。上乃悉下言，應奎汴於獄，而命司禮太監侯助輔臣變等鞠，具得其狀以聞。上乃出孚敬二密疏示羣臣，而

斥其伎罔。於是給事御史合論孚敬。上責令致仕。乃遠戍彭澤。輕辭僇罪。令爲編氓。敕言還職。自是連擢至禮部尚書。益貴用事。孚敬猶得馳驛歸。既陞階。賜公服牙笏。以識意。御史張寅追論孚敬與汪鉞誣陷夏言罪狀。上爲誦寅以安之。孚敬歸甫五月。而皇太后數問上。張少傅今安在。非少傅安得爲若母。於是上復遣行人蕭爾書馳召孚敬。遂趣命。既至。追論四郊工功。加兼太子太師。華蓋殿大學士。無何。彗星凡三見。孚敬引咎避位。不允。時都給事中魏良弼觀上待孚敬意稍息。不若前。乃疏謂彗星見東方。君臣爭明。彗孛出井。姦臣在側。孚敬竊弄威福。驕恣專權。妖星示異。惟其所召。乞亟罷之。以應天變。報聞。孚敬疏辯。以良弼濫舉京營武職。臣見其揄揚過情。下兵部覈實。罰其俸兩月。以是挾私報復。坐臣專擅。夫臣爲皇上守法。顧來專權之毀。而人之曲法媚人者。乃獲得衆之譽。臣恐自是效忠無地矣。上不悅。亦報聞。於是給事秦鰲復論孚敬強辯飾非。媚嫉愈甚。頃上諭以舉賢容衆。同寅協恭。今言官論列。輒文致其罪。而內閣同列亦欲以禍機中之曰曲法。曰媚人。且票擬聖旨。引以自歸。明示中外以天子之權在其掌握。上千天和。下拂人情。如此不去。不治。上乃喜鰲忠讜。而勒孚敬令自陳致仕。同列爲之請恩禮。皆不報。僅予馳驛。其明年復召用。亡何以一品六年考滿。再進少師。時昭聖皇太后於世宗有爰立之恩。而上所生章聖皇后日益重。顧有所宴見。昭聖猶儼然以故事裁之。上忿忿。而昭聖之弟昌國公鶴齡建昌侯延齡者。早倖橫行燕中。所爲多不法。既微知上旨。惴恐甚。而燕中少年亡賴蜂起。爭持脅其金帛。毋算。後稍稍不酬。乃上變言其詛。聖怨望大逆殺人事。頗有狀。昭聖恐。乃因上後宮有嗣息者。屈節爲延齡請。上益怒。遂欲

坐延齡反。族其家。孚敬固以爲延齡殺人抵償當而坐之。反族不可。夫延齡守財奴耳。何以能反。凡數詰問。對如初。論延齡殺人罪。屬秋盡。當論。孚敬復上疏。謂昭聖皇太后春秋高。卒聞延齡死。能不重傷痛乎。萬一不食。有它故。何以慰敬皇帝在天之靈。上悲責孚敬。自古強臣令君非一。若今愛死囚。令我矣。當悔不從廷和事敬皇帝耶。上故爲重語。欲以惕止孚敬。而孚敬意不已。與少保方獻夫復持之。獻夫至謂陛下居法官。誰導以悖倫忍心之事。若此者。上雖不悅。然難二大臣。詔以秋報。悉緩諸論死刑。而終太后及孚敬世。延齡得長繫矣。然孚敬意不能無修伎於言者。吏尙書汪鉉迎其意。於魏良弼秦鰲等皆坐考察。斥謫相繼矣。孚敬爲相。務以明天子尊信國威。重輔臣體。而其初潞州盜陳卿據青羊山殺官吏。中外頗務姑息。如楊一清桂萼皆爲撫安計。而孚敬獨持之。卒捕誅卿。大同叛兵殺其將。孚敬益自信。薦劉源清卻永爲大帥。以必得賊爲主。而所薦頗不任帥。賊挾口以重。僅購問其黨。自相殘。得一二主謀者。夏言乃以撫之說。拄孚敬口矣。孚敬有子中書舍人遜志。賢而夭。哭之成疾。乞歸。上謂孚敬胡忍舍朕耶。得無以夏言故邑邑。幸寬之。勿與較。孚敬抗辯不置。且言向所與同志。薦獻夫皆弱。萼又前死。而獻夫復先去。僅霍韜。愎而好辯。誰爲臣共大計者。因以疾力辭。上使太醫令診視。孚敬脈已。而手調藥以罵。曰。古有翦鬚和藥者。吾茲之未能。茲手調。亦庶幾焉。其專精神加殮自愛。以輔朕爲忠之義。孚敬感泣。然疾益甚。以死誓歸。上不得已。乃許致仕。賜璽書褒諭。歲給八疋。月俸米八石。所以優崇禮加於它相。其初。孚敬以上未有子嗣。請廣選良淑。以備六宮。又逾年而冊妃嬪。禮畢。孚敬表賀。且問起居。上乃遣錦衣衛千戶劉昂視。

其疾疾愈。卽馳傳入輔。而別以手書諭之曰。卿比以疾乞還。久切朕思。昨賀表具悉。朕躬平吉。聖母康泰。及擇原選淑女。內曰曹王二氏。朕御而各有喜期。且近矣。先冊爲端昭二嬪。河南李氏京選馬氏補敬靜二嬪。又朕於春三月躬行謁陵禮。奉慈車。率后妃以從。禮成。又於四月之吉。恭飾七陵。遂作朕幽宮於長陵左之陽翠嶺。更名平臺山。奉聖母舟還京。今遣使昂視卿。卿果疾末愈。不煩以見。如稍可。卽星夜以行。速見朕。副切思情。毋使朕眷眷無已。是時太廟宮殿及歷代訓錄成。孚敬皆以首功當遷賞。而孚敬行至。處州疾歸。再起。至金華。疾復作。復歸。以皇第二子生。遣人表賀。上特賜金幣甚厚。諸在事者不得比。久之。以疾卒。上時幸承天。聞之。哀悼不已。贈太師。諡文忠。命有司治祭葬。仍護持其家。孚敬有子四人。皆有官。遜志遜臣遜虜。皆天。遜業以尙寶司丞。數躡起。有才志。而亦不免天。諸以大禮貴者七人。

桂萼字子實。鉛山人。由進士至少保太子太傅。吏部尙書。武英殿大學士。卒。贈太傅。諡文襄。萼爲人廉。有才識。而儉。多所行恩怨。士大夫惡之。

席書字文同。遂甯人。弘治三年進士。初知刻城。興水利。開荒萊。興學禦盜。皆有條績。召工部主事。造舟淮浦。財貨清覈。作漕船志紀。因革利病。傳以己意。改戶部。時雲南晝晦五日。敕大臣考雲貴諸吏。書疏言致災之由。係朝廷不係雲貴。在大臣不在庶僚。條上時事千言。陞河南按察僉事。勦賊。正經界。禁工役。驕豎宗藩。莫敢撓阻。兼理廬鳳。會歲饑。請漕臺京粟賤。宜截漕粟賑糶。積舟車費。又數萬。皆可易銀轉京庫。又便得截粟四十萬石。饑民大濟。正德四年。副使提學貴州。延王守仁省城講授。五年。入賀京。道逢楊一清。

曰。曩見之河南鄉試。治河策善。貴州不足煩子。河事大。治河宜子。一清爲吏部尙書。遂薦書爲河南參政。領河事。會多艱。竟不及治河去。八年。進浙江按察使。擒治豪右。逐貪酷吏。釋冤獄。臬政一新。十二年。進雲南右布政使。勦濞益。搆亂士舍。轉福建左布政使。聞宸濠反。衆觀望。書發庫金募兵二萬討賊。嘉靖元年。陞副都御史。巡撫湖廣。擒姦豪。號三虎者。除民害。長沙守貪酷。巧附麗。書按坐摘戍。吏民畏戢。尋陞南京兵部侍郎。時江淮南北大饑。奏截漕粟五十萬石給軍餉。戶部方議發帑賑。會書奏至。請亟賑。又條上賑法。廷中方難得人往賑。見書疏。喜。請以賑事付書。書賑有法。全活數十萬。逾兩月。人稍蘇。當是時。大禮未定。桂萼上疏。并錄書及方獻夫疏。同封進。上得疏。喜。急徵入京。言官遂劾書賑事無法。書亦疏辭。召尋本生。詔下。停召書。陞吏部尙書。內傳下。言官又交劾。并劾賑乾沒銀八萬餘兩。三法司戶部出案。上曰。衆且中傷書。再遣司禮監官事。得白。益遣使促書。書至。改稱考獻帝伯考。孝宗將下詔。令書議詔條。書曰。卽開條濫恩赦。正德諸弊。政不可遏。力言不可。召至左順門。傳問可否。又力言不可。遂止。書尋檢姚崇要說。上圖新政十二事。御史藍田劾書。自比姚崇。比上玄宗。大不道。遂乞罷。不許。削田籍。大同軍叛。書薦一清守仁討賊。時相方主撫。議不果。又議世廟街宜避太廟。及禮樂宜遞減於太廟者四事。上大禮集議。纂要六卷。五年。獻帝實錄成。進少保。時書目失明。薦羅欽順自代。修明倫大典。爲總裁。六年。加武英殿大學士。賜第。給俸。留京師。三日卒。贈太傅。諡文襄。弟春。官至吏部侍郎。

方獻夫。字叔賢。南海人。由進士。至少保。太子太保。吏部尙書。武英殿大學士。致仕。贈太保。諡文襄。其在諸

公稍和平。然亦不肯爲飢餓。持易退之操。而居家不能持謹。數與郡國競。毀譽半焉。霍縉字渭先。南海人。由進士至太子太保。禮部尚書。掌詹事府事。翰林院學士。卒。贈太子太保。諡文敏。縉有學識。才操難進易退。又數犯顏敢爭。天下稱之。然偏而好訐。無通人度。

黃綰字宗賢。黃巖人。以祖廕得官。至禮部尚書。翰林院學士。以侍郎致仕。卒。綰雖起執袴。而精儒士業。兼長吏事。喜功名。第險闕。捫闔。君子所羞稱。

熊浹字悅之。南昌人。由進士至太子太保。吏部尚書。奪職。後贈少保。諡端肅。浹質直弘毅。有大臣度。晚節矯矯。此議禮中之嘉者。

黃宗明。鄞縣人。由進士至禮部左侍郎。卒。贈尚書。宗明雖以議禮驍貴。而性恬雅。間以直著。

史官曰。夫君臣遇合之際。難言之矣。循序平流。吐棄矯節。雖有絕智。何以達九重乎。獨是因機遘會。及鋒而施。如孚敬等。當人主旁皇。四顧孤而無援之際。蓄懷不伸。含言復囁。而孚敬等一爲抗辯。遂與天子稱莫逆。驟膺顯顯。嗟乎。始進以正。卽沈湮。歷邈數十年。晚進無害也。而乃出於此。狡哉。大禮是非。自有定論。夷諸人於倭幸。可以觀其節矣。他錄錄。獨孚敬。疆直自遂。人主爲屈。斯功罪不亦等哉。

### 仇鸞傳

仇鸞。江都人。咸甯侯鉞之孫也。鉞以平竄。蟠及流賊功。封侯。子恩。篤疾未嗣。鸞嗣侯。性鷙悍。氣橫。遇事敢當。不下人。嘉靖初。同毛伯溫征安南。不果。尋出鎮兩廣。改鎮榆林。遂訐奏都御史曾銑。論死。鸞亦罷。嘉靖



庚戌夏六月俺答入寇。詔起鸞加宮保總兵鎮大同。敵尋退。八月敵復擁衆至。鸞私賄俺答。令東寇薊鎮。鎮不守。遂犯城下。朝廷下詔諸邊將勤王。鸞首以大同兵入朝廷以爲忠。拜鸞大將軍。總督諸路勤王兵。分道禦敵。大同兵素驕縱。鸞部之無紀律。其兵多辮髮。作寇人狀。出殺擄居民。捕者不敢擒。時有擒以鸞方被寵任。亦不敢輒置之法。後以其事聞上。曰大同兵首先入援。縱有所犯。出於饑疲耳。付大將軍撫。鸞殊不爲禁。大同兵以此益無忌。民受毒於大同也甚於寇。時敵以在城下。鸞不敢進兵。時稱元帥兵禦寇。實去寇遠。是月二十四日敵退。欲奪白洋口。乃出會諸將兵尾之。敵又擁衆東南。還至昌平。鸞猝遇之。軍不及陣。多被寇騎蹂死傷。鸞幾不免。寇出境。鸞罷兵歸鎮。上疏自劾無功。詔書慰答之。加太保。時欲大振京營。遂命鸞代朱希忠提督。設戎政府。居鸞始置印章。以兵部尙書王邦瑞爲鸞副。上信鸞日深。鸞恃寵。歷陳奏。皆從之。始逐寇時。承命揚兵。稍不如意者。輒以稽緩軍務爲言。故賄之惟恐後。諸邊將及戶部遣以萬計。至是邦瑞稍承制清理京營弊政。多忤鸞及制下。又多從鸞請。先是京營制兵部尙書兼有御史給事中。等參糾。鸞皆奏罷之。未幾。鸞請召大同兵至京聽練。又建議於畿輔河南山東山西等處遣官分詣募兵。歲集京營操防。秋畢散去。如古踐更卒例。皆從之。鸞請大舉北征。遂先遣人詣諸邊鎮。命各選兵出京營將以領之。候師期。於是諸邊鎮皆隸京營將。忽邊地有警。諸邊將不得調遣。而京營將駐各邊者。多倚勢折辱人。且不任邊鎮之責。邊臣以爲言。不報。是年冬十一月。鸞統兵出宣大搗敵巢。時集諸路兵往。歷數月。僅斬寇數級。皆老弱。鸞又自劾。詔不問。鸞乃議。明年辛亥大舉。復請廣集兵糧。時命戶部

遣使盡括南都及各省貯積。仍督逋者甚急。亡何。鸞又請許邊入貢。朝廷命諸大臣議。鸞力主其事。乃以明年春開馬市於宣大。已而邊防大潰。鸞恐禍及。密疏止馬市。上又許之。鸞漸跋扈。吞諸邊臣。重賂亡厭。時與邊私相結。鸞所任時義。與俺荅義子脫脫拜爲兄弟。其亂政如此。朝士無不知。亦無敢言者。是年夏六月。鸞假防秋名。欲行邊。時商大節已承命部所募兵。經略都城。鸞亦徵其兵充部下。大節上言。例九卿不當受鸞節制。且持所部兵不可。鸞上疏排之。大節論死。繫獄。自是諸司無復言鸞者。鸞亦大作威福。三十一年壬子。鸞又出防春。請於上。兵部主調遣。戶部主糧餉。工部主器械。請各以侍郎一員偕行。三侍郎又各簡其屬。皆隸鸞幕府。鸞奏所行科條煩密。號令僭擬。詔皆以爲然。時人心洶洶。恐鸞出不測。是年六月。報敵復侵薊鎮。鸞當出師。鸞病疽。七月。報益急。鸞病劇。上言乞輿疾出師。免陛辭。上許之。時諸司不敢言大將者。兵部尙書趙錦曰。事迫矣。遂疏云。大將病不能行師。印在大將所。諸偏裨令不行。請暫借大將軍印。率師往禦之。制下。謂本兵不可出。令收大將軍印綬。別遣將將兵禦敵。於是錦卽夜至。鸞第收印綬。別舉總兵時陳爲大將軍。佩印行。鸞以收其印綬。大恚憤。疽益劇。遂死。時朝廷已心知鸞姦逆。未發。會鸞所親信時義侯榮姚江皆冒功。得錦衣衛指揮等官。恐鸞死事敗露。遂以是月十一日出奔。居庸關鞏華城諸處欲叛。入邊。爲關吏所執。赴陸炳告。炳以聞。下詔獄。命法司鞫之。乃盡發鸞前後通邊納賄諸亂政狀。世宗大怒。詔暴鸞罪。剖棺戮屍。梟其首。妻子及時義侯榮姚江等俱斬於市。籍其家。諸黨惡皆謫戍邊。遠趙錦以初附鸞。亦謫戍。

史官曰。彼有功者。驕其功可矣。而鸞無功。至使朝臣無敢勅鸞者。亦奇矣。獨考嘉靖壬子秋七月。廷宴諸進貢夷人。命鸞陪宴。鸞辭以病。南給事中祁清奏勅其方命託疾擅陳改遣。原鸞之心。得無以勢自崇。不層是宴而託言有疾者乎。抑果艱於動履。不能預宴。而真爲有疾者乎。夫位隆者貴防於漸。志溢者在警其初。天威在上。國典甚明。敢於恣肆。不恭孰甚。乞賜懲戒。以肅臣紀。敢言鸞者止此耳。鸞何術而籍人之口。至於如此。亦可以想其暴橫矣。夫世宗何負於鸞。鸞忍負之。至於通邊之罪。可勝誅哉。易言小人勿用。聖人豈非有以先見其微哉。

明書卷一百五十六

列傳十六

殘酷傳

史官論曰。漢元狩間。黷武幕南。師殫財匱。窮民起而爲盜。於是直指使出。杜周義縱之徒。以鷹擊毛鷲爲治。而酷吏始興。至江充治巫蠱獄。殺戾太子。武帝悲悔。作思子宮。而酷吏姓廢。明太祖懲元季弛法。用剛克爲治。果於誅殺。藍胡之獄。株連無慮數萬。懿文太子與詹徽錄囚。太子寬仁。多有所平反。徽每譖太子。太子因感疾薨。乃曰。詹徽殺我。嗟乎。酷吏之禍徧天下。其流毒之極。至於殺人主之子。使慈父與哀於望。思孝子痛憤於身後。國本旣傾。亂貽再世。雖萬被戮。豈有償哉。武帝族江充。建文誅詹徽。以此爲酷吏報。然楚靈王有言。子殺人子多矣。能無及此乎。天事好還。又未嘗不致憾於元狩洪武之君也。至遼國之際。又甚焉。所參夷喋血。動殃九族。至墟其閭里。曰瓜蔓鈔。爲之推波揚沸者。都御史陳瑛也。嗟乎。漢之酷吏。捕斬盜賊。延及平民。卽唐之酷吏。戮及士大夫矣。猶不敢殺魏元忠狄仁傑。而陳瑛所殺。皆千百忠臣義士也。比干。邴甯。周來之屬。罪實萬倍。觀史至此。能不嘆息痛恨於其時乎。

陳瑛。河間人。建文初。爲北平按察使。受王府金錢。通密謀。爲僉事湯宗所告。逮瑛。謫廣西。太宗卽位。召爲

都御史上欲爲建文皇帝輟朝五日。瑛請減之。又請追戮黃觀等。上曰：朕舉義師，所誅不過齊黃數輩耳。後來二十九人中，黃福、尹昌隆、張統、王鈍、鄭賜，皆宥而用之。況不與其數者乎？彼食其祿，自盡其心耳。方孝孺諸獄，宗戚受禍慘毒，皆瑛羅織。至胡閏一獄，鈔提數百家，男女至東市，冤號之聲徹天。兩列御史皆掩泣。瑛坦然謂人曰：不以叛逆誅此輩，則我等歸附無名。於是諸忠臣幾無噍類。永樂七年，給事中耿通劾其朋比蒙蔽，誣搆戶部主事李貞於死。八年中，允、劉子春，劾其方命刻薄。九年，下獄誅之，族其家。開濟，洛陽人，初爲國子助教，與丞相胡惟庸善，以疾罷歸。訓徒里中十四年。前御史大夫安然薦其才，召拜刑部尚書。初至京，勤敏有爲，嘗奏令諸司各署老功圖，日書官員所行事蹟，以積覈其勤怠。又言內外奏札宜減繁文，軍民細故犯罪者，宜卽決遣，無久拘禁。數月之間，獄無淹滯。上以濟有才，頗信用之。濟由是自負持法，漸肆巧詐，性殘酷，好以法中傷人。凡意所不悅，輒深文巧法以入之，無能脫者。濟與鄉人有舊怨，乃誣搆下獄，令郎中仇衍等鍛成之。嘗不奉旨，擅移文督責諸司。若中書省所屬者，又爲榜戒其僚屬曰：尚書到任日久，事之遲錯，皆寬大容忍。復然，則罪不爾貸。奏請揭於文華殿，以示衆。上曰：爾告戒僚屬之言，欲張之殿廷，豈人臣禮耶？濟慚謝未幾，又立簿曰：寅戌之書，以限僚屬出入。上聞，切責之曰：古人以卯酉爲常道，今使趨事赴功者，朝自寅，暮盡戌，奉父母，會妻子，能幾何時耶？濟不聽。獄囚有禁死者，濟亦不問。嘗受一囚賂，以獄中死囚代而脫之，爲獄官所發。上召濟諭之，歸部。與侍郎王希哲、主事王叔微執獄官於獄，扼其吭而殺之。其恃權罔上，傷害良善類如此。上屢訓迪不悛，會有告其在洛陽時盜賈人

贖買人出重價。乃還之。強役其甥女閻氏爲奴。濟妹亦早寡。姑老獨存。濟利其家財。盡掠取之。攜其妹并一子歸。其姑欲訴。輒垂逐之。時監察御史陶壘仲等劾濟瀆亂人倫。有傷風教。不可爲大臣。又擅殺獄官。及言濟奏事時。置奏牘懷中。或隱不言。欲入啓皇太子。至則又不言。乃復入奏。觀伺上意。務爲兩圖。姦計莫測。上怒。乃下濟獄。并執王希哲等。詔廷臣訊之。濟具服。遂并希哲等誅之。初。濟父蒙來朝。上待之甚厚。濟亦常侍左右。見御製詩文。輒請歸。潛刻碑以誇大聲勢。又所爲不法。由是見疏。濟爲人。以才辯。然陰毒狡險。外事諛說。當朝罷。上召與論政事。略無建明。但稱曰。真聖人。真聖人。故上深惡其諂佞云。

詹徽。武昌人。性殘忍。用刑最刻。洪武中。以左都御史兼吏部尚書。洪武二十六年。受命鞫藍玉獄。玉不肯服。徽叱玉吐實。將加酷刑。玉大呼。徽卽吾黨。遂併殺徽。徽嘗陷李善長。又惡解縉爲虞部郎中。王朝用草疏申救善長。并欲中縉危法。初。懿文太子亦恨徽。徽嘗侍太子錄囚。太子屢欲有所出。徽輒文附重法。太子爲白上。先入徽言。謂太子曰。徽執者法也。太子因言立國以仁厚爲本。上曰。汝欲遂自爲皇帝耶。太子懼。因感疾薨。謂建文君曰。詹徽殺我。至是。建文君爲太孫。錄藍獄。先斷徽手足。戮於市。

袁泰。夷陵人。登洪武四年進士。累官至右都御史。泰有才辯。明法律。著稱。然頗深刻。嘗鞫經歷王僭。鍛成其獄。屬吏薛希勝常連坐。詣大理白其枉。泰欲掩其失。噉河南道御史竄之法。上召廷臣會審。得釋。於是御史夏長文等劾泰而欺。上責泰曰。國家爲治在法。而持法平者御史也。今若此。欲無冤得乎。乃誅泰。馬順。江南人。錦衣指揮也。以義子事王振。見必膝行。違除戚施。振甚矜愛之。國子祭酒李時勉有所忤振。



令順許其伐廟木事。囊三木廟門。久之始釋。雷震奉先殿。鳴。翰林侍讀劉球。應詔上封事。語多侵振。振大怒。而會編修董璘言。太常用道流不稱。請自爲卿共祀。忤英宗。下獄。順榜答璘。使引球爲具葦草。卽朝班中。掉之出。球不知所坐。款第曰。若諛振死我。死卽訴上帝耳。竟與董璘益死獄。家人行求屍。順故糜之。勿得也。而順有子年二十餘。病孱久困矣。欵起持順髮。拳且蹴之曰。死老奴。令而異日禍喻我。我劉球也。順再拜謝。不可。俄而子死。王振以上北伐虜也。先陷土木。敗聞。時郕王監國。朝羣臣伏闕泣。請籍振家。併誅振弟。指揮山海。未報。衆忿。閔無所泄。而馬順前謂衆姑已。胥後命。給事中王竑直前提掉順曰。是非姦人黨耶。衆趨前擊殺順。須臾。血肉塗起。不可辨矣。王恐。乃下令誅山海籍。王振家。因併籍順。蓄藏金寶。以鉅萬計。

陸炳。浙之平湖人。祖擲。隸籍錦衣衛。與王之國安陸。選充儀衛司總旗。子松。陞千戶。世宗生於潛邸。松妻得爲乳母。又三年。炳生。攜入共寢處。上稍長。日侍左右。旣入承大統。松用從龍功。累官都督僉事。炳以官舍知書。頗覽文籍。欲應有司試。父曰。吾家自有環衛。可事天子。何必走寒士路。從考功門下。類首聽黜陟。爲。乃以世職千戶。應試武舉。會試高等。己亥。上幸承天。至衛輝。行宮夜火。侍衛倉卒無在者。獨炳身負上出於火。壬寅宮變之夕。炳心動。帶衛士急趨候門外。門開。皇后懿旨出。立應縛逆人正法。上甦。聞之甚喜。炳雄黠多智數。善迎合上意。時敵儼多。招勇士爲校尉。凡萬餘人。月支太倉米四萬石。鮮衣怒馬。出入市中。人皆目而畏之。庚戌。敵逼都城。諸大臣分守九門。炳勒所部門各三百人。譏察出入。其餘巡諸街巷。有

乘機搶掠者。縛其魁。治以法。中外賴之。仇鸞方入援。炳言大敵睥睨通州。未及渡河。所恃者。鸞兵抗其前耳。今相持已久。邊卒饑疲。餽餉不繼。可爲寒心。宜趣兵部發兵應援。戶部發銀充餉。薊鎮守臣伺敵歸路。遮擊。上深然之。切責戶部尙書李士翱等。不以國事爲重。俱令停俸待罪。卽日計處兵食。運各營。鸞旣被寵用。事來結歡。炳陽應心。勿善也。曰。是豺聲。能食人。必負國。見上倚信。未敢示異。同陰伺察之。銖兩之姦。無不知者。鸞前督師廣東。過杭。繼娶甚嬖。兩家互內飲。妻歸。罵鸞曰。汝自誇富貴。乃陸媼飾首奇麗。我勿逮遠甚。令我愧見侍者。鸞慚。借其飾。令鍛工效爲之。咸駭愕。謝不能。蓋得之西域鬼市。非世所有也。鸞乃令勇士二人劫取。炳嘗早起坐室中。士透簾而下。夾立。覺有異。謂曰。汝何誓到此。任汝所需。勿害我。曰。無他。夫人飾若干件安在此。瑤池故物。奉令來取。幸勿靳。且勿疑也。出與之。璽簷去。寂無人聲。心知鸞所使。甚怖。亦甚恨。鸞本通虜。使家丁時義等往來密媾。脇成馬市。專鈔宣大。勿犯薊鎮。炳久已刺得。未敢聞上。第厚爲備。時于射所率親兵。肄習挽疆。命中聲徹禁中。蓋密請於上。因欲動聽。上在西苑聞之。問方士陶典真曰。此陸炳耶。陶知上意所嚮。謬曰。天生神將。來備陛下肘腋。上喜。因遣小豎來觀。鸞方自大同回。亦率其徒至。與角。顯勿如。慍見顏色。徐奉觴曰。大將軍能用衆。將三十萬騎。空虜庭。書名雲臺。如某一校之任用。寡拳捷取快。漢有羽林期門。唐有飛騎彊騎。止衛宮庭。非大軍比也。鸞甚憚之。小豎歸報。上默然。由此益眷注。且悉鸞不足任。疑之矣。虜勢愈熾。鸞支吾二年。技窮。當出師。疽發背。上命收其符印。代以他將。鸞立死。姦狀盡露。先一夕。密忱兒義挾鸞自居庸關走大同。遣人中道遮縛爲證。上大怒。收其孥。下獄拷。

訊陳刑具問反狀。妻故素相識，認中表者呼曰：「夫君有謀，惟公知之，何問我爲？」衆皆失色。炳恚甚，加刑獄成，鸞剖棺戮屍，傳九邊梟首。大同妻子皆斬，炳獲寢諱，加秩校尉。徐永康等各進官，有差。倭患方熾，胡宗憲用兵糜費被劾，委罪俞大猷，逮出二千金及他珍寶贈之。賄嚴氏得不死，其與嚴氏相處坦然。雖互以權勢附麗，而善用不露跡。卽世蕃恣睢，亦入籠絡中，不敢肆。特厚徐階，密爲保護，甚受上知。雖處疑逼，終不能整，深有力焉。自以陸宣公之後，家世詩書，敬禮儒士。弟煒已爲中書舍人，實級舊例，惟試職者得應舉。癸卯年，特疏代請，許之。遂得中式。歷太常少卿，子甚劣，不可教。延東陽人趙祖鵬爲之師，蓋文華之族。其所薦者，纔數日，趨庭拱揖如禮。大喜，厚贈。因納其女，稱肺腑親。力爲地。中癸丑進士，選庶吉士，授編修。頤指所使，無不如意。祿賜既厚，本衛牧租芻糶，歲入數萬金。京中富厚者，多投門下求庇，所獻不資。其時白蓮教盛行，布滿畿甸，鹵謀讎至，入甲伏庫，皆經摘發，亦其耳目多。爪牙健，才足運用也。因而夷滅，無所顧惜，亦儘有救之極窮。活之垂斃，學士大夫下至走卒，片言卽解者。至今人能言之。王佐在事，炳爲之屬。年末二十，佐器其材，貌教以爰書公移之類。曰：「錦衣帥不可不精刀筆。」炳甚德之。佐孽子不肖，陸博縱飲，有三別墅，炳已得其二。其一最雄麗，復欲得之，不可。乃指以狎邪，捕其黨與家奴，證成其罪。子窘甚，其母故妾也，名亦在捕中。旣入對，炳與僚列坐，將脅之。子始亦固抵，母膝行前，道其子罪甚詳。子悲諱，母曰：「兒頃刻死耳，母忍助爲虐乎？」母叱曰：「死卽死，何說？」指炳坐，顧曰：「而父坐此，非一日作此等事，亦非一生汝不肖子。天道也。」復奚爲？炳頰發赤，趨遣之。出事遂寢，累資巨萬，豪侈起祠堂，卽禾中建乳娘廟於西湖，立

宣公書院。塑造遺像。營別宅十餘所。皆崇麗稱甲第。分置姬妾其中。統綺寶玩。所在充物。供帳不移。而具炳時游處其間。東西惟意。置良田宅於四方。若臨清揚州南昌承天等處。皆有莊店。聲勢震天下。惟內臣猶執故事不爲下。乃勅司禮太監李彬盜帝真殿工所物料及內府錢糧以數十萬計。私役軍丁造墳於黑山會。起丁字大券。僭擬山陵大逆不道。宜寘之法。上命錦衣衛拷訊。下刑部擬罪。比依盜大祀神御物律。與其黨杜泰等皆論斬。餘發遣如律。沒入資產銀四十八萬有奇。玉帶金寶纒環八箱。餘不司勝計。由是威行宮省。內外惕息。不稱官。不稱號。惟曰陸堂。至用以止小兒啼云。出司巡徼。入直內殿。凡郊廟以至諸禱祀。皆得與焉。親近尊信。卽勳貴大臣莫敢望一惜暴卒。上深悼之。贈諡祭葬有加。仍官其子繹指揮僉事。死未及旬。吏部出祖鵬爲湖廣僉事。尋考察閑住。居鄉縱誕不檢。與族弟喇有隙。喇因詣闕告祖鵬。怨望誹謗。并其他不法事。逮下詔獄。而行勘得實。言祖鵬兄熙子賢造賢選。皆恬勢作威。暴橫鄉曲。抑勒平民爲奴。箠之致死。祖鵬嘗得宋朝遺牒。謂宋魏悼王之裔。因修譜以續其系。私祭宋代陵寢。而名其莊曰護陵拱辰。復葬其妾於妃嬪之側。縱弟鸚冒報軍功。及事覺被逮。輒匿祖鵬所不出。又私創八角亭蟒衣。玉帶。抑奪官民地以拓第宅。皆僭侈不道。至於作書怨誦。尤非人臣禮。因論熙坐死。賢造賢選等各罪有差。祖鵬罪斬。穆宗卽位。祖鵬赦歸。御史張守約追論炳結納嚴世蕃。竊弄威權。播惡流毒。有大罪十。世蕃旣斬。炳宜追戮其屍。逮治其子繹。姪緒。家人顯籍其家。於是炳免戮屍。削奪繹緒煒。俱革職爲民。餘黨謫戍荒徼。籍其家。



明書卷一百五十七

列傳十七

姦回傳

史官論曰。木實將撥。必蠹其中。日月外暈。或蝕其裏。昔子壹謀桓魯隱弑。宰嚭佞越吳國。沼張禹黨王炎。鼎移林甫庇審漁陽。動自古姦臣在人主之側。威惠內竊。國情外輸。以宗社爲市者多矣。天下之惡一也。買妾欲其習我者。擇臣取其貳彼者。崇攜保姦。與晉殺里克。漢斬丁公之義何居。然春秋書叛人名。名不可掩也。作姦回傳。而以柔媚取容悅。無剛直之概者類編焉。

胡惟庸附陳汪廣洋楊憲傳

胡惟庸江南人性儉惡。小有才。以曲意奉上。當上心。太祖擬相。問劉基曰。楊憲何如。基與憲素厚。以爲不可。上怪之。基曰。憲有相才。無相器。夫宰相者。持心如水。以義理爲權衡。而已無與焉者也。今憲不然。能無敗乎。上曰。汪廣洋何如。對曰。此褊淺。觀其人可知。上曰。胡惟庸何如。基曰。此小犢。將債轅而破犂矣。洪武四年。爲左丞相。六年六月。改右丞相。十年九月。制尊左。復爲左丞相。劉基嘗語人曰。使吾言不驗。蒼生之福也。言而驗。如蒼生何。後自楊憲誅。而惟庸總中書之政。專肆威福。生殺黜陟。有不奏而行者。內外諸司。



封事入奏。惟庸先取視之。有病已者。輒匿不聞。私擢奏差胡懋爲巡檢。營其家事。由是四方奔競之徒。趨其門下。諸臣諛佞者多附之。受金帛名馬玩好。不可勝數。魏國公達深嫉其姦邪。常從容言於上。惟庸忌之。遂有關者福壽。惟庸陰誘致。爲己用。冀得其力以圖達。爲福壽所發。劉基亦嘗爲上言。惟庸姦恣不可用。惟庸知之。由是怨恨基。及基病。詔惟庸視之。往以毒中之。基竟死。上以基病久不疑。基死。惟庸益無所憚。與李善長等相結。以兄女妻善長從子祐。貪賄弄權。無所畏忌。一日。其定遠舊宅井中忽生竹筍。出水高數尺。諛者爭言爲丞相瑞應。又言其祖父三世塚上。皆夜有火光燭天。於是惟庸益自負。有邪謀矣。當是時。吉安侯陸仲亨自陝西歸。擅乘驛傳。上怒責之曰。中原兵燹之餘。民始復業。籍戶買馬。艱苦甚矣。使皆效爾所爲。民雖盡鬻子女買馬走遞。不能給也。責捕盜於代縣。平涼侯費聚常命往蘇州。撫綏軍民。聚不任事。惟嗜酒色。召遣責往西北招降敵。無功。上亦責之。二人懼。惟庸陰以權利脅誘之。二人素驍勇。又見惟庸當朝用事強盛。因與往來。久之益密。嘗過惟庸家飲酒。酒酣。屏去左右。因言吾等所爲多不法。一旦事覺。如何。二人惶懼。計無所出。惟庸乃告以己意。且令其在外收輯軍馬以俟。二人從之。與陳寧坐省中。閱天下軍馬籍。令都督毛驥取衛士劉遇寶及亡命魏文進等爲心膂。曰。吾有用爾也。太僕寺丞李存義。善長之弟。惟庸之婿父也。以親故。往來惟庸家。惟庸令存義陰說善長同起。善長驚悸曰。爾言何爲者。若爾九族皆滅。存義懼而去。往告惟庸。思以利動善長。後十日。又令存義以告善長。且言事成。當以淮西地封公爲王。善長雖有才能。然本文吏。計深巧。雖佯驚不許。不甚拂。迺歎息起曰。吾老矣。由爾等所爲。存

義還告。惟庸喜。因過善長。屏左右款語。良久。惟庸欣然就辭出。使指揮林賢下海招倭軍。約期來會。又遣元臣封績。致書稱臣於元。請兵馬外應。事皆未發。會惟庸子乘馬馳驟於市。馬奔入輓轂中。傷死焉。惟庸卽殺是輓轂者。上怒。命償其死。惟庸乃請以金帛給其家。上不許。惟庸乃與善長及中丞涂節御史大夫陳寧等謀起事。遣人陰告四方及武臣之從己者。時惟庸居第近西華門。先謠云。其所居井湧醴泉。以徹上聞。洪武庚申春正月。邀上幸其第觀之。先列勇士。衷甲數百。匿屏後俟變。時守西華門內使雲奇。知所爲倉卒告變。上悟。亟還宮。發兵圍緝。果然。遂罪人一一就縛。并黨御史大夫陳寧都督李玉等皆伏誅。已而惟庸語連李善長陸仲亨。上念初起時功臣。置不問。宋慎坐黨亦誅。仍籍其家。濂謫四川茂州。是獄也。前後戮黨凡數萬人。按是時御史涂節告變。謂寧附和丞相。坐省中閱天下軍馬圖籍。其在蘇州催糧餉。燒鐵烙人。其子孟麟泣諫。杖之至死。上曰。寧於其子如此。奚有於君父耶。遂賜死。寧長沙茶陵人。初名亮元。爲鎮江小吏。從軍至金陵。代諸將言事。英辨疊出。太祖異之。賜名寧。授江南行省掾史。歷中書省參議。凡朝廷制度。咸預稽詳。吳元年。出知廣德。歲大旱。奏免租。弗允。寧躬赴闕。上言天災民饑。催稅太急。是爲張士誠驅民也。上曰。爾乃膽大敢爲此言耶。竟從之。遷浙江按察使。適皂隸小毛。訟其隱過。逮繫。應天獄久之。乃釋。降太倉市舶提舉。洪武元年。召入爲司農卿。還兵部尚書。二年。出知松江府。復拜中書右丞。三年。又出知蘇州府。遷浙江行省參知政事。復召爲御史中丞。至是。坐胡黨誅。

汪廣洋。字朝宗。高郵人。廣洋寬和。通經能文。善篆隸。大書工詩歌。少從余關學。游太平。乙未。太祖渡江。召

廣洋入見與語大悅留幕下爲元帥府令史行樞密院掾史江南行省提控丁酉除照磨己亥立執法議理司大書四字牌上以廣洋李勝端爲執法官朝政有失執牌直諫又名爲都諫官辛丑遷江南行省都事陞郎中甲辰立中書省改右司郎中尋知驍騎衛事常遇春下贛州廣洋出參軍事遂守贛州尋陞江西行省參政洪武元年開省山東廣洋以廉明持正改山東安輯有勞是冬召入中書爲參政明年出參政陝西三年李善長病召入爲左丞時楊憲以山西參政先召入爲右丞惡廣洋札已噉侍御史劉炳劾廣洋不孝上切責斥還鄉憲意未已又噉炳劾廣洋謫海南李善長奏憲誣大臣放肆爲姦上誅憲召廣洋還是年冬與劉基同日受封封廣洋護軍忠勤伯食祿三千六百石誥詞比之子房孔明四年善長致仕廣洋爲右丞相參知政事胡惟庸爲左丞六年進左丞相惟庸爲右丞相尋廣洋坐畏懦迂猾斥爲廣東參政逾年召爲左御史大夫十年復爲左丞相上益厚廣洋未幾上以惟庸暴橫廣洋荒於酒色而怠棄政機浮沈守位敕戒令洗心補過會占城貢使至不以時引見下敕切責執政廣洋惶懼十二年御史中丞涂節言劉基死毒廣洋知狀上問廣洋對無是事上怒廣洋朋黨又謫海南舟至太平上再遣敕責廣洋事朕十餘年不聞一善言不薦一賢士在江西曲庇文正在中書不發楊憲姦惡惟務沈湎不事事廣洋得書益慚大懼自縊死

楊憲字希武陽曲人美姿儀博學多才少從父元末宦寓江南丙申謁太祖於金陵上與語奇之令居幕府已而擢江南行省都事當江廣多故日裁決文書不滯時稱其能中性深險而忌有不滿於己者輒以

計中傷之久之。出爲浙東行省郎中。又爲江西行省參政。召入爲司農卿。未幾參政中書省。尋改河南行省參政。洪武二年。調山西。三年。召爲中書省右丞。尋改左。憲事上既久。熟典故。以是假寵市權。藐同列。亦莫敢爲抗。嘗上書頌上功德。因勸上行督責之政。上曰。是欲使我失人心也。拒之。憲與昶同在中書。以昶才出己右。欲搆害之。時東南未定。元號令猶行於西北。昶嘗閒暇。與憲言。吾故元臣也。勉留於此。意不能忘。故君而吾妻子又皆在北方。存亡未可知。憲因鈞摘其言。謂昶謀叛。且出手書許之。昶遂坐誅。憲自是益無所憚。初爲司農卿。屬浙江初平。憲以其民富實。因議增賦。倍征以資國。民以不堪。在中書。盡變易省事。凡舊吏一切罷之。更任所親信。陰入持權。乃劄爲一統山河花押示僚吏。以觀其從違。凡附己者。卽不次超擢。否者斥之。人莫解其意。一日。翰林編修陳鏗入謁。憲以押字示之。鏗卽賀曰。押字大貴。所謂只有天在上。更無山與齊者。憲大喜。後數日。奏除鏗爲翰林侍書。已而又刺求丞相汪廣洋陰事。令御史劉炳劾奏之。廣洋坐免田里。憲又嗾炳劾廣洋。徙之廣南。上不聽。又教炳誣奏刑部侍郎任安擅入人罪。上始覺其誣。下炳獄。炳伏實。劉基併發其姦狀及諸陰事。上大怒。令羣臣按問。憲辭服。遂與炳等皆伏誅。史官曰。姦臣之於人主。必以其所長短者。巧中之。主上英明。則取聰察之事。以快其私。而關主無論已。明太祖神武剛毅。而胡惟庸恣生殺。擅黜陟。至壅蔽上聞。阻隔章奏。卒以反誅。宜矣。獨是株連無辜。戮至數萬。惟庸之惡。通於天矣。廣洋無所可否。持祿怙寵。將不謂之姦不可。憲賣友虐民。變亂成法。恣行胸臆。中傷雅流。授首市曹。不爲枉矣。書云。旁作穆穆。迓衡。又曰。斷斷猶無他技。使大臣能釋乎此。余未見其殄邪。

而隕首也。

徐增壽李景隆王寧盛庸茹瑺王佐傳

徐增壽以父任。三遷至左軍左都督。侍宿衛。建文皇帝業以持燕王事。從容謂增壽。王得無反乎。增壽頓首曰。燕王先帝同氣。且富貴已極。何故反。燕兵起。則時時從增壽。調虛實。增壽亦時時從王。所輸。建文皇帝漸覺之。未及問。而燕兵入金川門。召增壽詰之。不對。手劍斷增壽腰。燕王入。撫屍而哭。既卽位。封增壽爲舞陽侯。再追封定國公。俾子景昌嗣。歲祿二千五百石。久之。領軍府。嗣凡三十五年而卒。子顯忠嗣。十二年卒。子永寧幼。又七年而嗣。疾失心。子半祿罷朝請。病二十六年卒。子光祚嗣。久之。領軍府。以東宮舊恩。超進太傅。旋以監修武容二朝實錄成。累加太師。兼太子太師。凡四十五年卒。子延德嗣。領軍府。四十餘年卒。子文璧嗣。領軍府。加太保。太子太傅。嘉靖中。詔裁恩澤世封。而魏定二公。皆自以功。弗奪。有言定公功不稱者。卒弗奪也。天下僅五公。達子孫居二焉。文璧卒。子允禎嗣。國變時死節。

李景隆。長身偉姿。疏眉目。顧盼朗然。既少。奉文忠教。齒諸生間。與天台方孝孺善。多習典故。善談論。每朝會。進止雍容。是都。太祖每目屬之。既襲爵。與魏國公輝祖等分鎮中原要害地。所使多稱。進掌左軍都督府。加太子太傅。太祖崩。皇太孫立。景隆益以肺腑見親任。而弟增枝亦屢遷。至左都督。進加景隆太子太師。時兵部尚書齊泰。太常卿黃子澄。得幸。上謀削弱諸王。至燕而露。燕兵起。長興侯耿炳文。武定侯郭英等征之。前後皆敗。於是齊泰。黃子澄。皆才景隆而薦之。乃命景隆爲征虜大將軍。北伐。用裴度故事。賜通

夫屨帶建文皇帝爲推輪。親送之江。許且令得以一切便宜誅賞。時諸宿將多物故。鮮存者。而存者亦以老。又皆景隆諸父行。怏怏不肯爲之下。而景隆暴得意。自尊大。每升帳。踞高坐。毋敢與抗禮者。皆唯唯不能吐片語而退。景隆會兵五十萬於德州。乘燕王之攻大寧。遂進薄北平。築壘九門。爲長圍以困之。王還師自救。景隆逆戰。大敗。死者十餘萬。明日九門之師復潰。死者復數萬。乃退走。王復攻大同。景隆引兵出紫荆關。時寒甚。士卒墮指者什二三。乃移書燕王。請罷兵。辭驕蹇。王亦貽書來報。而心恨之甚。遂戰於白溝河北。凡三日。而景隆復大敗。殺溺及被俘者幾三十餘萬。景隆乃奔濟南。燕王來追。復大敗。死者二萬餘。濟南遂見圍。以參政鐵鉉堅守不下。始建文皇帝未得敗問。與秦子澄謀。以景隆權尙輕。特賜黃鉞。蓋彤弓矢。使者渡江而風失之。復製以賜。尋景隆敗問至京。召還。既陸見。黃子澄慚憤極。執景隆於朝。班慟哭。請誅以謝天下。建文莫能問也。又二載。師屢覆。燕兵悉渡江。駐龍潭。建文懼。乃使景隆同尙書茹瑺。都督王佐來謁燕王。以割地講和。請王笑曰。事至此。何地可割。吾但欲得姦臣耳。於是景隆等蒲伏密輸款。歸佐谷王守金川門。燕王至。景隆等開門逆之。燕王卽位。以景隆等默相事機。封曹國公。改號曰奉天靖難。階曰光祿大夫。勳曰左柱國。增祿歲一千石。其太子太師如故。賞埒淇成二公。改修高廟實錄。爲監修總裁。諸哉定功賞大興革。景隆猶以班首主議。天子雖外示崇重。而心恨之甚。諸功臣咸扼腕。謂彼白刃割我。而今以降奴而据我上。其又明年。三法司論劾景隆包藏禍心。蓄養亡命。與其弟左都督增枝。謀爲不軌。已文武大臣成國公能等吏部尙書蹇義等復言之。已。六科都給事中張信等復言之。乃下詔。盡



削景隆勳階官號。絕朝請。勒歸私第。猶以長公主故。不奪其爵。亡何。文武羣臣復言。調事者至其家。景隆猶坐受關人伏謁。如君臣禮。大不道。復株及左都督增枝。因詔併奪增枝荊州帥符。逮之。與景隆同繫私第。盡沒其莊田寶貨圖籍。緘獲入之官。而所繫者皆親屬矣。嘗絕其食。旬日不死。始稍稍給食。至永樂末。而景隆竟以凍餒卒。繫禁四十年。男女自相婚配。人以爲姦回之報云。

王寧。壽州人。尙懷慶公主。爲駙馬都尉公主。太祖第六女。母成穆孫貴妃。建文中。寧通語言燕王。洩中禁事。籍其家。繫寧錦衣獄。建文四年。詔封功臣。稱寧孝於太祖。忠於國家。正直無私。不阿權勢。遂遭誣陷。幾致殞身。達孝推恩。允宜褒答。封永春侯。食祿一千石。與世券。永樂元年。又官其子貞亮。羽林前衛指揮僉事。寧嘗侍上言及太祖時事。上愴然。寧卽勸上誦經。飯僧爲皇考福利。上不悅。五年。寧坐事。下詔獄死。貞亮先卒。宣德七年。貞亮子彝乞嗣衛僉事。不允。再乞。亦不允。十年。彝又援詔言公主適孫。請嗣侯。英宗授彝衛僉事。帶俸奉公主祀。

盛庸。江南人。建文時。充參將。隨耿炳文軍失利。又隨李景隆戰燕齊間。互有勝負。已而與鐵鉉守濟南。燕兵圍甚急。庸夜出劫戰。晝。憑城禦防。盡毀燕兵諸攻具。捷聞。陞鉉兵部尙書。封庸歷城侯。食祿千石。充平燕將軍總兵官。代景隆北進。與燕兵大戰東昌夾河。殺張玉譚濶。燕兵長驅至淮上。庸進戰靈璧。齊眉山皆敗。遁還。駐高資港。又敗。太宗卽位。庸歸命。敕曰。比以山東未定。命卿鎮守淮安。今鐵鉉就獲。諸郡悉平。朕念山東久困兵革。憊於轉輸。卿宜輯兵養民。以稱朕意。永樂元年。致仕。千戶王欽發庸狀。陞欽指揮同

知賞銀百兩。未幾，都御史陳瑛劾庸口出怨言，懷異圖，請誅庸，遂削爵，賜死。

茹瑺，衡山人。洪武末，由監生官左通政，遷吏部尚書。改兵部。建文初，以兵部尚書掌河南布政司事。燕兵至江上，建文皇帝遣瑺詣軍中勞問。瑺私稱臣，獻密計。燕兵遂從金川門入。事既定，詔稱王寧及瑺孝於太祖，忠於國家，封寧順昌侯，瑺忠誠伯。寧蓋駙馬，都向與徐尉增壽爲燕內間者也。瑺尋加太子少保。永樂七年，除名回籍。家人與安告其隱事，復械至京。久之，得釋還家。道經長沙，坐不朝谷王。都御史陳瑛劾之，復逮下詔獄。瑺懼，命其子銓市砒霜藏飯中，送食，遂死。法司以聞，銓坐殺父律，論死。婦人送浣衣局，幼男發鞍轡局。谷王亦於永樂十五年陰養死士，降庶人。錮南京，閹室自焚。

王佐，不知始所自起。歷官都督同知。燕兵至金川門，建文皇帝遣曹國公茹尚書及佐見燕王龍潭，議割地講和不聽。三人者遂望風納款，且獻密謀。比至城，金川門遂開，卽位。封順昌伯，食祿千石。與世券，後以嫌死。

史官曰：增壽、景隆、王寧，並以勳貴，托倚肺腑，陰懷搆貳，外輸秘密，增壽誅戮，景隆禁錮，王甯下獄。天道不爽，信然。雖後食報不同，而及身伏辜矣。盛庸氣壯雷奮，屢建戰功，卒傾心仇讐，不免刑辟。茹瑺、王佐，以天子信使，辱命潛款，卽圖榮數年，如浮雲之過眉睫，或父子伏法，或終以嫌死，亦何益哉，亦何益哉。

金忠顯成張信王通房寬傳

金忠，鄞人。少慷慨，負義氣。兄戍通州，忠省兄，會燕兵起，布衣甫冠，上謁典儀云：浙東奇士金忠，願見殿下。

說兵事及中朝動靜得召見忠言殿下太平皇帝小人耕江海間及往來齊魯道上聞殿下賢譽服人心久矣茲舉大事人材爲急太宗說立授署紀善日侍韓輓贊理戎務尋陞署長史已爲眞卽位後陞工部右侍郎治事北京永樂二年召入兵部爲尙書忠博覽史籍議論河懸儲位未定上密問忠歷數古昔適庶故事對上喜賜忠大纒又曰詹事宮端屬汝以尙書兼詹事幸善調護佐太子忠侍監國時時勸起孝敬篤友愛小心敬慎無失禮毀譽禍福聽諸天日而已或譖謗廷臣及宮僚過者上密令忠察審忠退每數日頓首再三爲白無此事願陛下寬霽上或不喜卽又頓首言臣敢保其無他他日有蹤跡卽如人言臣甘連坐以故諸所全獲者多忠謹厚不洩伴爲不知也公每導人寬愛無爲苛刻公事輒推同官使展其才能有闕誤引爲己過不遺片善不念舊惡俸賜有餘周賑鄉族仁宗卽位念之贈少師諡忠襄以其子達爲翰林檢討達幼遭歸寧波學支俸讀書比長宣宗召達還翰林正統十二年改禮科給事中陞都給事中景泰二年出爲長蘆運使

顧成字景昭江都人容貌魁梧壯勇質直有膽略喜習武事自文其身誇異人或謂成黔徒者非也丙申來歸充帳前親兵嘗擊蓋侍上出入忠謹無過初授百戶從征陞金吾副千戶宿衛陞指揮僉事從平蜀破貴州蠻克普定功陞指揮使普定衛進都指揮同知已而征雲南成扼普定斷後進督僉事充征南將軍鎮貴州征五開六洞破一百三十七寨斬首三千建文初令錦衣指揮譚全諭成班師二年進同知三年進右都督是年閏三月從盛庸至眞定戰敗被執燕王解其縛曰吾且用汝遣至北平侍世子居守有

功太宗卽位。以左都督封鎮遠侯。食祿一千五百石。與世券。又出鎮貴州。申嚴號令。威信並行。討撫諸蠻。搗臺羅寨。斬叛酋普亮。滅其家。羣蠻震攝。卒年八十五。贈夏國公。諡武毅。蠻中皆祠祀成。八子。長統爲普定指揮使。先卒。孫興祖。永樂十二年。嗣侯。贈父統侯爲總兵。宣德中。坐交趾事。徵下獄。正統十四年。從征。失律。降都督同知。景帝初。守備紫荆關。詔與伯爵。英宗復辟。詔復侯。出鎮貴州。有功。加祿三百石。守南京。景泰中。鎮廣西。坐貪財好色。失地喪師。逮下獄。死而釋之。子翰先卒。翰子淳。天順八年。嗣侯。卒。無子。淳從弟溥者。成諸元孫也。成化元年。嗣侯。溥初學國學。解文墨。嘗總兵團營。爲平蠻將軍。鎮湖廣。擒貴苗僞王。通滇蜀道。還流移五千家。復爛土長官司。設都勻府。增祿二百石。溥清慎。囊無餘資。英國公張懋爲率布帛供斂事。諡襄恪。子仕隆。弘治十七年。嗣侯。仕隆好文。諳武。爲京營總兵。寬弘簡質。得士心。充漕運總兵。鎮守淮安。廉榦不苛擾。卒。贈太傅。諡榮靖。子寶。嘉靖七年。嗣侯。出爲漕運總兵。二十三年。言官劾罷。伏羌伯毛漢代寶。旨下數日。又劾罷漢。用都督劉瓚。瓚致仕居南京。萬表代瓚。寶端清廉明。溫榮孝友。時論韙之。言官竟被考察去。寶復爲漕運總兵。鎮守淮安。尋總督京營戎政。卒。子肇。逆嗣侯。國變後。不知所終。張信。臨淮人。父興。開國功。爲永寧指揮僉事。信嗣官。以紫江草塘功。陞都指揮僉事。洪武三十一年。建文皇帝卽位。疑北平大臣薦信有謀。勇名。調北平都司。受密敕。令與謝貴。張昺。合力防燕。藩人信日夕憂懼。母怪而問之。信跪對曰。兒統兵邊閩。焉能無憂。母曰。汝非此憂。其語我故。信屏左右對曰。密旨欲得親王。奈何。母大驚曰。不可。汝父每言王氣在燕。無妄爲禍。家族矣。信益憂懼。未幾。敕促信。信輒然起曰。何爲乃。

爾三造燕邸。燕王辭不見。乃乘婦人輿求見。燕王令入。拜燕王牀下。時燕王稱風病不能言。久矣。信頓首曰。殿下無恙。卽有恙。常急諭臣。燕王曰。余誠病且困。待死爾。信復曰。殿下不以情語臣。朝廷密敕信執殿下。殿下意果無他。幸從臣歸命京師。卽有意。宜告臣。燕王見信稱臣。又意甚誠。側泣下。告信密謀。立召姚廣孝。朱能。張玉。定計奪九門。信遂從燕兵戰大寧。真定。鄭村。霸。還軍攻九門。營西克大同。轉戰夾河。薶城。渡淮。破盛庸兵。入金川門。陞都督僉事。太宗卽位。封隆平侯。食祿一千石。與世券伯。太宗時。時呼信爲恩張。凡召太子。北京。察藩王。勳靜諸密要事。皆命信。永樂二十年。征虜功。加少師。洪熙元年。與世侯。券。支。兩俸。子鏞自立功。爲指揮僉事。先卒。鏞子淳嗣官。正統七年。信卒。贈鄖國公。諡襄僖。淳以指揮僉事嗣侯。卒。子福嗣侯。無子。弟祐嗣侯。卒。無子。弟祿與塔爭嗣。下法司理。正德三年。祿嗣侯。卒。子偉優給。十二年。嗣侯。王通。陝成寧人。父真。開國功。爲燕山護衛百戶。從燕兵攻九門。戰永平。真定。功。陞都指揮使。建文四年。肥河戰沒。文皇卽位。贈金鄉侯。諡忠壯。進贈寧國公。通亦從燕兵有功。又以父故。封武義伯。食祿千二百石。與世券。永樂七年。作天壽山。十三年。進封成山侯。二十三年。與世券。又以父故。加祿。歲一千石。仁宗時。以真從祀太宗。宣德元年。充征夷將軍。總兵鎮交趾。未幾。通言交趾反。敕通勦賊。都督方政坐罪。隸麾下。立功。二年。斬僞司徒。利賊大懼。通怯不敢追。又爲奄山壽所窘。賊復聚寧橋。戰。通敗績。柳升兵又未至。通輒與利賊書。和許昇清化等州地。按察使楊時習以爲不可。力爭。通勵聲叱時習。比升兵至。隘留關。又大敗。升死。通遂與利賊盟。班師。陸行出廣西。山壽。陳智。由水道出欽州。凡文武吏士得還者。八萬六千六百四

十人利賊閉留不遣者尙數萬人。三年，廷臣劾通論當死，繫獄奪券，籍其家會赦宥死。爲民。正統元年，迪子琮，乞得祖塋葬通母。十四年，北狄南侵，廷薦通爲都督僉事，與楊善守京城禦敵功。陞都督同知，尋守山陵。景泰三年卒。琮爲景陵指揮僉事。天順元年，詔恩琮得嗣成山伯。卒。子庸，嗣伯。弘治十一年，乞券。孝宗念真從燕兵有功，又侑食太廟，出原券賜庸。卒。子洪嗣，吏部言通罪廢琮嗣伯，以詔恩庸時未許世嗣，執不許。洪嗣伯，上以洪祖真券故在。許洪嗣伯。

房寬，未詳何許人。洪武四年，以濟南左衛指揮，帥兵五千人，從魏國公達北平，練兵繕城，爲北平行都司。都指揮燕兵至大寧，守將朱鑑力戰，寬忽降。寬既降，鑑力不支，死之。建文二年，寬戰白溝河，敗，再戰有功。已而轉戰濟沛江淮，皆有功。歷陞督府僉事。太宗卽位，封思恩侯，食祿八百石。世指揮使。

史官曰：金忠布衣也，始燕終燕，而立朝建事，寬平有大臣之度，可爲名臣矣。獨是時上有共主，科目薦辟，並行不滯，亦可揭鬣天衢，播聲功業。乃走燕藩爲謀首，曾弗回首金陵，稍爲顧念，姦回之目，不能恕矣。顧成等，或作降鹵於戰，或驟倒戈於對壘，或獻密議於未形，或忘先志於開闢，咸北平之嘉績，而春秋之罪人，知董狐復起，無以貸也。

### 徐正傳

徐正，吳江人。業微，父爲人治刀筆詞訟，不齒。而正少美貌能文，人見輒詫恨曰：無天耶！徐氏生此兒，正舉進士，授給事中，侍英宗左右，上愛之，嘗撫慰曰：勉哉！將大用爾。然正小人，駮論沾沾無所以當上者。英宗



北狩還遜於南宮。正密疏曰：太上皇社稷罪人，今過奉非計，且下或借爲奇貨，宜有以處之。夫爲天下不顧家，陛下毋愛此名也。帝心難之，不用。又數載，正已遷大理少卿。英宗復辟，見正，勞曰：卿故侍吾給事耶？日召對，賜金帛酒食，而正亦且幸疏毀不發矣。會英宗一日坐便殿，旋風吹文書墮地，取覽，乃正疏也。怒甚，連發使召之，至則投疏令自拾，正魄奪，噤不能對。反接，凌遲於市，籍其家。

史官曰：徐正，佞小人，見事透徹，其於景帝謀之，其賊孚詩人之旨，不思勉哉！大用之恩，耶風落奏書，喪厥姿，令訟師之報，不亦宜乎？

劉吉萬安尹旻焦芳傳

劉吉，字祐之，博野人，性譎險，韋佞。登正統戊辰進士，選庶吉士，授編修。景泰初，侍經筵，預修寰宇通志，進修撰。天順中，侍東宮講讀，預輯一統志，進侍讀。成化改元，修英宗實錄成，陞侍讀學士，尋陟禮部侍郎。己丑，簡入內閣，兼學士。丁酉，進禮部尚書。戊戌，加太子少保，文淵閣大學士。庚子，遭父喪，詔責以羊酒寶鈔，令起服視事。吉三上疏辭，陰託貴戚萬喜爲援，得不允。編修陳音致書吉，勸其抗疏終制，不報。人遂無敢言者。吉每談笑對客，殊無戚容。尋修文華大訓成，加太子太保，武英殿大學士，給一品誥命。甲辰，改戶部尚書，護身殿大學士。丁未，秋，孝宗卽位，科道官交糾萬安、尹旻，以次罷去。吉獨不動，倚任尤專。慮科道有言者，乃傾身阿結，又建言欲超遷科道官，處以不次之位。會詔量才舉用，廢滯。吉特爲奏拔者，原任給事中賀欽、御史強珍輩十八人，部屬惟員外郎林俊一人。欽等皆名士，吏部已次第擬擢，而吉復爲此，欲以

媚衆。諸凡科道爲上所採納者。悉謂由己。以市恩。自是人無復有言之者。弘治戊申。進少傅。兼太子太師。吏部尙書。知經筵事。己酉二月春。不雨。詔儒臣撰文請禱。吉率同官上言。邇者姦徒襲李孜省。鄧常恩之故術。見月宿在畢。天將陰雨。遂奏請祈禱。幸而有中。以希進用。謹按詩云。月麗於畢。俾滂沱矣。書云。月之從星。則以風雨。今月宿在畢。雨降之徵也。臣恐倖門一開。爭言祈禱。啓釁召亂。實基於此。所以祝文臣等不敢奉命。庚戌星變。見吉又率同官上言。邇者妖星出天津。歷杵臼。近營寶。考之圖志。爲兵爲饑。爲水旱。矧今南海修垣。汝河修橋。俱非急務。宜停止。以答天戒。上嘉納之。未幾。風雹發自天壽山。毀瓦像物。震驚陵寢。有旨戒諭羣臣。修省。遣官祭告。時翰林侍讀張昇上疏言。應天之實。當以輔導之臣爲先。請明正吉罪。昇得罪。謫南工部員外郎。由是人目之爲繇花。以其耐彈也。吉聞之。大怒。或告以出自監中一老舉人善恢。諧者。吉遂奏舉人監生三赴會試。不第者不許再試。辛亥秋九月。上欲封張皇后弟伯爵。命吉撰誥。券。吉言必盡封周王二太后家子弟。乃可封。其意欲稽遲。以俟賄。上廉知而惡之。遣中官至其家。勒令致仕。吉去位。猶詔有司。月給米五石。歲撥人夫幾名。降敕護之還鄉。瀕行。京城人欄街指之曰。咲繇花去矣。既歸。踰年卒。六十七。贈太師。諡文穆。官其子皋爲太常少卿。

萬安。字循吉。眉州人。貌魁碩。眉目如刻畫。外寬內險。媚邪。盡正以干大位。登正統戊辰二甲第一名進士。選庶吉士。授編修。景泰壬申。以易儲。遷左春坊司直郎。尋轉右中允。改尙寶司丞。兼編修。天順戊寅。侍講兼學士。侍皇太孫講讀。成化改元。預修英宗實錄。陟少詹事兼學士。己丑春。遷禮部左侍郎。兼翰林院學

士入內閣預機務。先是有同年進士李泰，中官李永昌之猶子也。泰已累官少詹事兼侍講學士。安因深結泰。至是內閣員缺，議用泰。泰謂安曰：「子先爲之，我不患不至。」安遂被命在閣。惟以囑托貪賄爲事。聯萬貴妃爲同宗。時貴妃兄萬通亦授錦衣衛都指揮。通妻王氏出入掖庭。安陰陰家人給通妻往來布腹心。爲內援。壬辰春二月，以禮部左侍郎兼大學士掌會試事。未幾陟禮部尙書。加太子少保。改戶部尙書。兼文淵閣大學士。癸卯，皇太子出閣。時文華大訓成，命詹事彭華、左中允周經等以進講。東宮起立拱聽。安獻諛，以東宮不宜勞，謂講官宜立。疏請坐聽。華與經不從，竟得如禮。時妖僧繼曉幻吏李孜省皆以術得寵。孜省江西人，安緣其同鄉彭華浸密孜省，深相結納。黨援扶擠，遂百計引其附己者而退其不附者。一時詞臣若禮部侍郎邢讓、祭酒陳鑑、方正之士如王恕、馬文昇、耿裕、秦紘等相繼斥去。舉朝側目，無敢顯訟其過者。尋加少師兼太子太師。華蓋殿大學士。成化丁未，孝宗卽位。庶吉士鄒智與安同鄉，憤其所爲，率同館士吉人李文祥發其恃權怙寵之姦。御史湯鼎文、貴姜洪等交章糾劾。先是有倪進賢者，少無行而安與爲腹心，取爲庶吉士。擢御史，日與講房中之術。由是穢聲益彰。孝宗在東宮時，頗聞。至是於宮中檢獲疏一小篋，皆房中術。悉署曰「臣安進」。上遣懷恩攜至內閣，示之曰：「是豈大臣所爲乎？」安慚，漢不能出一語，亟欲斥去。上又命恩執諸臣奏章赴閣，示安。每展一卷，安卽跪泣乞哀，猶無去意。恩令摘其所懸牙牌，叱曰：「請出矣。」安始惶遽索馬歸第。初，安久戀內閣不退，人或微諷之，答曰：「惟一死報國耳。」及被出，在道猶看三台星，冀復用也。其無恥如此。尋卒。贈太師諡文康。其子翼爲南京禮部侍郎，孫弘璧爲編修，俱淫。

恣不檢卒無嗣。

尹晏字同仁。歷城人。小有識計。而心譎行詭。登正統戊辰進士。初選庶吉士。改刑科給事中。陞通政司參議。受命往陝西調度軍餉。天順壬午春三月。晏奏敵退河間。所調集軍馬衆盛。輸供已極。乞放還。從之。尋還京。明年癸未。進吏部右侍郎。成化己巳春。轉吏部左侍郎。九年癸巳春。陟吏部尙書。尋加太子太保。是時修山東志。囑載其居吏部有知人之鑒。所選吏皆稱職。因僞撰謠曰。公道不如王恕。選法不如尹晏。以自詡異實。當其掌天曹也。每各部司屬之賢能者。輒向人譽之。以表其知人。及至推舉。卻先科道官。而部屬中有出入中官之門者。亦先之。平日所稱揚者。又皆不與也。郎中陸容嘗論其事。若戶科給事中李孟暘。奉使山西。及其回過代州等處要地。皆武備不飭。暘至京。奏請設整理兵備副使一員。以專委任。兵部覆奏。制曰。可。及忝吏部。乃寢不行。後詰其故。以副使缺。例於刑部年深郎中內。以次陞補。時晏念一鄉人覬覦京職。不欲外。又欲越他陞。恐機泄。遂已。未幾。其覬覦者果擢大理寺丞。丁酉。立西廠。太監汪直用事。恣暴。時尙書項忠約諸堂上官疏汪過惡。晏不從。忠遂具草。詞意凱切。令郎中張瑛姚璧持詣各堂。上僉名。仍送藁於晏。俾收以自別。晏卽潛報汪。同朝薄之。晏子龍登進士。初授翰林編修。未幾。轉侍講。驕姪喪。檢士行不齒。晏自天順癸未爲吏部左右侍郎。尋陞尙書。後累進太子太傅。二十有四年。素與萬安不協。安亟欲去之。每語所親厚者曰。言官有能劾同仁者。勿憂無大官做也。會內閣劉珝與晏俱山東人。最厚善。安欲陷晏。爲珝所梗。不得行。成化四年。珝去位。安遂結李孜省譖晏於上。因嗾言官劾晏。從其子龍招。

權納賄私其鄉人朝廷逮龍下詔獄命三法司錦衣衛廷鞠之遂黜龍爲民晏落太子太傅令致仕及其鄉里故舊以蚤緣進者皆降調外補云後晏居家朝士猶有上章乞籍其家之半以賑山東饑者其不協士大夫之心如此弘治十六年卒贈太保諡恭簡

焦芳字孟陽泌陽人性險愎登天順甲申進士選庶吉士授編修轉侍講進侍講學士嘗坐事謫湖廣桂陽州同知歷霍州知州陞四川提學副使調湖廣副使因上疏自治陞南京右通政以憂去起仍爲通政再以憂去起爲太常少卿兼侍講學士擢禮部侍郎改吏部侍郎正德改元吏部尙書馬文升去位時司禮監太監李榮與芳同鄉因爲內援遂以芳代尙書是冬十一月以尙書兼武英殿大學士入閣辦事甚妨部務尋加太子太保兼謹身殿大學士專在內閣是時正人斥逐羣邪彙征逆瑾專寵芳結爲黨遂援兵部尙書劉宇爲吏尙而以曹元爲兵部尙書從其類也已已焦以老病致仕以宇兼文淵閣大學士入閣預機務明年春又以元兼文淵閣大學士芳始比尹晏父子尹坐敗謫及爲吏部尙書時值逆瑾亂政號八黨大學士劉健會同戶尙書韓文率百僚伏闕固爭將除之芳潛於瑾預爲之所由是劉健謝邊韓文楊守隨等相繼斥罷黨勢益熾遂以芳入閣表裏爲姦凡變紊成憲桎梏臣工杜塞言路酷虐軍民皆芳導之姦邪如曹元劉宇媚竈續貂成漏政本芳爲之援暨充孝宗實錄總裁官筆削任意凡先正名卿悉肆醜詆授意檢討段昊以快其忿初在吏部時郎中張綏與瑾同鄉芳力薦之驟至冢宰賣官鬻爵名器壞溢其子黃中尤狂誕恣睢方廷試畢芳欲取魁選旣而衆論取呂棨爲第一芳謂諸執事抑之遂入

言於瑾改編修顧清等二十餘人爲部屬官。授子黃中爲檢討。劉宇之子仁等六七人俱庶吉士。黃中尋陞編修。踰年轉侍講。時土官岑濬沒入家口。有妹色殊甚。芳聞求瑾得之。後臥病。黃中聚麀。人咸鄙之。瑾伏誅。言官交劾其罪。父子皆褫職爲民。中原盜起。有趙鏗者入泌陽。芳僅以身免。盡發其先世塚墓。無遺骸。取芳衣冠被庭樹。歷數其惡。命劍士櫛之曰。使吾手誅此賊以謝天下。

史官曰。回孺乘權。則橫播吞噬。譬彼豺虎。性秉凶殘。不必櫻牙羅蹄行人。何虞每遭伏攫也。豺虎窟嚙。帆蔽叢翳。伺覺而發。無所顧忌。所由然矣。姦臣淫猾狼戾。必且援引羣陰。擠排善類。奧結婦寺。外張餽毒。快心於正人之沈淪。借端於天子之威福。善則歸己。惡則歸君。及至身死名墮。遺臭漢青。悲夫。劉吉城府深密。左右多讒。斥害剛方。惡聞其過。而且奪服。忍於親重。賄忘其君。此綱常之大蠹。而孔孟之必誅也。至晚年一疏。豈所謂分香賣履。而欲以掩其生平也。萬安儂薄陰賊。寡廉鮮恥。以進房中爲媒。榮之階。用家人爲梯。援之計。潛通宮掖。伏異黨同跡。其生平無善可稱。尹旻挑釁詭譎。陰譎刻深。鄭曉謂其選法通敏。賢愚皆悅。豈惇史哉。焦芳肆姦實錄。又不止詆誣一時。欲以穢蠱千古文章。自矜鷲其鴟叫。若趙鏗者真可謂奇男子哉。蓋天之假手於鏗。而殲厥先幣耳。撫册及此。白日爲昏矣。

### 王瓊傳

王瓊字德華。太原人。登成化甲辰進士。心雖不甚樸而饒才智。初授工部主事。累官至戶部右侍郎。正德八年夏六月。代孫交爲尙書。先是正德六七年間。流賊猖獗。北畿輔山東之民苦焚掠。屬歲登。賴不告饑。



惟河間一府病水荒。交李東陽奏罷山東直隸等處京邊糧草數百餘萬。以故京師歲用不繼。轉借太倉。時遣戶部侍郎楊澤督發太倉庫銀二百萬兩往各州縣和買糧草。至是瓊代屬賦已平。因追駁其和買滋弊。如下令凡官軍捕賊經過州縣驗勘。合供給口糧草料。准其稅不足。官爲措處。事畢處補爲簡便。且謂交約愛民而不知所以處。東陽徒負文學之名。使當流賊內擾之時。設有邊方重警。東陽輩將束手無策。又曰。繼孫後使無句考之法。完惟正之供。而申明鹽法以助之。則邊兵缺食。必生餓殍矣。遂奏查餘剩料豆。令補給所坐軍糧。餘草數千萬束。多朽腐不堪用。令減價變賣。得銀二十六萬兩。以補宣府軍餉。人以是多瓊之智計。正德乙亥夏四月。調兵部尙書代陸完。時朱甯有寵用事。瓊與甯善。會有旨召彭澤還兵部。瓊仍本部。瓊因執初御史馮時雍之奏。乞留澤甘肅。候寫亦虎仙等回處。置停留還京。不聽。丙子。土魯番寇甘肅。瓊請敕切責都御史李昆等。已而差給事中黃成御史趙春往勘。回奏。昆等有功無過。瓊遂摭澤昆前後欺罔事跡。奏勅其擅命遣使納幣土魯番。復許增添失信。致啓邊釁。下法司議。時各部大臣及言官皆以澤有平賊功。戶部尙書石玠禮部毛澄亦以爲大夫出使於外。苟有利於國家。專之可也。奏入。朱寧因有憾於澤。內批落澤職爲民。初澤忿朱寧專。常對人發憤。瓊以語寧。恐不信也。一日瓊伺澤過其家。先匿寧屏後。瓊以言激澤。澤果大怒。詈寧。自是深憾澤。欲斥之。先是大學士楊廷和毛澄蔣冕俱欲庇澤。令兵部再勘。瓊復曰。納幣邊庭。失信夷人。致貽後患。利乎。不利乎。事須勘明。更勘何事。澤罷。廷和亦憾之。正德辛巳。世宗卽位。廷和請捕殺寫亦虎仙。遂令法司欲坐瓊以句引姦夷。瓊繫獄。已而勘無干。

涉釋之尋轉兵部尚書鎮守三邊嘉靖己丑南給事邱九仞劾其先朝遺姦表裏閹宦外交逆藩計斥忠良壞盡祖宗之制難逃亂賊之刑竊恐斯人難付重寄已而吏科給事中夏言疏亟除姦邪大臣謂瓊賦性姦兇宅心險賊內給嬖倖外附錢寧旬引姦夷擠排言路請重加竄斥以爲大臣阿附權姦者之戒遂致仕後哈密議起侍郎桂萼疏請明功臣發壘蔽謂嘉靖三年五月陝西以處決各夷火者八月遂有甘肅之變當時哈密深入以殺降爲詞實爲訴冤之舉故初不擄掠而誤事之人陳某等謬云志不在小以欺皇上皇上爲之震動當時大臣反議大發師以騙之令不得訟其冤遂使西北一邊生靈塗炭天下五尺童子所共知也科道曾無一人爲皇上言者歷訪乃知以楊廷和欲致王瓊之罪故耳乞特起王瓊以絕此弊臣初上此奏卽謀於大學士楊一清曰一時六部及在外耆舊無可比王瓊者一清曰論其才一時誠不能及但其心術姦險衆不肯信臣曰馭得其道天下狙詐咸作役使況今聖天子在上用之於久廢之餘必當深思所以報皇上者一清曰雖然子姑存此議在天下可也人言且誣瓊曰宸濠之反王瓊實受其賄今考當時舉朝大臣各懷二心不肯動心而倡言兵討者獨一瓊耳言官反誣爲受賄不已冤乎卽如大學士楊一清方皇上起用之初人言亦何所不至今旣立朝當時言者亦復紛紛否乎此皇上所親見也乞留神裁察誠不特爲瓊一人承一時之乏而已不起以卒

史官曰王瓊才具擅美設施焜燿往往謀事有條而存心險僻舉動乖張夏言一疏殆刺骨之談矣人臣能秉志公忠卽無才可稱不失平流若瓊者所謂自敗其姦者也

著者(清)傅維麟編纂 書碼 626·01  
Author Call No 7567  
書名 明書 一百七十一卷：十一  
Title

登錄號碼 007891  
Accession No.

月日 Date	借閱者 Borrower's Name	月日 Date	借閱者 Borrower's Name

國立中央圖書館

626·01  
書碼 7567 登錄號碼 007891

國家圖書館



000007891

